

77

F

88

7

1-D

50

K $\frac{3}{6}$ 

Bibliotheca
 i Coll. Rom.
 societ. Jesu

7.1.D.50

~~77-F-84~~

77.2.77

77
~~77~~
 80



Handwritten text, possibly a signature or name, appearing as a series of dark, connected strokes.

JOANNIS

BAPTISTÆ

VERI

CANONICI PATAVINI

RERUM

VENETARUM

LIBRI SEX.

QUINTA IMPRESSIO.




*Biblio. Sec.
Coll. Rom. Soc. Jesu.*

PATAVII, M.DC.XCII.

TYPI SEMINARI.

Superiorum Permissu.



LECTORI

BENEVOLO



Versatur hujus Operis argumentum in armis: sed Venetæ Gentis recenset bella, quæ ab origine ejus præclarissimæ Urbis ad hæc usque tempora Religionis, ac Justitiæ causa suscepta sunt, & gesta. Cum molestis vicinis primùm, inquietisque populis; deinde sacris in expeditionibus cum perfidis, & immanibus, Verùm si aliquando cum ejusdem fidei Principibus, ne tum quidem injustè, aut temerè; sed ad propria tuenda, ad repetenda ablata, ad servanda fœdera, curandam concórdiam, submovendaque odia, dimicatum est.

Res priscas præ antiquitate, & concordie scriptorum testimonio, obtrektationis vitium supergressas sincero sermone, ut sua tulerunt tempora, in compendium arctavit. In novissimis, & maximè ad Cretam gesto bello omnem operam posuit, ut in his (quorum inter vivos varia fides, pretium maneat veritati) suæ scriptionis constantiam non mutaret. Eidem placuit peracta à Venetis facinora memorabilia, atque in utraque

* 2 que

que fortuna præclara virtutis edita ex
perimenta calamo conscribere, gladi
veluti, criminis vacuo, puro, & in
nocenti, procul ab odio, adulatione, &
amore, contra quos animi affectus, scri
ptori non minùs, quàm militi, periculo
sè pugnatur. Brevitas illi non erit im
putanda, sed laudanda, quæ moras
rumpens intempestivas, nihil subtrahit
cognitioni eorum, ex quibus virtutum
documenta inde promentes, aut histo
riarum diversitate, aut magnitudine
obruantur. Hoc itaque, Amice Lector,
contractum Venetarum rerum Opus no
li contracto supercilio, sed exporrecta
fronte suscipere, conceptum, editumque
ab Auctore, qui sacrae mancipatus mi
litiæ profitetur se nihil aut pietati, aut
honori suæ Patriæ citra fidem dedisse.
Vale.



AD REVERENDISS. VIRUM D. D.

J. O. BAPTISTAM
VERUM

Cathedralis Ecclesiæ Patavinæ
CANONICUM,

Ob recens vulgatam Historiam
DE REBUS VENETIS.

VERE, tuos relegens libros stupet orbis, & heret;
An majus spargas lumen, an accipias.
Scilicet Heroùm Venetum dum grandia gesta.
Splendore historiæ tollis ad astra tuæ.
Heroes Veneti proprio splendore vicissim,
Tollunt Historici nomen ad astra sui.

CAR. PATINUS.

REs Venetas docto sic, VERE, volumine pandis,
Ut sit Adriaca primus in historia.

Idem.

REs Venetas VERUS terna vice pandere pergit,
Ut ternas Charites composuisse putes.

Gabr. Car. Patina.



P R O
HISTORIA
V E N E T A
CLARISSIMI VIRI
J O A N N I S
B A P T I S T Æ
V E R I
E P I G R A M M A.

A Driaci Proceres, immortalisque Senatus,
Et semper Domino tradita jura Mari
Rebus compositis pax aurea: ferreus ardor
Armorum, Fani cum patuere fores:
Argumentum ingens; sed VERUS scriptor,
abesto
Jam procul à tanto livida blatta Libro.
Quod Venetus fecit, quod dixit Verus, utrumq;
Et fieri, & dici non potuit melius.

Josephi Carlotti C. P.

AD

AD VIRUM LECTISSIMUM
IO. BAPTISTAM
VERUM
CANONICUM
PATAVINUM
HISTORIAM
VENETAM

Concinna brevitare edentem.



EPIGRAMMA.

Jam res Romanas, memorandaque facta,
Quiritum
Scripserat Euganei dextra diserta soli.
Has Florus breuiter viridantem astrinxit in
hortum,
Immensum ut parua sede maneret opus.
Res Venetas simili memorare Sabellicus ausu
Aggressus, Venetis Livius alter erat.
Has Verus Flori feliciter æmulus orbi
Exhibet, astricto cuncta redacta stylo.
Jam laus amborum, reliquique æquentur ho-
nores:
Verius at Vero scribere nemo potest.

Henricus Sonesius.

S E B A S T I A N U S
B A L D I N U S

Precatur longiorem vitam

CELEBERRIMO VIRO

JOANNI BAPTISTÆ
V E R O

Octogenario Canonico Patavino , de
Veneta Republica optimè meritò

Ob historias Rerum Venetarum summa
latini sermonis puritate descriptas,
& typis mandatas .

A D P A R C A M
O D E .

Dicata Illustriss. ac Reverendiss. D.

ANTONIO PAULUTIO
V E N E T O ,
S. ROTÆ AUDITORI.

D *Ic, cur retorti pensitans lini glomum
Coli laborem supputas?
Cum, Parca, stringis forficum chalybem manu,
Et vulnerantis in modum*

Su-

Subito furoris impetu te percitam
Cui comminaris stamini?
Quid? ah cruenta! comprime ictus, ictibus
VERI petis tu verticem?
Averte ferrum: VERUS in dies trahat
Momenta vitæ glurimos:
Ætatis ultimæ ruina si premit
Multis gravem lustris Senem;
Arctis rotanda nocte fila vinculis,
Novoque pensa fer colo.
Quin Phryxus afferat, vel Arietis virens
Ducenda in ævum vellera:
Staminibus his desueta volvere temporis
Alabra debes, Atropos;
Cadaveribus aurata, qui calamo parat
Scribente Famæ sæcula,
Et ossa campis, & sepulta fluctibus
Qui ducit ad solis iubar,
Kivacis annos dignus hic prætergredi
Phænicis, hic, hic occidet?
Heu non: sepulchro dedecet condi sophum
Omni rogo superstitem.
Typis remissa scilicet volumina
Testantur Auctoris decus,
Testantur undæ præpotentis Hadriæ,
Clasæque bellis impigræ;
Totque Venetorum bellicosa Principum
Elata virtus comprobat;
Et tot triumphi, tot trophæa Civium
Stylo notata candido.
Si fama tanti vincet illustris Viri
Functum ter ævo Nestorem,
L. vincat ætatem. Caput, quod albicat,
Nigris refulgeat comis:
Primæva per genas Juventus floreat,
Venisque bulliat cruor;
Quando opus ahæno, vana si res non foret,
Veneficæ esset Colchidis,

Eme-

*Emeritum, iniqua, cadere hoc flamen? Scelus
 Inexpiandum cogitas.*
*Crines ab Aurora suos pete, & suos
 A Sole, cum quibus neas,
 Remotiores proferens quos limites
 Natura cunctis contrahit.*
*Andisne? Ab Axe detonat lævo Polus
 Omen triumphet consonum.*
*O vivat ille, dum Duces, & milites
 Jubet sepultos surgere;*
*Es Urbis, omnis regna quæ frenat maris,
 Præconium dum concinit.*
*Ad te recurris Musa, cogere qui potes,
 Tres hæc Noctis filias,
 Plutone diras qui vales stupido Regis
 Lenire pænas barbito.*
*Si vertis, ANTONI, Sacram legum Rotam
 Equam tueris si Themis,*
*Tu vocis huic præfagio nostræ faue,
 Tu vota mecum concipe.*
*Sic eloquenti ab ore diffusas preces
 Ratas fovebit Juppiter.*



AD DOMINUM

SEBASTIANUM

BALDINUM

POETAM EXIMIUM

DE ODE ERUDITISSIMA,

Quam scripsit pro longiori vita

CELEBERRIMI VIRI

D. JO. BAPTISTÆ

VERI,

Octogenarii Canonici Patavini,

RERUM VENETARUM

SCRIPTORIS

AD PARCAM

EPIGRAMMA.

T*Rejictus Vates ita Carmine lenit Orcum,
Olli ut reddideris Rex Erebi Euridicen.
Nil dubitem tetras quin flexeris ipse sorores,
Ut Vero discat par. ere Parca tuo
Adde, quod æternum, quem feceris ipse canendo;
Vivet, & invitas videris inde Deas.
Ergo felices his vivite versibus ambo;
Quæ canis, ut prohibet tantus Apollo mori.*

Joannis Baptistæ Ugolini.

I N

I N
L A U D E M
REVERENDISS. DOMINI
JOANNIS BAPTISTÆ
V E R I
E P I G R A M M A.

O Mirum? Venetus cunabula prima Senatus
Dicitur in toto consolidasse mari.
Postea crescentes in fluctibus Urbis honores
Hellepontiacis constituisse vadis.
Urbs, quæ tot palmas potuit numerare, quot undas;
Et belli, & pacis quanta trophæa notas!
Sæpius excitas compressit ad arma cohortes,
Quæ subito patrum Marte tulere jugum.
Thracius attonito non palluit undique Ponto
Bosphorus, has vidit quanto tonare rates?
Et Pyratarum quoties audacia lauri
Aspersit ramos sanguine pressa suo?
Quæ plaga, quod Pelagus, quæ climata, quæque per
Orbem
Littora plaudenti non sonuere tuba?
Sed de tot gestis Venetorum, deque triumphis
Si tu, V E R E, canis, vera peracta canis.
O quibus eloquiis Classis metuenda refulget!
O quibus elogiis strenua Castra micant!
Fama suas pennas, & docta Minerva papyros;
Et tibi aramentum gemma liquata dedit.
Erigis in chartis Venetæ Capitolia famæ,
Construis & calamo digna Theatra tuo.

JOAN.

JOANNIS BAPTISTÆ^r
V E R I
CANONICI PATAVINI
RERUM VENETARUM

LIBER PRIMUS



I ulli populo unquam visum est
licere suam ad Deos originem
referre, Veneto maximè jus
est; neque enim, nisi Deum
in aquis tantæ molis, ac tanti
miraculi auctorem existimare ab eventu
putandum: ac Deo conditori, quo qui-
dem nomine nemo alius mortalium gloria-
ri potest; stupenda suis primordiis augu-
stissimæ Urbis incrementa, atque in hunc
usque diem sapientissimæ Reipublicæ ad-
ministratio humanæ varietatis expers re-
spondent. Etenim grata Civitas à Numi-
nis cultu sub ipsum initium, & à religio-
ne natalem, annalesque suos auspicata est:
nempè à dedicatione Templi, quod, in-
cendio repentè sedato, dicatum Divo Ja-
cobo extruxit, post Christum natum,
ccccxxj. mense Martio. Prima Urbis ad-
ministratio neque Regia, neque Consula-
ris. Unicum, aut ex-fingulari duplex
imperium olim in tyrannidem abiit. Qua

A de

de causa prudens Resp. suum libertatis decus plurimum dominio fascibus integrum tutari voluit. Singulis namque in insulis singuli creabantur Tribuni, penes quos summa vitæ, necisque erat auctoritas. Annuum placuit esse hunc magistratum, decretumque, ut, si quid gravius accideret, conventus omnium indiceretur in aliam, atque aliam insularum, ne in una continuata dignitas invidiam pareret, atque imperii jus collocare videretur. Verum quia tantæ Reip. initia, leges, acta claris scriptoribus memorata sunt: nos paucis perstringemus, & quas ipsa domi contentiones, & studia habuit: & quæ foris bella à primis ad hæc usque nostra tempora confecit.

Res gestæ sub Tribunis.

A. C. DXXXVI.

Venetum nomen propagari cœpit iis artibus, quibus deinceps semper Majores nostri studuere, nempe maritimis: nam in mari fundata Urbs à mari: aut injuriam timere, aut illatam vindicare debuerat. Anno quingentesimo trigésimo sexto Justinianus Imperator Amalasinthæ Reginæ necem ulturus in Gothos bellum suscipit, duce Belisario. Hic adversus Vitigen ejus gentis Regem Romam strenuè defendit, cæloque exercitu, reliquum

quum hostem Ravennam usque propellit , quò insēcutus fugientem , cūm urbis munitionibus tutum expugnari posse diffideret , ad deditionem fame compellere meditatur . Sed quia deerant naves , quibus à mari , & à fluminibus prohiberentur transpadanæ Gothorum urbes , ne com-
meatum obsessio Regi deferrent , petit Belisarius à Venetis , ut , iis comparatis , atque instructis , natum penè cum ipsa Rep. Græcorum imperium tuerentur . Præsto
fuere , nihilque duxerunt illustrius , quàm pro amico Principe arma primùm capessere . Naves ergo alias adversò Pado traducunt , ac Ticino Ravennam aliquid inveheretur : alias in fluminis ostio sistunt , ne quid à vicino mari in obsessum oppidum ,
comportari posset . Hæc inter hostica classis , Vitige per extrema omnia opem sollicitante , Ticino delata secundo amne in Venetam irrupit solidè instructam . Repulsi , fractique Barbari , Veneto ex navibus acriter , nec minùs ab utraque Padi ripa Belisarii milite dimicante , post desperatam salutem sese cum tota classe
dedidere Imperatorio duci , penes quem belli fructus , apud Venetos summa laus fuit . Hac una victoria occupata Ravenna , & captus Vitiges . Anno post hanc pugnam quintodecimo , Totilas Italiæ Regnum adeptus cum altero Justiniani exercitus ductore Narsete infelici exitu confli-

xit . Primum victoriarum omen pro Græcis apud Anconam maritimam urbem illuxit, Venetis Navali prælio decertantibus . Hi compluribus rostratis ad liberandum obsidione oppidum navigantes , cùm in Gothicas triremes & numero , & robore validiores incidissent , iniquos apparatus æqua virtute tolerarunt ; utriusque igitur infestis proris concurrentibus , dubio Marte aliquandiù pugnatum est : tandem, procedente prælio , quo Veneti clarum militiæ specimen edidere , Totilæ classis profligatur .

Ducum Origo.
DCXCVII.

CÆterùm Tribunitia potestas , quæ ducentos annos duraverat , sub hoc tempus novo Magistratu inducto, in hunc modum excidit . Cœperant finitimorum armis Reipublicæ fines turbari , vixque intra ipsas insulas, Tribunorum incuria , atque inertia, Veneti tutos se credebant , sæpiùs à proximis populis piraticam exercèntibus vexabantur . Hi Gradum , & Heracleam continentis oppida populati , noctu in Rivoaltum descendunt , ibidemque aliquot deprædantur onerarias . Navium custodes à Tribunis tum negligentius suo munere fungentibus in excubiis dispositi , non priùs latrones repulerunt , quàm

LIBER PRIMUS.

5

quàm incondito clamore universam Civitatem perturbassent. Re cognita, sit undique ad naves concursus, fuganturque tumultuaria decertatione piratæ; non paucis tamen Venetorum aut occisis, aut vulneratis. Insolita clades adeò omnium animos perculit, ut, quasi violata urbis esset securitas, & libertas, Tribunis abrogatis, unius Principis novus induceretur Magistratus, nomine Ducis: quo pacto prudenter constitutum, ut in eo, quod titulo rectius, & augustius est, apud unum, unius nomen, & majestas supra cæteros insignis esset: &, quod pro libertate singulorum tutius apud plures, administratio, & imperium pluribus, iisque Patritiis, committerentur. Anno servati orbis sexcentesimo nonagesimo septimo, urbis verò conditæ ducentesimo septuagesimo sexto, primus omnium recentis dignitatis splendore Paolucius Anafestus insignitur, vir præ aliis conspicuus. Anafesto Marcellus Heracleanus successit: hunc excepit Horleus Ursus, qui ab instituta Ducis dignitate cum trigessimus nondum annus præteriisset, facinorosa seditiosorum manu opprimitur. Tanta rei novitate perturbata Resp. alteram publicæ administrationis formam reperit, & pro Ducibus Magistros militum sibi creavit, quorum munus annuum. Attamen & his post sextum annum sublati, cum se superbè,

atque insolenter gererent, ad Duces reditum est. His primùm Heraclea urbs: deinde Methamaucum imperii sedes fuit: postremò Rivoaltus. Cæterùm si Reip. benè constitutæ salus, dignitas, ornamenta, & securitas firmanantur legibus: his Veneta tam sanctis semper usâ est, ut non mirum, si per tot jam ætates primam illam & religionem, & nunquam interruptam libertatem pari fortuna, studioque ad nostra usque sæcula conservatam conservatura deinceps sit: nam cujus origini Deum affuisse compertum est: nunquam ei humanam virtutem, & sapientiam crediderim defuturam.

*Prima Venetorum Ducum expeditio
ad Ravennam.
DCCXXV.*

HOrleus Ursus ita quotidianis laboribus, rebusque navalibus Venetam juventutem exercuit, ut ea, quæ tum temporis quasi adhuc metu proprii exitii collecta multitudo in insulis veluti delitescibat, apud exteros demùm clarior innotuerit. Hinc primùm sub tanto Duce Venetæ genti peperit decus Ravenna recepta. Parebat ea urbs Græcis Imperatoribus, quibus Veneti favebant publicæ augendæ rei studio. Civilium per ea tempora discordiarum fluctibus agitatam facile
se

~~se~~ oppressurum, ut agnovit Luithprandus Longobardorum Rex, cum exercitu Ildeprandum nepotem transmisit, qui brevi urbem non tam bellicis oppugnatam operibus, quàm intestinis dissidiis proditam, occupavit, fugato Exarcho. Is ad Venetam fidem confugit, Gregorio II. Romano Pontifice ad Rempublicam litteris flagitante. Missum igitur instructissimæ classis auxilium octuaginta triremium. Sed ut hostes nihil minùs metuentes faciliùs pellerentur, Horleus, ficto repudiati Exarchi titulo, evulgatoque suo in Orientem apparatu, noctu Ravennam enavigat. Ita, ubi primùm illuxit, propè urbis mœnia, applicuit, jactis, quæ opus, pontibus, & per muros maturato usu scalarum jubet suos in incautos descendere, uno, eodemque tempore, quo Exarchus, dato signo, cum terrestribus copiis, quas tumultuario delectu in Æmilia comparaverat, urbem clamore maximo, impetuque aggreditur. Exciti re inopinata Longobardi, Venetum jam incubantem faucibus nec repellere, nec sustinere potuerunt. Ildeprandus somno adhuc obrutus, improviloque tumultu perterrefactus, cum neque consilii quidquam, neque virium, occiso Peredæo duce, ampliùs haberet, in Ursi potestatem devenit. Sic Ravenna Longobardico jugo erepta Græcis restituitur: atque inde Venetum nomen illustrius redditum,

ac in finitimos postea acrius, vehementiusque insurrexit.

*Bellum inter Heraclianos, &
Æquillos.*

DCCXXXVII.

Bellum hoc civile crescentis Reipublicæ statum aliquandiù turbavit. De finibus in multos annos protracta controversia inter Heraclianos, & Æquillos: nunc assidue, & sine intermissione toto biennio infestius repetita est, sæpius anticipati eventu, certa demùm utriusque gentis calamitate, & vastatione ambarum urbium, quæ ad Anaxi ostia sitæ erant. Præsentium discordiarum Ursus auctor habitus, dùm Heraclianis nimium studere creditur, adversæ partis odium incurrit; quare post multas hinc inde illatas, acceptasque clades à tumultuante populo interficitur, mutata in Principem fide vel metu, vel necessitate.

*Conjuratio Gallæ in Theodatum
Principem.*
DCCLVI.

Theodatus Ursi Principis filius, ac publicæ dignitatis hæres, ut partes expleret optimi Ducis, cujus in primis est tueri suos, ne unquam externis pateant

aggressionibus, Brundulum castrum, quod imminet ostio Athesis, quâ in mare influit, firma arce muniendum, latisque vallandum aggeribus curavit: profectus & ipse in eum locum, ut opus præsentia acceleraret. Hanc nactus occasionem Methamaucenus quidam Galla nomine tyrannidis suspicionem in Principem apud cives concitavit. Ea injecta vulgo, creditaque, cum nimia suspecti sceleris indignitate omnium animi angerentur, facta conspiratione ad arma concursus est, ac Theodatus ex improvise interceptus congressu iniquioris aliquantò pugnae, fortisque, dum parati imparatos invadunt, fuga etiam sibi consulentibus, qui circa Ducem versabantur: in quem exinde Galla sceleratas manus injecit, ac dignitate, nec non & oculis orbatum procul à patrio solo relegavit. Restitutæ quasi libertatis vindici Gallæ summus Reip. honor deferretur: sed cum partem scelere potestatem, per scelus exerceret, ea altero anno exuitur, effossisque luminibus justas sui flagitii pœnas persolvit.

In Longobardos expeditio.
DCCLXXIII.

ADversus Longobardos Carolus Gallorum Rex ob res præclarè gestas Magnus cognomine, prosperè dimicavit.

A 5 Eos

Eos populos ducentis ante annis ad invadendam Italiam è Scandinavia Oceani Aquilonaris peninsula exciverat Gothorum terror, exitiumque Narſes, maſculæ prorsus virtutis miles, qui non minùs ſagaciter, quàm verè Imperatrici ſe adpenſum revocanti, Ordiam, inquit, telam, quam nec ipſa tu, nec maritus facilè retexet. Poſtremus Longobardorum Rex Deſiderius, quamvis exutus viribus, armisque Gallicis Ticini obſideretur, haud tamen recuperandi Regni ſpem abjecerat, qui aperto anſe ſat commodè bellum trahebat. Quamobrem, ut urbs cum hoſte citiùs caperetur, Venetorum auxilia ſolicitari cœpta. Hi, Romano Antifſtite, Regeque Gallo ſic precantibus, XXV. armatis navibus in Padum, Ticinumque trajecti, omni auxilio incluſum hoſtem ſpoliant; eundemque ſequenti anno victum, capto oppido, in Galliam Carolus abducit. Ex hac decora expeditione Veneti ab Adriano Pontifice ingrati animi monumentum obtinent, ut Epiſcopali dignitate Rivoaltus nobilitaretur, quam olim Gradientium propriam demùm in Patriarchalem commutavit Nicolaus Quintus ſexcentefimo, ac ſeptuageſimo ſeptimo poſt anno, idque muneris, honorisque Laurentio Juſtiniano ſanctiſſimo viro primùm obtigit.

Civiles Venetorum tumultus.

DCCCII.

MAuritus Galbajus Princeps, ita sibi in Reip. administratione publicum amorem conciliarat, ut filium obtineret dignitatis consortem, & successorem, pernicioso quamvis ad posteros exemplo, quod annis CC. circiter, ac LX. usque ad Principatum Dominici Flabanici invaluit: nam tùm mos ille cooptandi in gubernanda Rep. socii, successorisque sublatu est. Mortuo Galbajo Joannes filius Mauritium ex se natum in imperio collegam ascivit. Sed ut primùm juvenis mores se detexere, Venetos concessæ potestatis pœnituit. Nulla erant scelera, quæ liberæ genti invisa non committeret. Hæc Pater dissimulatione alebat: quare eò usque progressum, ut ex sese Mauritius omnia tam humana, quàm divina administraret. Ea propter Joannes Patriarcha Gradenfis amicitia jure crebrius admonuit, ne pergerent tantis criminibus se fœdare: scirentque, libero populo imperare sibi datum. Verùm degenerant Principes in tyrannos, quando justæ admonitionis sensum excutiunt. Illi pium censorem ægrè ferentes Gradum paratis bello navibus clam provehuntur, Patriarcham fraudis ignarum capiunt, cellaque turri præ-

eipitant, exprobrantes ei, quòd Principibus
 oblatrasset. Infandum parricidium Vene-
 tus aut ferro, aut igne expiandum con-
 clamat. At interim popularem impetum
 compescuit delata Patriarchalis dignitas
 Fortunato demortui nepoti. Is nihilomi-
 nus commissi à Ducibus sceleris vindictam
 reposcens, conjuncto sibi Obelerio Me-
 thamauceno, ad Carolum Magnum in
 Galliam proficisci meditabatur, ut regia-
 arma adversus Duces excitaret. De hoc
 illi moniti consilio Gradum rursus perrexe-
 runt. Fortunatus arrepta fuga maturavit
 in Galliam: Obelerius cùm in Tarvisinum
 agrum recessisset, ab exulibus Venetis, &
 Ducum hostibus Reip. Princeps declara-
 tur, validaque agrestium manu adjunctus,
 Methamaucum oppugnatum venit. Joa-
 nes, & Mauritius à suis destituti, cum
 se armato hosti opponere non possent, su-
 bito effugio Mantuam petiere. Victori
 Obelerio publica administratio confirma-
 tur, datusque socius frater, cui Beato
 nomen. Interim, quia de revocandis in
 urbem, & imperium Ducibus compertum
 est studere Heracleanos, Obelerius Æqui-
 liorum auxiliis subnixus impigrè obstitit:
 nec manu minùs, quàm lingua promptus,
 ut Joanni, & Mauritio spem omnem in
 patriam redeundi eximeret, suis persua-
 sit, non priùs à civilibus discordiis cessa-
 tum iri, quàm ipsa una Heracleanorum
 urbs

urbs funditus deleteretur : ita commisit utrumque populum , qui in diversâ distractus continuis dissidiis , præliisque se eò usque laceravit , donec mutua clade cives , mutuoque excidio civitates ambæ conciderint . Ex eo tempore Methamaucum , & Rivoaltus insulæ habitatoribus auctæ . Cæterum exacti Duces patria , & honoribus spoliati , Nicephorum Græcum Imperatorem adiere imploratum subsidia , quibus ad suos reducerentur . Quam ob causam Fortunatus , & Obelerius veriti , ne impetrata ope pellerentur . Pipini Italiæ Regis arma in Græcos rebellium auxiliarios fautores sollicitarunt . Attamen diversum sortita est eventum Gallica expeditio , dum sanior Veneti populi pars , Angelo Baduario consulente , in eam sententiam coiret , non esse cum Nicephoro fœdera violanda . Hinc Obelerius , ac Beatus , qui contrà obstinatissimè nitebantur , popularem tumultum ut declinarent , exules urbe discesserunt , ac in patriam concitavere Pipinum . Nec multò post divisum Orbem constat inter Carolum Magnum , Pipini patrem , & Nicephorum , ea lege , ut alter Orientis , alter Occidentis Augustus diceretur : & medius inter dno Imperia , veluti utriusque terminus , Veneta Respublica staret , tertium veluti Numen , nullique obnoxia majestas .

Bellum Gallicum cum Pipino.
DCCCIX.

Cum Pipino Italiæ Rege declarato bellum gessere Majores nostri, non tam hostium strage funestum, quàm suæ virtutis experimentis præclarum: atque tum primùm pro libertate deprompta fuerunt arma: maximèque hoc bellum curam Reip. sollicitam habuit. Populus enim in se, vicinosque satis pollens, utrùm in procurentis imperii Gallici impetum, ac in omnem partem valeret, non sine trepidatione dubitatum. Ea certè belli contentio fuit, ut in experimentum illata fato putaretur; an scilicet Veneta virtus imperium stabile contra omnes, ac æternum, quaquaversum habitura foret. Re vera Pipini ambitio Venetos invasit, ut imperii sui fines dilataret. Nostri hostium minas sprevere primùm freti Græcorum classem sub Paulo Patricio: quo tandem discedente, propter occultas cum civibus quibusdam similtates, soli rem sedulò navarunt. Sub hæc conatur Pipinus, legatione transmissa, Venetos ab Imperatore Græco retrahere: idemque speciosis nominibus agit cum Dalmatis, ut horum populorum auxiliis, concessoque usu portuum, tutiùs alienas ditiones occuparet. Nostri, quamvis neutrius censerentur imperii, Nicephori tamen rebus summè aderant, cum id

Reip.

Reipub. interesset : quare neque regiis in-
 præsens postulatis, ut antea, neque Du-
 eum adhortationibus acquievere. His com-
 motus Pipinus bellum acerrimè intendit,
 parataque numerosa classe, primùm Dal-
 matiaë portus vexare cœpit: mox inde cre-
 bris incurfibus proxima urbi loca infestare:
 id animo cogitabat fore, consulente Obe-
 lorio, ut occupatis in vicinia insulis, &
 oppidis, nulli Venetias commeatus impor-
 tarentur, atque ita nostri, exclusis terra,
 marique ad vitam necessariis, inedia tan-
 dem, ultimo oblectarum urbium malo,
 compulsi deditionem facerent. At Veneti,
 nec hosti cedendum, nec bellum remitten-
 dum rati, ut Gallum propularent, majores
 naves in anchoris juxta Meduaci por-
 tum stare jubent adversus navigia, quæ
 Ravenna duci credebantur, Brunduli ar-
 cem geminato præsidio communiunt: &
 contra fluviatiles lintres ex omnibus insulis
 contrahunt minores cymbas. Hæc inter
 Pipinus terrestri exercitu omnem littoris
 oram occupat, Brundulano vico potitur,
 præter arcem. Clodiam exinde pergens
 subegit, ac reliqua circum stagnantia loca
 brevi temporis momento in potestatem sus-
 cepit. Methamauceni, cognita vicinarum
 gentium calamitate, certique imminere
 hostem, maturè omnes in Rivoaltum con-
 fugerunt, vacua Gallis hospitia relinquen-
 tes. Ejus fugæ nuntio Pipinus graviter i-
 ratus,

ratus, quia se tum deceptum spe, suisque è manibus elapsam prædam videbat. Noſtri in Rivoalto confidentes ob inſulæ inacceſſæ ſitum univerſas Gallorum vires, & furias in circumfuſis longè, latèque æſtuariis facilè ſperabant eluſum iri. Interim compluribus diverſi generis extractis navigiis Rex ex Albiola ſolvit, & ut pro comperto habuit, Venetis certum eſſe, aut mori, aut vincere, in eos ferociter movit innumerabili miſſilium jactu: illi, quibus à Claiſis Præfecto, cui Victoria nomen, foelici omine in hoſtem promittebatur victoria, tum navium agilitate, tum rei navalis, ac præſertim canalium errantium peritia, obſervato aquarum in altum recurſu, in adventantem Gallum à fronte, à lateribus impigrè invehuntur. Crudele continuò miſcetur certamen; hoſtes prædæ cupiditate trahi: Veneti pro aris, focusque, proque ipſa libertate, qua nihil carius, in pugnam ruere: ob id acerrimè dimicantes memorabilem Gallorum cædem edidere. Ita fractus Pipino animus, injuſtæquæ expeditionis præmium clades, dedecus fuit, ac fœdus diſceſſus: imò certa mors: ubi enim Mediolanum ſe recepit, debacchante in ſemet ira ob rem malè geſtam, paucos intra dies extinctus eſt. Sic adverſus Caroli Magni filium proſperè pugnatum accepimus: & bono Reip. fato; nam tum primùm ob exciſum Methamaucum

cum Ducalis sedes in Rivoaltum ab Angelo Baduario, qui Gallicam dissuaserat societatem, ad publicam evecto administrationem traducta est, quò loci in posterum adeò crevit res Veneta, ut non minùs finitimis, quàm longinquis populis etiam bello par esset: ipsaque urbs haud immeritò omnium Italicarum regina habeatur.

Bellum Saracenicum primum.
DCCCXXVII.

SAraceni superioribus annis vincendo longiùs progressi Constantinopolim, Byzantium olim, integro septennio obsedere: mox ab irritò conatu in Hispaniam navigantes, totam eam provinciam, Gothis feliciter expulsis, occuparunt. At Galliam deinceps incurfantes, victoriisque audentes Carolus Martellus contudit, prostravitque. Tandem barbaræ quod reliquum nationi Sicilia, Calabria, Apulia, & Italiæ pleraque patuerunt. Cum his hostibus Veneta virtus pro sociis diù se exercuit: atque tum Michaelis cognomento Balbi Græci Imperatoris precibus in Siculam expeditionem Senatus misit. Susceptum in impios hostes bellum Deus non tam læto beavit fine, sed etiam muneribus auxit, allato per eos dies ab Alexandria Divi Marci Evangelistæ corpore, ut illum pro tutelari suo numine Veneta Respublica

ca perpetuis deinde temporibus veneraretur.

Curieta insula expugnata.

DCCCXXX.

O Belerius, post acceptam à Pipino cladem, in Curietam insulam, hodie Vegliam, recessit: sed neque tempus, neque continuata calamitas extinxerant adhuc omnium malorum incendia, cupiditatem imperii, & ambitionem. Quamobrem, excitatis media in urbe factionum discordiis, quærebat patriæ, ac pristinæ dignitati restitui. Illum Methamauceni cives asferebant æmulatione, & invidia Joannis Baduarii Ducis patria prohiberi: jamque minacibus armis apparebat, manu reducendum Obelerium; cum Princeps prudenti consilio domesticos in primis tumultus reprimere aggressus, sublatis penè omnibus adversæ factionis, Methamaucum scelestorum sedem immisso igne delevit. Secundum hæc comparata classe in auctorem scelerum se convertit. Tenuit eò usque Curietam dura obsidione, donec vi expugnatam redegit in potestatem, ac patriæ hostem ultus est. Is oppressus jugulatur, atque militum manu digno suis criminibus supplicio discerpitur.

Carof-

Carassiana conjuratio in Principem.
DCCCXXXV.

C Arossius quidam nomine , clarus genere , excogitati in Ducem nefandi sceleris patricos satellites habuit . Hoc auctore contracta perduellium societas , & inita conspiratio in necem Joannis Baduarii , cui nihil aliud æquè , ac virtus , & fortuna invidiam movit . Princeps facinorosum impetum effugio in Galliam declinavit , & Carossius publicam administrationem , quasi vacantem invasit . Verùm quia malè acquisitum imperium haud facilè retinetur : Veneta plebs semper in priorem , ac legitimum dominum pari fide , Carossium adorta , orbatum oculis extra urbem eiecit : neque his contenta , sociis conspiracy ad unum conquisitis , trucidatisque , Joannem postliminio suæ reddidit dignitati . Postremò , quòd is graves simultates cum Mastalicia gente , cujus summa apud populum gratia , & auctoritas , exerceret , Gradum relegatus est , ne scilicet , continuante dissidio , Respub. gravius aliquod damnum contraheret .

Prima in Narentinos expeditio.
DCCCXXXIX.

Narentini juxta Naronem fluvium non procul ab Epidauro ad Illyricum mare siti, suis è latebris anguium more proreptantes quotidie fermè in mercatorias Venetorum naves erumpebant. Insidiantium fallacia scopulis ferè, & sinuum fraude juvabatur. Contra prædones modò prospera, modò adversa fortuna visa est. In primo cum illis conflictu sædè repellimur, Petro Tradonico Duce. Hic demùm ab externo præservatus hoste domi periit, facta suorum conspiratione; incertum qua de causa: sed cùm in parricidio nulla satis justa ad sceleris patrocinium prætexi posset excusatio, de fontibus ultio est habita. Cæterùm non priùs Narentino bello C. ac LXX. annorum finis datus, quàm jugum illi genti impositum, dirutaque oppida, ut hodie, quæ, & ubi fuerint, requiratur.

Bellum Saracenicum secundum.
DCCCXL.

Vastabant incendiis, & rapinis Græcas cum primis insulas Saraceni, nihilque extra injuriam, quod ferro, & igne peti posset. Græci propriis diffisi viribus, sensim collabante Orientis imperio, ad cohiben-

hibendas hostium populationes Veneta auxilia impetrant: delectu à nostris validissimarum navium habito in hostes itum est: Venetam, Græcamq; classes ductabat Joannes Tradonicus, Saracenicam Sabbas. Hic nostros juxta Crotonis littora operire statuit, quò demum loci supervenientes acre cum barbaro injere certamen; utrimque totis viribus, animisque concursum est, & stetit post longum, variumque congressum apud fœderatam classem victoria, nisi Græci ad primum ferè pugnae signum turpiter effugissent. Exinde universus hostilium armorum connisus, & rabies conversa in Venetum, qui diù sibi, reliquisque animo, ac virtute par, ad extremum numero hostium, ac suomet labori impar lasas manus, non victas Saraceno permisit. Triremes fermè omnes, aut captæ, aut merisæ. Prospero hoc succèssu elati Barbari in Dalmatiam rectâ navigarunt, ut onerarias Reip. apud Tergestinos interciperent, cùm priùs singulos captivorum variis cruciatibus enecassent, atque ita omne odium tum in Venetum nomen effudissent.

Secunda in Narentinos expeditio.

DCCCLXIV.

Illata ab Saracenis clades Narentinis invadendæ Reipub. occasionem præbuit: quamobrem periclitata est ita Adriaticum

mare



mare infestum reddebant, ut Venetiarum ora nihilo melior appareret, quàm cujusque arctissimè oblessi oppidi. Sic oppressa civitas in latrones continuò exiliendum proclamabat; non expectandum, ut mediam in urbem irrumpentes hucusque florentem infanda barbarie fœdarent. Patres iis querelis accensi, vulgique alacritate animosa in victorię auspiciū traducta, XXX. longarum navium classem quàm celerrimè comparant, cui Ursus Baduarius præficitur, vir tanti nominis in re bellica, ut ad evulgatum instructæ classis, delectique ducis nuntium Narentini reformident; ob hanc propè causam, non modò sese subeunti Baduario objicere non audent, sed etiam supplices pacem per Legatos exorant. Hæc tutior sperata victoria Venetos præbuit faciles deprecantibus: nec alia lex deditis injuncta, quàm ut rata æstimatione, quæ damna intulissent, ex æquo, & bono ea rependerent.

Bellum Saracenicum tertium.

DCCCLXVII.

SAraceni ad consueta latrocinia reversi Dalmatiæ, & Histriæ maritimas oras depopulantur: demùm Gradum per rapinam, & nefas invadunt. Ursus Baduarius Princeps in proximos hostes, & ipsi fortassè urbi ex vicinia insidiantes valido navium

viū apparatu progressus est. Eos circa Gradum præpropere accessu, inopinoque ita perterrefecit, ut vel ipso pugnæ indito signo turbaret adversam classem, & in fugam converterit. Fugientem insecutus hostem non procul à Tarento penitus profligavit. Rei feliciter navatæ testis erga Principem extitit publicus Venetorum favor: illi ab expeditione revertenti datus consors imperii Joannes filius, qui tum, etiam ipse non minori virtute contra Barbaros, pugnaverat.

Comaclensis pugna prima.
DCCCLXXXI.

Joannes Baduarius paternæ dignitatis hæres Comaclum, quod intra antiquæ Venetiæ limites esset, Reipublicæ uti debitum assererat. Hac de causâ fratrem, nomine Baduarium, Romam mittere statuit, ut, Pontifice auctore, oppidum Veneto juri cederet. Comaclenses, explorato Ducis consilio, asciscunt in auxilium Ravennates, & Venetum legatum per suos fines transeuntem adorti multis vulneribus ab itinere avertunt. Baduarius in patriam reversus brevi post interiit. Joannes injuriam, fraternamque cædem ulturus justâ classe Comaclum aggreditur, tantoque irati animi æstu, ut oppidi non contentus expugnatione, omnes ferè illius incolas cruenta

ta pugna cæciderit . Sed neque hæc vindictæ cursum sistit ; impotens est enim iracundiæ gustus , ac sui ipsius esca , & fomes ; in ipsos Ravennatium penetrat fines omnia vastando flammis , ferroque , nec priùs metam cædibus constituit , quàm desideratis , qui cæderentur , cùm reliqui sibi fuga , vel in proximos montes , vel in subjectas castrorum munitiones jam antea consulissent .

Tertia in Narentinos expeditio .
DCCCLXXXVII.

HI populi , quasi anniversarii Reip. hostes ex Illyrio Caprulas usque , inque ipsa urbi proxima loca prædabundi advolarunt . Illos à rapinis Venetus ut dimoveret , longis aliquot rostratis insectatus , haud procul à Miculo Dalmatiæ promontorio ostendit . Petri Candiani Ducis exemplo , & adhortationibus valida in prædones facta est impressio , primoque congressu res Veneta superior fuit . Cæterùm nutante fortuna , dum Candianus nimium victoriæ avidus in confertissimos sese hostes protrudit , ictu sagittæ perimitur . Eo casu consternata classis , cùm sine duce loco stare non posset , nudatur sensim defensoribus , & in rapaces manus tota concedit .

Hunni à Venetis victi.

DCCCCIII.

REspublica si qua vulnera superioribus bellis acceperat, ea Hunnorum spoliis lenivit. Gens illa Scythica denuò suis excita sedibus devicit in ipsis Italiae faucibus Berengarium; atque inde strages, ruinasque tectis, agrisque inferendo in Carnorum regionem sese effudit: magno demùm impetu erupit in hanc nostram provinciam fama Venetarum opum. Totâ igitur Venetia iis ingruentibus miserandum in modum vastata; nobiliora oppida direpta, everſaque, ac inusitatis cladibus infelices populi afflicti. Hoc rerum cursu, nulloque resistente, Hunni, combusta Clodia, nihil prætermittunt, quod nostri aut pati, aut timere possent: & cùm unam Rivoalti oppugnationem procaci animo voverent, ad hanc paratis undecumque ratibus se instruunt. Porro Veneti, qui adversis in rebus semper invicto fuere animo, ad immanissimum hostem longè arcendum ingenti audacia, & Gallicæ quondam cladis recordatione erecti bellum procurant, exiliuntque animosi, præſente Petro Tribuno Principe. Manus circa Albiolam conferitur, & res primò missilibus geri cœpta, hostium ictus invalidi cadebant; quia instabiles, incertique: nam jaculato-

B res

res barbari terrestribus assueti præliis fluctuabant in linitibus. Veneti navibus firmi, veluti stataria pugna, hostes facile turbare, sternere, fundere, injectisque harpagonibus in fugam datos sistere, ut universi aut gladiis, aut aquis perierint. Constat, modico Veneti sanguinis impendio tam celebrem de Barbaris hucusque victoribus victoriam constituisse.

Comaclensis pugna secunda.

DCCCCXXXII.

COmaclenses, deposita prioris cladis, & Venetæ virtutis memoria, obsessis viarum aditibus, in nostros illac transientes latronum more grassabantur: cives sæpius conquesti, & mercatores de interceptis mercibus ingeminantes querelas, Remp. ad arma compulerunt: sed non prius hostibus illata, quàm præmissa legatio, qua repeteretur ablatum. Et tamen tùm recepta, cùm ex Reip. lege in foro jam occupato recitata Venetum habuit & testem maleficii, & judicem noxæ. Classis cum Duce in hostile solum trajecta omnia circum diripiendo in anceps, dubiumque periculum oppidanos adduxit. At enim contra hostem, jamdiù, nimiumque reluctantem expositi classarii, & in obstinatam gentem, munitionesque conjectæ faces. Ità postremò secuta est deditio, restituta furta, & fides

pu-

publica expressa, qua Comaclenses Veneto imperio se parituros promissere.

Impia Finitimorum insidia repressa.

DCCCCXLIV.

Semper Veneta Resp. circumfideri visa est ab invidia, & odio finitimarum gentium. Dalmatæ, Histri, ac Tergestini, vicini populi, veriti, ne aliquando illius mole opprimerentur, in ejus perniciem non semel conjurarunt. Ea propter piraticis insultibus Gradum, proximaque loca ab his latronibus sæpè vexata, & occupata: à nostris crebrò defensa, ac recepta accepimus. Mos erat convenire quotannis in templum urbis maximum Divò Petro in Insula Castellana dicatum: ubi virgines cum propinquis aderant, quælibet nuptura, cui magis aut dote, aut ore placeret. Finitimi hostes nocturna navigatione in viciniora stagna devecti, tandiù tacitis insidiis quievèrè, donec nuptialis conventus ageretur, cujus tandem certiores, facto impetu, templum adorti, armisque repente omnia turbantes dotalem virginum apparatus depopulati sunt. Insolens hoc facinus adeò Venetæ juventutis animos perculit, ut prædones persequendos nulla mora decreverit. Levioribus itaque adventa lintribus furta jam dividentes in Caprulanis paludibus inopinatò oppressit, tanto

B 2 que

que ardore, ut, repetita præda, latrones ad internecionem usque confecerit. *Re* feliciter gesta, actæ sunt Deiparæ Virgini grates, quod hucusque ex ipso victoriæ nomine observare licet.

Cades Petri Candiani Ducis.
DCCCCLXXV.

Supremæ dignitatis fastigium, quod clementia potissimum, ac morum sanctitate sustineri debet, Petrus Candianus Quartus nullo non scelere corripit. *In* Reip. gubernacula, adnitente populo, Patri Duci cooptatus imperium sibi uni asserere maluit per nefas, quàm cum aliis per leges habere commune: inde moliri insidias, & seditiones alere intra cives. Quibus studiis offensi Veneti proscribere contumacem, spe dignitatis, ac patriæ repetendæ præcisa. At ille ingenio ferox, impetrata ab Ravennatibus ope, fœdis excursibus laceßivit rem Venetam. Patre extincto, hunc tamen eundem civitas, quem jure odisse debuerat, populari prorsus levitate in pristinum honoris gradum exulem revocavit. Sed brevi, ut populum suæ instabilitatis pœnituit, ita Candianus merita tyrannicæ administrationis pœnas dedit. Reversus enim in patriam, remoto pudore, ac metu, more veteris impotentiae grassabatur, priore abdicata conjuge, U-
val-

valdertam Oberti Hetruriæ Principis filiam duxit : & hac elatus affinitate omnia pro libidine gessit . Quæsitæ juris specie , qua velaret ambitiones spiritus , in Opiterginos , ac Ferrarienses , inconsulto Senatu , movit , ut repeteret prædia , quæ sibi dotis nomine assignata jactabat : in præstantiores quoque viros suam sævitiam , ultionemque confictis criminibus explevit . Postremò , ut cœpit vindicem populum , conscientia scelerum , domestico tyrannorum tortore , reformidare , regias domos communivit , & in arcis usum forti præsidio firmavit . Interim Venetus avitæ libertatis omninò memor , arreptis armis , conatus est intra tecta impium Ducem aggredi . Sed , ut se cominùs repulsum ab custodibus sensit , alti furoris arma , faces , & ignem in atrium ejaculavit , quo intestinus hostis subcensus illustre civibus perviciæ spectaculum præbuit . Spretæ apud iratam plebem captivi preces , ac nequicquam pro infante filio deprecantis : utrique fauces elisæ , & cadavera in macellum abjecta , memorabili exemplo puniendæ tyrannidis , ne quis ad imitandum scelus superesset .

*Histria, & Dalmatia in ditionem
recepta, eversis Narentini.*

DCCCCXCVII.

Regna, & imperia tunc collabi visa ,
cum primùm ab avita religione , &
justitia declinarunt : duobus his fundamen-
tis destitutum Orientale imperium eo tem-
pore corruit , quo Imperatores sacrilegum
cum Deo, Divisque bellum gessere. Inde
Principum contemptus, civium querelæ,
ortæ seditiones, & discordiæ : adeò Græ-
corum vires enervatæ, ut in posterum non
fœderatis opem, non suis jam desperatis
rebus auxilium ferre possent, vel contra
domesticos, vel adversus externos insul-
tus. Cùm itaque gliscerent ubique tumultus,
hi potissimùm in Illyricis invalesce-
bant. Histri, & Dalmatæ à finitimis mon-
tanæ incolentibus, & præcipuè à Narenti-
nis perpetuis rapinis divexabantur. Igitur
cùm se à tantis calamitatibus eximere pro-
priis viribus nequirent, missa ad Venetos
legatione, se, suasque urbes, & liberos
Senatui permiserunt; at non prius in tu-
telam recepti sunt, quàm explorata Græ-
ci Imperatoris voluntate, ne quidquam in
fœdera committeretur. Hoc factò, Petrus
Urseolus Princeps classe lectissima instru-
ctus confestim in provinciam transmisit,
& primùm in Histriam. Ad Venetarum

tri-

triremium appulsum primi omnium Parentini alacres se Venetæ potestati submiserunt : hos secuti Polani , pleraque alia castra , & quacumque Veneta classis pergebat , quæ dederent se , oppidorum legati occurrebant : omnes benignè appellatos Princeps cum muneribus , ac privilegiis dimisit . Mox in Dalmatiam trajectum , ubi Jaderenses in Reipub. fidem ultrò jurarunt , evulgataque illorum deditione , reliquæ ferè omnes urbes , non tam , quæ littoreis , quàm quæ mediterraneis in locis sitæ erant , se Venetorum fidei committere . Sic tum nota omnibus Reipub. æquitas , justitia , & mite imperium ad se volentes pertraxit eos populos , & retinuit humanitate magis , quàm vi : quo gubernationis genere allectæ finitimæ gentes ultrò Reip. leges amplexatæ sunt . Corcyra tamen nigra , hodie Curzola , & Lefina , olim Pharia illas detrectantes maluerunt omnia pati , quàm sese tradere . Urseolus , ne aliqua remanerent in provincia bellorum semina , quibus demùm in deditis jam populis seditiones nascerentur , decrevit armis uti , ubi Veneta clementia locum non invenisset : cùm interim repugnantium animos partim spe , partim metu tentasset , classem admovit , & quemadmodum hostem primò non violenter terrendum censuit , quòd voluntariam deditionem non desperasset : ita si plus æquo protraheret spem , se nihil hostile

prætermisſurum minitabatur . Terra, marique acri obſidione preſſi non diù reſtiterẽ, quin deditionis ſigno clementiam, ac virtutem Ducis implorarent. Pharii diutiùs, acriùſque reluãtati ſunt : loci quippe natura, ſituque aſpero ſe inexpugnabiles arbitrabantur . Veneti adverſus obſtinatum hoſtem pertinaciter dimicantes magno impetu tentarunt irruptionem in arcem, tantaque à noſtris miſſilium multitudo fertur emiſſa in propugnatores, ut hi, ceu denſiſſima grandine obteãti, præſidio tandem decedere, ac mœnia vacua relinquere cogerentur . Suis itaque deſenſoribus nudatum oppidum occupatur, ac ſupplicium de iis ſumptum eſt, deditionem qui diſſuaſerant . His peractis in Narentinos itur : horum caſtra, totaque regio latis vaſtationibus perpopulata, ac diruta, deletumque cum iſſis oppidis pervicaciſſimæ gentis nomen . Sic libuit aliquando crudeliſſimi hoſtis rabiẽ, & ſævitiã pari crudelitate, ac furore multaffe . Ita igitur Narentini everſi, acquiſita Hiſtria, occupata Dalmatia . Viãtrici claſſe reverſus Urſeolus ab effuſa civitate veluti triumphans excipitur, decretumque à Patribus, ut deinceps Dux Venetus Dalmatiæ quoque nobiliſſimæ provinciæ Princeps appelleretur .

Bellum Saracenicum quartum.

MV.

FUnesto iterum agmine Saraceni petentes Italiam, post subactam Capuam, Barium in Apulia terra, marique oppugnabant: qui obsidebantur, à fame hoste interno, ac inexpugnabili mortalibus malo non minus pressi, quàm à circumfidentibus Barbaris, jam se hosti permisissent, si eò amplius Veneti rei frumentariæ, & militaris apparatus auxilia retardassent; quare iis laborantibus opportunè subvenire fortissima classe, quam militibus, & comitatibus non mediocriter instructam eduxerant: cæterum vehementius in Saracenos res gesta, recenti adhuc memoria acceptæ ad Crotonem cladis. At verò à nostris non tam Barium obsidione liberatum, quàm ex ipso hoste, multis ex illius triremibus in conflictu disiectis, reportata victoria gravissimo quidem exitu nobilis, ut Saraceni toto mari depulsi non amplius ab eò tempore classibus oras Italicas appetere ausi fuerint.

Pugna cum Adriensibus prima.

MXV.

OTho Urseolus Petri Ducis filius ad Reip. gubernacula delectus expeditionem in Adrienses suscipit, quod popularentur Venetos fines. Insensio hosti tumultuario delecto occurrit, Lauretumque ad Padi ostia aggreditur. Principis celeritas magnam Adriensibus trepidationem incutit, Venetoque victoriam parit. Cruentata pugna profligati, & à præsentì populatione repressi; ac, ne quid amplius simile in posterum molirentur, cohibiti.

*Bellum in Murcimirum Liburnia.**Regulum.*

MXXIII.

HOc anno Murcimirus Liburniæ, vulgò Croatiae, Regulus prædabundus in Jaderensium fines irrumpens Venetos ad arma traxit. Ne igitur illata fœderatæ genti impunita esset injuriâ, nostri ex improvviso feruntur in hostem, atque uno quasi impetu profligatum in suorum mortuum anfractus, & latibula cum cæde propellunt. Fugatis Liburnis, eò tamen usque instant donec ad victoriam nihil ultra prædam deesset, quam uberem, & sanè luculentam accumulanti. Hæc res non minus

nus Murcimiri temeritatem castigavit ,
quàm turpis antea fuga. Cæterum petenti
data pax, quàm cum potentioribus co-
lendam, neque æmulatione potentiæ vali-
diores irritandos suo malo didicit.

Prima Jadera defectio.

ML.

JAderenses fidei religionem , quæ annis
LIII. cum Venetis jurejurando inter-
cesserat, voluntaria defectione polluerunt,
se se Regi Pannoniæ dedentes: vicinis quo-
que urbibus sollicitatis , ut detestandum
exemplum ejusdem fraudis imitatione com-
probarent. Patrum animos inexpectatus
tantæ novitatis nuntius summè perturba-
vit : nisi enim primo quoque tempore ex-
pedita classis in Dalmatiam navigaret, non
multò post reliqui ejus provinciæ populi
defecturi videbantur. Dominicus Conta-
renus Princeps in expeditionem profectus
Jaderam eo impetu oppugnavit , ut illa
assiduè concussa muralibus tormentis, fu-
gatisque Pannonum auxiliis , ne excisa à
fundamentis ignominia suæ testis esset sem-
piterna, novo fidei sacramento obstricta
fuerit. Haud parum profuit urbs vi rece-
pta ; nam à cæteris Dalmatiæ oppidis , il-
lius expugnatione audita, fides servata est
Venetis.

Bellum Normannicum primum.

MLXXX.

Venetorum auxiliis sæpiùs stetit res Græca, si annalibus credendum, & præcipuè, quo tempore Normanni, Guiscardus Duce, maritimam Macedoniæ oram cædibus, ac rapinis complebant. Ea de causa Græci, ut prospicerent suis accisis rebus, adversus recentes hostes probatam in alios Reip. opem implorant. Quare nostri amicæ genti gratificantes validarum triremium numerum comparant, & Dominico Silvio Duce in Normannos pugnaturo ex urbe discedunt. Pervenere ad Dyrrachium tum obsessum, datoque pugnæ signo in adversam classem fecere impetum. Hostes Venetas triremes non minori impulsu excipiunt, quàm illæ in suas raperentur: certamen utrinque suboritur cruentum, & nostri præliari pro ipsa patria libertate, non pro sociis, videbantur. Diù ancipiti eventu res gesta, tandem disiectis hostibus, submersis, actisque in fugam navibus, mare Dyrrachinis antea occlusum, & securitatem aperuit, restituitque Silvius magna Venetæ gentis fama. Attamen, quia fortunæ vires instabiles sunt, & repentinæ mutationes, bellum hoc à nobis prosperè confectum brevis secuta est quies, pulso ab imperio Nicephoro Boto-

nia-

ntate, & vi illud occupantibus Comnenis. Normanni tumultibus; ac seditionibus, quæ per id tempus Constantinopoli gliscebant, plectti, reparatis denuò viribus, Dyrrachium regressi adoriuntur, occupantque. Veneti, Græcis rursùm supplicantibus, insequenti anno in eosdem hostes navalem conflictum experiuntur; diverso tamen exitu, quamvis eodem ferme loco, & Duce. Numerosissimâ Venetorum classis adeò dissipatur, ut ex navium multitudine, quas Princeps eò duxerat, nullæ penitus evasisse dicantur, præter parvum navigium, quo ipse cum paucis aufugit. Senatus in Silvium omnem belli cladem confert, eidemque summo Magistratu abrogato, Vitalem Falerium substituit. Sed cum sub novo Principe classem reparasset, non minorem altera cladem passus est, haud longè Corcyra quarto post anno. Inde satis constat, bellum non eos semper fortiri exitus, qui sperantur, & plus sæpè auctoritatis sibi vindicare fortunam, quàm Ducum virtutem, & ingenium.

Bellum Syriacum primum.
MXCIX.

DEcreta in Christianæ Religionis hostes expeditione apud Clarum montem Arvernæ oppidum, adhortante Urbaba-

bano II. Pontifice, Veneti, ne piæ, communique causæ viderentur deesse, classẽm, CC. navium, ut memoriæ proditum est, compararunt in id bellum, in quo, diviso duas in partes mortalium genere, hinc pietas, inde fœda superstitionis depugnabat. Validissimo apparatui Præfecti summo cum imperio dati sunt Henricus Contarenus Castellanus Antistes, & Joannes Vitalis Michaelis Principis filius, morum pietate, & rei maritimæ peritia viri, quibus, ut par erat, res publica, & Christiana, committeretur. Belli destinata sedes Hierosolymorum civitas. Hæc è Barbarorum manibus ut eriperetur, transportati in Asiam magni exercitus, & noster penè orbis sub signis peragratus. Porro Veneti sacræ militiæ dato nomine, in provinciam navigantes, ubi Rhodum appulere, à Pisaniis probrosis contumeliis excepti, odione, an invidia, minùs constat; an potius instigante Alexio Imperatore Græco, qui Syriacam expeditionem nostris Principibus invidebat. Illi in certamen vocati justas temeritatis pœnas exolverunt, ex quinquaginta navium classe vix duabus, & viginti fuga servatis: captivæ tandem redditæ, quòd bello Christiano inservirent, & quòd satis esset vicisse: mirum quàm id magnanimitati, & clementiæ Venetis cesserit. Exinde nostri Duces Ioppen ingressi totius belli moderatorem Gothofredum Bolio-

neum

neum adiere consulturi, quò essent arma dirigenda. Is, laudata Venetorum virtute, expugnandum Porphyriten indixit. Dum itaque oppidi ad radices Carmeli montis positi paratur oppugnatio, gravi morbo laborare Bolioneus fertur, qui, fugatis, profligatisque sæpiùs in acie Barbaris, urbem, sacrumque solum receperat, post unum, alterumve ab obsidione mensem, cum omnium primis effractus machinis muros conscendisset. Eo nuntio commoti Venetæ classis ductores festinavere Hierosolymas. Ægrotum Regem morti jam proximum vix allocutos Balduinus Regni successor perhumaniter excepit. Tandem sacra venerati loca, ubi in castra rediere, oppugnatione acriùs repetita, Porphyriten occuparunt. Mox Tyberiadem, quam nullo successu Galli erant aggressi, nostro accedente robore, in Venetorum manus concessisse, facta ab incolis deditione, testantur annales. In hunc igitur modum, functa pro Christiana Rep. maritimo, terrestrique bello ex Syria in Adriaticum classis Veneta relata urbem triumphis specie, barbaris onusta prædis ingressa est.

Bellum Normannicum secundum.

M C.

QUoniam iterum repetitis vastationibus universam ferme Græciæ , & Dalmatiæ tractum exhauriebant Normanni : idcirco etiam ad arma rursus , navalesque apparatus contra inquietos hostes itum est . Veneti cum Pannoniæ Rege , cuius urbes ab iisdem graviter vexabantur , isto fœdere , in Apuliam armatis navibus properarunt , prudenti consilio , ut hostem ad sua tutanda ; ab alienis invadendis retraherent : facta itaque in hostilem provinciam irruptione , ingens circumquaque immissus terror , trepidansque Brundisium , proximaque alia castra ultrò se dediderunt . Classis , rapta non modica ex mediterraneis præda , ad suos rediit , & avvocato hosti pacem dedit , sic Dalmatis , Græcisque pristina securitas restituta .

Bellum Syriacum secundum.

M C I V.

REceptas Hierosolymas post Gothofredum Balduinus fraternæ virtutis , atque fortunæ hæres administravit : & ut apud Christianos tantum imperium stabile , ac diuturnum constitueretur , pergebant Veneti novas semper copias , novosque

que commeatus in Syriam transmittere. Sed quia maximè ad illius securitatem videbatur opportuna Ptolemais, si caperetur, in hanc unam oppugnandam summo studio incubuere. Itaque Ordelapho Falerio Principe, C. navium classis mira celeritate transmarinis appulsa littoribus in Ptolemaidis conspectum se dedit, conjunctisque cum Balduino viribus, urbem, quam ille antea pedestri milite frustra tentaverat, aperto mari ad omnes suppetias, veluti inexpugnabilem, sic maritima obsidione fatigavit, ut supra spem citius in Christianorum jus, ditionemque venerit. Ptolemaide capta, Sidonem trajectum est, quæ viso classico apparatu portas aperuit; & alia etiam vicina oppida victricibus armis succubuerunt, postquam oppugnari cœpta. Inde nostri ad Pharamiam circa Nili ostia munitam arcem advecti, inita feliciter pugna, deturbatoque vi præsidio illam à fundamentis evertunt. Sic demoliti piratarum receptaculum, maris usum Christianis in Syriam navigantibus recuperant. Balduinus ut se gratum præberet, effusus in munera Venetæ Reip. in Ptolemaide sacram ædem, forumque concessit, & ut eodem, quo Galli, jure fruerentur: eamque compluribus aliis privilegiis in toto Hierosolymitano regno donavit.

Bellum Patavinum primum.
MCX.

FAtale fermè genti Venetæ videbatur, ne post Syriacas victorias, diuturno otio torperet; sed ut terra pariter, ac mari imperium extenderet, ita de finibus orta cum Patavinis contentio. His, qui à Tarvisinis, & Ravennatibus accepto auxilio superbi, ac feroces ferebantur, obviam iere Veneti circa Bebianam turrin, ut opportuniùs à finibus arcerent. Levibus primùm certaminibus dimicatum: postremò, ut in confertam, ac furentem pugnam ventum est, pro Venetis stetit victoria, magna hostium cæde, & captivitate. Qui superfuere, correpta fuga, ab Henrico Imperatore tunc subsistente Veronæ exorare properarunt subsidia. Cæterùm supplicibus ille haud manu, sed consilio profuit: ut omisso novarum rerum studio circa fines pacem, & amicitiam cum Venetis inirent, discerentque, considerandum priùs, quàm aggrediendum, quidquid præter opinionem potest belli contingere.

Jaderæ secunda defectio.
MCXVII.

ITerùm Jaderenses, Venetò ab urbe pulso Magistratu, defecere ad Panno-

noniæ Regem: hic violata fœderum sancti-
 tate, in quæ cum Repub. adversus Nor-
 mannos hostes pridem juraverat, quasvis ei-
 dem amicas, deditasque urbes, quibuscum-
 que illecebris, aut donariis, aut pretiosa su-
 ppellectili, quodque magis in præsens con-
 gruere videbatur, specioso libertatis nomi-
 ne ad se pellicere conabatur. Venetiis cum
 certa iterati criminis fama innotuisset, ex-
 templo parata classis, quæ rursus Dalma-
 tiam peteret. Prospera navigatione Vene-
 tus Princeps ut applicuit, subitam molitur
 urbis oppugnationem, effususque in agrum
 latè omnia populatur. Pannonæ, qui præ-
 sidio erant, haud territi erumpunt, clas-
 siariosque provocant in terrestrem con-
 gressum. Hostem docet experimento Or-
 delaphus, nihil interesse virtutis terra,
 an aquis dimicaretur: quamobrem tanto
 impetu è navibus exilit, prælium capes-
 sit, ut fusi, dissipatique sint Pannonæ,
 tota brevi cedente Dalmatia. Hac enim
 insigni victoria, suorumque fautorum
 strage exanimata Jadera rediit in obse-
 quium, conditionibus victoris arbitrio ac-
 ceptis in pœnam admissæ defectionis. In-
 de Sicum, nostris Sebenicum, oppidum
 receptum, moxque vetitum arcis muros,
 à Veneto milite subritos, in posterum
 reparare, ne oppidum munimento con-
 fissum deficeret. Princeps ad hæc, æqua-
 bili planè fortuna, Liburniæ montibus
 sit-

superatis , hostium reliquias adhuc palantes vel cæcidit, vel in captivitatem traxit : atque ulterius in provinciam penetrans , quotquot sese obtulere castra , arcesque inopinato armorum terrore victor subegit . Hinc Venetus Dux novo Croatiae, sive Liburniae Principatus titulo auctus . Tandem recepta Dalmatia, propagatoque imperio clarus Venetias rediens , triumphum captivorum pompa nobilem , nec antea in urbe visum primus duxit; reportataque de Pannonicis cohortibus vexilla templo suspendi Senatus iussit; ad excitandam scilicet virtutem gloriosum posteris victoriae monimentum.

Bellum Pannonicum primum.
MCXVIII.

Fama rerum in Liburnia gestarum per Pannoniam gliscens universam regionem in vindictam sollicitat . Maximi apparatus exercitus, & bellicosissimae gentis suis veluti sedibus excita potentia Venetos fines, more circumfusi amnis irrumpit; recentibusque fortuna invidente victoriis breve sanè tempus ad eas recensendas , quin ad recipiendum spiritum vix mora conceditur . Patres igitur anxii de retinenda Dalmatia opportunam classem decernunt adversus ingruentem hostem, quæ eodem Falerio Duce transmissa explorat circa Jade-

deram hostilium castra disposita, ductoque ingentis operis vallo vetitum descensum, nec minùs interclusum obsessis auxilium. Falerius omnia experiundo, ut laborantibus præsto sit, ad pugnam è munitionibus elicit Barbaros, ratus, quòd faciliùs interdum dicandum intromitterentur auxilia. Ita bellum hinc inde atrox conferitur, & miseranda conspicitur strages, serò ad neutram partem se inclinante fortuna: ad extremum Ducis interitus, qui, dum optimi Imperatoris explet munus non tam consilio, quàm manu præsens, occumbit, nostrorum perturbat animos, & Pannonas ferociores reddit: miles itaque suo Duce orbatus fluctuat, turbatisque ordinibus, trepida ex fuga dispersus victoriam hostibus cedit. Tantæ cladis nuntius spem conservandæ Dalmatiæ Patribus omnem ademit, quòd jam superiores multitudine Barbari undique per provinciam militari licentia discurrerent. Sed victoriæ nusquam temperantibus placuit Senatui non armis, verùm obviam ire precibus, cùm & id censeferi debeat honestum, quod tuendæ Reip. causa sit factum. Missi igitur legati quinquennales inducias impetrarunt.

Bellum Syriacum tertium.
MCXXII.

Quis non admiretur invictum, celsio-
remque populi Veneti animum, qui
cùm ad retinendam Dalmatiam arma debe-
ret convertere, potiùs in remotam longè
regionem mittebat? quippe alacriùs pro
fociis, quàm pro se, magisque pro reli-
gione, quàm pro imperio dimicabat. In
Syriam sub hoc tempus denuò vocatur,
quia Parthi ad instar grandinis, nimborum-
que omnia cædibus, ac funestissimis præ-
dis evertabant. Callistus Romanus Ponti-
fex nostros spe gloriæ concitos permovit
in Barbaros, qui captum Balduinum Re-
gem Charras in vincula adduxerant. In
sacramitaque expeditionem Dominicus Mi-
chaelius Ordelapho susceptus CC. diversi
generis navium classem Cyprum versus
traducit, eoque loci audita Ioppensi obsi-
dione, ad hanc solvendam statim proras
convertit. Certior in portu sedere hostes
uni tantùm rei intentos, ut intercepto com-
meatu maritimo, tandem se ultrò dederet
oppidum fame domitum, in eos plenis ve-
lis, incitatoque remige sese immittit; va-
lidaque impressione facta tantus iisdem pa-
vor injectus, ut oppressi, cæsique sint,
antequam, quid facto opus, dignoscerent:
varia itaque strage, & captivitate multat-

tis

tis Barbaris, Ioppe magna Veneti nominis
celebritate ab excidio vindicata, hostilem-
que omnem classem noster prædatus miles
ingenti, & locuplete præda factus est di-
tior. Post hæc Michaelius Hierosolymas
perrexit, ut ibidem cum Varimundo sacræ
urbis præfule de belli ratione decerneret.
Tyros expugnanda deligitur conjunctis
exercitibus, quod non tam situ, quam
opere munitissima haberetur. Reparata
protinus classe, & ex Ioppenfi portu desti-
nato littori appulsa, simul urbi insultan-
tes fœderatæ acies, pari tantæ virtutis even-
tu ea se brevi potiri posse confidunt: at
dum spe longius in obsidione tempus pro-
trahitur, certo ne, an ad invidiam ficto
auctore, terrestres inter copias rumor ema-
nat, expeditissimum obsessis adventare au-
xilium, & hinc fugam Venetos meditari.
Michaelius ubi primum fœdam in se, suos-
que calumniam percipit, ad stabiliendam
in sociis Venetæ constantiæ fidem ademp-
tum singulis suis navibus omnem appara-
tum nauticum apud confœderatos, ceu fi-
dei pignora, deponit, ut inde constaret,
inviolabilem apud Venetos fœderum san-
ctitatem, neque eorum animos vel adver-
sa, vel prospera unquam nutare fortuna.
Hoc fidei documento ab Veneto Imperato-
re socii confirmati. Verùm qualiscunque
de maturatis auxiliis rumor hætenus in-
crebuerat, haud vanus extitisset, nisi in-
ter-

terceptæ essent litteræ , quibus à Damasceno rege monebantur obfessi , forti durarent animo , intra paucos dies auxiliares manus affuturas . Memoriam proditum , id nostros rescivisse è litteris , quas pedibus appensas aereus nuntius columba deferebat obfessis , cum ea prætervolans ad ingentes Christiani exercitus clamores concidisset . Nostri opportunam rei benè gerendæ occasionem nacti alato tabellario fictas refugiunt litteras , quibus Tyrii admonerentur , non esse , cur à Damasco expectarent auxilia : undique hostilibus armis obsepta itinera : proinde parerent tempori , ac necessitati . Opportunum commentum votis cumulatè respondet : Tyrii siquidem sese destitutos dubio procul arbitrati , exacto quinto obsidionis mense deditionem faciunt . Ingressi urbem fœderati milites murorum , turriumque pinnis Christiana signa præfigunt , Veneta scilicet Hierosolymitanis immixta . Demùm id ex fœdere obtinuit Resp. ut Tyri , receptæque Ascalonis , urbium tertia pars sibi libero jure traderetur ; probatissimum virtutis , deque re Christiana benemerentis argumentum .

*Bellum cum Græcis Imperatoribus primum.
Jadera tertia defectio.*

MCXXV.

Florens in Asia Venetorum fortuna Græcorum iisdem attraxit invidiam. Calojoannes Imperator ob partam de Tyro victoriam Reip. felicitate offensus, & utcumque nociturus nihil non tentare, ut prosperos bellorum successus moraretur, atque omni Syria deturbaret. Hoc assequi fraudibus cum non posset, ultrò indictis armis hostem sese proficitur, nisi quamprimum classis in Adriaticum rediret. Nostri minas parvi facientes susceptam expeditionem non tam necessaria, quam illius contentione prosequuntur. Sub hæc Græcis in vicina Venetæ urbi loca irrumpentibus, cumque tutum nihil navigantibus pateret oblesso mari, Michaelius subito recursum deflectens in Græciam, Rhodum primò, Chium exinde præcipua Orientalis imperii propugnacula aggressus summa belli prosperitate expugnat: pari mox fortuna nonnullæ in Ægei insulæ vi captæ, Methone occupata, ejusque arx robustissimo communita præsidio. Hæc victoriæ fama Græcorum repressit insultus, & ab eorum classibus nostrum mare vindicta purgavit. Nec minus Jaderam compescuit,

C

quæ

quæ tertium rebellis quodam veluti contagio Spalatum, Traguriumque infecerat. Receptæ Jaderæ mœnia ubi solo adæquata, reliquis pœnæ documentum præbuerent. Aliquot maritima oppida, quorum fidem Pannonæ tentaverant, promotis triremibus nostris, conservata. Sic fortissimus Imperator Syriæ, Græciæque ora universa in Illyrium usque partim armis domita, partim ab hostilibus injuriis vindicata, biennio post in patriam lætis acclamationibus reversus est.

Fanenses libertati restituti.
MCXXX.

FANUM-fortunæ per ea tempora fortasse proprio numine veluti desertum à proximis Pisauri, & Senogalliæ populis crebris oppugnationibus infestabatur, hosti haud dubiè cessurum, nisi ad notam Venetæ virtutis fortunam confugisset. Hac una favente servatum est: missa quippe in subsidium classis cum hostibus prælium miscet, partaque victoria Fanensibus libertatem restituit. Asserta civitas, ne tanti beneficii memoria intercideret, multos sese annos, statuto pro viribus tributo, Reip. obnoxiam præstitit.

Bellum Patavinum secundum.
MCXLIII.

Patavini Venetos iterum fines turbantes Meduaci fluminis aggeres non procul à Gambarariis proscindere conati sunt, apertissimo Reip. detrimento, ut per circumjacentes agros diffusæ aquæ limosis, sterilibusque paludibus urbem nostram obsepirent. Sed missis à Petro Polano Principe in turbidos hostes pedestribus copiis, res bellica strenuè gesta est, commisso ad Tumbam certamine, quo Venetus robore, animoque superior Patavinos devicit, cepitque ex eis trecentos, ac quinquaginta notæ nobilitatis viros. At primatibus Patavinæ urbis testantibus, id in Veneti nominis odium haud fuisse factum, captivi ad unum remissi sunt.

Bellum in Rogerium Sicilia Regem pro Gracis.
MCXLIX.

His temporibus Hydrunto emissus miles Rogerii Regis ductu extremum Orientalis imperii moliturus erat excidium. Is enim pro libidine efferus in Ionio mari, quod per summum scelus, & avaritiam Imperatorius Quæstor classe nudaverat, Corcyram, Thebas, Chal-

Chalcidem, nullo prohibente, occupavit: inde infestis agminibus in Peloponnesum raptus opimas quoque Byzantii prædas affectabat. Tantis malis Græcus Imperator oppressus ad Rem. veterum injuriarum oblitam legatos exoratum misit, ut pro imperii incolumitate tunc etiam contra progredientem hostem arma distringeret. Nostri ex instituto turbatis amicorum rebus præsto affuturi, validam navium classem in Corcyram decernunt, præfectis maritimo apparatui Joanne, & Rainerio Polanis. Rebus ad votum succedentibus, Corcyrenses primò, captis Siculis triremibus XIX. hostili jugo exempti: mox insula necessariis munita præsidiis, in Siciliam belli incendia translata: faciliùs triumphandum erat de hoste res alienas haud amplius invasuro, cum suarum defensionum parum sufficeret. Trajectis Venetis nullum Sicilia funestæ cladis genus non est experta: pagi vastati, ædificia incensa, atque incolarum permulti in captivitatem abducti: multa ubique strages. Nec mirum, sævit enim sui quoque impotens animus, ubi impotenter irritatur, maximè, ut iis opem ferat, quibuscum amicitia, fœdusque intercedit. Ita igitur Græcum imperium ea tempestate Venetis armis non solum, ut sæpè antea, defensum, sed antiqua eidem servata majestas.

Cum Finitimis navalis decertatio.
MCL.

DOminico Mauroceno imperante adversus finitimos populos, seu veriùs piratas, pari felicitate pugnatum est. Sex longæ naves urbe emissæ totidem Anconitanas biremes interceptere, extorta ab latronum manibus rapina, interemptoque duce. Sed in Polanos, & Histros piraticam quoque exercentes majori apparatu transmissum. Pola oblecta in obsequium rediit ea lege, ut Veneto Principi in bellum proficiscenti daret auxilia: eadem pœna mulctati Æmonenses. Demùm cum Anconitanis contracta societas, percussumque fœdus in communes hostes cum Siculis. Sic Respub. aut metu, aut amore vicinas, remotasque nationes sibi conciliare potuit.

*Victoria de Ulrico Patriarcha
Aquilejensi.*
MCLXII.

Vitale Michaelio Duce hujus nominis II. bellum decernitur in Ulricum Patriacham Aquilejensem. Hic indignè ferens Gradensem sibi Metropolitanò à Romano Pontifice prælatum, cum auxiliaribus Carnorum exercitibus Gra-

dum invadit, ejectioneque Antistite, plurimam inde tum profanam, tum sacram, prædam exportat. Veneti subsidia oppressis allaturi, antequam delerentur, ad primos tumultus accurrunt, Gradumque armatis triremibus delati in obvios hostes eò vehementius, quò iis numero impares, irrumpunt. Verùm quia pro subditis injustè laceffit bellum gerebatur; post ancipitem diù conflictum, Carnis turpissimè fugatis, ad nostros deflexit victoria, nihil inde cessatum ab armis, Ulricus in captivitatem ductus, Gradum receptum, & libero Marte per Carniam excursus: sic tota provincia cessit in prædam. Rem admodum præclarè gestam, postremis Bacchanaliorum diebus anniversarii ludi testantur. Cæterum ut exteris gentibus id quoque Venetæ benignitatis, & clementiæ constaret exemplum, Ulrico cum reliquis captivis pristina libertas à nostris ultrò restituta.

Pugna cum Adriensibus secunda.
MCLXIII.

PER eadem tempora Adrienses accitæ vicinarum gentium manu Venetos fines territarunt, ab Imperatore Federico Ænobarbo ad arma sollicitati; qui Alexandro III. hostis implacabilis nostros Pontificiæ majestatis cultores, propugna-

gnatoresque acerrimos summè oderat , vastarunt illi Caputaggeris , & Lauretum , multa abacta præda. Hanc noxam ulturus Venetus , scripto tumultuariè exercitu , in populatores irrupit. Verùm cùm illi se fuga subduxissent , pari sævitia agros , vicosque subvertit . At nullum memorabile prælium cum fugaci populo initum ; ex concepto tamen pavore ita ejus vires attritæ , ut nihil amplius in Rempubl. attentarit .

*Bellum cum Græcis Imperatoribus
secundum.
MCLXX.*

FUGATIS toto Adriatico piratis , producto imperio , edoctis experimento Siculis , quantum polleret Resp. restituta oppressis libertate , ictisque fœderibus cum finitimis populis , nulla circum arma strepebant : atque jure post magnas victorias magna quoque , & diuturna pax sperabatur . Sed inimica nostræ prosperitatis fortuna , quæ pacata erant , turbavit , graves ferendo simultates inter Emanuele Orientis Imperatorem , & Guilielmum Siciliæ Regem , cum quo Resp. sub id tempus fœdus inierat . Græcus bellum moturus in Siculum Venetos in societatem adfiscere nitebatur : verùm nostri fœderum leges sanctè colentes

negarunt auxilia, quæ in amicum Principem peterentur. Emanuel ea propter versus in rabiem, quæ arma contra Guilielmum compararat, in Remp. sine belli denuntiatione convertit, vocatoque in belli aleam Pannone, hic Spalatum, Tragurium, pleraque alia Dalmatiæ oppida suo Regno adjecit. Jussum interea ab Senatu, ut negotiatores Veneti omnes tota Græcia decederent. At ubi videt Emanuel nostros datæ fidei, & amicitiae (rarissimum in adversis exemplum) esse tenaces, quod vi non poterat, fraudibus assequi studet. Destinatis ergo oratoribus, sibi fore gratum profitetur, si Venetæ naves in Græciam ad mercimonia rursus traducerentur. Nostri, qui non nisi maturatè in arma provocari consueſcunt, permiffa suis in Græca emporia navigatione, veteres amicitias renovant, modò eum Guilielmo inita societas non abrumperetur. In hanc igitur sententiam ivere Constantinopolim legati. At nihil expectari poterat ab Græco hoste, quod fallaciis non scateret. Primùm itaque legatos non admisit: deinde, qui ex Venetis mercaturæ operam dabant, constituta ad inauditum facinus die, toto imperio conquisitos in vincula conjecit, interceptisque navibus eorum merces in fiscum redegit: legatos etiam violasset: sed hi trepida fuga dilapſi patriam petiere. Defixit impia rei atrocitas Patrum,

trum ; Populique animos , & deliberato omnium ordinum suffragiis bello , validissima expeditur classis centum longarum navium , quas totidem intra dies diligens fabrorum cura compegit , absolvitque studio festinantis vindictæ : sic annales produnt . Hæc minoribus adaucta navigiis Vitalis Michaelii Principis ductu in hostem ultionis avida dum rapitur , compressit primò totius Dalmatiæ defectionem , post in Eubœam delata , eam occupasset Michaelius , si Græcas fallendi artes novisset . Dum igitur insulæ Præfecto sanctè juranti , Emanuele præsentì bello quamcunque pacem prælaturum , credit , cohibet ille à vastatione milites , & de pace ineunda legatos ad Imperatorem decernit , eorumque reditum in hybernis juxta Chium statuit opperiri . Interim monitus Emanuel , quæ callidè cum Veneto acta essent , pacis condiciones moratur eatenus , ut , certa nostrorum pernicie , miles otio corrumpetur , ac opportunum temporis intervallum iis esset , quibus jam mandaverat fontes , ac flumina , unde classis aquabatur , venenatis succis imbueretur . Inde virulento potu infecta adeò acerbam passa est luem , ut non priùs infelix morbus sese remiserit , quàm post universi militis miserandum exitium . Fertur ex C. & LX. navibus , X. ac VII. solummodo , easque nudatas propugnatoribus , re-

migibusque , atque semifractas funesto
spectaculo remigrasse . Legimus etiam
omnes in ea expeditione Justinianæ fa-
miliæ viros periisse : unico superstite mo-
nasticæ vitæ , sacrisque addicto . Hic in
Reip. commodum , Pontificis indulgen-
tia , juncta sibi in uxorem Anna Michae-
lia Principis filia , uberem , & beatam
prolem suscepit , quæ illustri serie in hæc
usque tempora propagata , inclytæ genti ,
dubiisque Reip. rebus sæpè domi , bellique
auxilio fuit , ac ornamento . Dux interim ,
qui nimia credendi facilitate in deploran-
dum discrimen lapsus fuerat , consilii
inops , dissipatæ classis reliquias in pa-
triam secundo post anno omine infausto
reduxit : suo enim adventu adedè sæva
pestilentia urbem invaserat , ut paucos
intra dies penè habitatoribus vacua , de-
sertaque remanserit . Ipsi quoque Michae-
lio exitus lugubris fuit : quippe tanquam
Patriæ hostis , & proditor à tumultuante
populo interfectus est : memorabili cæteris
documento , rarè ea bella feliciter geri ,
quæ à ducibus suscipiuntur hostium natu-
ram , artesque ignorantibus , iisque mini-
mè credendum , qui semel fidem , atque
jusjurandum violarunt .

In Anconitanos expeditio prima .
MCLXXII.

E Manuel adhuc implacabili in Venetum nomen exæstuans odio , ut nullum infidiarum , aut crudelitatis genus intentatum relinqueret , quod in ejus perniciem , & contumeliam verti posset ; Henricum Dandulum alterum ex legatis ab Senatu missis , ut repeterent , quæ præterito bello Venetis mercatoribus per fraudem fuerant ablata , sub colloquii specie ad se vocatum candenti ère obcecat . Nec contentus jura gentium violasse , Anconitanos se junxit à nostrorum amicitia , horumque usus temeritate , rebus nostris se undequaque præbuit infensum . Verùm non defuit Reip. in adversis prudens consilium : inita enim cum Ariminensibus societate , Anconitanis toto pelago interdixit , expeditaque classe hostes intra murorum septa conclusit , ita ut gravioribus in dies oppressi incommodis , pacem implorare coacti fuerint , quæ illis ea lege concessa , ut illati damni estimatione mularentur .

Bellum pro Alexandro III. Pontifice in Federicum Ænobarbum Imperatorem.

MCLXXVII.

NULLUM unquam bellum à Venetis alicuiori animo susceptum legimus , quàm quo Romanæ Sedi sua auctoritas , & antiquum decus conservatum est . Federicus Ænobarbus cùm in animi sui deliramenta trahere nequaquam valuisset Alexandrum Pontificem hujus nominis III. ausus est eum excludere Pontificatu , & ab ejus obsequio , cultuque universam ferme Europam deterrere , aliis subrogatis Pontificibus . Verùm apud Venetos plus religio , quàm gratia valuit : & legitimo Antistiti obsequi , ac patrocinari maluerunt , quàm præsentem Imperatoris amicitiam per nefas demereri . Idem Federicus per finitimos populos Rempublicam turbat irruptionibus : & Alexandrum ad netem inquirens , ipse Romam armato milite contendit : adventu tanti hostis perterritus inermis Pontifex , Beneventum trepidans primò , mox in Gargarum montem , inde Liburnico navigio Jaderam , ac tandem in unicum libertatis , securitatisque asylum Venetias confugit . Tantus hospes à pio , & religioso Senatu summo honore , cultuque exceptus est , missique ad Cæsarem legati , qui illum publico

nomine rogarent, ut, depositis cum Alexandro odiis in ejus amicitiam rediret, ac veterem Romano Patri dignitatem affereret, rei que Christianæ prorsus consultum vellet. Superbo animo Federicus legationem excepit, extrema omnia minatus, nisi ad se quamprimum fugitivus hostis transmitteretur. Sed imperterriti Patres durissima quæque perpeti potius statuere, quam fidem erga Romanum Antistitem turpi aliquo facinore contaminare. Federicus hæc inter sui impotens, ac præcipiti furore actus cum LXXV. rostratis Othonem filium in oram Venetam penetrare jubet, ubi Histriæ littoribus appulsus, vi, & prece, tentatis maritimis oppidis, quædam oppugnat, quædam voluntaria deditione consequitur. Nostri non minori celeritate usi, Sebastiano Ciano Principe, & ductore, XXX. longis navibus in hostem procedunt. Non procul à Salborio, quod promontorium in Piranensi tractu est, commissum inter utranque classem certamen, dubioque Marte per multas horas certatum est. Postremò tamen, Deo in rem suam dimicante, Cæsariani, quamvis numero superiores, profligati sunt: eorumque classe fusa, dissipataque, LX. triremes, demersis, aut fugatis reliquis, in Ducis potestatem unà cum Othone devenere. Infelicem ejus belli eventum nonnisi ab irato numine profectum

Etum Imperatoris filius religiosè factus est ;
 quòd si se liberum facerent Venetì, acturum
 cum patre de pacis conditionibus , quibus
 minimè impetratis, reversurum ad constitu-
 tum diem, sanctè sponndit. Sic ille dimissus
 in Germaniam Patri injustam belli causam
 exhibuit ; ideoque à Superis immisam cla-
 dem, ac proindè tutiora fore oblatae pacis
 consilia , quàm execrandum Diis, homini-
 busque discrimen subire . His commotus
 Ænobarbus Venetias concessit , & in Mar-
 ciana æde veteres cum Alexandro , & Re-
 publ. simultates detestatus, fœderis, ac in-
 eundæ pacis cupidissimum se præbuit : hæc
 ubi solemnī ritu firmata fuit , Cæsar pri-
 mum decessit ; at Pontifex, antequam Ro-
 mam rediret , in accepti beneficii memo-
 riam augustissimis Principem , & Remp.
 honorum insignibus illustravit . Hinc per-
 durat Adriatici maris Veneto sanguine par-
 ti confirmatum imperium , annua ejusdem
 desponsatione : hinc publicarum litterarum
 plumbea obsignatio : hinc cætera illa insi-
 gnia , & ornamenta, quibus decoratur Dux
 Venetus, cum se regia majestate conspicien-
 dum tradit . Porro ex tam pio bello Vene-
 ta Resp. clarissimum sibi inter cæteras na-
 tiones pietatis testimonium promeruit.

Jadera quarta defectio .
MCLXXXVII.

VRhs hæc insigni jam levitate clara non pudore , aut metu cohiberi potuit , quin imperante Aurio Maripetro quartam molita defectionem ad Belam Pannoniæ Regem desciverit . Perfidia , ac temeritati virtute , viribusque it obviam Resp. & in id unum sua convertit studia , ut domitum jam rebelle oppidum singulari animadversione cæteris fidei servandæ documentum præberet : quia verò laborante ærario publico celeriter classis instrui non poterat , è civibus locupletiores , quando omnia patriæ debemus , privatas opes in publicam causam erogantes satis opportunum apparatus procurarunt . Privatis itaque auxiliis hoc potissimum tempore in Dalmatiam transfretatum est . Jadera acri cincta obsidione dum assiduo machinarum impetu quateretur ; & circumcincta armorum fragor obstreperet , proximæ insulæ , castraque minùs firma in nostram potestatem venire . At ipsum belli caput penè jam profligatum cum in ditionem nutaret , Clementis Pontificis hortationibus servatur , pactæque sunt cum Rege Bela in biennium induciæ , & soluta obsidio . Datum & hoc jugis observantiæ erga Romanum Præsulem pignus , satiùsque Vene-

to .

to vilum est, se pium, quàm triumphatorem exhibuisse.

Bellum Syriacum quartum.

MCXCH.

IN Syriacum, sacrumque bellum Veneti haud segniter jam quartò arma corripiunt. Et quia instructissimus debebat terra, marique deduci exercitus, ut Hierosolymæ è barbarorum manibus extorquerentur, ipsi, quam poterant, lectissimam classem appararunt. Hac per Syriaca deVecti littora circa Ptolemaidem constitere: urbem Saladinus Ægypti Sultanus occupaverat, quam Veneti continuata unius anni obsidione, eximiaque virtute recuperarunt, atque rursùs obtinuerè sibi antea jure bellico acquisita privilegia. Recepta, Ptolemaide, complura littorea oppida maritimis fatigata oppugnationibus Christianæ Reip. restituuntur. His tandem, præclarisque aliis in externa provincia perfuncta bellis, Veneta classis tertio post anno incolumis, ac ingentibus de profligatis Barbaris onusta spoliis ad urbem appulit.

Expedition in Pisanos.

MCXCIII.

Pisani Syriacis quoque rebus auxiliati classe, non obscuram sibi famam, gloriamque in maritimobello pepererunt; verum æmulatione imperii, atque invidia bellicę laudis cum Venetis toto triennio decertarunt: hinc in apertas inimicitias ventum est. Cùm primùm enim Veneta classis reducta fuit, illi extemplo aperto Marte Polam tributariam Reipub. urbem opprèssere, eo consilio, ut ibi, si per otium licuisset, hybernarent, sique se offerret occasio, è propinquo omnia Venetis infesta redderent. Exciti Patres insigni contumelia, navibus ad eam ulciscendam convolarunt. Prope Polam in pugnam vocatur hostis, confertur utrinque audacter manus, victor Venetus oppidum recipit, & plures hosticas naves in portu deprimit, ac incendit, arcemque, ne ulla deinceps inimicę genti securitatis spes ibidem restaret, muris undequaque nudat. Verum etiam ut toto pelago fœdifragum hostem pelleret, Methonem adnavigat, & alteram in itinere classem offendit, quam repetito certamine denuò superat, cogitque Adriatico sinu excedere. Tandem propriam causam in Veneta mansuetudine reponentes Pisani,
ho-

honestissimam pacis conditionem impetrare .

*Bellum Constantinopolitanum primum. Terge-
stum receptum. Jadera quinta defectio.*

Creta Veneti iuris facta .

MCCII.

Turcarum ferum genus adeò Christiano nomini fuit ab origine infestum , ut ad illius natum excidium , & ad hominum , urbiumque stragem creditum sit . Hæc publica Orbis lues à Scythia , quam Tartariam appellamus , effluxit , suaque multitudine ferox , universa Asia penè subacta , jam Syriæ , ipsisque Hierosolymis , quæ erant reliquæ , inconditis armis imminebat . Sub id tempus actum de ea provincia , ac de sancta urbe videbatur , nisi deprecante Innocentio Pontifice Balduinus Flandriæ Comes , & plerique alii vicinarum regionum Principes sacræ militiæ nomina dedissent . Innumerabiles itaque copiæ , toto ferme Occidente conscripto , in Barbaros moturæ erant : at non aliorum ope , & auxilio faciliùs , quàm Venetorum trajici poterant in Asiam . Delati igitur primùm Venetias Francorum duces ad convectandum belli apparatus , quod maximè in votis sacro militi erat , promptum non solum beneficio Senatum habuere , & magnificentia liberalem , (condonata nimirum ingenti pecuniarum

rum summa, quas mutuo acceperant) sed etiam belli socium in ea expeditione, quæ tandem conversa est in Græcum imperium. Id unum interea ab amica gente impetrare visum, ut paribus animis, armisque oppugnata Jadera, quæ per eos dies defecerat, Venetæ ditioni restitueretur. Firmatis hac lege foederibus, jamque adventantibus ex Occidente copiis, Henricus Dandulus, quem ab Emanuel Græco Imperatore obcæcatum diximus, ut suos, si non manu, consilio saltem juvaret, classem CC. ac XL. navium, ex quibus LX. rostratæ, cum reliquis ductoribus conscendit. Conspectu numerosissimæ classis territi Histri, qui rapinis infestabant Adriaticum, annuo tributo Venetis iterum se subdidere. Tergestum eisdem ob insultus vi petatum in Reipub. potestatem tum primum venit. Post hæc in Jaderenses traductum; obsidio quò longior, eò laboriosior fuit, quia Pannonēs acerrimè rebellem urbem armis protegēbant. Forti tamen, & obstinata oppugnatione victa Venetum imperium quartum accepit. Hæc dum geruntur in Dalmatia, Alexius Angelus, assumpto Comneni nomine, Isaacium fratrem Orientalis imperii administratione, oculisque privaverat, cujus filius fuga dilapsus in socialia nostrorum castra pervenit, opem in infelicis patris subsidium adversus tyrannum deprecaturus; utque magis Ducum moveret animos,

pre-

precibus ingentes addidit pollicitationes ; Cretam per eos dies ab Insulanis spontè sibi oblatam , Bonifacio affini suo ex Montis-ferrati Marchionibus cessit . Lacrymis adolescentis , scelerisque indignitate permoti omnes è Dalmatia Constantinopolim solvunt , & ad continentem prosperè appulsi , exposito exercitu , paratisque bello navibus , terra Franci , Belgæque , pelago Veneti urbem adoriuntur , perrupta catena , quam ad utrumque Bosphori caput imposuerat Tyrannus , ne in portum pateret aditus , primum mari per nostros ex improvviso regia urbs invaditur , & hostiles aliquot biremes capiuntur : exinde faciliùs opera bellica mœnibus sunt admota , colligatisque simul antennis è cordibus in muros jacti pontes , è quibus nostri missilibus , igneque in proxima tecta coniectis , hostem ita terruere , ut eodem trepidè se recipiente , primi intra mœnia desilierint : hæc dum fierent à classariis , ab terrestribus copiis impigrè quoque res gesta ; quippe plures erumpentium Græcorum turmas prostrarunt , fugientesque subinde insecuti urbem tumultuariò ingressi sunt . Adversis his rebus Constantinopolim tanta incescit consternatio , ut torpentibus civium animis post Alexii fugam , & desperationem , profugi , & ærumnosi Principes à suis recepti : & Imperatores denuò acclamati fuerint

Isa-

Isaacijs, & Alexius filius, cum quo senex pater speciem retinuit pristinae dignitatis. Sequenti anno, dum exigere satagunt, quæ auxiliariis exsolverent in obstricti animi significationem, temporarium civium suorum ingenium experiuntur. Coorto enim tumultu à Murtzuphlo uno è proceribus imperium affectante obtruncantur: contractoque seditiosorum agmine in fœderata castra fit irruptio. Sed Græca gens novandis rebus, quam gerendis aptior, à nostris facile repellitur. Murtzuphlus igitur cum fortunam sibi tanquam impio adversam cerneret, desperata venia, fugæ potius, quam bello salutem commisit. Mortuis itaque, ad quos legitime spectabat imperium, exactoque tyranno, Franci, ac Veneti novis se devincientes fœderibus in hæc pacta ivere, ut quidquid esset sociis armis acquisitum, æquo jure divideretur. Hisce conditionibus iterum Constantinopolis oppugnatur: atque eadem, quæ prius, emicuit Venetorum virtus, & robur. Priores enim pulsas mœnibus Græcis, urbem intrant, portas confœderatis recludunt, exceptique in hunc modum utriusque exercitus ductores, triumphandi prorsus acclamatione simul consalutantur; regiam urbem in jus, ac ditionem recipiunt, anno suscepti belli tertio. Balduino Comiti Imperatoria dignitas communibus Ducum suffragiis de-

defertur , Urbis verò Patriarchalis sedes Thomæ Maurotено Veneto . Post hæc ex fœderum lege omnes Ægei , ac Jonii majores insulas sibi Resp. subjecit : Cretam quoque recepit , aliaque plura in se comoda ex hac Byzantina expeditione luculenter congeffit . E minoribus autem , quæ iisdem in maribus erant , Insulæ , ut cuique occupanti cederent , Senatus consulto permissum . Hoc ubi publicè indictum , Marcus Sanutus , alique ex primoribus , Danduli , Viari , externi quoque nonnulli victricia illis in locis arma circumferentes , omnia , quæ piratarum , latronumque antea fuerant , receptacula sibi subegerunt : magno id factum Reip. commodo , & ad vitanda publica dispendia , & ad certum incrementum , ut , cum opus foret , suorum civium auxiliis , viribusque uti posset .

Exeditio in piratas prima .

MCCV.

VEnetì ut parta Constantinopolitano bello non tam ab domestica insularum temeritate , quàm ab externo hostium insultu tuta redderent , Petro Ciano Duce , unius & XXX. expeditarum triremium classem per Hellespontum disponunt , ne publica ibidem viderentur deesse præsidia . Triremibus dantur præfecti

fecti Rainerius Dandulus, & Rogerius Permarenus viri ambo nauticæ artis, militiæque peritissimi. Hi ad commissum munus egressi obvias in Adriatico sinu nonnullas præsertim latrocinantium Ligu- rum naves habuere, quibus, ducente Ve- trano, per maritimam nostrorum oram, apertissimè deprædabantur. Cum his igitur tanto impetu congressi sunt Veneti Duces, ut Ligur eorum impressionem mi- nimè sustinuerit, victusque cum trepidè ex acie aufugeret, reliquerit in nostras ma- nus Vetrani prædonum caput. Hic Cor- cyram deportatus piraticum scelus capite luit. Post hæc ad evertenda reliqua pira- tarum latibula conversi, Methonem, Co- ronemque, iis inde ejectis, expugnant, receptaque castra firmant præsidiis. Mis- sa quoque in Corcyram insulam nostrorum colonia, tutum adversus indigenas, ac te- merarios hostes munimentum.

Rebellantium in Creta tumultus sedati.

Bellum cum Genuensibus primum.

MCCVII.

Purgato piraticis excursibus Adriatico, Veneti ductores in Ægeum naviga- runt, ut Cretam ab invidorum armis Rei- pub. vindicarent. Stetit tamen cupiditas hæc opere non minimo: nec nisi post va- rios bellorum, & casuum eventus illa ite- rum

rum Veneto imperio se submisit. Pacatam Insulam primus omnium Cretici Ducis titulo Senatus decreto administravit Jacobus Theupolus : cui tamen non defuit hostis in ipsa Creta nutritus, & multiplici seditione contumax. Ageostaphanitæ familiæ luxus, & ambitio, quæ Insulæ imperium affectans, Cretenicis ad rebellandum incitaverat. Theupolus, cognita re, Marci Sanuti, qui Naxo, ac reliquis Cycladibus imperitabat, auxilia imploravit. Inde castris receptis, quæ defecerant, barbarum auctores facile depressi sunt. Sanutus ex successu Cretenium levitate, ignaviaque deprehensa, quasi non patriæ, sed sibi vicisset, cupiditate insulæ accensus, eam sui juris facere conatus est. Dam nato itaque Theupoli duro, & vecordi imperio ex levi quidem causa, annonæ ad usum publicum deficientis, tumultus excitat, fugatoque legitimo gubernatore, ipse Cydone, hodie Canea, primaria Insulæ urbe potitur. Hæc Venetiis certis rumoribus sparsa sollicitarunt auxilia, quibus Sanuti protervia castigaretur. Classe igitur secundis ventis in provinciam brevi delata, audentior Theupolus Themeno, quò confugerat, egressus, dum aliò iter fingit, noctu Cydonem devenit, observataque excubitorum desidia, mœnibus scalas admovit, & intromisso milite urbem ex improviso occupat. Hinc Sanu-
tus

tus consternatis ægrè suas in Ægeum sedes repetit: quibus sic præclarè gestis, Theopolo in patriam reversuro succedit Paulus Quirinus. Hoc rem Creticam gerente, biennio post altera excitata seditio, cujus incendium ex scintillula adeò crevit, ut penè tota insula conflagrarit. Interceptos aliquot sibi equos ab arcis Bonreparitanæ præfecto Joannes Scordilius querebatur, homo summæ apud Græcos auctoritatis: unde factum, ut cum opinione suâ tardiùs jumentorum restitutio procederet; privatam injuriam publico scelere vindicandam ratus, exstimularet in defectionem Cretenses. Quirinus ad factiosos conatus coercendos destinavit Joannem Gritum: qui dum exercitum inexploratò ducit, necatur à rebellibus in Pituronensi saltu circumventus: cautiùs deinde progressus Quirinus tumultuantes magna strage afflixit, & penitùs delevit. Subinde Genuenses tantæ insulæ accessione veriti, ne in suam perniciem Respub. nimium excreceret, summo studio Venetos ex ea depellere connixi sunt. Junctis igitur viribus cum Melitenfium Comite, cui plurima cum Cretensibus privatim amicitia intercedebat, totam penè insulam, quâ vi, quâ fraude, à Veneti nominis devotione abalienarunt. Sed Rainerius Dandulus alter triremium Præfectus, hostium conatibus armata vi occurrens, fortiter

D juxtà,

juxta, ac feliciter pugnando, quæ desciverant, oppida recuperavit: & sic bellico quoque jure in ditionem Venetorum Creta redacta est. Verùm incolæ novum detrectantes imperium turbas, rebellionefque concitarunt, ad quas etiam compescendas biennio post missus idem Dandulus, dum strenui ducis, & militis obit munera, telo inter dimicandum conficitur. Patres sub hoc valdè anxii de retinenda insula, in eam prudenti consilio decernunt coloniam ex patricio, plebeoque ordine: qua deducta postmodum tranquilliore illius Insulæ statu potiti sunt. Verùm tamen Genuenses recentis semper invidiæ causas nacti, sævis excursionibus maria navigantibus infesta reddebant. Joannes Trivisanus classis ductor hostium insolentiam reprimere aggressus, quamvis navium numero, & robore longè impar, animo tamen superior XX. eorum infectatus rates, non longè à Drepano Siciliae promontorio XII. cepit, & reliquas fugavit, atque ita dissipatis prædonibus Inferum, Superumque mare nostris mercatoribus aperuit. Sed & hæc victoria pacem peperit, quam supplex petiit Genuensis, eam iterum violaturus, ubi de gloria, ac potentia certamen cum Veneta Repub. suggessisset ambitio. Post hæc Cretensi Magistratu abeuntem Quirinum sequitur Joannes Storlatus. Turbavit & hujus administrationis quietem

ter-

tertia à prima quartodecimo post anno nata rebellio . Excitatam legimus à Mellesinis turbidis civibus , & qui rapinis , & cædibus eos mulctabant , qui in nefandi sceleris societatem nomen dare recusabant . Storlatus defectionis initiis maturè occurrendum ratus , extemporaneo collecto milite sceleratis hominibus ita sese opposuit , ut , reportata insigni victoria , eos in tantam rerum desperationem adduxerit , ut vocato Vatazo Lesbio Principe , promissoque ei Cretæ regno , illam negligerent libertatem , qua sub mitissimo Reip. dominatu frui poterant . Vatazus haud ignorans levissimam occasionem præter ipsem ad res maximas veluti sese ducem interdum præbere , XXX. armatas naves traduxit in Insulam , quarum Navarchus arcium oppugnationi ea solertia incubuit , ut intra paucos dies Rhitymnam , Milopotamum , aliaque castra deditione obtineret . Dux Vene- tus , cui jam cum duplici hoste pugnandum erat , contra Vatazianam classem constituit primùm configere , ut , externo profligato , domesticus hostis omni opede- stitutus faciliùs cederet . Quare comparato navali , terrestrique robore , ut in conspectum hostilis classis venit , strenuam manu , consilioque navavit operam , & ita suos in pugnam hortatus est , ut Vatazianos trepidantes fugarit ab Insula ,

& plures naves ceperit; nec ad integram victoriam ipsa defuere numina; quippe reliquas jam dispersas propè Cythera foedissimum naufragium absorpsit. Sublato itaque insidiarum, turbarumque fomite, fracti sunt seditiosorum animi, consumptæ vires, inque fidem reducta rebellia oppida. Hinc res Cretenſes sine tumultibus aliquandiù fuerunt, quietumque imperium Storlatus Bartholomæo Gradonico ſucceſſori reliquit, atque hujus miti ingenio, prudentique dexteritate factum est, ut parta tranquillitate diù insula frueretur. Tandem regente Andrea Zeno magnis irarum motibus iterum concussa est Creta. Occiso Marco Silenza viro primario, Senatus in nocentes, qui aufugerant, exilii poena animadvertit. Verum quia fontes ad supplicium gravius conquirendo, perperam. Candacenses querebantur; aliis contrà in eos satis animadverſum videretur; in diversa ex jurgiis studia, & motus distracta plebs crebris dimicationibus ex occurſu partium se lacerabant: medio urbis foro civium spectabantur certamina, sprete Ducis majestate, ut nullibi fortassis lacrymabilior civitatis facies: pars illa, quæ domestico congressu inferior erat, tanquam si cum altera ipſe Dux sentiret, potiùs quàm civi cedere, externo se dedere meditatur; hinc quartam in defectionem apertissimè discessum. Cæterum, quæ

quæ per eos dies ab Italia venerant copiæ , ductore Zeno , civiles impetus sedarunt , & nutantem Insulam , captis , damnatisque flagitii auctoribus , in fide retinuerunt . Non tamen diù ab consuetis turbis respiravit Creta quintam passa seditionem post quinquennalem quietem. Quidam Cortatii fratres , natalibus , majorumque titulis elati , Venetum ab Insula magistratum , & ipsum quoque nomen deturbare conabantur. Perniciosa in primis scelestorum manu quædam nobiliora castra capta , occupatæ Desilomates angustiae , è quibus perduelles sæpè exiliebant magno insulanorum incommodò . Marcus Gradonicus iis occurrens dimicavit feliciter , & rebellem turbam brevi prostravit . Ab insula demigrarunt Cortatii : affecclæ pro venia supplices impuniti ultrò etiam recessere . Sopitis in hunc modum tempestatibus , quæ viginti , ac sex annos Cretam exagitaverant , optata demùm tranquillitas affulsit.

Bellum Patavinum tertium.

MCCXV.

QUo tempore in Creta tumultus exorti , tertio cum Patavinis pugnatum est . Tarvisini per eos dies nimio fortassè luxu dissoluti , ludos quosdam

D 3 mi-

militares instituerant , ad quos confluebant vicini populi , non tam ut ea spectarent certamina , quàm ut rudimentis iis ad seria se exercerent : eò itaque Venetorum , ac Patavinorum juvenum plurimi accesserant : cumque Venetis jam certaminis palmam spectatores deferrent, Patavini sola invidia moti , factò in Venetum signiferum impetu , vexillum , Marcia icone , & patrio numine venerandum turpi , ac probrosa contumelia lacerarunt . Ex injuria continuò orta indignatio tempore adolevit , succrescentibus odiis , & invalescentibus factionibus . Patavini , tanquam ipsi eam vim , & convitia passi essent, indictis armis in nostros concurrere primi , suppeditantibus auxilia Tarvisinis , & dimisso exercitu Venetos agros populantes intravere ; nec rapinis contenti , Bebianam turrim non procul à stagnis se demolituros , urbemque ipsam invasuros minitabantur . Ad coercendam igitur hostium audaciam milites subito conscripti sunt , qui audacter progressi hostilia castra adorti grave circa turrim ineunt certamen ; quo procedente , tantum pavoris Patavinis incussum est , ut panico veluti metu perculsi , quàm cuique patebat ad fugam via , dilaberentur . Nihil deinde à victoria temperatum : nostri ad prædandum in agros effusi , opima de hostibus

bus spolia retulere : & cùm ulterius ad municipiorum expugnationes properarent, revocati sunt ab Senatu, pro hostibus pacem exorante Patriarcha Aquilejensi Innocentii Pontificis Legato, quam utrique populo Senatus clementissimè concessit.

Bellum in Federicum II. Imperatorem.

MCCXXXVI.

SUb hæc tempora, Jacobo Theupolo Remp. moderante, in duas partes divisa est Italia, quarum uni, quæ Romano Pontifici studebat, Guelforum nomen inditum : Gibellinorum alteri, quæ Cæsarem sequebatur, intestinisque odiis, ac factionibus miserè lacerabatur; hæcque infanda nomina, imperante Federico Secundo, ardentioribus propagata studiis civilem pestem, ac perniciem latè in Cisalpina Gallia sparsere. Tota hac provincia, perstreptibus Cæsarianis armis, in apertum discrimen Pontificia quoque dignitas ruebat, ni Veneti ex veteri instituto eam tutati essent. Itaque contra Federicum Romanæ ditionis oppida turbantem ab Senatu valida ornatur classis, & Petro Joanni Theupolo in Apuliam ducenda traditur. In eam regionem Venetus ductor profectus Thermolas, & Bestricem, aliaque complura castra Pontificiæ sedi rursùs asseruit. His peractis, à mari in continens bellum

translatum, Petro Theupolo duce tum à Mediolanensibus in Prætorem ascito, pugnatum est. Porro non eadem ubique fortuna. Theupolus enim dum ad Cortem novam parum prosperè confli- git, accepta clade captus, missusque in Apuliam, à furenti populo ibi d'scerpitur, quòd antea illius frater eam provinciam in summas difficultates rede- gisset. Hæc inter Cæsar nostris adhuc infensus, quia Pontifici favebant, suis militibus Bebianæ turris demolitionem ag- greditur; hostiumque impressionibus pro- cubio illa cessisset, nisi confestim magna navicularum copia in subsidium missa esset: hoc auxilio pulsus hostibus turris egregiè ser- vatur.

Bellum Constantinopolitanum secundum.
MCCXXXVIII.

PRO amicorum securitate denuò Ve- neti ad arma revocantur. Ut pri- mum namque nuntiatum est, Constanti- nopolim à Joanne Vatazo Lesbi Princi- pe, junctis cum Ponti Rege copiis obsi- deri, captamque iri, si tantillum amicorum auxilia tardarent, Senatus in subsidia- riam expeditionem quinque, ac viginti triremium classem, ductoribus Leonardo Quirino, & Marco Gussonio decernit. Hæc in Hellespontum advecta hosticam in illius pelagi faucibus offendit, quæ ibi
conj

consultò morabatur, ut impediret suppetias. Commissa itaque pugna pari utriusque constantia, dubium diù fecit belli eventum; sed tandem devicti, superatique hostes vaga fuga nostris reliquere locum, & victoriam. Soluta urbis obsidione, partoque triumpho insigni Venetias classis remeavit. Vatazus tamen, qui Constantinopolis potiundæ impotenti ardebat cupiditate, nostrorum cognito recessu, denuò rem navalem instaurat; & majore impetu repetit obsidium. Iterùm tamen à Venetis repellitur, urbiq; sua securitas confirmatur. Joannis Michaelii solertia, qui pro Venetis incolis Byzantii tum Prætorem agens, paucis in Vatazum eductis triremibus, atque tentata veriùs, quàm inita pugna, obsidentem non sine memorabili clade fudit; ostenditque, non multitudine militum, sed animorum virtute victoriam parari.

Ferraria Romano Pontifici servata.

MCCXL.

FERRARIAM Federicus Imperator Romanæ Ecclesiæ ademeral. Veneti igitur, qui se, suaque omnia summo Antistiti devoverant, adversus Cæsarem iterum arma sumunt. Classis nempe sub Jacobi Theupoli auspiciis Padum ingreditur, quæ intereà secundo flumine invec̃ta, dum terra Pontificius Legatus, & Actio.

D 5 Ate

Atestinus urbem perstringere adnituntur , bellicarum machinarum robore disjecit mœnia, unde per ruinas introgressi nostri portas recluserunt terrestribus copiis , ducto in captivitatem Cælaris Præfecto Salinguerra Taurelio. Ex hoc postea tempore Ferrariæ libera administratio data est Atestinorum familiæ , quæ urbem à Pontificibus Marchionis primum, deinde Ducis titulo acceptam jure hæreditario retinuit ad nostram propè tempestatem . Atque hæc expeditio plurima Venetis privilegia peperit in ea civitate , quæ deinceps Venetum Prætorem sibi deligendum perpetuò statuit , tunc ad id munus electo Stephano Baduario, qui Pontificias turmas deduxerat .

Jadera sexta defectio.
MCCXLII.

VIx à Ferranriensi bello respiratum erat : & nondum arma deposita , cum Jaderæ toties rebellantis alia defectio hæc excitasset , quæ nunc etiam , Veneto Magistratu repulso, Regis Pannonici gubernacula suscepit . Allati nuntii rumor quò magis sua indignitate Patrum animos incendit, eò citiùs ad parandam ultioni classem impellit . Conscripto milite , imperatoque remige , in expeditionem destinatur Rainerius Zenus . Is postquam Dalmatiæ applicuit ,
Ja-

Jaderam tùm terrestri, tùm maritima manu circumdedit, & duobus mensibus terra, marique oppugnatam jam sextùm Venetæ dominationi subjecit. Post hæc Patribus placuit legatos in Pannoniam mittere, Stephanum Justinianum, & Petrum Dandulum, eloquentia præstantes viros, qui publicam rem eo maxime nomine juvarent, quòd à Rege impetrassent eam opem & esse, & futuram rebellibus ultimam; remisso etiam jure omni, quod sibi quoquomodo in ea urbe esse posset. Tandem civium Venetorum colonia Jaderam ad tempus traducta est: quippe urbes domesticæ fidei exemplo stabilire interdum non minus est, quàm eandem armis acquirere.

*Compressus Alexii Calergii tumultus
in Creta.*

MCCXLVII.

NULLA est fides, nullumque tutum obsequium, ubi fines cupiditatis augeat innata ferè viris principibus ambitio. Alexius hic Calergio sanguine, opibusque superbus non unius urbis, sed totius Cretæ imperium affectabat. Tantis ea propter incendiis, direptionibusque rebellis legio, cui ille præerat, universam fœdavit insulam, ut præcerto constaret, nullius mali expertem esse provinciam,

D 6 ciam,

ciam, in qua vigerent seditiones, ac intestina bella. Pudet ejus temporis execranda scelera, impios ausus, scelestasque civium cædes hîc attexere. Cæterùm in Creta extremum subiisset excidium res Veneta, nisi Vitalis Michaelii Cretici Ducis prudentia, ac dexteritate pax cum Alexio firmata esset. Juvat quandoque pacisci cum subditis. Horum quippe exasperati animi non rarò in audaciam, & desperationem feruntur, non impetrata Principis clementia, quæ opportunè adhibita, populorum querimoniæ plerumque sedantur, ac rebellionum, seditionumque fax, si qua est, conso-
pitur.

Bellum in Actiolinum Tyrannum.
MCCLVI.

Gubernante Remp. Rainerio Zeno, Actiolinus Patavinorum tyrannus, ex obscuris natalibus ad regiam propè majestatem evectus, universam penè Cisalpinam Galliam obtinebat, permit-
tente Federico II. Imperatore, cujus partes, & nomen ille impigrè tuebatur. Impensè audax, & impius ita in humanum genus grassatus est, ut supra triginta mortalium millia pro libidine ingenii sui teterrimis suppliciis sustulisse dicatur. Itaque ad evertendum hoc naturæ monstrum accessit Venetias Alexandri IV.
Pon-

Pontificis legatus, ut nostri adversus tyrannum diris omnibus devotum auxiliares manus conferrent. Pontificiis monitis, & vicinarum gentium calamitate permoti Patres, confestim delectum militum habent, imperantque navigia, quæ ex Bebuis in Meduacos amnes devecta, exercitum tutius, celeriusque exponerent. Copiæ Venetæ eo consilio ductæ in hostiles agros, ut populationibus, & villarum incendiis hostem mœnibus inclusum in patentes campos elicerent. Nec fecius res contigit. Ansedinum Actiolini nepotem, & Patavinæ urbis Præfectum ad Corregiolam obvium habuere: hinc ille metari statuerat, & Venetos à prædis cohibere. Verùm ex conferta acriter manu inde submotus est magna clade, & in Saccense oppidum fugatus. Insequentibus autem nostris, inde etiam turpiter dilapsum tandem excepit Patavium. Inde tota circa eam urbem belli moles, quam admotis machinis noctu, diùque Veneti oppugnare decreverunt, quoad, expulsis tyrannis, libertatem civibus procurassent. Lacesiti primùm sunt hostes ad Pontem-curvum, atque intra munitiones fœdissimè rejecti; deinde circa Altinatē portam, supervenientibus Pontificiis, atque Atestinorum copiis bellum recrudit, Ansedinoque fuso, & in fugam acto, urbs capta est. Actiolinus, accepto
amissi

amissi Patavii nuntio, properè motis castris à Mantuæ obsidione in illius conspectum advolavit : sed irruenti, provocantique in certamen tyranno nihil aliud responsum, objectumque, quàm grandi vallo, & robustissimis defensoribus munita moenia, militarisque constantia, quæ inaniter furentis impetum fregit, ac delusit. Quarecùm recuperandæ urbis spe frustraretur, quasi in ultionem versus, quos ad XII. millia suis in castris habebat, Patavinos, vario mortis genere ad unum necari iussit. Hac ne dum satiatus rabie Patavino agro decedens totam Insubriam immanissimis crudelitatibus replevit. Tanta ille favitia socias omnes civitates in se commovit, atque demùm has suorum scelerum vindices habuit. Quem itaque immaniter oderant, contracto ad Abduam, numerofo exercitu subito appetiere; Deoque justæ causæ favente, tandem Actiolinus vulnerato crure captus Soncinum perducitur, ubi furiis ultricibus agitatatus sibi mortem tyranno dignam conscivit. Hac victoria bellorum reliquias persecuti Veneti, Albericum Actiolini fratrem Tarvisio pulsum cum uxore, liberisque obtruncarunt, ne quisquam aut ad scelus, aut ad vindictam ex tam nefaria domo superesset. Ita penitùs Actiolina tyrannide extincta, exoptata rediit libertas, quæ totis triginta quatuor annis ab universa

fer-

fermè Cisalpina Gallia, totaque Venetia
exulaverat.

Bellum cum Genuensibus secundum.
MCCLVI.

CUM Genuensibus grave, & diuturnum
Resp. bellum gessit, quo gens illa ar-
mis ferox Venetos ita exercuit, ut hi viderentur quasi suos habere Carthaginenses.
Levis quidemea causa, quæ duos potentissimos Italiae populos funestissimis cladibus,
parva interdum respirandi mora, commisit.
Genuenses in similitates pertraxere Venetorum opes, & majestas: ex quibus invidia,
& odium, ac publica demum dissidia originem duxerunt. Postquam enim Christianorum Principum armis Hierosolymæ, ac
fermè tota Syria Barbaris crepta est,
Veneti, ut diximus, in Ptolemaide, Tyroque urbibus re præclarè gesta, juris dicundi suis facultatem obtinebant, ac proprias ædes, vias, forumque. Hæc eadem jura obtinuerant Genuenses, cum ipsi quoque Syriacam expeditionem collato auxilio juvissent. Nihil itaque utrique genti commune præter sacra templa. Verum cum de cœnobio Sancti Sabbæ in ipsa Ptolemaide orta esset contentio, singulis illud sibi vindicare conantibus, lis ad Romanum Præfulem delata ita componitur, ut eo templo, ædibusque tam
Vene-

que classe Tyrum redegit : Venetus Ptolemaidem victor, ac onustus spoliis admovit, ibique omnia Genuensium ædificia diruit, & eorum plurimos rapuit in captivitatem. Penitus autem integro duorum annorum spatio, quo pugnatum est, deletus esset hostis, nisi Senatus dicto parens Pontificis, pactis cum Ligure induciis, captivos restituisset.

Constantinopolis à Paleologis occupata.
MCCLIX.

L Esbi Princeps Theodorus Lascaris, morti jam proximus, filio impuberi Michaellem Palæologum, qui maternum ab Alexio Comneno trahēbat genus, tutorem dedit, mandata eidem tantisper potentissimæ insulæ dominatione, quoad ille capax imperii adolesceret. Palæologus per occasionem tutelæ ad invadendum insulæ imperium animum adjecit : cū igitur regnandi cupiditate nihil sit iniquius, quæ nec divinis, nec humanis coercetur legibus, ad infandam primò pueri cædem, mox ad Constantinopolitanum imperium, occupata Lesbo, sævos, impiosque conatus direxit. Sed quoniam ambitioni suæ adversum Achajæ Ducem opinabatur, hunc bello aggreditur, & opitulante, plerumque scelestis fortuna, captum

vin-

vinculis destinat , & Achajam sui juris facit .
Prosperrimis his rerum successibus , acqui-
sitoque regno superbiens , Balduinum
Byzantii Imperatorem armis invadit , re-
giamque urbem terra , marique infestat .
Is ad inopinatum recentis hostis adventum
terrestri manu raptim coacta strenuè in-
continenti se defendit : dum non minori
virtute Marcus Gradonicus , pro Venetis in
ea urbe Prætor , aliquot instructis navigiis
Palæologam classem propulsaret . Porro
servata fuisset urbs , si per ea tempora Bal-
duinus Græcis non imperasset . Hæc quip-
pè gens sua in levitate constans , Gallicum
exosa nomen , & administrationem , Pa-
læologo spem dedit urbis recuperandæ , si
cum validis turmis noctu ad mœnia tacitè
constitisset . Ille itaque expeditissimo mi-
lite stipatus , prope unam urbis portam
furtivè confedit : ubi cùm rei gerendæ
tempus advenisset , dato signo , à prodi-
toribus necantur vigiles , & novus Im-
perator cum suis intra muros admittitur .
Exauditur confestim horribilis debac-
chantium armorum fragor , & flebiles
undique voces , captum esse Byzantium .
Balduinus ad omnia pavidus cùm sibi
nullam recipiendæ urbis spem superesse
videret , instructo properè navigio , cum
Veneto Prætoře in Eubœam profugit :
sicque per prodicionem ad Græcos Con-
stantinopolitanum rediit imperium anno
octa-

octavo, ac quinquagesimo, postquam illud Galli, Venetique conjunctim habuissent.

Bellum cum Genuensibus tertium.

MCCLX.

Constantinopolis per prodicionem amisæ casus non levem Veneto Senatui curam intulit. At animo præsens XVIII. triremes armat, quibus Marco Michaelio imperatum, ut non solum adversus novos, si qui forent, Palæologi insultus rem Venetorum servaret: sed etiam, si è re videretur, Constantinopolim ipsam oppugnaret, & hostium loca omnia bellicis calamitatibus infesta redderet. Michaelium satis constat eam operam navasse, qua fractus Palæologus, desperatisque rebus dubio procul vrbe demigraturus crederetur, nisi Genuenses in nostræ partis invidiam, suæque spem, qua Peram, urbi contiguum oppidum, & Insulam Chium mercenariò captarant, laboranti Græco opem tulissent: unde geminato hoste, duplicatoque impetu confusa virtus, Venetumque robur, imparitate actum in fugam elanguit, postremisque fati concessit Michaelius. Verùm cum ad cohibendas inimicorum excursiones aliæ XXX. rostratæ submissæ essent: Jacobus Delphinus hoc auxilio satis opportuno erectus Eubœam rebellantem adortus est,

est, demissoque in continentem milite
per singulas illius insulæ arces victricia
signa circumtulit, nutantemque populum
Venetis asseruit. Plures posthac ex vi-
cinitate congressus habuit cum Ligure,
tantoque hinc inde odio pugnatum, ut
plures utrinque profligatæ naves, inter-
ceptæque dicantur, nihilque non actum,
quod in alterius partis damnum cessu-
rum videretur. Nullum sanè hostem ex-
perta est hucusque Reipubl. aut magis
irrequietum, aut minùs placabilem ipso
Ligure, cum quo multos annos, quasi
de imperio, & de gloria decertavit, par-
tim proprio, partim alieno Marte: ne-
que enim suum utrique populo studium
deerat in Syria, dum Venetis Latini,
Genuensibus Græci impensius faverent,
unde ferè omnes illius regionis urbes;
diversis discissæ factionibus, plerumque
mutuis cladibus hauriebantur. Oppresse-
rant hisce temporibus Genuenses non-
nulla Venetorum navigia in Hellesponto,
remiges, militesque barbarum in morem
vel interfecerant, vel excæcarant. Nostri
è contra, ut suis moribus domarentur ho-
stes, non paucas eorum naves circa Ægi-
nam in Saronico sinu deprædati sunt. Sed
ut validiori apparatu res publica defende-
retur, ac quinquaginta triremes adversus
Genuenses sex eductæ, quæ primùm in
Siciliam, tandem in Syriam ad inquiren-
das

das hosticas navigant. At iis nusquam
occurrentibus, Tyri oppugnationem in-
stituunt, quæ urbs per eos dies hosti se-
dederat. Quoniam verò in hac expeditio-
ne haud opus esset tantis viribus, cum
triremium parte Jacobus Dandulus perse-
quendo intra penates Liguri destinatur.
Hic, accepto navium supplemento ex Cre-
ta, cum Marco Gradonico in Liguriam
trajecit, ejusque oram hostiliter diripuit,
multa præda, pluribusque adductis navi-
giis. Contumeliamulturi Gennenses XXX.
rostratis Venetum persequuntur, corre-
ptumque in sinu Drepanitano adoriuntur
haud legniter. Utraque classis pugnandi
avida confestim atrox, spectantibus Sicu-
lis, miscet certamen, & tam ex propin-
quo conferuit, ut non missilibus ampliùs,
verùm gladiis, propè collato pede, dimi-
icaret. Fortuna, cum in multas horas neu-
tri victoriam adjudicasset, Veneto tandem
adhæsit Hostium triremes XX. captæ,
combustæ reliquæ, aut aquis, fervente
bello, depressæ: remigum, militumque
infinitus propè numerus in vincula pro-
tractus. Porro nec nobis incruenta vi-
ctoria, non paucis desideratis, quos ma-
re, marique absorpserat. Palæologus,
audita Genuensi clade, de se, sociisque
actum timens, cum victore Veneto in-
quinguennium inducias, ipso excluso
Ligure, paciscitur, qui in adversis fero-
cior

cior factus , ad piraticam convertitur ; navemque mercatoriam apud Cytheram prædatur , & Cydonem in Creta oppidum populatur , vastatque . Interim Senatus ne maritimam Græciæ oram sibi subiectam hostilis turbaret irruptio , imperat ad Methonem opportuna triremium præsidia : atque in hunc modum eam littoralem provinciam tutam multos annos retinuit .

Civilis tumultus ob tributum .
MCCLXV.

EXhausto diuturnis bellorum impensis ærario , videbatur Respub. amplius non posse aut alere milites , aut classici apparatus ita commodè instruere . Persuadendi erant idcirco cives ; popularesque , ut non tam rei propriæ , quàm communi salutis consultum vellent , qualiscumque tributi collecta , quod mulctatitio ære secundum noxas penderetur . At hoc publicè indictum , mirum quàm plebejos animos offenderit . Ex eo in apertam seditionem ventum est : directis in Curiam armis , ibi primò conjurationis fax eluxit , & in Principem Rainerium Zenum furibunda plebs lapides conjecit ; mox plures patritiæ domus expilatæ , & Senatores ad necem sunt conquisiti . Apparebat tumultuantem eam tempestate Remp. pessum ituram . Porro ab irato vulgo in Patres haud ultrà process-

cessum, postquam jurassent impositi tribut-
ti abrogationem. Ita seditiosæ turbæ pa-
cata, & reddita mœstæ urbi tranquillitas.
In quædam tamen scelerum capita animad-
verſum, habitaque de contumacibus quæ-
stione, plures securi percussi sunt: cæte-
ris exemplo, seditiones nunquam suis au-
ctoribus cessisse feliciter.

Bellum cum Genuensibus quartum.
MCCLXVI.

N Ondum exciderat Venetorum animis
Cydonis in Creta oppidi exitium ab
Genuensibus illatum, quod videbatur Reip.
majestati grave, nisi acceptam injuriam
vindicarent. His igitur pulsi, adactique
stimulis Jacobum Dandulum Ptolemaidem
tendere jubent, & adversus perfidum ho-
stem hostilia omnia moliri. Immissus ita-
que Venetus Præfectus cum instructissima
classe in Syriam inter Ptolemaidem, Ty-
rumque incidit in hostes, eique in pugnam
soluto majores objecere vires Genuenses.
At quia nostris potior in re navali ars, per
medias acies præterlapsi, acrius in obsi-
stentes convertunt proras: in multum
diem duravit contentio, quam tandem cer-
ta cum victoria pro Venetis fortuna dire-
mit. Verum inclinante ad vindictam ho-
stium animo, cum impetratam sibi ab Gal-
liarum, Siciliaeque Regibus pacem spre-
vis-

vissent ; incassum etiam eam sollicitante Romano Antistite ; quinquennales inducias libentiùs pacisci voluerunt , opportunum rati hoc temporis spatium restaurandis viribus , quibus tandem præsentem injuriam ulciscerentur .

Pugna cum Bononiensibus .

MCCLXXI.

Post inceptum cum Genuensibus bellum ita obsidebantur inimicis classibus maria , ut infida , & periculosa nostris redderetur ad frumentationem in Apuliam , Siciliamque navigatio : nec poterat vel publica impensa altera parari classis , qua frumentatores ab hostili metu defenderentur . Hinc Veneta urbs sub Laurentii Theupoli Principatu in extremam annonæ penuriam incidit . Ad vicinas igitur gentes itum , quas ab Actiolini tyrannide ope sua paulò antè liberatas Veneti gratas , & beneficii memores arbitrabantur : sed contrà accidit . Ferrarienses enim , Tarvisini , & Patavini præsertim , non ære , non precibus flecti unquam potuere , ut liberam egenti civitati darent in ipsorum agris frumentandi licentiam : unde liquidò apparet , nihil in populo fluxius esse , quàm accepti beneficii memoriam . Quoniam itaque finitimorum odia Venetos ad longinqua redegerunt auxilia , eaque parum
tu-

tuta, ab audenti Reip. fortuna civibus fame laborantibus prosperè consultum est, empto in Sicilia frumento, atque sine jactura in urbem invec̃to. Porro in vindictam ingratorum Patres novam de portoriis legem promulgarunt, qua vectigalia, solverent ii, qui cum mercibus intra Flanaticum sinum, Padique ostia navigarent; & ne fraus intercederet, destinatæ sunt ad exactionem speculatoriæ naves. Bononienses id ægrè passi, legatione missa, se arma correpturos minitantur, nisi decretum vectigal Senatus quamprimùm tolleretur, liberumque maris usum permetteret. Risit is insanientis populi minas, novemque armatis biremibus, se illi ad Primarium ostendit: verùm in ulteriore Padi ripa erecto à Bononiensibus castello, res Veneta graviter turbabatur. Nostri ad hostium vires sensim debilitandas bellum, protraxere in triennium, quo exacto, Marcus Contarenius jam fessis pacem largitur his conditionibus, ut extructam arcem diruerent, & immuni quarundam mercium subvectatione, ostiorum Padi custodia penes Rempublicam esset.

Justinopolis recepta.
 MCCLXXVI.

UT nulla Reip. ab armis esset vacatio, non diù post Bononiensem pugnam nuntius affertur de Justinopolis defectione. Illa, Veneto Prætor ejectione, specioso libertatis titulo capta rebellarat. Ut in pristini officii leges traheretur, missus Andreas Basejus cum idoneo navium delectu. Is in provinciam delatus subita oppugnatione contumacem civitatem adeò deterruit, ut, venia suo sceleri desperata, maluerit Aquilejensis Patriarchæ subire servitium, quàm Venetæ benignitati obtemperare. Ille adipiscendæ urbis occasionem amplexus, cum armato milite præsto adfuit: sed bellum cupidius, quàm feliciter gessit: quippe obsessis non solum quidquam profuit, sed ipse primis congressionibus in fugam adactus Venetam de se victoriam magis auxit, & Justinopolis, turpiter abeunte defensore, citius recepta est.

In Anconitanos expeditio secunda.
 MCCLXXVIII.

EAdem causa, quæ pridem Bononienfes, in pugnam tunc traxit Anconitanos: de portoriis nempe lata lex:

ca

ea negabant pendere , quia id juris non esset Reipublicæ . Horum pervicaciam armis vindicare volentes Veneti , cum sex , ac vinginti triremibus Anconam , oppugnatum ivere . Classis ante inimicam urbem explicata ingenti pavore hostem affecit : & quia ea erat Romanæ Sedis tributaria , à Pontifice opem postulavit . Interim nostri obsidioni intenti , cùm nullam ibidem suis navibus haberent tutam stationem , à fœdissima repente tempestate jactantur , ac proximis Senogalliæ littoribus illisi triremes aliquot perdidērunt . Non tamen iniqua fors Venetos consternavit , quin , aliis in supplementum acceptis , Anconam iterum vexarent . Subinde fraudibus rem agentes Anconitani Venetas triremes omni bellico ornamento imitati , obvii procedunt , ac exhibito amicitiae signo , duas è nostris confecto dolo incautas naves opprimunt . Hinc magis irritatis Patrum animis insedit sententia delendi hostem . Quare tandem horum constantia territi Anconitani iterum Pontificia auxilia implorant : at nihil profectum obsessis , qui in dies ad angustiores rerum anfractus redigebantur . Penè igitur desperationi proximi pacem suppliciter exorarunt . Hæc denegata prius , ut longiores audaciæ , ac temeritatis pœnas darent : postremò benigniter concessa ab Jacobo Contareno

Principe ea lege, ne impositum onus exinde detrectarent.

*Bellum Histricum cum Aquilejensibus
primum.*

MCCLXXXIX.

ANconitanos Histri exceperunt à Veneto deficientes: ad coercendos rebelles nostri progressi ibidem in armis pro contumacibus conspexere Patriarcham Aquilejensem, qui valida Venetorum classe, manuque appetitus, declinando pugnam, veluti subitaneo correptus metu in fugam dilabitur. Ex hoc Veneti faciliùs Histros recepere. Cæterùm vix de recuperata Provincia fama Patribus innotuerat, cùm iterùm Aquilejensis non tam suis instructus, quàm auctus Gortiani Comitii auxiliis ad spem melioris fortunæ revertitur: quare cùm terrorem tantarum virium latè circumtulisset, altera Histriæ secuta est defectio, dum Reip. præfideret Joannes Dandulus. Nuntiata ea Senatui, qui recentem ab urbe classem dimisit, Tergestum in primis rebelle oppidum petitur: sub mœnibus frustra iterata certamina, crebròque promotæ bellicæ machinæ: nam in propugnatoribus singularis constantia, & eximia virtus apparuit. Longiori itaque obsidione opus erat, ut contumax hostis domaretur:

&c

& adhibita quidem à Venetis solertia, non parùm hostiles animos infregisset, nisi ad minora officia dilapsus cum maxima parte copiarum Joannes Dandulus animum fecisset Tergestinis, qui nimbum priùs sibi instantem in nostros transfuderunt: hoc modo elusa victoria, iræque in aliud tempus dilatæ Tergestum sua obsidione liberarunt.

Res in Syria malè gesta.
MCCXCI.

Gliscentibus in dies Venetorum, & Genuensium discordiis Christianæ res in Oriente miserandum in modum occidere. Primò quidem Venetæ ab Syriaca provincia divulsæ; Ligusticæ verò non tam inde, quàm à reliqua Græcia paulò post exterminatæ sunt. Christianis itaque inter se dissidentibus, Hierosolyma, urbs antiqua nobilitate celebris, & Christi Dei natalibus, vita, morteque sanctissima in Barbarorum manus rediit, expugnata à Saladino Babiloniæ Rege. Is per eos dies non ultra progressus est, ne totam in se armaret Europam: utque domiti à se bello populi animos quoque captaret, firmaretque, tracta ad tempus modestia, compositoque Marte usus erga omnes esse fertur; unde etiam Ptolemaidì indulta quies, pactis cum Veneto induciis. Attamen, ut essent,

qui grassantem hostem morarentur, Romanus Pontifex Christianos Principes excitare sedulò adnitebatur, & jam apud Venetos stabat in anchoris parata classis. Sed quid? dum ab reliquis socialia arma cunctantiùs parantur, induciarum tempus per summam Orbis Christiani socordiam elabatur: quam suis rebus occasionem nactus Sultanus, & Saladini, cui successerat, fortunam assecutus post Tyrum, Sidonem, Tripolim, Berythumque incensas, & solo æquatas urbes; Ptolemaidem tanquam belli caput aggressus est. Stetit hæc tamen aliquandiù sola Venetorum virtute, ac viribus; at innumeris penè cincta legionibus, nullisque ab Europa allatis suppetiis, corruit miseranda urbs, & ab imis fundamentis deleta est. Ita non sine infami Europæorum Principum nota, qui arma in pium bellum distringenda, tunc temporis ad se dilaniandos civili quadam rabie converterant, expulso è sacro solo divino cultu, atque Christiano nomine, amissus monumenta pietatis, & tot victoriarum trophæa, quæ annorum fermè CC. labore à majoribus nostris parata fuerant.

Bellum cum Genuensibus quintum.
MCCXCIV.

A Missa Ptolemaide non ampliùs cum Genuensibus dimicandum erat; quippe urbem illam præteritorum bellorum facem Sultanus jam extinxerat: hæc tamen sublata odiorum causa, aliam livor, & ambitio prætexuere; maris nempe imperium à Ligure sibi arrogatum. Ea, propter rursus inter utramque gentem, repetitis sæpè congressibus, ita præliatum accepimus, ut non minùs victos, quàm victores belli pœniteret. Cæterùm hoc ipsum bellum motum est in Genuenses, administrante Remp. Petro Gradonico, eò quòd illi Pisanos ad Lamellam insulam per summam injuriam offenderant. Sociis illatæ cladis ultio mandatur Rogerio Mauroceno, qui cum LX. triremium classe devectus in Pontum, Peram non procul à Byzantio hostium receptaculum combussit; parique usus celeritate Folia-vetera oppidum injectis flammis solo æquavit. His gestis, domum evocato Mauroceno, Joannes Superantius sufficitur. Sub novo duce Caphata urbs, in qua Ligures negotiabantur, occupatur, diripiturque; inde progressum in Tauricam Chersonesum; ubi Veneti majorem suo nomini gloriam peperissent, nisi re-

gio illa, perpetuis damnata frigoribus, nautas, & milites ultra fidem debilitasset. Hæc inter hostes discursantes per nostra maria, in his omnia pro libidine agebant: classem LXX. rostratarum Lampadius Auria ductabat, qui prædando magno nominis, armorumque terrore cuncta in vicinis littoribus perturbaverat. Depopulationes, metumque prohibetur alias naves, triemesque comparavit Senatus, & quidem tumultuario; expletoque XC. armatorum navigiorum numero in hostes delegit præstantissimum virum Carolum Dandulum: hic paribus armis, animisque bellum à Ligure oblatum suscepit, quo Corcyra in Illyrio non parum nobilitata, invehctusque in provocantem hostem, præteritarum victoriarum memoria: initum certamen in multas horas protraxit, toto pelago armorum fragore, & cadentium utrimque fremitibus inhorrescente: sed tandem fortuna instabilis, nostrisque adversa, Genuenses sequuta est, ibique deficere visa, ubi virtus eminebat. Nostrorum itaque profligata classe, Dandulus in hostium potestatem venit, eorum ornaturus triumphum, nisi generosa morte ignominia se eripuisset. Cæterum Veneti non inulti, neque hostibus incruento bello cecidere; quippe hi majora non ausi, fugientibus similes Adriatico excessere. At mirum quantum infremuerit Ci-

vitas ad nuntium dissipatæ classis; haud
 tamen animo consternata recollegit vires,
 & XXV. triremibus Marco Basejo Præfe-
 cto, hostibus in Hellesponto occurrit :
 verum tunc quoque constitit, quamcum-
 que rei militaris gloriam sæpius fortunæ,
 quàm virtutis esse beneficium. Obviam
 eunti Veneto pugnam similiter indixere
 Genuenses, & navium numero, & recen-
 ti rerum gestarum recordatione freti. Hos
 Basejus cum subito discessu eludere delibe-
 raret, ita properare non potuit, quin
 circumveniretur : quoad suffecere vires,
 fortiter præliatus est, labore tandem, ac
 robore impar victori cessit. Duplicato ma-
 lo nec quidem prostrata Rēsp. persequen-
 dos hostes decrevit, qui libero mari va-
 gantes in Cretam irruerunt direpta ite-
 rum Cydone. Itaque tertium relictis gran-
 di conatu viribus in Liguriam trajecit, ut
 ex impressione illi coacti ab Creta ad tu-
 tandam patriam revocarentur. Dominicus
 quidam Slavus vir præstans animi cum
 paucis aliquot navigiis universam fermè
 Ligusticam oram rapinis, incendiis, & va-
 stationibus sædè permiscuit, plures hostium
 biremes vi cepit, & in ipso quoque Ge-
 nuæ portu egregia in oppidanorum con-
 tumeliam edidit facinora; inde postremò
 recedens duas Ligusticas triremes oppres-
 sit, quas suarum puppibus adligatas
 triumphantis in morem invexit in ur-
 bem.

bem . Tandem pacem necessariam magis ,
quàm voluntariam uterque populus est
amplexatus , cùm amborum vires conti-
nuatis cladibus fractæ , ac extremo penè
excidio consumptæ essent .

Expediit in Græcum Imperatorem..
MCCCI.

CUm Andronico Palæologo , quòd Ve-
netæ Reip. vel ratum vectigal , vel
acceptam mutuò pecuniam solvere recu-
sasset , præliatum est . Missus Belletus Ju-
stinianus unà cum VII ac XX. triremi-
bus , ut à Græco , quæ debebat , vi repe-
teret : enavigavit prospero cursu in Hel-
lespontum , ac multis hostium depreßis na-
vibus , aperto mari divagatus , fermè om-
nes Constantinopolitani imperii maritimos
tractus incendiis , & cædibus , quæ potuit ,
desolavit . Qui capti sunt Græci ad unum
laqueo spiritum reddidere , æquabili vin-
dicta , quam distulerat , non abstulerat
Venetus , memor fraudis , qua ipse By-
zantio cum Balduino fuerat ejectus . Hoc
metu Justinianus à Palæologo debitum æs
extorsit , quod prædæ conjunctum insigni
cum victoria patriæ intulit .

Bochoniana in urbe conspiratio.

MCCCII.

Vix libera externo bello Resp. quando ex privatis odiis in domesticum incidit, ob sceleratas quorundam civium conspirationes. Marinus Bochonius Petro Gradonico Duci infensus, eos in nefaria consilia compulit, qui per eos dies adversus eundem Principem pari odio furebant: cum, posthabito Jacobo Theupolo, quem popularis acclamatio ad supremum Magistratum expetebat, Gradonicum Patres extulissent: vel, quod nefas, quibus inhonora libertate potior tyrannis videbatur. Eo itaque auctore, in Principem, quem unum Bochonius impensè oderat, & in optimates, si qui obsistere ausi essent, ad necem usque desævire constitutum erat. Dicta est sceleris dies, qua Comitia agerentur. Delata Patribus conjuratio in id omnium studia convertit, ut primo quoque tempore tanti criminis capita comprehenderentur. Favit autem publicis votis fortuna; Marinus enim ipse, & primores socii capti, civitasque ab imminente incendio servata est, dum illi flagitiis convicti capitali supplicio puniuntur.

Bellum Patavinum quartum.

MCCCIV.

Patavini, erecto castello, eique imposito præsidio non procul à stagnis, quibus Petabubulæ nomen, in arma Venetos provocarunt. Apparebat, vel etiam invitis his, omnia ea loca, quæ inter Clodiam, & Albanum sita sunt, in salinarum usum per Patavinos fore redigenda, maximo Reip. detrimento; finitimæ gentis machinamenta cognovere Patres, in publicam, privatamque perniciem tendere. Quamobrem immissus est miles, qui hostes ejiceret, arcem, munitionesque subverteret. Velitatum est sæpius cum præfidiariis. Patavini, qui ad subsidium venerant, arrepta fuga, sive impares viribus, sive rei malè gestæ pœnitentia, nihil deinceps tentare ausi sunt.

Bellum Ferrariense primum.

MCCCVII.

Nulla generis religio, nullum nomen tam sanctum, quod non regnandi cupiditate violetur. Friscus Atestinus parricidiale bellum Diis penatibus intulit, ac in paterno sanguine gladiatoriam immanitatem exercuit, impia parentis morte, quia Ferrariæ princi-
pa-

patum scelere occupare maluit , quàm ex tabulis expectare . Turbatæ eo facinore civitati Venetus assertor adfuit , veteri instituto , ne eadem scilicet fax , quæ domesticos Ateſtinorum lares nuper cremaverat , ſociorum quoque urbem , & domos per factiones ſuccenderet ; præceps eſt enim ambitio , ubi aperto flagitio innotuit . Ferrarienſes itaque abominati tam crudele imperium , ſe Romano Pontifici dedunt : indignatus ſuorum defectione Friſcus , ultrà quàm credi poteſt , in eos , qui dicebantur auctores , exquisitiſſimis tormentis deſæviit : hinc deploratis noviffimè rebus omnibus , ac tardante Pontificis ope , ſe Veneto Senatui committunt , quos ille in fidem receptos legitimo Domino ſervabat , firmata priùs urbe munitionibus , & Magiſtratu ſuo . Verùm Clemens Quintus , qui hos tumultus in Gallia perceperat , Veneto ſacris interdixit , eorumque bona , hominèſque ubique locorum diripiendos permifit , quòd urbem Romanæ ſedi ſubjectam contra juſ , & fas occupaffent . Accedit demùm è Bononiienſibus Pontificiſ legatus cum exercitu , undè recentibus furiis agitata civitas deſciſcit à Venetis , atque iterùm in Pontificia jura concedit . Tantæ levitatis pertæſi noſtri , ſecundo belli anno urbe cedunt , pacemque à Clemente , diù nec quicquam petitam , nota tandem Franciſci Danduli moderatione , & opera impetrarunt .

Bajamontis Theupoli conjuratio.
MCCCX.

SOlet familiæ præstantia, opum ubertas, ac morum licentia ambitiosos spiritus plerumque alere: inde toties expertæ sunt civitates inquietorum civium turbas; nam illi dum pares negligunt, vel superiores non admittunt, laxatis insolentiæ habenis in Patriæ ruinam procurrunt. Hæc omnia in uno Bajamonte Theupolo, ejusque affec-
clis penè omnibus patricii sanguinis vim tantam habuere, ut horum cæco furore Reip. imperium ferè cum ipsa libertate corruerit. Impulit in scelus non amor in patriam, sed simulas, indignatio, & odium in Dandulam familiam, & in ipsum Petrum Gradonicum Principem, qui nimio plus illi favere credebatur, quique Jacobo Theupolo ejus patri prælatus fuerat, frustrà populo eundem in Principem deposcente. Sed ut plerumque privata odia in publica erumpunt incommoda, exsurgente rerum novarum cupiditate: ipso Theupolo duce incuriam primò statutum erat irrumpere, Principem, cæterosque sibi invisos confodere, & si quæ cederet, occupare imperium. Cùm instaret dies sceleris, densatis tenebris cælum impium facinus exhorruit: se dieitur procelloso tonitruum gemitu, & crebra fulgurum coruscatione: at ea por-
ten-

tenta contumaces nec terruere , nec postea ipsa fama patefactæ conspirationis . Hæc ut Patribus opportunè detecta : ac jam-jam immineret vis (id certè divini Numinis auxilium, ut furias in ipso jam successu securas subita ultio exciperet) repentina ad arma conclamatio eorum facta est , qui Remp. salvam vellent . Optimi quique inopinato exciti signo, ac tumultu ad publicam defensionem armati in euriam convolarunt : conjurati quoque irrupere in Marcianum forum , & quasi versarentur in militaribus castris , exorandum ibidem certamen orsi sunt . Hi sua fata urgebant , & ab illis urgebantur singularibus furoribus ; ideò præcipientes ruere in clades, quas sibi noxiis consiliis paraverant . Conseritur civium manus ; libertasque veluti in medio constituta videbatur à suis vel perdenda , vel conservanda . Conspiratorum impetum diù paludati Patres sustinere, deinde repulere certa victoria, qua passim consternati , cæque perduelles ; superstites aut capitis, aut exilii poenas cum ipso criminis auctore luerunt . Memoriae proditum est, nullam Cisalpinæ Galliæ urbem, nullum oppidum extitisse Venetis extorribus vacuum . Cæterum Theupolus jam publicis armis vix elapsus mulierculæ manu concidisset, nisi alium mortario dejecto contrivisset , quem caput sceleris

ex vexillo opinabatur. Extincta in hunc modum conjuratione, de proditoribus affatim habita est ultio: in quosdam laqueo, in alios securi est animadversum: omnium gentilitia signa, & nomina ubique locorum expuncta, dirutæ ædes, & bona in publicum translata. Laudatur civico illo conflictu supra cæteros Marci, atque Ugolini Justinianorum virtus, & pietas. Sic antiqua Reip. restituta tranquillitas, plurimaque postmodum in strenuos cives, ac de patria benemeritos, atque adeo in ipsam animum collata sunt præmia. Receptæ, conservatæque quietis, ac libertatis dies in Venetis fastis viget, decreta quotannis supplicatione Divo Vito, cujus festo extinctam conspirationem accepimus. In parricidam verò exulem, pessimis artibus reditum in patriam rursus molientem, rogata lex, jussumque, ut Franciscus Dandulus, id temporis Venetorum Princeps, quovis ære proscriptum interficiendum curaret.

Jadere defectio septima:

MCCCXI.

EVulgata Theupolæ conjurationis fama, quæ omnia in majus auget, Jaderenses pessumdatam Remp. sibi stultè suaderentes, septimam ad Pannonos moliti sunt defectionem. Populum ad rebellionem natum non tam pedestri, quàm
na-

navali militia domandum , ut alias , decretum est , sedente Marino Georgio Principe . Illa Dalmaso homini Hispano conceditur : hæc Philippo Bellegnio . Uterque mira celeritate in provinciam fertur , urbemque contumacem dispositis circum castris acriter oppugnat . Jaderenses armis undique septi , & auxiliorum inopes ad spretum olim imperium rediissent , nisi Dalmasus , auro polluta fide , in singulos dies nostram producendo victoriam se illis pacis intercessorem exhibuisset . Cognita viri fraude , nihil ab obiectis impetratum , proditor omnibus invisus clam aufugit : cæterum ulciscente Deo perfidiam , mari penè obrutus est , naufragio amissis donariis . Interea non cessantibus Venetis ab oppugnatione , Jaderenses nulla in armis , dolive reperta spe , à certamine ad preces se convertunt , factaque deditione eas condiciones accepere , quibus provincialium levitatem à læso dominio cohiberi solitum est .

Expeditio in piratas secunda?
MCCCXXIII.

PErcrebuerat rumor , quædam , Ligu-
rum piratarum navigia Venetis in
Græcia rebus hostiliter nocuisse : quo
Venetias tandem delato , Patres quam-
pri-

primùm compescendam decernunt eorum audaciam, qui prædari semel edocti, injurii nunquam esse desinebant. Ea propter Justinianum ex Justinianis XL. triremium classi præficiunt cum summo imperio. Vetus in Ponticum aliquot prædonum naves circa Thracium Bosphorum captas incendit; inde conversus ad Peræ expugnationem coegit oppidanos, ut illata ad eam usque diem Venetis rebus damna persolverent. His benè actis, Joanne Superantio Principe, Cretæ Dux renuntiatur, ut quoddam quasi debitum virtuti præmium consequeretur.

Bellum Histricum II. cum Aquilejensibus.

MCCCXXVIII.

V Allenses, & Polani, qui olim defecerant, experti, quàm dura in se dominia exercerent Aquilejenses, rursus ad mitem Venetorum dominationem ultronea deditio rediere. Ejus temporis Patriarcha transitionem illam impotenti ferens animo, repenti in Histriam cum exercitu profectus est, ut illam armis ad imperium suum reduceret, jamque ex agrorum populationibus ingentem incolis timorem attulerat. Cæterum Veneti retinendis, confirmandisque oppidis intenti Justinianum ejusdem familiæ virum ac-

rem

rem in eam curam expediunt , qui cum hostibus semel congressus victoriam reportavit , fuditque Patriarcham , cujus in provinciam ingressus non minus fuit ipsi terribilis , quàm turpis , & fœda fuerit ejus fuga .

Compreſſe in Creta ſeditiones .
MCCCXXX.

NOnaginta fermè annorum tranquillitatem in Creta turbavit nescio quis Varda homo turbidus , & factioſus : occasio furoris fuit denegatum tributum , quo naves in piratas armarentur à Rhitymnæ Quæſtoribus , in quos ille non tam verbis , quàm armis inſurrexerat . Adhæſere nefario complures : quare ab aucto , armatoque perduellium agmine haud parum Cydone trepidatum eſt ; nihil enim prætermiſſum ab rebellibus , quod igne , ferroque non corrumpere-
tur . Selini caſtrum expugnatum , Præfectus arcis Hermolaus Bellegnus vinculis addiſtus , commiſſæ cædes , aliaque patrata facinora , quæ modò referre non libet . Primus in irrequietam turbam irruit Joannes Cornelius , qui integram , ipſo trucidato Varda , aſſecutus victoriam , omnia recepit oppida , quæ fidem , atque imperium nefariè excuſſerant . Porro non diuturna pace Inſula quievit , ab
Leo-

Leone Calergio novis motibus concussa, qui Venetos dum in insula pellere conatur, ingentem rerum tempestatem excitavit. Placuerat Nicolao Priolo duci desperatis non offerre certamen, sed eos blanditiis in obsequium trahere, eoque magis, quod Calergium suscepti facinoris jam pœnitere ferebatur, quem etiam blandis litteris, & humanitatis plenissimis ad integritatem veteris obedientiæ pellexit. Cum verò per dolum, & occultas machinationes Smerilium Costam jam tumultuantem contra jurisjurandi datam fidem concitaret, denuò manifesti sceleris reus, labem proditiōis, & maculam fatalibus aquis eluere, Prioli sententia coactus est. Hujus evulgatum supplicium non modò non extinxit submersas faces, sed etiam majus rebellionis incendium suscitavit, quo grassante penitus exarsura Creta videbatur, nisi Priolus haud ignarus, seditiosos inter se vix unquam stabili fide hædere, valida militum scripta turba perduelles insequutus esset, montiumque occupatis angustiis, ne intra eorum latebras ullum illis pateret effugium, perquisitos dedisset in fugam, & palantes per campestria more pecudum ad internecionem usque mactasset. Hac victoria, rebellique sanguine expiata Creta summa in multos annos tranquillitate quievit.

Expeditio in piratas tertia.
MCCCXXXI.

PER eadem tempora Thomas Viarus infelici successu cum piratis conflictavit: dum enim sex eorum naves infectantur, alias, quæ Venetorum onerarias duas deprædatæ fuerant, medio Adriatico offendit. Procedens igitur temerè in pugnam, promissa sibi ex validiore classe, qua fretus erat, victoria, à pirata Ligure ita excipitur, ut momento temporis ejus fermè omnes triremes aut laceratæ, aut captæ fuerint, omnesque milites cæsi, & ipse vix parvum à bello nactus navigium, Venetias trepidè aufugerit. Cùm autem ejus prælii infelix exitus ex nimia Viari audacia Patribus innotuisset, ad perpetuos carceres illum condemnarunt, memorabili sanè ducibus exemplo: quo scirent, non tam speciosa, quàm necessaria in bellis consilia esse sequenda.

Bellum Turcicum primum.
MCCCXXXII.

TURCÆ ad servitutem nati, sed Christianorum dissidiis evecti ad imperia, sub Amurathe in Europam Ligurum ope, remigioque traducti jam Græcas provincias cœperant occupare, nostra-

straque maria ita infesta reddere, ut in Orientem navigantibus nil tutum reliquum esset. Insolentis, audacisque hostis conatibus maturè occurrendum erat : quare Veneti extemplò legatos Romam, & in Galliam dimittunt, Pontificem, & Regem monituros, ne, dilata virium conjunctione, imminenti Barbaro subigenda Italia traderetur. Gallus cum magis nomen ad præsidium sociorum, quam vires attulisset, Pontifici, Venetoque solis Italica salus, & libertas conceditur : horum Principum armis per ea tempora Turcarum insultus repressi sunt. Petrus enim Zenus Venetarum triremium ductor hosticas in Ionio navigantes cecidit, & omnium primus de Turcis triumphavit. Cæterum hos mari summovisse non contentus plura Græci littoris oppida barbarorum prædis referta populatur, ac evertit. Post hæc renovato cum Christianis Principibus fœdere, continuatis in aliquot annos victoriis cum tanto hoste pugnavit. Tandem post purgata piraticis latrociniiis maria gravi, & martia classe Smyrnam applicuit, aggressusque urbis oppugnationem feliciter confecit, fugatisque barbaris illam recepit. Hinc celebriores triumphos sibi pollicitus in Asiæ Mediterranea descendit, ac fugitivos ubique persecutus est. In ea provincia, ut quidam habent annales, egregius imperator

rator dum lăcris de more operam darēt,
à convolantibus undique agrestibus in-
terceptus in templo fœdè opprimitur, &
cum tanti viri occasu spes omnis melio-
ris fortunæ evanuit.

FINIS LIBRI PRIMI.

120
JOANNIS BAPTISTÆ
V E R I
CANONICI PATAVINI
RERUM VENETARUM
LIBER SECUNDUS.

*Bellum in Scaligeros Verona Principes.
Tarvisium obtentum.
M. CCC. XXXVII.*

EA semper fuit Venetorum pietas, ut vicinos juvarent auxiliis, quando à potentioribus contumeliosè vexarentur. Hinc obliti injuriarum, quibus Patavini eos toties affecerant, arma pro externis aris, focisque suscipiunt adversus Scaligeros Veronæ Principes. Horum potentia intra justas imperii metas nescia consistere, in licentiam quoque erupit offendendæ Reip. Quare, ut latius per opprobrium aliorum suos fines extenderent, arcem in stagnis propè Clodiam insolenti milite communitam erexerunt, ac per Padum, Athesimque navigantibus Venetias indixerunt portoria, neque alia in turbidis Principibus defuere facinora, quibus sensim res Veneta in perniciem traheretur, nisi

nisi quandoque tantis initiis maturè iretur obviam. Interim Patres certi, si nihil moverent, eam audaciam in speciem legitimi dominatus transituram, Scaligeros, legatione more patrio transmissa, prius quàm arma arriperent, conati sunt ab injuriis revocare: cæterùm ea spreta, atque turpiter irrita est. Hujus rei fama, mirum, quàm magnis, propensisque studiis bellum in juris gentium violatores decretum sit. Primò igitur cum Florentinis percussum fœdus jam antea Venetam opem in eisdem hostes implorantibus: mox evulgata expeditione complures Principes, quibus ea potentia suspecta erat, Vicecomites, Atestini, Gonzagæ, & ipse Boemiæ Rex suos internuntios Venetias mittere, quo junctis viribus Scaligerorum superbia retunderetur. Adfuisse una die in urbe sexaginta Europæorum Principum legatos, qui apud Senatum tum de bello, tum de pace tractarent, produnt ejus temporis scriptores. Marsilius quoque Carrariensis vir inter Patavinos summæ auctoritatis, Scaligerorum causam iisdem diebus apud Patres fovebat, & pacis conditiones percontatus has retulit: Patavino agro hostis decederet: Tarvisium Reip. esset: Rubis Parma: & Florentinis Luca permetteretur. Verùm ut iniquæ rejectæ, & pax desperata, bellum utrinque maturarunt. Summa itaque cura

miles conscriptus , comparatoque exercitui datus imperator Petrus Rubeus Parmensis , duobus additis rei bellicæ procuratoribus , Legatorum nomine , Marco Cornelio , & Andrea Mauroceno . Ille , acceptis à Francisco Dandulo Principe sui muneris insignibus , copias in Mottensi agro recensitas , dispositasque in aciem ultra Plavim trajecit : inde in Patavinos itum , ubi Albertum Mastini tum Veronensium domini fratrem non parum territavit : ac per patens consternatæ regionis solum illatus , cùm nullus obex occurreret , agros passim vastavit , ingentique terrore latè circum sparsa municipia pervasit . Saccense castrum , & Caputaggeris se dedidere . Marcus Lauretanus levioribus navigiis arcem in stagnis aggressus , eam deturbato præsidio exicidit : venere in fidem Cuneanenses : nec non maxima eorum exemplo secuta est oppidorum defectio . Itaque omnia hostibus infesta : nequicquam subinde è Germania conducto milite , quo Patavium opprefferant , non juverant , defectionem molientibus civibus , tyrannidis , bellicque mole confecti sunt . Hac inter Rubeus ad Ateste pugnabat , captivo hosti sat æquus fama captandæ clementiæ , nam quos inter dimicandum ceperat , omnes libero jure dimisit . Postea ipsa rursus Patavinæ urbis mœnia obequitans , concremataæ unius portæ incendium ,

dium, quæ Sanctorum dicitur; agrorumque vastationes per contumeliam inclusis Scaligeris exprobravit: at ulterius non progressus, ne desperata spe veniæ pertinacia furor hostis accenderetur, in Tarvisinos concessit. Ea in provincia inperato fortunæ eventu injecto solo nomine metu Tarvisium occupavit non ausum arma experiri. Mastinus ea propter versus in rabiem Patavio ad Bubulentam promovet; ibique stationaria aliquot nostrum navigia oppressit, barbarum in morem cum nautis, custodibusque debacchatus. Quingenti etiam mercenarii milites circa Mestrium vicum Alberti dolo cecidere, deceptus in ipsa vindicta furentis animus, cum eos Venetos omnes esse arbitraretur. Dum igitur in Patavinis, Tarvisinisque bellum ita alitur, Mastino nuntiatur, Brixiam à Vicecomitibus obsideri. Ex hoc abeuntis Mastini recessu excitati Patavini à tyrannide se vindicant, auctore Marsilio Carrariense, qui tacitis nuntiis accersitum Rubeum in urbem per Pontem-curvum recepit, Albertumque dedit in vincula, ut Venetias duceretur. In hunc modum sine sanguine occupatum, servatumque Patavium, habita in seditiosos quosdam animadversione. Quamobrem Senatus, commendata Carrariensium fide, in benemerentem familiam innumera contulit beneficia, quorum primum, & singula-

re illud fuit, libera Patavinæ urbis administratio. His gestis, Rubens, ducta copiarum parte ad Montem-silicem oppugnandum, dum impigram & militis, & optimi ducis navat operam, inter confertissimos missilium jactus miserè cadit: funus quidem tanti viri lacrymabile contigit, accessit demum dolori impetus, dum alter fraternæ virtutis egregius æmulator germanus in Gonzagiacis castris Veronam tum obfidentibus occubuisse. Alius è Rubeis supererat Rolandus nomine æquè clarus militia. Hic suscepto copiarum imperio distulit per eos dies vindictam in Montesilicenses, & in Veronensium fines populatum penetravit. Subinde Rubei necem ulciscitur Ubertinus Carrariensis, Montis-silicis potitur arce, hostemque terga dantem persecutus profligat. Mastinus, qui jam amissa Brixia redierat, aliquo minùs turpi facinore fugam honestaturus Montanianum castrum aggreditur, sed irritò conatu: quippe obvium habuit Andreacium Maurocenum, quem licet ipse Scaliger ignominiosè effugeret, sat multos tamen suorum ad internecionem reliquit, præter captivos. Rolandus cum jam nihil gloriæ deesse, nihil obstare Venetæ virtuti videret, divisis copiis, pluribus simul in locis victricia arma circumtulit, præcipuè in Vicentinos acer, quorum oppidum ea constantia fatigavit, ut

inops

inops animi Mastinus pacem, quam antea spreverat, per Oratores ultra deprecatus sit; datis prioribus conditionibus, acceptisque Veneti quievire, ne Italica libertas continuatis bellorum fluctibus mergeretur. Ex hoc bello præter oppidula Venetæ Reip. accessit Tarvisium: deditum quoque erat Patavium, sed, uti diximus, Carrariensibus traditum, quò magis constaret, Venetos arma in Scaligeros corripuisse non aliam ob causam, quam ut inter vicinos populos pax, & securitas vigeret.

Cretensium defectio.

MCCCXLII.

EX Italia in Cretam, gubernante rem Venetam Bartholomæo Gradonico, bellum translatum est. Necessè erat inconstantissimæ gentis ingenium, & in dissidia proclive armis retundere. Quamobrem Patres robustissimas militum legiones in eam insulam destinarunt. Tripartito agmine terni Duces ex Faleria, Justinianæ, & Maurocena familiis in rebellantes solverunt. His fortiter juxta, ac feliciter dimicantibus secunda fortuna occurrit: nam perduellum munitiora castella vi ceperunt, & dirutis ex iis quibusdam, inessisque montium latibulis, ne receptaculo hostibus essent, circumlatoque passim bello, tantum illis terrorem incussere, ut brevi

sedata defectione, sumpto de rebellibus supplicio, tota Insula intestinis purgata, discordiis ad vetus imperium redierit.

Jadera defectio octava.

MCCCXLV.

JADERENSium defectiones non semel depressæ, cæsiq; earum auctores, in alias, atque alias anniversario quodam furore pullulabant, veluti si de occisorum caput sanguine renascerentur. Subiit confestim Patrum animos ex Principis Andree Danduli sententia recepta diù cogitatio, non esse impunè relinquendum scelus, ne tota provincia conjuratione Jaderensium erecta occasionem rebellandi susceperet. Navali ergo, terrestrique apparatu urbem oppugnaturi Petrum Canaliū, & Marcum Justinianum eò imperant, ut alter mari, alter terra pugnam rebellibus inferret. Primo accessu Canalius Pagum cepit oppidum, ita & Justinianus subitaneis aggressionibus Jaderam recepisset, nisi Pannonες victoriam remorati essent. Advenere è Pannonia cum ipso Rege expeditæ copiæ: his nostri haud territi obviam procedentes bellum atrox committunt, quo plures hostium cæsi sunt. Verùm cum illud magis recrudesceret, oppidani, qui subsidiariorum fugam turbatis ordinibus conspexerant, ut illis opitularentur, è

mœnibus turmatim advolantes, fortunam ad nostros jam inclinantem prævertere; sed non multò post justam belli causam, Venetamque secuta illa virtutem, rediit: pedestres enim nostrorum copiae à navali-
bus fociis opportunè adjunctæ, magnam de hostibus stragem ediderunt, sed ea jactura, abundante hostium multitudine, inter damna haud numerata. Dùm Jaderæ procedit oppugnatio, in regiis castris non mediocriter annona laboratum, quorum incommodis Venetorum fiducia crevit, Pannoneseque rerum omnium egestate coacti bello excedere nostris victoriam relinquere. Hanc brevi cumulavit ipsius rebellis urbis occupatio, quæ Venetum robur diù, nocturneque perpeffa victori, ac domino sedemùm restituit, subjecitque, impetrata à clementissimo Senatu scelerum venia, cum è suis avelli sedibus, ne amplius fidem violaret, mereretur.

Bellum Histricum tertium.

MCCCXLVIII.

QUasi illud rebellionum, conspirationumque sæculum esset, allatum de recepta Jaderæ nuntium non tam immanis comitata est pestilentia, quàm certus rumor, Justinopolitanos defecisse. Illa, non priùs, quàm expleta fati rabie, recessit; isti, antequam externarum gentium

roboracoirent, Marci Justiniani vigilantia in fidem retracti sunt. Per eos quoque dies Albertus Carnorum Regulus universam, penè Histriam cædibus, & latrociniis everterat. In eam provinciam exercitum, quo retunderetur illius temeritas, mittendum censuit Senatus: & cùm primùm armatum se ostendit, hostis perterrefactus, quasi manibus arma decidissent, per devia montium aufugit, nusquam ullo certo ordine, aut spe reliqua resistendi: dispersum, palantemque insectatus Venetus malè multavit, cepit ducem, & cum eo captivo ad Senatum capta vexilla in victoriæ testimonium præmisit. Porro Albertus audaciæ veniam obtinuit, & libertatem, data fide non ampliùs in Remp. dimicaturum, & aliquot suis in finibus oppida demoliturum, ne ulli in posterum tuti recessus piraticæ genti, ac latrocinantibus barbaris paterent.

Bellum cum Genuensibus sextum.
MCCCL.

HUjus belli initium ab intercepta Venetis per mare Ponticum navigatione profectum. Versi primùm Genuenses in piraticam, mercatorias naves in Hellesponto prædati sunt. Rei novitas, violataque inde pax hanc unam curam injecit Patribus, ut per Oratores abla-

ablata repeterentur, & nisi essent reddita, bellum denuntiaretur. Non accepta legatione, sed elato animo repudiata, ad arma properè concursus est, parataque præclara classis, quæ sub Marci Ruzini imperio temerarios, & turbulentissimos hostes castigaret. Hic celeri cursu tendens in Græciam à speculatoribus quatuordecim Ligusticas naves Carystium portum ingressas audit. Illarum perdendarum, concepta spe Ruzinius, suas non longè à portu disposuit: nam propius accedere obstabat illius vadofum ostium. Nihilominus hostibus in difficilem eruptionem conjectis haud defuit animus; decreverunt enim ex illis angustiis intumescente mari egredi, etiam cum aperto discrimine; audentibusque, ac desperatis favisset fors; nisi Marcus Maurocenus Adriatici Præfectus ex transverso irruens hostiles triremes IV. liberè jam egressas intercepisset: quo casu consternatæ reliquæ, circumventæque à tota classe vicinis littoribus illiduntur, nostrisque in directionem concedunt. Captivi hostes Chalcidem ducuntur, iturque ad oppugnandam Peram Genuensium coloniam. At hoc nequicquam tentatum est. Idcirco Ligur animos, viresque sumens, Chalcidem appellit, omniaque replet vago tumultu, direptam succendit urbem, captivosque in servitutem abducit, reluctari hosti

minimè auso Thoma Viaro Prætorè ,
 quoniam ubi intrat animum pavor , id so-
 lum metuit , quod formidat . His utrò-
 citròque illatis cladibus , apparebat bel-
 lum hoc diù inter utrumque populum
 duraturum , neque sine externa ope confi-
 ciendum esse . Ea propter Veneti , cum
 Græcorum Imperatore , Aragonumque
 Rege icto fœdere , validiores in pervicacis-
 simam gentem procedunt , ac robustioris ,
 quàm antea classis moderatorem nominant
 Nicolaum Pisânum , qui continuò è Dal-
 matia solvens Pancratium Justinianum in
 Siciliam mittit , ut cum Aragoniis se con-
 sociaret . Nihilò segniores Genuenses au-
 cta classe sub Pagani Auria auspiciis con-
 tendunt in Græciam , circumnavigataque
 Eubœa , quâ potuerè , hostili rabie ex-
 cursitarunt , præda Peram reducta . Inte-
 rim Veneti cum Aragoniis è Sicilia in hor-
 ridam (futuræ calamitatis omen) incide-
 re tempestatem , qua tandem remittente ,
 fracti penitus , dissolutique Methonem
 tenuerè . Ibidem curato milite , refectis-
 que navibus Peræ obsidium meditantur ,
 Euntibus in expeditionem Genuenses ma-
 turè , & fortiter occurrere in ipsis Bos-
 phori faucibus , in his facilè excepturi no-
 stros , quia intra eas angustias non pote-
 rat tanta classis commodè , unoque tem-
 pore tota in certamen explicari . Eò igitur
 loci necessariò concursus est , sed ma-
 gnis.

gnis viribus, iratisque animis: pugnam
 summo mane initam cadentes tenebræ di-
 rimere non potuerunt, nec prius cessa-
 tum ab armis, quam lux altera reddere-
 tur, & una classium victoriam reportaret.
 Initio malè certavimus Græcorum auxi-
 liis; illi namque lingua, quam manu prom-
 ptiores, tentato, non commisso certami-
 ne, ad primas Genuensium impressiones
 proras suas averterunt: Aragonii, qui se-
 cundum in congressu locum iustinebant,
 sive hostis audacia, sive ignavo Græco-
 rum metu exterriti, & ipsi se prælio sub-
 traxere. Omnis itaque vis, & conatus in
 solos Venetos conversus, continuataque
 cæco Marte pugna tamdiu protracta, quo-
 ad fessi, nulloque recreati subsidio cede-
 rent: obstinatè pugnatum, omnesque vi-
 cti à victoribus: ob belli pertinaciam, ac-
 ceptaque damna iratis cæsi sunt. Occu-
 buere eo prælio cum Justiniano complures
 patricii viri, perpetua tamen apud poste-
 ros victuri gloria, quod fortiter pro pa-
 tria pugnando mori maluerint, quam tur-
 piter fugiendo patriæ decus, & avitam
 nobilitatem fœdare. Iniqui successus fama
 non tam timore, quam pudore affecit
 Remp: quod tot validissimarum classium
 hostis victor abivisset: sed mox erecta in
 vindictam jubet nulla mora alteras in-
 strui triremes, veteres refici, & Pisanum
 iterum expediri. Ille redintegrata, sup-

pletaque classe prope Peram, usus meliore fato, hosticas aliquot disperfit: & cum certa fama intellexisset, ab Antonio Grimaldo rostratas supra XXX. Aragonias juxta Cyrnum perculsas esse, ita opportunè adfuit oppressis sociis, ut hos præter spem erigeret, hostesque inopinato accursu terreret, quos fugam jam meditantes harpagonibus remoratus eorum cæde, & plurimarum navium spoliis paulò ante acceptam cladem rependit, majoremque Patriæ, ac sibi peperit triumphum. Laceri in hunc modum Genuenses nequam superbos animos ad pacem inflexerunt, sed ut magis nativum in Venetos odium testarentur, ipsa neglecta libertate, qua nihil dulcius, Joanni Vicecomiti Mediolanensium Duci urbem, se, suæque omnia spontè tradiderunt; ut ita quæsito ab invidia hoste, reperiretur qui adversus Remp. decertaret. Vicecomes dulcedine oblatae urbis orantibus præsto fuit. Hinc Veneti futurum sibi belli discrimen cum Insubre rat, confestim omnia in continenti oppida auctis præsidis obfirmant, renovatisque foederibus Scaligeros, Carrarienses, & Gonzagas veteribus odiis infensos illi opponunt: sic tutum terra imperium cum videretur, omnis erat sollicitudo in augenda classe. Pisanum igitur tribus aliis, ac XX. triremibus præfectum emittunt in Ligurem, qui per eos dies

Cor-

Corcyram nigram, & Phariam tentarat, animique potius desperatione, quam virium robore audacissimè ruebat in omne facinus. Parentium vi captum subiecto igne demolitus est: piratarumque more Adriaticum vexat. Interim Pisanus universum classicum apparatus in ora Peloponnesi ad insulam Sphagiam, quæ hodie Sapientia est, retinebat. In libero portu, apertoque facilè oppugnatum iri Venetum hostis sibi persuasit, & jam Vicecomitis ope contracta XL. triremium classe, portum sine tumultu, perque tenebras, nihil tale nostris cogitantibus, intrat, classiarios ignavissimo metu correptos occupat, ceterique, & incruenta victoria navibus omnibus potitur, unica excepta, quæ inter cæterarum trepidationem casu elapsa aufugit; Pisanus ipse cum quinque hominum millibus Genuam asportatus hostis triumphum non parùm nobilitavit: singulari hoc inexpectatæ calamitatis eventu post integrum belli quadriennium concidisse videbatur. Venetæ imperii gloria, & vetustissima urbis libertas, si victor victoriam esset persecutus. Patres tamen inflictum vulnus cautè obtegentes non fortuna, at fraude se victos evulgant, quatuorque triremes privatis sumptibus illicò reparant, quæ à popularibus trierarchis ductæ in Tyrrenum proveherentur. Sed ne quidquam

quam ad hostium felicitatem deesse videretur, eam quoque interceperunt navem, quæ furtim à priore jactura evaserat: pro-
 vectique Gradum, ingentem civitatì incuf-
 ferunt formidinem. Repressit tamen non-
 nihil hostiles in vicinia insultus Nicolaus
 Justinianus, tribusque longis navibus de-
 latus in Histriam nutantem provinciam
 confirmavit. Cæterùm non defuere prodi-
 gia, quæ acceptas calamitates portende-
 runt: visi nempe sunt in aere clangentes
 corvi, atque inter se acerrimè pugnantes,
 guttæque sanguinis in Venetam classem de-
 cidere: conspecta etiam in portu immanis,
 & monstrosa bellua, quæ casu lapsum in
 mare hominem protinus voravit; successit
 demùm teterrima pestis, urbisque ultimum
 penè excidium, scelestissima ipsius Principis
 conspiratione.

Marini Falerii Principis conjuratio.

MCCCLV.

MArinus Falerius Princeps, nondùm
 peracto publicæ administrationis an-
 no, ac propè sexagenarius, vel privatis o-
 diis, vel immoderatæ ambitionis fluctibus
 agitatus, se Venetiarum tyrannum consti-
 tuere, pluriumque usurpare dominatum ne-
 faria cogitatione decrevit. Itaque cùm pu-
 blicam, privatamque salutem negligeret,
 in impii facinoris societatem trahit plures è
 vulgo

vulgo, & veluti cæco quodam furore actus, ac sine consilio cum primoribus agit, ut, simulato Ligusticæ classis propè urbem adventu, rumores intempesta nocte spargerent de vicino hoste, & quasi repentino pavore contriti voces ad arma alternarent; scelerique addit commentum, quo popolare odium in optimates concitaret, nempe ut confictis nobilium familiarum nominibus, appareret, alienas uxores, & filias ad stupra, atque adulteria per viros patricos rapi. Ita igitur vulgato hostium ingressu, sparsaque vanis rumoribus contumelia, condictum erat, ut primi omnium conjurati, veluti ad publicam defensionem, in Curiam properarent, cujus obsessis liminibus, unumquemque patricii sanguinis interimerent. Sanè discrimini maximo tunc obiciebatur res Veneta, nisi divinitus servata fuisset. Quidam è conspiratorum ducibus, Beltrandus nomine, Nicolao Leonio, quo viro utebatur familiarissimè, scelus aperit, docetque conjurationis capita sexdecim esse, singulos duces habere sub se milites sexaginta, & horum omnium antesignanum Principem Falerium. Leonius, promissa sceleris impunitate, ampliusque munerum largitione, nihil cunctando Patrum seniores adit, coactoque concilio sub ejus notis initium, quæ cædibus fuerat destinata, suadet tanto maloceleriter occurrendum, statimque mittendos lictores, qui conjuratos vincirent. Huic decreto patrocinata, ut sæpè

ut sæpè in similibus ; fortuna captivos dedit perduelles , qui crimen confessi , fractis cervicibus , occultè necantur . Opprimitur deinde Falerius detecti sceleris adhuc ignarus , exutusque publicis ornamentis in ipsa curia securi percutitur . Sub hæc quæsitum in reliquos : reperti quadringenti , & plures Falerianæ conspirationis conscii , atque singuli vel capite , vel exilio puniti .

Bellum Pannonicum secundum.
MCCCLVI.

DOmesticos ultra Resp. hostes , cum externis etiam nempe Genuensibus pacem composuit , Bernardi Justiniani opera , & virtute . Non diù tamen vel sub auspiciis fortunatissimi Principis Joannis Gradonici lætatus est Venetus , conservata libertate , partaque pace , quia altero anno certus rumor increbuit Ludovicum Pannoniæ Regem in Dalmatiam venisse numerosissimo exercitu , quo uno eodem tempore Jaderam , Sicum , Spalatum , Tragurium , Enonamque obsedit : utque suum hostem diversis in locis variis bellorum tempestatibus jactaret , cum Francisco Carrariensi Patavinorum Principe clam fœdus percussit , jamque Cuneanum , Saccillumque præter minora alia castra vi subacta fuerant . At nihil unquam tam acerbum obti-

obtigit, quod non patiens, & æquus ille Venetæ gentis animus tolerando superaret, tum præsertim adhortante Joanne Delphino, qui in publica administratione Gradonico successerat. Obsessæ in Dalmatia urbes necessariis destitutæ auxiliis, quia universa belli rabies in Italia grassabatur, Pannonio se dediderunt: Enona diù Joannis Justiniani labore defensa fame, non ferro expugnatur: Jadera, arce pro Veneto stante, non militum vi, sed Carrariensis fraude succubuit. Hæc inter in Tarvisinis nostri ita strenuè dimicabant, ut ex hostibus vix ullus è castris erumperet, qui non saucius rediret: repulsus tandem ab urbis obsidione ipse Rex, cæsaque multa Pannonum milia. At jure in Carrarienses insurgendum videbatur, puniendumque armis ingratum genus, sed tum placuit cum illis prohiberi commercia, & Marcum Maurocenum Patavinæ urbis prætorem Venetias evocari. Cæterùm, cùm integra periisset Dalmatia, Patres ut arduum, & difficile bellum evitarent, eam provinciam Regi, impetrata pace, concessere. Ita Reipublicæ optimè consultum, quæ viribus, opibusque exhausta imperium alibi partum longis laboribus, aversa unius pugnae fortuna, deperdere potuisset.

Bellum Creticum in Colonos
MCCCLXIV.

QUæ in Creta hac tempestate emerfit defectio, graviùs Patrum animos turbavit, quàm ulla alia, quòd à Venetis eòdem in coloniam deductis emanasset. Hi obliti antiquæ patriæ, gentisque, unde habuere initia, jam Græcam levitatem, & inconstantiam induerant, connixi in semetipsos, à Rep. transferre Insulæ imperium. Defectionis causa ea ferebatur, quòd nullis vectigalibus Cretenses coloni essent obnoxii: & quòd ita transactum cum majoribus, antequam in coloniam mitterentur; indignè quidem, ac impiè: ac si dominium Insulæ non ampliùs ad unam Remp. spectaret, nec deberent auxilia quandoque laboranti præstare. Hinc cœperunt rebelles arma distringere, conjectisque in vincula Venetis Præfectis, ipsi Cretam suo nutu regere, omniaque, novatis pro libidine legibus, susque, deque miscere: quodque turpius fuit, ut Insulanorum animos faciliùs captarent, Græcus ubique ritus Latinæ, & Catholicæ religioni subrogatur. Mutato itaque sacrorum cultu, quæ fides ampliùs erga Rempub. sperabatur? quippe rarò populus Principem fideliter amat, qui ab illius religione dissentit. Revocandos à rebellione animos primùm censuit Senatus

per

per Oratores, misso Andrea Contareno viro facundissimo, ut facinorosos in antiquum obsequium reduceret, aut demum arma minaretur. At cum obstinatis nihil persuasisset, obtinuit postremo destinatus ad Europæos Principes legatus, ne Venetis in Creta rebellibus auxilia subministrarent. His confirmatis, cum non in alios, quam in Cretenses bellum esset suscipiendum, omne studium in paranda classe locatur; fuit hæc XL. longarum navium, præter onerarias, datusque ei imperator Dominicus Michaelius. Verum & maritimo, & pedestri apparatu Creta petenda erat, ob id etiam validissimus conscribitur exercitus, cui præficitur vir impiger Luchinus Vermius Veronensis. Ubi comparata sunt omnia, Veneti duces in Insulam transiecti Cydonem rebellionis caput oppugnant. Cives continere se muris coacti, neque erumpere ausi, desperata spe pacis, & veniæ, in nefaria consilia se dant præcipites: horribili primum feritate in eos, qui pro Venetis sentirent, debacchantur; deinceps oblata Genuensibus Insulæ dominatione, ad tutelam sibi externam fidem, subsidiaque deprecantur. Genuenses pacis cum Rep. memores remisere legatos spe vacuos, qui ad suos in Cretam remeantes capti sunt à nostris, & interfecti. Interim dum Michaelius maritimo apparatu Cydonis hæret excidio, pari studio Ver-

Vermius partes sibi traditas obit in contigenti. At rebelles in vicinis montibus latitantes plerumque in parum cautos profliebant. Tandem Luchini constantia, atque in præsens conficta quadam locorum ignorantia eos nihil minus, quam insidias metuentes suis è latebris extraxit, insecutusque dispalatos insignem pro portis urbis stragem de hostibus habuit. Sic domiti Cydonii deditiois signa è mœnibus publicarunt, missisque, qui veniam deprecarentur, eam, exceptis defectionis auctoribus, à clementissimo duce retulere: subdiderunt se eo exemplo reliqua circum municipia victricibus Venetorum armis. Porro vetita deditæ urbis direptione exasperatur miles, excitatque tumultum in castris: sed Luchinus dexteritate, non vi, lenique oratione continuit tumultuantes. At postea ne talibus assuesceret exercitus, digna in fontes pœna animadvertit. Receptæ insulæ nuncius summa lætitia complevit Senatum: publicè Deo gratiæ actæ, atque martiales ludi nunquam aliàs visi in Marciano foro commissi. Adversa tamen fortuna ejus victoriæ hilaritatem turbavit, cum paulò post ipsamet Insula nova seditione agitari nuntiaretur. Joannes Calergius maximi apud suos nominis se Creteneses in libertatem vindicaturum profitebatur. Hoc nomine fuere plures, qui scelerata consilia, factaque

Etæque sequerentur , Calergio duce: quâ
 vi , quâ fraude , ubique grassabatur per-
 duellium caterva , Rhithymnæ expugna-
 tione , Venetisque non uno loco fugatis
 Rectoribus , quidquid à Thallis ad Cya-
 mum usque promontorium protenditur , à
 Reip. fide abalienatum est . In impium ,
 rebellemque civem Nicolaus Justinianus ,
 & Dominicus Molinus , delecti vindices ,
 cum selecta equitum , peditumque manu
 procurrunt , & quidem opportunè re-
 pressere Calergii conatus . Sed ille in
 loca montium aspera delatus valida suorum
 turba communivit juga itineri imminen-
 tia , à quibus sæpius subeuntes nostros
 aut repressit , aut deturbavit . Intereâ
 cum tota in insula hinc inde furerent
 populationibus , & incendiis , fœda rei
 præsertim frumentariæ penuria exoritur .
 Hæc Lasýthanos cum primis , deinde
 omnem ferme Orientalem tractum compu-
 lit ad imperium Reip. Cæterum contra
 Calergium adhuc obstinatum sequenti an-
 no progressus idem Justinianus , ut bello
 finem daret , ad Anopolim castrametatur ;
 ibi tutum ob difficilem accessum se cre-
 debat hostis ; at ubi occupato itinere ,
 quod unicum erat ad arcem , omnia sibi
 in dies arctiora fieri deprehendit , nota
 alia diverticula frustra quæritabat ; di-
 stracti in varia consilia locii , dum per
 deditionem alii Venetam clementiam ,
 extre-

extremam alii pugnae aleam experiri mal-
 lent, quotidie magis in angustias adducti
 sunt, postremò victi omnes, & cum ipsa
 arce capti. Illa æquata solo, damnatisque
 cum Calergio rebellibus capite, exilio,
 carceribus, universam Insulam à turbis,
 ac seditionibus purgavit Iustinianus. Inte-
 gro quinquennio disceptatum est, in pri-
 mis Laurentio Celso, deinde Marco Cor-
 nelio in urbe Principatum gerentibus.
 Justinianus in familiæ suæ decus, edomi-
 tæque insulæ memoriam ab Senatu acce-
 pit, ut domestico stemmati auream adde-
 ret Aquilam, quod Græci Imperii signum
 in vexillis pinxerat Calergius. Pax deni-
 que Cretæ ab hoc duce reddita ad hæcuf-
 que tempora constantissimè perseverat.

Tergestinorum defectio prima.
 MCCCLXVIII.

ANdrea Contareno Duce, qui dela-
 tam sibi omnium calculis admini-
 strationem invitus susceperat, eò quòd
 funestas Patriæ calamitates præfagiret,
 Tergestini primùm defecere. Hi quadam
 rapti vesania naves Venetas in portu stan-
 tes diripiunt, discerpunt custodes ad ve-
 ctigalia per Histriam excubantes, & pen-
 dentia è turribus Reip. signa per contume-
 liam evellunt. Nuntiata defectio pari mœ-
 rore, & vindictæ cupiditate Patres accen-
 dit.

dit. Quare maritimis, terrestribusque festinatis delectibus, missi sunt ad coercendos rebelles Dominicus Michaelius, & Crœsus Molinus, qui postquam in provinciam venire, obsidione, & munitio- nibus adeò circumvallaverunt, & vexa- runt hostes, ut, succedentibus tandem Paulo Lauretano, & Thaddæo Justinia- no novis ducibus, penitùs debellarentur. Interim cùm se victos, veniaque indignos agnoscerent, Austriaco Principi se, suaque omnia dediderunt. Ille festinavit veluti ad prædam magno exercitu. Veneti vallo- rum fiducia hostiles copias aspernabantur; ut tamen ventum est ad certamen, atrox, ac miseranda ubique rerum facies vulne- ribus, cædibusque, jamque apparebant, ingruentibus undique barbaris, direpta, captaque Veneta castra. Porro Justinia- nus, accitis properè navalibus turmis, terrestres manus inter pugnae, fugæque consilia hæsitantes confirmavit. Ita, re- dintegrato meliore fortuna bello, effectum, ut Austriacus ob acceptas clades de bono eventu desperaret: quamobrem, unde venerat, fugienti similis, reverti- tur. Exinde cæsis auxiliaribus, datisque in fugam, Venetus accessione virium ro- bustior Tergestum majore vi adoritur, quod cùm diù obsistere non posset, cle- mentiam victoris, quàm iram experiri maluit. Pacem ergo, veniamque civi-
tati

tati rebelles dedere Veneti, non tam vindictæ appetentes quàm gloriæ, quod etiam primoribus perduellium antesignanis salutis fuit.

Bellum Carrariense primum.

MCCCLXXII.

AT quoniam ita comparatum est, ut, crescentibus cumulatè beneficiis, pro gratia odium reddatur; Franciscus hoc nomine primus è Carrariensibus Patavinorum Princeps benemerentis Reip. hostis efficitur. Is haud suis contentus finibus Venetos attrectare primum incæpit; mox aucto sceleris pondere ipsius Venetæ Urbis perniciem tentare ausus est. Misit enim facinorosos, qui puteos venenis inficerent, certorum optimatum necem patrarent, aliosque data pecunia corrumpèrent, ut ipsi sacrosancta Senatus arcana proderentur. Foris ergo arma, intus insidiæ ab ingrato parabantur. In domesticas fraudes externis perniciosiores avertendas cum primis incubuere Patres, repertosque secreta indagine maleficos opportunè mulctarunt: postremò ad persequendas hostiles injurias conversi, cum frustra de finibus antea per vicinos Principes tractatum esset, undique contrahunt copias. Summa ducendi exercitus cura datur Rainerio Valschio, qui cum legatis

tis Andrea Zeno, & Thaddæo Justiniano omnia hosti turbulenta redderet. Ad Aponi balnea Valschius castra posuit, sæpiusque deducto milite Patavinos temerè laceßivit ad pugnam obequitando, provocandoque. Monitus à Legatis, ne tantum periculi ingredi vellet, ne sibi demùm cum desperatis bellandum esset, consilii impatiens, & ut erat elati spiritus, militaria insignia deposuit. Deserto ab Valschio muneri Albertus Corregiensis sufficitur, vir æquè & armis, & prudentia conspicuus. Interim legati, strenuè administrata re bellica, multa à Carrariensium fide oppida exemerunt: turbaruntque ita omnia hostiliter, ut Franciscus Pannoniæ Regem precibus fatigaret, quamprimum sibi amico, & clienti prospiceret auxiliari manu, subitasque mitteret suppetias: implorantem itaque subsidia adjuvat Pannonius: nec multos post dies Rex ipse cum ingentibus copiis Tarvisinos fines ingreditur magna nostrorum trepitatione. Irruenti hosti impigrè objicitur Thaddæus Justinianus, qui propter Plavis ripas prælium iniens de pedestri hostium legione integram tulit victoriam, sed mox ab equitatu circumventus, pugnamque redintegrare coactus profligatur, cæditurque, & ipse vivus in hostiles manus venit, Tarvisium tandem dissipati exercitus reliquias excepit. Post hæc ad Bassianum Patavi-

ni agri confedere Pannonēs . Exinde illos repellere conatus est Michael Delphinus ; jamque ei prospera cuncta successerant , cū Carrariēsis inopinantem adoritur : quare cū viribus inferior esset , fuga sibi consilere maluit , quā luctando certum periculum subire . Hæc inter alibi feliciter pugnatum cum Stephano Pannonici equitatus ductore . Is enim pertæsus suæ veluti socordię , quod nunquam provocatus è castris sat dignum pulverem vidisset , aut non nisi levibus congressibus tumultuaretur magis , quā decertaret , in apertum marem ciere nostros est ausus . Itaque cum hoste pugnandi cupido Albertus , qui Legatorum consilio repellere bellum , non inferre statuerat , manus viriliter in Tarvisinis consenuit . Diū æqua sorte , & multa hinc inde cæde dimicatum est . Tandem Albertus cū amplius effrænem hostem sustinere haud posset , ac in sollicitudinem vertere fiduciam pedestres milites suspicaretur , jussit ab equis cataphractos descendere , atque unà secum pedibus , manibusque bellum proseguere . Hoc illustri facto , præeunteque duce , tam acriter certatum accepimus , ut hostes ad satietatem necati sint , captus ipse imperator , rapta ferme omnia insignia , & præ magnitudine cladis Patavium nuntiatum , non esse , cur alia speraret ab inermi Rege auxilia,

xilia . Sed qui tristis pugnae eventus superbum , atque implacabilem Francisci animum non fregit , ad ultimum prostravit orta in ipsum civium conspiratio . Ut itaque tuto se eriperet à proditoribus , cum quibus difficilior dimicatio , supplex pacem petiit , datamque juxta victoris arbitrium accepit .

Bellum Austriacum primum.
MCCCLXXIV.

Fama est, Leopoldum Austriae Ducem in Venetos ab Carrariensibus excitatum . Armorum hostilis impetus Tarvisinos primum corripuit , lataque agri vastatione proximis quibusque oppidis iniecit metum: ipsas quoque Venetias Austriacus hic terror afflavit . Inviçti tamen & hac tempestate Veneti, comparato exercitu, ruentem ulterius hostem pari violentia excipiunt . Ille tum sese objicere parato timuit, declinavitque in Bellunenſes , quo in itinere populationibus , ac incendiis nihil reliquum fecit . Hanc ob causam Senatus Germanos mercatores Veneta sub ditione degentes carceribus destinavit , & publicatis singulorum bonis damna passis restituit . Interea totius belli administratio Jacobo Caballo Veronensi mandatur . Is Tarvisio egressus hostes ad Unigum cæcidit, repulitque , ac fugientibus semper inhæ-

rens Feltriæ inclusos obsedit. Suorum periculo, ac propria dignitate excitus Leopoldus, non jam prædatoria manu, sed serio, ac magno bello obviandum infestæ potentiæ ratus, omnique opere, & opera decus, & famam redempturus acerrimè in nostros revertitur: quibus cù tutiora magis, quàm furens Germanorum atrocitas, placerent, direptis oppidi suburbiis, incolumes Tarvisum regressi sunt. Ex ea fuga Austriacus dolens sibi interceptam vindictam, prædamque, in Bebianam turrin defæviit, trucidatis ad unum præsidiariis. Cæterum, ne hæc arma diutius obstreperent, consulente Ludovico Pannoniæ Rege, pactæ sunt in biennium induciæ; deinde firmata pax, apud Venetos in diem duratura, renascente cum Genuensibus bello, quod tamen variante diù fortuna, magnaque gestum virtute Reipublicæ cessit feliciter.

*Bellum cum Genuensibus septimum,
Clodianum.*

MCCCLXXVII.

Tenedus maris Ægei insula Veneti juris facta bellum hoc quatuor annis continuatum cum Genuensibus promovit, cæteris tùm rerum gestarum magnitudine, tùm fortunæ varietate memorabilius. Metuebant illi Reipubl. poten-

potentiam, quam nova imperii accessione crescere iniquè ferebant. Inde odium, & invidia, quæ feros animos in ejus ruinam exstimulabat. Venetis eam insulam donaverat Calojoannes Græcorum imperator (non inutili nostrorum opera usus in Andronicum filium regni competitorum) ut beneficii gratiam rependeret. Eandem ipsius Andronici munere sibi Genuenses vindicare conabantur, quod ut quoquomodo assererent, cum filio rebelles societatem, fœdusque jungunt, Venetumque tota Græcia pellere constituunt. Magnum facinus magno firmandum conatu: unde in belli consortium pellunt Pannoniæ Regem, Austriæ Ducem, Aquilejæ Antistitem, & Franciscum Carariensem, ut tot Principum conspiratione nemo rem Venetam utcumque stabilem, non collapsuram putaret. Erumpunt primi Genuenses furtim Tenedum aggressuri XI. triremibus; sed mox recedunt terri venetarum navium robore, & numero, quæ in illos audacissimè processerant. Hæc inter Byzantii ab Andronico sevitum in Venetos mercatores inaudita, & corporum, & rerum clade: coactusque Imperator benevolentiam Venetorum Genuensi admetiri. Sed hæc omnia vix è Græcia innotuere, cum alius rumor insonuit: à finitimis nempe Patavinorum, & Aquilejensium Principibus Venetos fines igne,

ferroque laceſſiri . Tanta rerum diſcrimi-
 na noſtrorum animos haud territarunt ,
 qui locata in ſola virtute fiducia , ſpreto-
 que armorum undequaque furentium ſtre-
 pitu , fortiter , & propriis ſe viribus tu-
 tati ſunt . Quoniam igitur maritimum
 bellum in dies magis & fama , & pericu-
 lo creſcebat , victorem Piſanum in Ligu-
 ſticam oram expediunt Patres . Ille ejus
 præternavigato littore plura diſſipavit na-
 vigia ; & conſerto apud Antium Marte ,
 hoſtilis belli ducem Ludovicum Eliſcum
 in captivitatem adduxit : eo tamen loci ma-
 jor cum pelago , quàm cum Ligure dimi-
 catio fuit , quæ verò victoria tempeſtati ,
 & naufragio ſuperfuit , ea pro Victore
 ſtetit . Sed illius quaſi altera ſpolia repo-
 poſcerat , cùm paulò poſt ex Eubœa in
 Liguſticum tractum denudò reverſus eſt ;
 populatus circùm omnia cum opima præ-
 da ſuos deinde in Hiſtriæ hyberna dedu-
 xit . Hinc alibi apud hoſtem ſummè trepi-
 datum ; quippe Venetæ triremes , quæ no-
 vam ſponſam Bernabovis Inſubrum Ducis
 filiam Cyprio Regi erant traducturæ , opem
 quoque videri poterant ferre in recuperan-
 da Tamaffo , illi jam antea per vim extor-
 ta . Neque id perperam . Nam ut noſtri
 Cyprum appulere regiis precibus animati ,
 in eam expeditionem quinque triremes di-
 mittunt : ſed harum opera eadem fuit ,
 quæ regiarum copiarum : nam illas Ligur-

ocu-

oculis, animoque jam tùm sibi præsens, ut vidit, sic profligavit. Melius, relicta Cypro, ad Ascrivium Pisanus rem egit, ubi & mœnia civitatis, & civium animos eadem consternatione protrivit, captivorum præda militibus, ut promissa, sic data, ulterioris audaciæ futura cos. Ab Ascrivi Pannonici oppidi everfione in Calabriam transfretavit: audierat in Tarentino sinu stare inimicam classem, cujus oppugnandæ cupidus, omnia maria, & litora vestigabat; sed hæc Venetum adventare monita, extracta in tempus pugna, tandiù morata est persequentem, quousque se frustra adniti Pisanus agnovit, Jaderamque cursu tenuit, ubi cùm nullus portus, nec statio ulla tutæ Veneto esset, necessario, quò venerat, redeundum fuit. Hæc: dùm mari fiunt: in Tarvisinos agros, vicosque diris procurrebat vastationibus Carrariensis: sollicitatum ad dedicationem Mestrium Francisci Delphini vigilantia in obsequio retinuit. Verùm Pisanus in Dalmatiam regressus domuit Sicum, militique concessit diripiendum: mox Tragurium conversus, in portum, cui hostiles naves incubabant, non semel tentavit irrumperè, sed inde ab Genuensi præsidio compellus abscedere, Histriam in hybernâ divertit: ubi quantum hîc aeris inclementia, ac pestilens cœli plaga classem confecerit, exeunte

hyeme, argumento fuit, quòd ex triginta scelectarum triremium remige, ac milite vix duodecim restaurarit; missum igitur ab urbe imminutæ classi supplementum, mandatumque Pisano, ut in Cretam navigaret. Sed jam iter parantem triste fatum excepit, certumque venturæ calamitatis augurium. Refectam enim classem, apparatusque belli omnem in mari aggressa tempestas tam fœda strage laceravit, ut hostilis belli effigiem præberet, planè quasi Genuenses quoddam cum fluctibus, procellisque fœdus adversus Venetum injissent. Duæ, quas ex onerariis in portum Anconitanum incolumes æstus explicuerat, scelere oppidanorum Liguri proditæ sunt: reliquas à pacato mari recollegit Pisanus, opportunè instruxit, iisque est usus dexterrimè: nam quindecim hostium rostratas fugavit, quibus illi profecti in Adriaticum omnia turbabant. In Ægeò mari graviora damna Genuensibus inferebat Carolus Zenus, unoque propè tempore omnibus locis adefse videbatur. Usus est fraude sub hęc vasser hostis. Nam audito Pisani trajectu ad Polam, ab averso portui promontorio decem majores naves in insidiis collocavit, totidemque Venetum insecutus est. Victor harum ducem Lucianum Auriam ex insolito certaminis appetentem ut vidit, in audacia fraudem suspicatus prælium

re-

recusavit. Propterea à suis timoris incusatus; demùm ad pugnam provocanti occurrit, jussis stare in portu quinque triremibus, quæ tempestivè succederent, ubi necessitas postulasset. Pugnatum accepimus ita, ut utraque classis aciem terrestri similem instruxerit. Pisanus fatorum violentia raptus in fallacias, ac medius inter hosticas dimicare coactus, victoriam tandem circumfuso Liguri reliquit, nullis subsidiariis, ut credebatur, in usum prodeuntibus. Hujus adversæ cladis rumor in urbe evulgatus, incredibile, quo mœrore omnium animos perturbarit. Illius primùm auctor Pisanus, quòd pugnasset temerè, poscitur; inde perduellionis damnati, qui ducis imperio non paruerant, omnes simul condi carcere Senatus jubet. Hosti, quo plenissimè triumpharet, nihil deerat præter ipsam urbem. Idcirco, Petro Auria ducente, solvit ab Jadarenfi littore, ac more ignis obvia quæque depopulatus, Gradum, Comaclum, Caprulas incendit: propiùsque ferens hostilia arma, diripit Palestrinam, inde Clodiam movens omnia circum evertit, repletque tumultibus. Verùm in unam oppugnandam Clodiam totis animis, viribusque fœderati omnes suas acies direxerunt: quippe ea capta, imperii finem, occasumque urbis dominæ certò sperabant. Maximaitaque vi, summoque apparatu premi Clodienses cœpti

G. 5 sunt:

sunt : aggeribus , munitionibusque oppidum quâ terra , quâ mari circumseptum , curante sedulò legiones , commeatusque Carrariense. Restitit supra vires Petrus Hemus Prætor , elusitque plures dies hostium territamenta ; sed tandem , desperato subsidio , fame , ac machinis expugnato defensore , cessit oppidum hostibus , qui immani sævitia tum finem cædibus dedere , cùm deficerent , qui cæderentur . Sex mortalium millia periere , ingens captivorum fuit numerus . Ad nuntium perditæ Clodiæ , publicè statim comploratum est : ob id à Patribus , undique ope destitutis , missi illicò Oratores , qui integram tantum libertatem à Carrariense , & à Ligure quibuscumque legibus impetrarent . At ille pervicaci odio , hic præsentis victoria efferus , eam pacis ssem Venetis reliquam proponebant , ut victi libero jure victoribus subderentur . Indignitatis plena , responsio ultimæ libertatis admonuit Venetum , in libertate natum , pariterque victurum , atque ut quàm maximè vegeti solent esse impetus pro vita dimicantium , sic plus animi sumptum à populo quasi morituro , itumque in omnem reliquæ fortunæ spiritum , conclamatumque ad arma classico populi , reposcentis una voce Pisannum belli ducem . Huic publicæ acclamationi assensum , tanquam arcanæ divinationi , eductusque è custodia Victor ,

to-

totius belli administrationi, ceu alter Marius, præficitur. Sic civitatis studium, fortiter insurrexit, affectante ultrò militiam plebe, ac in usum præsentem nonnullis sumptus præbentibus, & navigia privata stipe. At hostes quoque rem suam agebant foris. Methamaucum usque proVecti è propinquo ultimam cladem non se dedituribus minitabantur. Pisanus recentì classe, & urbanis copiis instructa, moturus in Genuenses, proximum littus munit excubiis, duasque ante portus fauces protendit ferreas catenas, & aliquot ad Popiliam mergit navigia lapidibus plena: ut ita occluderetur libera in urbis aquas navigatio. Sed interim non deerant audentiores, qui minoribus cymbis Clodiam prædatum usque procurrerent. Thaddæus Justinianus ex hostium vinculis elapsus hostilia rostra iuxta Brundulum acriter divexabat: pari successu Jacobus Caballus laceſſebat in litore Carrariensem peditatum. Hæc in futuram spem prosperè in salo patrabantur; in solo turbulentiùs, cùm in lassos, atque districtos gravis alter belli turbo infremuisset. Pannonum arma per eos dies, instigante Patavino, sensere Tarvisini, & de eorum incursionibus fidelissima urbs querebatur. Senatus, qui uno tempore tot bellis sufficere non poterat, per legatos ab Rege pacem petit: at quia iniquæ proponebantur conditiones, rejecta

est. Ita ex desperatione crescebant animi : & quoniam supremi Ducis præsentia in bello veluti numen quoddam est , à quo milites alacres , ferocesque spiritus hauriunt , Patres in eam sententiam ivere , ut penes Andream Contarenum Principem universi exercitus regendi esset imperium : & in patriciorum album redigerentur ii , qui tum privatis impendiis juvissent rem publicam . His prudenter decretis cœpit fortunam pœnitere inflictarum cladum . Præeunte ergo Contareno , nostri visisunt fortius , alacriusque bellare : vulnera sine mœrore accipere , mortem intrepidi oppetere , & illius majestate , qui corpus annis quamvis grave , ingenium tamen prudentia vegetum bello afferebat , nemo militum mandata ducum detrectare . Igitur singuli navium moderatores pari animorum impetu implacabilem , asperrimumque hostem aggressi sunt . Joannes Barbadi-
cus ex Albani fossa Ligustica præsidia dispulit : Thaddæus Justinianus quotidie magis redeuntis , & reviviscentis imperii spem virtute , manuque dabat : nec hisce , aut cæteris inferior Pisanus in ipsis æstuariis insensissimi exercitus molem mira felicitate sustentabat , nulla non die victor præda , aut incendiis hosticarum navium : Carolus Zenus Ligurem toto Adriatico classe vagum nullibi in tuto consistere patebatur . Prosperis hisce placatæ sortis præ-
ludiis

Iudis non levis metus invasit hostem ,
 qui omnia in pejus sibi ominari, castris, non
 amplius egredi, sua ipsa consilia, conatus,
 impetus formidare : ita ut desertor ipse
 suarum munitionum , operumque pa-
 vidus, ac tremens Clodia sese clauderet .
 Illum mœnibus obseratum repentina adori-
 ri oppugnatione à nostris decretum est ;
 idque per principem Contarenum adeò fe-
 stinatum , ut ante Clodiæ portum prius
 constiterit , quàm de accessu quicquam ad
 Ligurem perveniret . Ad Venetæ classis
 conspectum , ac si ultîma necessitas , soli-
 dum ad magna , & fortia incitamentum ,
 Genuenses in furorem verteret , vehe-
 menti impulsu suis triremibus nostras na-
 ves urgent , initoque acris certamine on-
 rarias, quæ magno erant usui , superant ,
 perforatasque incendunt, ac reliqua classe
 fugata, tantum terrorem nostris incutiunt,
 ut apud consternatos jam pro certo periis-
 se libertas videretur . Omnium tamen ani-
 mos voce , vultuque recreavit Contare-
 nus, ac ostendit calamitosæ virtuti fortu-
 nam hæud defuturam , vanosque esse cos-
 metus ; cùm certam de hostibus victoriam
 promitteret . Jussit itaque intempesta no-
 cte mergi duas ex semiambustis onerariis
 in portu, eodemque astu Brundulum oc-
 cludi , & reliquos impediri aditus , ne
 qua hostica classis exiret , atque ita obsi-
 deretur . Cognito Venetorum reditu , Li-
 gur

gur priori impetu ad pristinam victoriam
 in nostros rapitur : sed sensit dolos, cum
 in ipsas obrutas naves incidisset, incusa-
 vitque Auriam, qui suo muneri defuisset,
 neglecta portus custodia. Acrior itaque
 è vicinia redditus utrinque hostis mutuum
 cruorem quotidianis dimicationibus hau-
 riebat, ingens ubique strages, ac ferè
 æqualis, nisi quod Ligurem fovebant so-
 ciorum auxilia, proinde à Clodia summo-
 veri non nisi multa vi posse videbatur.
 Magnam intereà ad victoriam spem, &
 momentum attulit Joannes Barbadicus, qui
 omnium primus horribile, & admirandum
 in aquis specimen belligerandi exhibuit
 æneis tormentis, quas vulgò bombardas
 dicunt. Eorum usus jam antea repertus ad
 tutanda, quatiendave ignitis glandibus
 mœnia, plurimum tunc Venetos juvit.
 Ille singulos lembos, atque triremes novis
 iis machinis armatas Genuensium pectori-
 bus objecit : quorum ictibus insolitis, &
 inevitabilibus miserè discerpebantur. Sub
 hæc è Græcia cum XIV. rostratis accessit
 Zenus ; quarum aliquot Brundulum
 transmissæ Pisaurum ventorum vi abre-
 ptæ, (sic belli aleam alternante fortuna)
 vicinis littoribus alliduntur, ac laceræ,
 planèque inutiles fiunt hostium præda. La-
 ti eo facto, veluti si pro illorum causa pe-
 lagus, ventis, cœlum dimicaret, dupli-
 cem moliuntur eruptionem, alteram ad
 Lu-

Lupam, alteram ad Brundulum, utrobique tamen cum clade repulsi : propterea aliam effugii viam tentarunt : ex transverso enim littoris, quâ in mare prospicit, alterum veluti portum sibi fodere parant magno sanè labore, non tam fugæ destinatum iter, quàm in obsidentes nostros viam. Mature eam molem detexit Venetus, certusque terrestri manu posse dissolvi, è navalibus copiis expeditum legit militem, quî sub Caroli Zeni auspiciis in continentem profiliret. Ille utraque disciplina pari laude conspicuus, pedestre bellum suscepit; inessamque ab hostibus medio littore turrim subvertit : & dum victor ulterius procedit, disturbato opere, armatas offendit acies, quæ turmatim, inconditoque clamore Brundulo, Clodiaque in Venetos irruebant. In confertissimos hostium cuneos penetrat Zenus, nec ducis minùs virtute, quàm militis ardore Brundulanas primùm copias in turpissimam vertit fugam; mox Clodientes, occiso Auria, insequitur usque ad pontem, quo in alteram ripam Clodiam versus trajicitur. Pons à fugatis ex acie, atque à transmissis ab oppido in subsidium, occupatus ruinam traxit præ pondere, in subjectasque aquas mortalium plures dimisit, & retinuit Venetum, ne tum Clodia potiretur. Ea prælii calamitas, fractique pontis jactura tanta fuit, ut ad tria milia.

lia hostium interiisse dicantur , & capti
ferè sexcenti. Post hæc dedente se Brun-
duli castro, Clodia terra simul, marique ob-
sideri potuit. Inclusi intra mœnia , non
armis, non com meatibus egentes, quæ lar-
gus omnia suppeditarat Carrariensis, de-
crevere novo vincendi genere , scilicet
non pugnando , superare , rati Venetam
virtutem , ac patientiam mora , tædioque
consenescere. At Zenum nulla securitas
post victoriam, neque ulla segnities ince-
sserat. Quare à Clodiæ portu circum ipsam
urbem castrametatus, illam vallo, fossa,
inductoque mari, castellisque circumdatam
subjugare non ferro , sed fame statuit:
tanta usus vigilantia , ut procedente obsi-
dione obsessi confœderatorum suppetias
frustrà implorarent. Genuam subinde
it nuntius, qui classem Clodiano portu re-
tentam, speratam excidisse victoriam refer-
ret , & alterum navalem apparatus
instruendum, quo mœsti cives urgenti ,
ac miseranda calamitate eriperentur.
Ea propter ad liberandos obsessos Mat-
thæus Marullus in Adriaticum tredecim
triremibus navigavit: sed metu Venetæ
classis , dum suam Clodia procul ducta-
ret , in Thaddæum Justinianum incidit
ex Apuliæ frumentatione redeuntem.
Hic conspecto hoste in Sipontinum por-
tum deflectit, quem infectatus Ligur vi-
ribus disparem oppugnat , comprehendit ,
atque

atque iterum in captivitatem abducit. Secunda hac pugna Clodiam appellit, ut, si quâ posset, obsessis subveniret, atque ob id etiam nostros importunis clamoribus provocabat. Pisano immodestæ temeritatis castigatio commissa, cujus nomine vix audito convitiantes turpi fuga, se ejus furori subdixerunt. Cedentes in Dalmatiam Pisanus insequi noluit: cæterum qui obsidebantur, percepto amicæ classis adventu, in usum novorum lincium tecta, parietesque resciderant, quibus per internas aquas clanculum delati in mare ad suos profugerent: & effugissent quidem, si Zeni hostile opus, vafrumque ingenium, latuisset. Is extemplo ad mare accessum, prohibuit parvis myoparonibus, in vectusque in fugam molientes, omnes in oppidum rursus compulit, succensis naviculis. Ad ultimum extrema defatigati inedia, & ad obscænos quoque cibos redacti, non prius de se dedendis cœpere consilia, quàm auro tentata aliquot Venetorum ducum pro effugio fide: pervenit & hoc scelus opportunè ad Zeni aures, qui in delatos reos sub hostium oculis animadvertit, atque exinde majori studio continuata est obsidio: hac demùm domiti Genuenses misere legatos, qui nudis tantum corporibus liberam abeundi facultatem deprecarentur: sed rejecti, repulsi, que invalescente rerum penuria coguntur.

tur sese victorum arbitrio , & potestati
 permittere. Decimo itaque obsidionis men-
 se, non tam armis , quàm , turpe nihil
 non experti , fame devicti easdem condi-
 tiones à victore Veneto accipere coacti
 sunt , quas illi antea victo obtulerant :
 haud levi temperandæ victoriæ documen-
 to . Capta Clodia , quatuor hostium mil-
 lia in publicas custodias data sunt : unde
 viginti triremes captæ : & biduo integro
 facta prædæ licitatio : Quoniam verò nun-
 quam Veneti domitis hostibus victoriam
 exprobrarunt , qui , nec si vincerentur
 frangi animo , nec si vincerent , secundis
 rebus inolescere consueverunt , idè pu-
 blicè , privatimque singulari lenitatis exem-
 plo ita habiti sunt captivi , ut non facilè
 crederes , eum esse Genuensem , qui Ve-
 netam libertatem non ita pridem opprime-
 re studisset .

Tergestinorum defectio secunda .

Justinopolis iterùm recepta .

MCCCLXXXI.

Non quievere Clodiana clade pervi-
 cacissimi Ligures , ne tam virtu-
 te , quàm fortuna superati viderentur .
 Prompti igitur ad vindictam XX. rostra-
 tarum classe non multò post Genua
 egressi Histriam , & Dalmatiam sollici-
 tant , atque in primis retrahunt à Reip.
 obse-

obsequio Tergestinos. Prona in scelus gens hæc fidem deserit, conjectoque in vincula Donato Throno Prætor, fugat ex utraque arce præsidium. Eadem vesania furit Justinopolis, sed arx Veneto firmius adhæsit. Auctis denique viribus hostis prope ipsa æstuaria rursus stare visus. Quocirca Zenus adversus denuò insultantem immisus, reddito prius securo ab incurfibus mari, in hostile delatus solum, oppida, vicosque secundum Lunæ portum evertit, in eundem investus paulò post Pisanus illum Pirano dispulit in Dalmatiam, ubi diu inter scopulos latuit. Verùm ut partæ de Genuensibus victoriæ nihil superesset, Tergestum, ac Justinopolis rebelles urbes in obsequium erant reducendæ. Decretum itaque primùm, Justinopolitanam moliri oppugnationem, qua peracta prosperè, sperabatur ultrò se Tergestum dediturum. Pisano hæc una commendatur expeditio, qui jam hosti terrori erat. Igitur classe optimè instructa in provinciam delatus, speculatorias, lectasque turmas præmisit, quæ nocturno descensu pontem rescinderent, qui Justinopolim jungit continenti, ut ab ea parte rebellibus externa auxilia retardarentur, & summo mane tanta celeritate ad inimicum litus appulit, ut Justinopolitani, quem venire non fenserant, videre se vix crederent: confestim circum jacentes agros, vicos-

vicosque fœdat incendiis in obfessorum metum ; denique urbis mœnia omni telorum , pilarumque genere adeò quassavit , ut , tandem oppidani consternati animo iterùm in potestatem venerint . Post domitam Justinopolim Pisanus Ligusticæ classis reliquias infectatus, eas in Pelignis littoribus fœdissimè laceravit , sumpta de Polæ , Arbæque vastatione , & de abducto in captivitatem Ludovico Contareno ; vindicta . His gestis , Jaderam tenuit ; post apud Sipontum correptus lethali morbo interjit , universis meritò fortissimi viri sortem collachrymantibus . Sed postquam privato , publicoque dolori indultum est , Patres maritimis rebus summa cum administratione præficiunt Carolum Zenum . Intereà Aloysius Lauretanus apud Curictam hostes dedit in fugam , eosque toto postea pelago Zenus exterminavit , compressa quoque illorum audacia , qui circa Anconam in Venetos negotiatores piraticè incurfabant . Ad hæc , modò inferum mare , modò Superum perlustrando recentem Liguris classem quæribat , quam per eos dies VII. ac XX. triremium Genua prodiisse audierat . Nec vanus rumor , nam illa repentino appulso Justinopolim denuò subjugarat . Carolus non alia vi , quàm facta in hostilem provinciam irruptione , abducendum hostem ratus , & pari exemplo Histriæ clades

clades in Liguria vindicandas, illuc tota mole conversus, maritimam oram tantis calamitatibus infestavit, ut inhærentem, atque incubantem alienis rebus militari hac arte retraheret. Ita bis continuato bello Justinopolis amissa, bis recuperata. Cum irrequieto sanè, vehementique hoste pugnatum, qui fortunæ judicium pati insolens, repetitis excursibus, à Pisauro Clodiam usque, mare quasi tempestate denuò præcluserat: hinc à nostris circa urbis portum aliæ erectæ munitiones, dispositi in littore milites, imperatæque naves, quibus per occasionem quæcumque hostilis audacia comprimeretur.

Bellum secundum Carrariense.
MCCCLXXXII.

Vix sedata maritimi belli procella, altera tempestas ab Carrariensibus aliunde mota perstrepuìt, eodem tempore, quo periculosissimis bellorum curis implicabatur Resp. Tarvisium illi affectabant, quamobrem cœpere vastatis in confinio agris, positis ad mœnia castris, extructisque turribus, quæ murorum pinnis imminerent, urbem diù noctuque fatigare. Et ut brevi illius absolverent oppugnationem, interceptis com meatibus, Silim fluvium in diversa duxerant. Tarvisina præsidia non tam
ho.

hostium metus, quàm rerum omnium penuria incessit; quare ut animis consternatis nostri succurrerent, armatis quibusdam lintribus sibi aperire conantur inessas aquas, Marci Caravelli ingenio. Is hostiles machinas ab amne revellere aggressus, ab incœpto opere à Carrariensibus deturbatur, incassum è fluminis ripa opem afferente Saraceno Dandulo. Acriùs exinde oppugnatum Tarvisium, circumlatisque hostium magno terrore signis, Castrum-francum, munitioraque alia circum municipia Patavinis tradita sunt. Quare cùm spes omnis retinendi Tarvisii cecidisset, visum est Senatui eam urbem Leopoldo Austriaco Duci tradere, in contumeliam invisæ gentis, & ut Resp. liberata domestico bello, tota in Ligusticum insurgeret, quod fama erat magis, quàm antea erupturum. Carrariensès de Veneti Legati profectio-
ne ad Austriacum certiores facti, in Tarvisinos majori rabie concitantur, utque majorem obsessis metum incuterent alienis calamitatibus, Noalium evertunt, Acelum solo æquant, Serravallium, & Cuneanam arcem deditione capiunt. Adventantis hæc inter Leopoldi ad recipiendum Tarvisium fama cum valido exercitu Carrariensium copiarum ductor Arcuanus Buzzacarenus exterritus Patavium festinata fuga recessit, reversurus, ubi juvisset. At vix Leopoldus,
-o-
nullo

nullo obstante Plavim transmiserat, intraque urbem festis acclamationibus erat exceptus, cum hostes relictis in unum copiis ipsum securum inopinato armorum strepitu turbavere. Pavidum, necdum auxiliis confirmatum ingentibus promissis expugnant, ut Carrariensibus, quod ferro assequi nequiverant, auro concederet: quæ omnia prius perfecta, pactaque fuerunt, quam quidquam eorum geri Venetias nuntiaretur. Indignum id facinus nostrorum animis altiùs infedisset, nisi per eos dies pax inita cum Genuensibus, in quam utrumque populum, ac fœderatos Principes sollicitarat Aimon Allobrogum Dux, tanta lætitia Senatum cumulasset, ut tum adversa hæc non sentirentur.

*Fœdus cum Mediolanensium Duce in
Carrarienses.*

MCCCLXXXVIII.

Nondum elapso pacis septennio redit ad arma Franciscus Carrariensis, præsidente Reip. Antonio Venerio: neque aliam ob causam, quam quia quietis impatiens, & alieni imperii cupidus. Injerunt Veneti cum Galeatio Vicecomite Mediolanensium Duce fœdera adversus turbidum Principem, ut, illo divisim oppugnato, facilius à se propullarent injurias. Quare à continenti progressus in arma Vicecomes Patavinæ

ur-

urbis exitium omni tormentorum genere prosperè molitus est. Franciscus ut ambitionis, ruptæque pacis daret pœnas captus in Insubriam deducitur, clauditurque angusto carcere, qui paulò antea amplo, & opulento oppido vix capiebatur. Nostri comparata aliunde plurium navigiorum classe ad oppugnandas hostiles in stagnis, ac in fluvialibus ostiis erectas munitiones, progrediuntur, Francisco Delphino præfesto. Post arces, castraque occupata, ever-saque, ab aquis in solum translato bello, Tarvisinam expeditionem suscipiunt: & quamvis jam fusi, & saucii hostis reliquias adorirentur: non faciliùs tamen domuerè, quàm integri, & recentis. Itaque inter varia armorum discrimina Tarvisini Venetæ clementiæ memores sese fidei, obsequioque Reip. alacres tradidere, expulsis Carrariensibus: tantaque constantia, ut nec fidelior in posterum reperta gens ulla sit, in summa etiam Venetarum rerum desperatione.

Bellum sociale in Galeatium Vicecomitem Mediolani Ducem.

MCCCXCVII.

Galeatius, præclarissimarum urbium accessione, quippe qui Pata-vium jam occuparat, jamque Veronam, ac Vicentiam, expulsis Scaligeris, invaserat, tumidus, & ferox dum integras pro-

provincias suo addere imperio connititur ; sibi finitimorum Principum invidiam conciliavit . Inde odium , & reprimendæ cupiditatis consensus , eo præcipuè tempore , quo ille cum Bononiensibus , ac Florentinis præliabatur . Ejus belli incendium , cum per viciniam timeretur grassaturum , universi propemodum Italiæ Principes ad id restinguendum sancitis fœderibus , sociatisque armis conjurarunt . Veneti classe per Padum in Mincium traducunt , quia hostis in Mantuanum socium primò moturus credebatur : & audacissimè Vicecomitem adorti unica dimicatione classicum ejus apparatus profligant , gloriamque confecti belli , servata Mantua , reportant . Huic victoriæ alterum non minus illustre facinus adjungitur . Galeatius Patavium , ut diximus , sui juris fecerat , fuga , cæde , captivitate Carrariensium . Evaferat Franciscus , junior appellatus , atque tamdiù apud Baviaræ Ducem latuerat , donec sibi recuperandæ paternæ urbis occasionem virtus , aut casus dedisset . Accepta itaque Italica conspiratione in Vicecomites , ignoto habitu Venetias venit , exorataque Senatus clementia , Patriæ , ac urbis administrationi restitui impetravit . Beneficio igitur , armisque Reipublicæ iterum Carrariensium familia Patavio potitur , ejusque imperium Franciscus recipit Senatus Ve-

neti munificentia : quæ cùm barbaros, & immites quoque animos conciliet, quis credat in Rempublicam arma denuò sumpturos Carrarienses?

Bellum cum Genuensibus Octavum.
MCCCCL.

PRæerat urbi Michael Stenus, cùm Genuenses rupto fœdere, violataque pace alterum ex præsentī tranquillitate belli turbinem excitarunt, non irritati, sed ipso, quo antea invidiæ æstu, aut morbo dominationis: quasi cum Venetis naturale haberent dissidium. Buccicaldus quidam Gallus per ea tempora rem Genuensem administrabat. Hic cum XXIII. triremibus Tamassum, Cypri urbem adnavigavit, ut inde, si daretur occasio, in Syria novi aliquid tentaret: primò igitur Berutum oppidum prædabundus aggreditur, ingentes ex eo prædas agit, infestus etiam onerariis, quæ Venetorum merces vectabant; nec privatis contentus, fur publicus haberi voluit: ausus etiam Reip. classē apud Methonem populari, quasi certus victoriæ ex sociorum piratarum numero. Cæterum Carolus Zenus Genuenses vincere assuetus in temerarium hostem strenuè, suoque more detonuit; consilio, manūque acris per prætoriam discurrens illud sæpius suis repetebat, non multitudine, ac
fero-

ferocia, sed virtute militum, ac prudentia Ducum constare victoriam. At dum quoque de triumpho hæsitaret fortuna, Hermolai Lombardi adventus rem Venetam, undecim rostratis ægrè defensam, penèque expugnatam erexit astu. Is cum plenis velis in hostilem classem, duabus triremibus, impressionem fecisset, jamque inimicas contingeret, jussit momento velorum funes incidi, quæ ventorum vi raptæ unius hostilium navigiorum milites retis instar involvit, ut omnes ad unum incruento Marte cæciderit, & aliud infesto ictu percussus cum propugnatoribus demerferit. His auspiciis restaurata quasi de integro pugna, Zenus Buccicaldum ita oppressit, ut quamvis duplici vulnere faucibus non prius ex acie recesserit, quàm victum hostem, omnique penè apparatu exutum in fugam conjecerit. Parta victoria Venetus ad suos lætus revertitur, cujus magnitudine quantus Genuensibus incussus fuerit metus, vel ex eo constat, quod nulla in posterum ab ipsis Reipublicæ vis illata.

Bellum Carrariense tertium.
MCCGCIII.

MAjores suos imitatus Franciscus junior Carrariensis, atque hæres paternæ ambitionis, dum per omne ne-

fas imperium proferre studet, contumacem se quodque, & ingratum adversus Rempub. declaravit. Primum itaque cum, sublati veneno Scaligeris, Veronam occupasset, coepit armis urgere Vicentiam. Cives tyranni mores detestantes ultrò se Veneto Senatui dederunt. His in patrocinium, ac fidem susceptis, ad Franciscum missus nuncius, ut desisteret Vincentinos injuriis laceffere; &, nisi temperaret, bellum indiceret. Ille acceptorum beneficiorum immemor, non modò Venetorum postulatis non acquievit, sed legatum per obscœnam, turpemque contumeliam violatum, & irrisum remisit. Quare haud cunctanter in arma conclamatum, præfectorum terrestrium copiarum Paulo Sabellio, bellicæ socii Francisco Gonzaga Mantuano; navalium Marco Grimano, ut non tam terra, quàm aquis sacrilegi hostis temeritatem, ac perfidiam retunderent, & castigaret. Grimanus armatis lintribus in Meduacum illatus ex omnibus fermè locis munitiones, & Carrariensis præsidia deturbat: Gonzaga cum Sabellio Patavinum agrum ingressus eadem fortuna circum omnia subvertit, atque crebris vastationibus, & incendiis quotidie trepidantis civitatis oculos fumo, ac pulvere implebat. Verùm quia faciliùs cessurus videbatur Carrariensis, si divisis ar-

mis

mis peteretur, jussus est Gonzaga bellum in Veronensibus administrare, qui ea arte, & solertia arma moderatus est, ut interclusis undequaque subsidiis, ipsa penè, qua cœpta est obsideri die, Verona capi potuerit: sed nihil æquè, atque invisâ Carrariensium dominatio, odiumque ob interfectos Scaligeros deditionem maturavit. Nostri urbem adepti, hostium obtruncant præsidia, inscutique Jacobum Francisci filium clàm aufugientem prope Hostuliam capiunt, ac Venetias vinctum mittunt. Hæc inter Franciscus cum diù labantes in præceps res suas sustinere non posset, ad externa conversus auxilia, Albertum Atestinum Ferraricium Ducem in Remp. concitavit. At Senatus ut certum, iratumque hostem cum Alberto committeret, illi fratrem Actium exulem, opponit duplici injuria metuendum; & libertatem, & Polyneum jure sibi repetentem. Hic effusus cum Venetis turmis in Ferrarienses agros, nihil cui ferro, & igne noceri poterat, non scdissimè vastat: traducta etiam classis per Joannem Barbum, utrique Padi ripæ adeò se præbet infestam, ut Ferraria ex metu nutaret. Quare cum se inexplicabilibus malis oppressum iri cerneret Albertus, positis armis, à fratre, jussu Senatus acceptis conditionibus, pacem redemit. Sedato hoc motu, bellum

validius in Carrariensem recrudit, ductore Galeatio Grumello, qui mortuo Sabelio suffectus, ut in hostile solum pervenit, arces, & vicos terrore, colles, & agros populationibus complevit. Patavium tandem promotis castris, cum aliquot dies machinarum impetu primum illius, & sequentem murum prostrasset; scalis deinde, & irruptione ad portam Sanctæ Crucis peregit excidium. Fugatur in arcem Franciscus, qui velut in altero oppido victori diu restitit: hic acriter obsessus, & prope expugnatus hostis, ferociter pro se pacis leges agebat, veluti re integra, ac in ipso interitu superbissimus. Cæterum Patavini non tam fessi fame, & bello, quam domini pertæsi contumaciam, versa in rabiem fide, Principem in Venetorum manus dederunt. Hunc in modum recipitur arx, ipseque captivus Venetias ductus, digna ingratis pœna, jugulatur. Hoc Patris, & Avi factum quinquennio post subivit etiam Marfilius, ausus res novas moliri, in quo omne Carrariensis familiæ genus extinctum accepimus, ut nullus remaneret qui, tantorum facinorum capefferet successionem. Ex hoc trium annorum bello accessere Veneto imperio Vicentia, Verona, Patavium, aliaque complura clarissima oppida: ii nempe solent clementiæ Principum esse fructus: tyrannis autem non diuturni obsequii magistra est.

Bel-

Bellum cum Sigismundo Imperatore .
MCCCCIX.

TAndem Jadera non armis , sed auro Venetæ ditioni debebat accedere cum universo agro , suisque à mari limitibus . Hanc Ladislaus Pannoniæ Rex in Neapolitanum Regnum , quod nuper obtinuerat , profecturus , Reipubl. vendidit centum millibus nummum . Ita Venetus per vicinas , remotioresque gentes , jam manu-ducante fortuna , diffusus , justis armis , honestissimisque titulis suum imperium auxit , & propagavit . Interim tamen Sicum , Sebenicum vulgò , plurimum civili discordia vexabatur : quippe dominante plebe , ac Sigismundi Imperatoris studiis animata , nobilium hominum ordo in exilium actus fuerat : hic adversus sordidum vulgus Reip. auxilium impetravit , & eò promptius , quòd si negaretur , rebellionis periculum , quadam veluti contagione , in finitimos erat promanaturum . Confestim igitur expedita classis ad Sice-
sem oppugnationem traducitur , subita-
que aggressione tentatur oppidum : at
propugnatoribus impigrè erumpentibus
diù in obsidione laboratum est . Porro
finem hujus belli urgente Senatu , classi-
co apparatusi juncta est etiam terrestris
manus sub Ludovico Buzzacareno . Hic

H 4. hostem

hostem jam terra , marique circumfessum brevi ad extrema usque compulit; sed dum ille segniter rem bellicam administrat , ac sine sanguine triumphare studet , obsidionem in alterum annum protrahit , & Sigismundum Imperatorem suis sedibus evocat , qui deditæ sibi plebis causæ patrocinatorus magno equitatu Venetos fines ingressus inopina irruptione terrorem longè lateque omnibus incutit , & expulsis Savornianis , potitur Utino , adimitque Reipubl. Belunium , Serravallium , & Feltriam , oppida , non indecora Carrariensis belli spolia . Tarvisum erat reliquum , cuius tum agrum hostis miserrimè prædabatur . Tanti belli incendium furtim enatum repressuri Veneti , tumultuario milite occurrunt . Sed , ne latiùs vagaretur , effecit Carolus Malatesta , dum cunctando magis , quàm dimicando , superbientem rapinis hostem integro fermè triennio in Tarvisinis remoratus est . Tandem diuturni belli calamitate utrinque fatigati animi nihil magis exoptabant , quàm pacem . Sed hujus improbatas hinc inde conditionibus , quinque annorum induciæ pactæ sunt , conventumque , ut interim de Sicensibus Romanus Pontifex arbitraretur .

Vtinum cum Foro-julio receptum.
MCCCCXX.

ELapsis cum Sigismundo Imperatore induciis, repetendi, quæ superiori bello erant amissa, opportunam Venetis occasionem dedere Utinensium discordiæ. Utino, uti diximus, Sigismundus expulerat Savornianos: hos sibi populares reposcebant: restitui obstabat Ludovicus Tecchius Patriarcha Aquilejensis. Ita in partes discissa urbs Venetos in spem erexit imperii. Profecti itaque in Foro-julii expeditionem Sacilium primò vi, Cividatensium deinde oppidum voluntaria deditione recipere. Hinc bellum ortum cum Tecchio, Cividatensibus irato, quia se dedidissent. Ille suo, & Cæsariano milite innixus, oppidum, veluti rebelle, summa contentione oppugnat. Veneto tamen recepto præsidio, reluctatur intrepidè, protrahitque Tecchium, ut non tam obsessorum virtute, quàm superveniente hyemis asperitate obsidium intra quintumdecimum diem solvere coactus sit. Veneti ea inter Feltriam, Belunium, cæteraque castra, hosti antea tradita pristinæ addunt ditioni. His gestis, Foro-julienfis Patriæ ingressi fines subruta ejus nominis arce, propè Utinum castrametantur. Ea in urbe domestica protinùs arma quievere, ut de

H 5 Ve-

Venetis fama innotuit, in libertatem eos vindicaturis, qui per injuriam opprimerentur. Hæc una moderatio in bello maximum momentum habuit, & hæc Vtinenses Reip. nulla vi obnoxios reddidit tanta Patrum lætitia, ut missa ad illos populos sit legatio, & impetrata Savornianis, cæterisque extorribus patriæ jura, & libertas. Vtinum secuta universa Fori-julii Provincia, spontè Venetam administrationem, Thoma Mocenico Principe, suscepit.

Dalmatia. Recepta..
MCCCCXXIII.

SUB hæc etiam tempora, flante à mari prospera fortunæ aura, selectissima classis Adriaticum navigavit, quæ, Petro Lauretano ductore, cum totam Dalmatiam perlustrasset, tanta incolas affecit formidine, ut universa ea Regio non armorum impetu, sed spontanea deditione Pannonico jugo excusso rursus Reipublicæ dominationem suscepit, anno quinquagesimo octavo, postquam vi barbaræ genti paruisset. Rebus ita feliciter comparatis, è Dalmatia fortunatissimus Imperator in Hellespontum trajecit, atque cum Turcicis piratis prosperè confligit, illosque ad Callipolim memorabili pugna, ac totius penè classis captivitate debellavit.

Bel-

Bellum Insubricum primum cum Philippo Vicecomite Mediolanensium Duce.

MCCCCXXVI.

NEC minori secundarum rerum eventu Franciscus Fufcarus præfuit Reip. Sub hoc Duce, qui omnia fortunæ incrementa propriæ virtuti debebat, mirum, quàm latè se protulerint Veneti limites; & præcipuè eo bello, quod adversus Philippum Vicecomitem Mediolanensium Ducem gestum legimus. Cùm enim ille Florentinos armis fatigaret in immodicâ affectantis imperia suspicionem venit. Oppressi nostra implorant auxilia: & placuit Senatui opem tantis ferre supplicibus, ac Vicecomiti bellum indicere, quoniam, neglectis, spreisque legationibus, in eam rem missis, haud cessaret ab injuriis. Declarato hosti junctum cum reliquis Italiæ Principibus fœdus primò objectum est; deinde arma intentata. Exercitus, quem propriis sumptibus Veneti compararant, & in quo tum XVI. equitum millia, peditum VIII. fuisse perhibentur, uni Francisco Carmignolæ, viro strenuo committitur, qui Philippi superbos mores perosus ab eo desciverat, Veneto- rumque stipendia sequebatur. Ille itaque susceptam expeditionem aliquo

H. 6. egre-

egregio facinore auspicaturus, Brixiam aggreditur, quam tamen non vi, sed Avogadræ gentis in Rempub. propenso studio, obtinet, excepta arce. Recuperatum venit amissam urbem Franciscus Sfortia; verum insultanti circa mœnia, omniaque more ignis corripienti strenuè sese opposuit Venetus imperator, hostemque fuga dilapsam debellasset, nisi illi corporis ægritudo moram iniecisset. Interim absente Carmignola universæ militiæ præponitur Franciscus Gonzaga. Hujus dexteritate, Victoris Barbari solertia, & Nicolai Atestini virtute effectum, ut interclusis aditibus nullus in Brixienfes hostilibus copiis ingressus pateret: neque iis, quas Angelus Pergulanus ab Etruria deducebat: quamvis ausus (tantum temeritatis, ex parva nostrorum dolo fugata manu, conceperat,) oppugnare castra: sed exitus incœpto defuit: nam restituto saluti Carmignola, Brixienfis arcis obsidio efferbuit ita, ut se dediturum præfidium proclamaverit, nisi in decimum diem venirent subsidia: hæc ne accederent, repetitis non semel certaminibus, impigrè distinuit dux Venetus, cui tandem facta est arcis deditio. Hinc ad reliquæ circum oppida recipiendâ pari felicitate festinatum est. Hæc inter ad pacem hortabatur dissidentes Martinus Pontifex. Verum dum ægrè patitur Vicecomes

comes à Veneto sibi leges præscribi, recentes utrinque copię veteribus additæ sunt; terrestrique militiæ adjuncta maritima, ut aquis, terraque bellum aleretur. Hostis sub hæc adornata apud Cremonam classe Casale-majus in Padi ripa vi obtinet, aliaque Mantuani agri municipia. Porro quæ occupaverat vix ad famam retinuit. Quippe ea subito Franciscus Bembus, & Stephanus Contarenus Padanæ Classis Præfecti recepere tanta vicinarum gentium consternatione, ut inde Cremonæ summè trepidatum sit. Hæc urbs incolarum fuga deserta tum primùm Reip. paruisset, nisi effusi avidè ad prædas nostri milites in agris subsidissent. Sed mox incuriæ pœnam dedere; nam ab irruente hoste vagi, dispalatique magna cæde prosteruntur; Carmignolam interim, Brixie conservandæ intentum, crebris incursionibus territabat Philippus, quem tamen reciprocante industriæ, armorumque æstu ita elidebat Petrus Laurentanus, ut facilem Cremonæ aditum Veneto imperatori se iterum aperire consideret. Hostis, ubique præsens, juxta Ostolengum parat insidias transfuenti Veneto, eoque loci varium iter, multusque labor militum, comoda belli momenta Philippo exhibuit, internecone attritis eo modo nostris, ut vix ullus à ferro liber superfuisset,

nisi

nisi Carmignola, ejulatibus oppressorum excitus, adproperasset subsidio, redutisque ad signa fugientibus grassantem hostem invicta propè fortitudine repulisset. Olio amne deinde ponte superato secus Padi ripas haud longè Cremona metatus est. Ob exercitus viciniam maxima rursum finitimis incussa formido, ac si omnes uno impetu Venetis armis excinderentur. Ipse quoque Philippus trepidare visus est, cum publicè indixisset, ut qui proprias fortunas, resque Principis salvas vellent, ipsum armati sequerentur. Sic innumeras collegit copias, Venetumque aggredi statuit ad Summum Cremonensium vicum: & ambigua capiundi belli consiliatio ferociæ cessit Francisci Sfortiæ. Hic gloriæ avidus in Veneta castra promptissimus irrupit, pugnavitque tam strenuè, ut ob id solum opportuno præsidio Cremona munita sit. Nostri tandem è munitionibus egressi Macclodium ivere, quo loci sub hostium oculis Veneta signa in Vicecomitum dedecus extulerunt. Hanc ignominiae maculam Veneto sanguine eluendam conclamabat idem Sfortia, & Nicolaus Picininus. Quamobrem Carolus Malatesta, cui per eos dies sui exercitus curam Philippus detulerat, in Venetas acies utrumque ducem à fronte præmisit, ipse à tergo in eandem furtim

eru-

erupturus.. Hostilem fraudem parī studio elusit Carmignola. Nicolaum enim Tollentinatē cum parte exercitus ad Terentianas paludes insidere jubet, & inde non prius exilire in hostium latera, quā ipse cum reliquis copiis Malateſtam à Pompejano caſtro venientem in pugnam evocaſſet. Hoc modo conferitur utrinque atrox prælium, & poſtquam ad integram agminum decertationem, ex qua omnia pendebant, perventum eſt, Tollentinas acri impreſſione excepit incautos.. Ita igitur cū diū acies æquomarte occiderent, atque occiderentur, in medio pugnantium ardore ſteterē immotæ, quaſi inter ſe conveniſſent: ſed interim deliberabat fortuna, quid ageret; repetitis tandem congreſſibus Venetorum victoria fuit. Maelodium, ignobilis antea Cremonenſis agri vicus tum nobilitatur magnitudine cladis, quæ quanta fuerit, hoſtium captivitas declarat, quorum millia octo, cum ipſo Malateſta, cenſa ſunt, præter bellica omnia impedimenta, quæ in prædā venire.. Tanta denique conſternatione affectos fuiſſe conſtat, ut ſi, quemadmodum Venetus imperator vicerat, victoria uti ſciviſſet, ejicere principatu Philippum eo die facile potuiſſet.. Sed plerumque victori mentem adimunt læti luceſſus. Quare Carmignola & integrum

ne

neglexit triumphum, &, quod est absurdius, Malatestam cum captivis ad unum, inconsulto Senatu, libertati restituit. Hæc propter illius suspecta primum fides apud Venetos. Philippus interim coactus quamcumque pacem præsentī calamitati præferre, in eas condiciones descendit, quibus Venetæ Reip. Brixia, Bergomum, aliaque omnia in Cremonensibus occupata oppida jure belli concederentur. Atque ita in continenti Venetæ dominationis termini latiore gloria dilatari cœperunt.

Expeditio in piratas quarta.
MCCCCXXX.

ARdebat cum Vicecomitibus bellum, quando de expugnata à Turcis Thessalonica in Macedonia relatum est. Etsi verò Patres in Italia gravissimarum rerum serie implicarentur, hanc tamen alteram ineunt expeditionem sub Petri Michaelii ductu in piratas. Libero enim maris usui maximum inesse momentum nostris semper est visum, tum ad comineatus in Urbem invehendos, tum ad convectandos subsidio milites, quibus ea tempestate Resp. maximè indigebat. Classis itaque Præfectus, maritima ora perlustrata, munitissima castra Crysolim, & Castellum in Asiæ littoribus eripuit Barbaris,

pur-

purgatoque mari his infensis prædonibus ,
 Ponti aditum , Venetis antea clausum ,
 aperuit . Post hæc reparatæ , auctæque
 classis Andreas Mocenicus curam suscepit ,
 imperante Senatu , ut Chium Ligurum Pi-
 ratarum nidum , terra , marique obsideret :
 quoniam verò bellicas machinas munitum
 oppidum cludebat , prædabundus in pro-
 xima littora discurrit miles : omniaque
 incendiis , cædibusque terret , vastatque .
 Postremò delegatus in provinciam Silve-
 ster Maurocenus infestos prædones debel-
 lavit : ille cœptæ expeditioni instans assi-
 dua navigatione , & indagine omnes por-
 tus , omnesque tùm Adriatici , tùm Æ-
 gei sinus , eò ampliùs exploravit , ut bre-
 vi utrumque mare ab Turcarum , Ligu-
 rumque direptionibus tutum , securapace ,
 reddiderit .

Bellum Insuadicum secundum .
 MCCCCXXI.

NON poterat pax cum Philippo ef-
 se diuturna , quia solitus jam vi-
 vere bello , & aliena concupiscere , ite-
 rum arma in Florentinos , Reipub. socios ,
 converterat . Hanc ob causam terrestres ,
 & navales copiæ ab Senatu imperatæ , ut
 amicis opitularentur . Classis in Padum
 agenda Nicolao Trivisano traditur , Car-
 mignolæ pedestris militiæ imperium , at-
 que

que utrique mandata hostis vindicta, seu solo, seu flumine bellum exposceret. At Carmignolam, cui fervida magis consilia, quàm cauta ex ratione Senatus, placebant, ex levî concepta spe occupandæ Soncinæ arcis insidiis circumventum, ac ferè captum accepimus. Interim Philippus ab Genuensi Rep. subsidarias, naves, & classici apparatus ducem Grimaldum impetraverat: hisque auxiliis (quæ Senatum in Genuenses, ceu pacis violatores postmodum commovere) instructus Philippus cataphracto milite insolita in eundiem disciplina naves armat, ac secundo amne, noctuque in nostras agit, tam audacter, ut ex metu gravissima consternatione percussæ fuerint. Trivisanus eam belligerandi novitatem, ac monstrum miratus, haud procul agentem Carmignolam monuit, certissimum imminere periculum, ni celeri ope levaretur. Hic illius ignaviam ridens suppetias negat: interim igitur magis, atque magis ab utraque Padi ripa Sfortia, & Picinino pedestri robore urgentibus, Veneta navigia multiplici impetu dissipantur, tanta strage, & jactura, ut suo naufragio totum Padum cooperuerint. Vix quinque biremes fuga evasere ipso Trivisano incolume: occisa, & aquis obruta, VI. hominum millia, nullo, aut saltem exiguo Insuorum damno. Ex illata clade

ite-

iferum proditionis nomine arguitur Carmignola, cui quoque per id tempus tertio nocuit non recepta Cremona, denegato auxilio Cavalcabovis strenuo militi, cum parva manu se unam urbis portam infedis-
se illi per nuntios significasset. Ex his ab Senatu perduellionis reus judicatus, Venetias per speciem de belli ratione consulendi accitur: ubi venit, obligatur vinculis, & cum in questionem postulatus obiectum crimen redintegratae cum hoste amicitiae fateretur, poenas perfidiae capitali supplicio dedit. Vir multis victoriis clarus, & cum primis Maclo diensi certamine, nisi postremo suam gloriam tanto scelere foedasset. Eo extincto penes Joannem Franciscum Gonzagam, Mantuanorum Principem Venetarum copiarum cura, & imperium fuit. In hoc statu res erant, tum Venetorum Reipubl. tum Mediolanensium Ducis, quando de pace agi coeptum est. Haec utrisque per quam necessaria gravi, longoque bello attritis & facilis, & diuturna sperabatur: at nondum Italia Principum in se delirantium iras, & odia concoxerat.

Bellum cum Genuensibus nonum.
MCCCCXXXII.

QUoniam violata pace favissent Philippo Genuenses, placuit Senatui in-
ju-

juriam armis vindicare. Viginti itaque, & plurium triremium classe Petrus Lauretanus bellum Genuensibus invexit. Naviganti in Ligusticum mare totidem rostratæ ex adverso ad sinum Repalitanum, ducente Francisco Spinula, obviæ occurrunt paribus in certamen armis, odiisque. In ipso autem navalis congressus momento Lauretanus militarem astum commentus, fugam simulare cœpit, qua credulus hostis in altum, ut contigit, protractus, nostris apertiore ad ictus viam fecit. Pleno namque ventorum afflatu inter medios Genuenses ita impellitur Venetus, ut tota classis hostilis post brevem pugnam conciderit. Ingens ex hoc certamine

gloria Lauretano magni nominis duci parta est.

Quippe multæ

Ligurum

naves

cum ipso Spinula fuere interceptæ, multæ depressæ, exiguo, ac propè nullo nostrorum dispendio.

Bellum Valli Tellinæ illatum.
MCCCCXXXIII.

DUm latiùs serperet bellum cum Vicecomite, Vallis Tellinæ populi armis petiti sunt, & eorum vallis occupata Georgii Cornelii virtute. Sed quæ pugnæ initia nostri prospera fuerunt, eadem exitii mox causa. Nicolaus Picininus hostium ductor supra Soricum, ubi lacus angustior est, fabricato ponte munivit utramque ripam, & ignorantibus Venetis, in vallem suas copias traduxit. Cornelius de ingressu monitus, quâ fluit Abdua in Larium, Picininum cum suis ducta fossa circumdedit, atque ita inclusum hostem aggressus oppugnavit, fugato duce, qui fluvium, & fossam parva rate trajecit. Secundo hoc pugnæ eventu nostri quasi nullum ampliùs negotium ad integram victoriam superesset, fluminis, & fossæ custodiam neglexere, quod non leve mox eis attulit incommodum. Id enim cùm Picinino innotuisset, contracta Vallis incolarum manu, qui Veneto nomini infensi erant, eodem in loco nostros obsedit, & nihil tale metuentes aggressus fudit. Occubuit Cornelius, & ex tribus armatorum millibus vix trecenti per saltus evasere. Ara erecta non procul à Dallebio pagos Philippus eam victoriam posteritati consecravit, minùs pium.

pium Christiani Principis trophæum. Interim ad Padum Legati manibus parentatur Casalís, & Brixili munitissimarum arcium everfionibus.

Bellum Insubricum tertium.
MCCCCXXXIV.

Tertiò adversus Philippum Venetì rursus arma moverunt : quibus tam pronum semper fuit ingenium ad tuendos oppressos, quàm illi ad turbas ex turbis serendas, & aliorum exagitandas fortunas. Cùm igitur Eugenio Pontifici, atque Florentinis iterum hostiliter insultaret, extincta paulò ante bellorum, incendia majore flamma erupere. Fœdera quippe ab hoste toties violata impulerunt Venetos, ut ope egentibus auxilio essent. Erasmus Narniensis, à versutia militari Catę Mellitę cognomentum sortitus, Pontifici patrocinator in Æmiliam transit, ubi ab Nicolao Tollentinate Florentinorum auctus viribus prope Imolam cum Picinino conflixit, infelici tamen eventu: capto enim socio ipse cum paucis in eam provinciam reversus est. Initiis parum prosperis Veneta constantia opposuit Franciscum Gonzagam Principem Mantuanum. Hic jussus per omnem militarem licentiam fines Mediolanenses invadere nulla avitę virtutis, justique adversus com-
mu-

munem hostem odii protulit experimenta: quare ob clandestinam propensionem in Vicecomitem Senatus jure diffitus Principis fide, primùm Federico Contareno Legato, deinde Erasino summam belli detulit, cùm hic quotidie magis militari disciplina non minùs, quàm singulari in Remp. studio notior evaderet. Opportunè igitur suffectus non levibus Insubrem damnis affecit, multisque pagis in agro Bergomensi exuit, & per Cremonensem Brixiam iturus Picinini technas diligenti cautione vitavit. Sed nec hostis interea segnior Veronensem agrum rapinis, & incendiis vastabat, domitis quoque Lacus Benaci accolis: promotusque post hæc in Brixienfes, & sub ipsam urbem cum Picinino copias jungit Gonzaga. Mellita sibi, & rei præsens adventu suo Brixiam confirmat: quam occasionem in victoriæ spem traducens Picininus in Camonicam vallem ducit, ubi tamen fidum, valenque nostrorum præsidium derisit appropinquantem, fugavitque: hanc ille noxam ulturus Rhoadum obsedit, eousque in incepto duraturus, donec rumor Mellitam Brixia evocaret. Cæterùm, neque locum habuere fraudes structæ nostris, per angustum iter à montibus in planitiem descendentes. Patuit astus Veneti ducis calliditati, & ipse prior in agmine sibi insidiantibus offert, vertitque

que in eorum capita artes, cum eos tacito, improvifoque congressu consternasset, aperto sibi reditu in Brixienfes. Sed cum non posset ubique sese opponere Picinino penè volanti, omnia circum oppida hostis occupat, cujus consilium erat, ut Venetæ copiæ circa unam tuendam Brixiam diù morantes, fame tandem conficerentur. Ille, ne ita obsideretur, quàm esset opus, ferro sibi viam aperiens, Veronam cogitabat, sed Mincii amnis tumidi frustra tentato vadando in montana conscendit, in quibus effera incolarum rabiem expertus est. Porro fatis iter desperato Duci molientibus Petrensis arcis præsidia conficta fuga in se pertraxit: ubi enim illam propugnatoribus vacuum conspexit in sequentes conversus inopinata audacia omnes prostravit, atque sic per vetitum iter nulla fermè suorum jactura Veronam tenuit. Attamen simul ac illum Brixia discessisse nuntiatum est, Picininus totam belli molem in ejus urbis expugnationem transtulit. Illa civium suorum fide, qua nullum fortius propugnaculum, & invicto Francisci Barbari animo, ac tolerantia, tres menses elusit obsidentium impetus, cum interim duplici, & intestino hoste, fame nimirum, & pestilentia crudeliter vexaretur. Barbarus laboris ultra fidem patiens, tectum, dapes, omniaque cum milite prisca frugalitate, communia habebat,

bat, raro nostri ævi exemplo. At Picininus in distrahendo obsessis comœatu eò amplius in Reip. amicos ferus, Paridem Ludronii Comitem debellat, quem tamen pro viribus ulciscitur Gerardus Dandulus, occisis aliquot Insuorum turmis. Navibus novo ingenio ex Athesi Benacum traductis subinde Brixie penuria summè laboranti succurritur. Præsenti quoque rerum angustiae benigni sideris instar affulsit Franciscus Sfortia à Vicecomite divisus, & per Florentinos ad Reip. stipendia transmissus. Hic sexdecim armatorum millibus procurrens in hosticum, Philippi duces è Veronensi agro exegit, ac Picininum fugienti similem in Mantuanos abire compulit. Sparso cladis rumore paululum respiravit Brixia; pluraque ex hostium manibus castra in Venetam potestatem reducta. At malè in Benaco pugnatum est. Brixia enim egressus Barbarus cum classario duce consilium init de comburendis in lacu Philippi navibus; sed intercepto nuntio tempus facinori destinatum innotuit. Quare Picininus, & Gonzaga ad assuetos dolos animati, alter à continenti, alter à lacu nostros improvisò adorti faciliè oppresserunt, capto Petro Zeno Præsfecto, univèrsaque lacerata classe, antequam Barbarus quidquam sciret: consequitur triste infortunium Madernæ quoque arcis deditio. Veneti Patres soli

lita æquanimitate alteram è vestigio classem in Benaco parant, auspiciis Stephani Contareni, quam ut pedestri cohorte defenderet, selectus Mellita. Hæc inter Sfortiæ, per Tridentinos saltus, Brixiaë suppetias laturo, occurrunt Picininus, & Gonzaga; confertaque acriter manu non leve hinc inde discrimen subiere duces, postremò tamen fusus, & profligatus hostis illatam antea Venetis in lacu cladem ex æquo rependit. Non prius enim dirempta pugna est, quàm universis penè copiis nudarentur Picininus, & Gonzaga, qui dum socium captivum liberare nititur, ipse nostrorum fit præda. Illuxit adversus hostes Joannis Pompeii fortitudo, & fides in Rempublicam, cùm Picinini, Gonzagæque turmas è Vicentino in Veronensem agrum irrupturas parva ex indigenis manu distinuisset. Non impar ejusdem gentis enata soboles Franciscus inimicas alibi sustinuit impressiones. Atqui nec tanta jactura Picinini ferociam repressit, quin instauratis viribus Veronam celeri, ac inopinata impressione occupavit. Cujus rei Sfortia certior factus, aliquandiù stupore defixus hæsit, tandem & ipse pari celeritate usus, promotus è Brixienfi agro antelucano tempore castris, opportunè accessit, ingressusque per munimenta Sancti Felicis, & Castri-veteris horrifono clamorum, armorumque fragore irruit in hostes,

stes, sibi que illustrem egregia virtute paravit victoriam biduò post quàm ab ipsis urbs capta est. Rebus prosperè fluentibus accessit Contareni triumphus de universa Philippi classe profligata; maturatisque Ripæ, Gardæ, & Salodii oppugnationibus; & direpta paulò post per ipsum Sfortiam hostium statione ad Urceos-novos. Hinc magis irritatus, quàm domitus Philippi animus, nil nisi bellorum æstus concipiebat. Partas eo tempore victorias Senatui gratulatum venit Sfortia, cùm Picininus ex occasione illius absentia, hand ignarus fama licet falsa occisi Imperatoris terreri posse exercitum, de Sfortia nece mendaces rumores spargit, magnumque ob id tumultum excitat in Brixienfibus. Interim ille per viciniam grassatus, cuncta ferro, flammisque permiscuit. Fraudis hujus commonitus Sfortia in provinciam revertitur quàm celerrimè, & debellato apud Tignanum vicum Picinino, se superesse, & arma adhuc tractare omnibus ostendit. Philippus novis semper gliscentibus incommodis oppressum se tandem iri veritus, ad pacem prostratum animum inclinavit, anno quinto ab incœpto bello, iisdem, quibus olim conditionibus, retentis potissimùm à Veneto Verona, Brixia, Bergamo. Et quia tunc avidius fortassis, quàm ante, pacis commoda expetebat, Franciscum Sfortiam ex

hoste sibi generum adscivit, tradita ei filia spuria Blanca, dataque nomine dotis Cremona. Eodem ferme tempore morbo interiit Cata Mellita Senatui mirè commendatus, quòd prudenter potiùs, quàm audacter arma tractaret. Per eos quoque dies Ravennates pulso Hostasio Polentone tyranno, & Cervientes ultrò in Venetam administrationem venerunt. Tanta nempe fuit apud omnes Reipublicæ existimatio, & legum æquitas, ut etiam spontè populi longè remoti illius fidei, ac imperio sese submiserint.

Expediitio in piratas quinta.

MCCCCXLIII.

Bella cum Vicecomite sæpiùs repetita, & veluti continuata expeditiones maritimæ exceperunt. Primum in Cathelanos piratas est destinata classis, at non priùs, quàm veteri majorum religione delata non semel esset ad Alphonsum Regem Neapolitanum querela, & additæ preces, ut ab Apuliæ, & Calabriæ portubus exturbaret prædones: cùm autem nihil profectum esset, exiire in ultionem Antonius Diedus, & Franciscus Quirinus Scodræ Præfectus. Horum alter protinùs debellavit vagos homines, & dùm Istonium in Ferentanorum ora rapacissimæ gentis asylum omni vi conatur expugnare, exor-

exorta repentè procella horribili, fœdaque cum tota classe hostico littori alliditur, fitque miserabile latronum spolium : verùm jussu Alphonsi cum triremibus libertate donatur . Alter, conversis proris in Turcas, Antibarim, Epyri urbem, commissio non levi conflictu, è barbarorum manibus extorsit, & Reipub. addixit . Renascentis inde perfidiæ pœnas sumpsit Philippus Cornelius . Hic tanta felicitate pugnavit, ut brevi non solum omne illud piraticum genus longè à mari profligarit, sed & plura eorum subverterit receptacula . Postremò aliæ in prædatorias Turcarum naves instructæ triremes sunt, quibus, auxiliantibus Pontificiis, Aloysius Lauretanus gravi bello Amurathem implicuit, ea ipsa tempestate, qua contra Barbarum Ladislaus Poloniæ Rex arma sumpserat . Conjunctis viribus dimicatum accepimus ad ostia Danubii, sed incerta victoria, quamvis referant annales, duo de quadraginta Turcarum millia eo certamine interfecta .

Bellum Insubricum quartum .

MCCCCXLVII.

SFortia, celebratis nuptiis, ad recipienda, quæ sibi oppida hæreditario jure obtigerant, in Umbriam profecturus, Cremonam, urbem dotis nomine acceptam, Venetorum tutelæ com-

mendavit . Philippus ob id more sui ingenii paci , ac vicinorum quieti gravis arma corripuit , indignatus , se à genero contemni , agrumq; Cremonensem fœdè diripuit . Noſtri , quid Sfortiæ deberent , non immemores illi ultricia arma denuntiant , niſi alienis rebus parceret ; ſed cùm vix audita fuiſſet legatio , declarato copiarum duce Michaelē Attendulo , ſuſceptum eſt bellum , commiſſumque cum Vicecomite tanto impetu , ut poſt brevem , at cruentiſſimam pugnam caſtris exutus , deſideratiſque quatuor equitum millibus , intra oppidorum munitiones repulſus fuerit , nullumque in ea provincia caſtrum ipſi relictum , præter Laudem-pompejam . Auſtus ſubindè Ludovici Gonzagæ copiis Attendulus Abduam trajicit , atque altera ibidem cum hoſte inita pugna , victor iterum receſſit . Duplici elarus triumpho majora moliturus , Mediolanum , Ticinumque infeſtavit excuſſibus , & Abduam , Comumque interjacentia caſtra , viſoſque Reip. ſubjecit , ea fatorum proſperitate , ut averſa Philippo numina crederentur . Et ſanè procedente bello apparebat , toto imperio ſpoliatum iri , niſi Sfortia improbè Philippi partibus ſe addiſſet , Eugenii Pontificis , & Alphonſi Neapolitani Regis conſilio , quibus proſperi Venetorum ſucceſſus inviſi erant .

Bellum Neapolitanum primum.
MCCCCXLVIII.

PHilippus Vicecomes Mediolanensium Dux , vir acer , bellicque cupidus , hoc anno moritur , scripto ditionum suarum hærede Francisco Sfortia . Evulgato illius obitu , Alphonsus Rex Neapolitanus , tanquam extinctæ Vicecomitum familiæ successor , Mediolanense dominium postulabat . At cum propriis viribus non posset vindicare sibi hæreditatem , in Venetos opem denegantes irrupit ; cumque armis incassum laboraret , rabiem , odiumque evomere voluit , promulgato edicto , ut omnes , qui in Regno suo Venetæ gentis forent , intra præscriptum diem excederent . Improbi hujus facinoris ultor Aloysius Lauretanus electus est . Sed vindictam dies aliquot retardavit de pace missa ab Alphonsi legatio : irritatis tamen semel animis bellum nihilò intermissiùs susceptum , mox à Victore Capellio , qui Adriatico sinui præerat in Neapolitanam oram delatum est . Is plura hostis navigia oppressit , Orthonem usque infectatus , injectoque igne urbis navale penitus absumpsit , & vicinos pagos populatus est . Neque his satur Senatus Lauretanum in Siciliam destinavit : ille Messanam vi petiit , concremata in portu excubitorum navi , quæ regia ob

magnitudinem nuncupabatur; parte demum classis relicta ad urbis obsidium, cætera totius insulæ maritima loca cum perlustrasset, quinquaginta, & plures Alphonfi naviculas vel pessumdedit, vel igne vastavit. Interea Messanenſes juxta portum validas munitiones erexerant, quibus Veneti ulteriùs navigare impedirentur. Porro nostri, dum ipsa propugnacula destruere conantur, navale certamen propugnatoribus indicunt, quod à temerario Siculo acceptatum est, consensisque navibus in pugnam itum, sic tamen ut ad prima tantum signa ille concurreret, Victoria tandem sagaci Lauretani consilio stetit. Ingens hic navigium farmentis, ac tormentario pulvere plenum immisit in hostilem apparatus, quod ubi ignem concepisset, flante vento in portum immissum est, ruptisque repagulis, inſequenti Veneto viam stravit. Instabat extremum Messanæ urbis fatum, sed Patres, qualicunque vindicta contenti, Lauretanum in Adriaticum revocant, nec multos post dies firmatur pax cum Alphonſo, bellumque à Tyrrheno pelago in Cisalpinam provinciam reduci-

Bellum Insubricum quintum.
MCCCCL.

Pervaserat jam antea proximas, remotasque provincias, quàm singularis esset Venetæ Reip. humanitas, & æqua imperii moderatio, ut propterea plurimi Italiæ populi mitissimum ejus imperium subire certatim contenderent. Laudenses in primis, ac Placentini ultrò in fidem venire: pari exemplo Ancona Veneto paruit. Cæterùm Mediolanenses inchoatum à Vicecomite bellum se profecturos Senatui denuntiant, nisi capta oppida, & urbes restitueret. Remissi sunt hoc responso Legati, Venetum se tum omnia redditurum, cùm sibi illud auri pondus persolveretur, quod ipsorum Vicecomitum superbia, & rei alienæ cupiditas ærario extorserat. Quare Mediolanenses evocato ad opem Sfortiæ, mercedem navandæ operæ, Principatum promittunt. Dives stipendium extemplò hominem armat in Placentiæ ruinam, cujus præda militem onustum trahit ad Laudem-pompejam, sed dispari exitu. Venetus ea inter circa agrum Cremonensem, sub Attendulo luctabatur, magis profecturus subsidio classis, quam iisdem diebus Andreas Quirinus, & Georgius Laurentanus Legati Pado advexerant: docu-

mentum, ut credo, Sfortiæ; nam ille quoque navibus vires suas obfirmavit. Sic res terra, aquisque paribus hinc inde artibus stetit, quousque Sfortia, suppositis per utramque Padi Ripam æneis tormentis, & milite, nostram ex insidiis preffit, fugavitque ad Casale-majus, ubi nec ulla reliquæ classi futura securitas supererat, nisi injectis facibus consumpta fuisset, ne audacissimo persecutori cederet. Post hæc in Abduæ Glarea ad Carravagium posita sunt castra: cui oppido si vim hostis parasset, subsidio erat Attendulus circumquaque disposita manu, qua interdum hostibus terrorem, ac damna non levia inferebat. Cæterum Sfortiæ Padana victoria elato terrestri altera accessit. Nam cum Attendulo inito certamine, post integri diei prælium, nostros loco cedere coegit, conjectosque in viarum anfractus, & angustias ingenti occisione debellavit. Fama est, præter eos, qui in acie cæsi, quinque millia fuisse captivorum, cum quibus ille ante Brixiaë mœnia comparuit, ut oppidani, audita clade, visaque suorum captivitate, deditionem facerent. Non hæc tamen victrix Sfortiæ fortuna Patrum animos fregit, memores, brevissimo sæpè momento res penitus collapsas in integrum rursus restitui. Ad festinandos militum delectus Veronam accedere Legati, qui paucos intra dies

dies majorem exercitum largo stipendio collegerunt. Verum quia Sfortia se demum quiete toti Insubriæ credidit imperaturum, socio, amicoque Veneto, Mediolanenses incusare non servati promissi, imminutæ bellicæ administrationis, nihilque sibi spei amplius in Principatu: At revera deterfit pudorem imperii libido, cum ad Venetos his conditionibus defecerit, ut, quidquid ultra Abduam, Padumque caperetur, ipse haberet: quidquid citra ipsi tenerent. Consociatis in hæc foedera armis, brevi sequentibus se victoriis Mediolanensium oppida, & urbes penè omnes in deditionem receptæ sunt. Intervenerat pro Insubribus Allobrogum Dux. Hunc tantisper morantem victorias Bartholomæus Coleonius juxta Sicidium amnem profligavit: atque ita summoto auxiliario Mediolanum obsideri cœptum: jamque portis hærebat Sfortia, cum Veneti Patres suspicati unius ambitione Italianam libertatem posse pessumdari, injecta pacis mentione, conantur Sfortiam conciliare Mediolanensibus: sed quia potens, ac suave est ad excelsa incitamentum felicitas, eam ille rejecit. Senatus ob id in obsessorum auxilia exercitu, commeatuque immisso, res eorum sibi curæ fore declaravit. Vano tamen eventu omnia cecidere: vir enim ille, cujus virtutem fors comitabatur, non

tanti fecit frequentes erumpentium op-
pidanorum, injurias, quàm Sigismundi
Malatestæ, Veneti imperatoris, crebra
in apertum bellum irritamenta, tutiùs
fore putans, continere se castris, nec a-
lia vi urbem expugnare, quàm constan-
tissima obsidione. Porro & illi pronior
fortuna præter opinionem fuit. Etenim
Mediolanenses turbidè rem suam admini-
strantes, atque in ipsos auxilios Venet-
os contumeliis, ac cædibus feroces, o-
pinione citiùs in Francisci Sfortiæ pote-
statem venerunt. Sub hæc, vel metus cre-
scentis potentiae, vel invidia Alphonsum
Regem Neapolitanum, Ludovicum Du-
cem Allobrogum, & Guilielmum Montis-
ferrati Marchionem adversus novum Me-
diolani Principem armavit. Verùm dum
singuli per se vicino, & fortissimo ho-
sti videntur impares, in unum socia ar-
ma contrahunt: & quia adhuc suffectu-
ro etiam conjunctis, & affectanti adhuc
alienas ditiones longè maximis viribus
obviam eundem ducebant, Venetos ite-
ratis sæpè legationibus in eandem expe-
ditionem sollicitant. Itaque adhæserunt
societati, ut bellum Italicæ pacis causa
gereretur: primique omnium adversus
Sfortiam insurrexere. Hic Florentino-
rum opibus, & Mantuanorum amicitia
subnixus ad arma conclamata se vertit
intrepidè, & ubicumque ea perstrepe-
rent

rent audacter sese expediit. Soncinum interea oppidum, quia nostris diu restiterat, mulctatur mœnibus. Noxam ulturus Sfortia in apertam cum Veneto concertationem procurrit, ubi æquo exitu, parique clade pugnatum est. Inde hostis ad tutelam Cremonæ converso agmine, cauti potius militis, quam pugnae famæ in posterum studuit. Crebriores sub hoc tempus fuere intestini conflictus, quàm castrenses, oppidanis, populisque, qui interea fœdis sese factionibus polluebant, in Venetas, aut Sfortianas partes distractis. Mantuani etiam irruptionibus à Venetis hoc ipso tempore castigati, quòd Sfortiæ adhærerent. A majoribus tandem claudibus temperatum, quasi constituta pace ad perceptam Constantinopolitanæ urbis everisionem. Illuc vires ducendæ omnium Christianorum Principum videbantur, ne calamitas ea totius Orientis imperium Turcico Regi Mehemeto brevi subderet.

Bellum Constantinopolitanum tertium.
MCCCCLIII.

Constantinopolis Orientalis caput Imperii, & sedes, postquam à Constantino Magno constituta stetisset annis MCXXII. à Mehemeto Turcarum Rege alteri Constantino eripitur. Cum
ita-

itaque fama vulgasset, Constantinopolim Turcicis armis oppugnandam esse, jamque barbarum Regem formidandis terra, marique viribus applicuisse, Veneti proprio, & totius Christiani orbis periculo moniti, confestim dispersa alibi arma contrahunt in hanc perquam necessariam expeditionem, quia Turcarum avaritia, non uno saturo imperio, toti Europæ inhiabat. Quamobrem nec minor cura sollicitabat reliquos Italiae populos, qui primi hostis injuriæ erant obnoxii, Romani, Genuenses, & Neapolitani. Interim adversus Mehemetum Regiam urbem obsidentem, viginti rostratarum classem traducunt Veneti: quibus totidem onerarias adjungunt confederati. Totius rei maritimæ imperium Jacobus Lauretanus omnium consensu accepit: in altum provectus naves præmisit, quæ urbis portum defenderent: ipse cum reliquo navium apparatu in hostilem incidit ad Hellesponticas fauces: aggreditur audacissime, oppugnat, turbatque barbaros: sed integram nostro duci victoriam intercepit subita illorum fuga. Palæologus ad hanc famam, cum nimis properè vellet hostium trepidationem in sequentis victoriæ omen convertere, dato terrestribus eruptionis signo, Turcarum invadit stationes. Sed suo tandem fato expeditur, non ubique locorum eandem sta-

re fortunam. Incredibile dictu, quib
 copiis terra confederit Mehemetus; CCC.
 armatorum millibus urbem vallaverat,
 eamque jam irrequieta LX. dierum
 oppugnatione fatigarat. Hic hostis cun-
 ctatione erat vincendus, ut immane cor-
 pus sua ipsius mole concideret. Sed quo
 tempore Palæologus è continenti raptus est
 in hostes nostri, mari eosdem insectabantur:
 pugnatum iterum strenuè fuit: at po-
 stremò justa causa malignæ fortis arbi-
 trio succubuit. Fortuna quippe in impe-
 ria idem habet jus, quòd adversus impe-
 rantes, fatalesque sunt rerum humana-
 rum interitus. Victis igitur, profliga-
 tisque fœderatis, Constantinus ut hone-
 stiùs occumberet, claroque exitu vitam
 enim imperio clauderet, inter confertissi-
 mos hostes dimicando cæditur. Capta
 Constantinopoli, Turcæ, Regio neglecto
 titulo, in posterum dici Imperatores vo-
 luerunt. Quadraginta mortalium millia
 è nostris periisse fama est: innumeros
 fuisse captivos, eosque inter septem, ac
 quinquaginta patricios Venetos. Ad hos
 redimendos legati nomine Mehemetum
 adiit Bartholomæus Marcellus: hic ab
 Turca præter captivorum corpora,
 eorum quoque bona humanissimè rece-
 pit, tulitque pacem. Verùm huic non
 acquievit Senatus, turpe se facturum
 existimans, si cum hoste haberet ami-
 citias,

citias, cum quo necessario depugnandum, ne religio, quam ille persequitur, una cum fortunæ bonis profanum servitium patiatur.

Bellum Insulanicum sextum.

MCCCCLIV.

PRIVATA Principum Christianorum odia Mehemetum Constantinopolitana victoria ferociorem reddidere, ac si non timeret Italiam, quod inter Italiæ Proceres vigerent perpetuæ lites, & concertationes. Spes erat, communi omnium conspiratione ingens bellum Turcis inferendum: sed magis per ea tempora in Cisalpinis invaluerant irarum discordiæ. Qua occasione, Turcæ, non tam sua virtute, quam nostra æmulatione vastum illud Orientis imperium sibi compararunt. Sfortia, tanti mali fomes, oppida, arcesque Brigantino- rum montium Veneto erepturus, Abduæ transitu, rescisso ponte, illum prohibere conatus est. Ex his facile perspicuus Senatus, quorsum tenderent hostis machinamenta, cum etiam per eos dies Rhodum, & Urceos expugnasset, bellum totis animis arripuit, brevique temporis momento Gentili Leonesio duce sub signis XX. armatorum millia recensuit. Pro Insubre steterunt in armis Florentini, & Renatus ex Aragonia familia, ut Veneto

pe

peracto bello Neapolitanum Regnum, ad-
 scititia ope, sibi ex Alphonsi obitu junge-
 ret. Horum auxiliis hostis Brixienſes, ac
 Bergomates agros vastavit, sparsaque cir-
 cùm castra partim vi, partim deditione
 subegit. Veneti retinendis urbibus occu-
 pati, postquam illas præſidiis confirmassent,
 more velutum nulli hostium rei parcentes,
 hinc inde excurrando militari licentia om-
 nia rapinis, cædibusque miscebant. Me-
 diolanum, cujus crebrò ad portas procur-
 sum erat, ea formido, pavorque invase-
 rat, ut in anceps adductum periculum ali-
 quandiù in Sfortiana fide nutaret. Tandem
 iratos animos opportunè Christianæ tran-
 quillitati conciliat Nicolaus Pontifex,
 qui duos hosce potentissimos Italiæ Prin-
 cipes adversus Turcam armari optabat.
 Pacis condiciones pro Venetis eæ fuere,
 ut, præter Abduæ Glaream, redderentur
 quæcumque oppida in Brixienſibus, ac
 Bergomatibus Sfortia cepisset. Hæc deni-
 que pax, ut Divino Numini, placuit, diù
 firma ac stabilis perduravit: Mediolani im-
 perium longa posterorum serie propagatum
 Sfortia retinuit.

FINIS LIBRI SECUNDI.

JOANNIS BAPTISTÆ
V E R I
CANONICI PATAVINI
RERUM VENETARUM
LIBERTERTIUS.

Bellum Turcicum Secundum.
MCCCCLXIII.

PArtam terrestri bello quietem, navalis in Turcas turbavit expeditio, altero Christophori Mauri Principis anno. Tunc in Peloponnesum descenderat Mehemetus Secundus Turcarum Imperator, totamque penè provinciam sui juris fecerat; fraterno in illa regnantium diffidio. Contendebant inter se finibus Thomas, & Demetrius fratres Palæologi: & dum alter succumbere alterius viribus timet, tyrannum sibi auxiliarium deposcit, impetratque. Turca instructo exercitu ad prædā, non ad opem supervenit, atque utrumque more latronis regno exiit: expulso Thoma, Demetrium redegit in servitutem: atque sic tum primū, & per scelus Othomannicæ tyrannidi cessit Peloponnesus.

sus . Veneti circa littora præclara quadam
 oppida retinebant , quibus dum etiam in-
 hiat Barbarus , ex Senatus consulto robu-
 stissimæ octoginta navium classi datur Præ-
 fectus Victor Capellius . Hic , obsecun-
 dante pelago , provectus Isthmum , in quo
 bimaris Corinthus , opportunis firmat mu-
 nitionibus , & porrecto muro in utrumque
 fretum , ne Turcæ ab Achaja irrumperent :
 nihil interim movet armis , donec etiam
 ad opem accederent pedestres copiæ . In-
 terea hostis , quæ in Isthmo erant muni-
 tiones subruere connixus est , sed magna
 strage repellitur : terga danti insistent no-
 stri , & dum ille in tutiora dilabitur , Spar-
 tam celebrem olim urbem rebus pace , bel-
 loque gestis , occupant . Verum non mul-
 to post apud Corinthum accepta calamitas
 illam nobis victoriam imminuit : tanta
 quippe , ex conferta pugna , nostrorum
 fuit clades , Bertoldique Atestini , peditum
 summi ductoris cæde in primis conspicua ,
 ut ex tribus armatorum millibus vix unus
 superstes profligati exercitus nuntium af-
 fere potuerit . Hinc à classiariis terrestribus
 suscepta expeditio . Argos vetustissimum
 oppidum diripitur , in penitiora Pelepo-
 nesi procurritur , obvia quæque vastan-
 tur : subinde à Turcis circumventi Nau-
 pliam repelluntur . Refectis postremò vi-
 ribus in bellum rursus redire placuit : re-
 perti sunt hostes , quasi planè vicissent
 læta .

Tergeſtini debellati.
MCCCCLXIV.

Satis conſtat , quàm invicta ſemper , & maximè in adverſis conſtans fuerit Venetorum fiducia, & animus . Gravem belli molem in potentem, ac aſperrimum hoſtem Turcam ſuſceperant , cùm tamen auſi in diverſa proſpicere , & vires ſuas aliò convertere . Juſtinopolitani per ea tempora querebantur de Tergeſtinorum injuriis . Hi , permittente Federico Imperatore, ad nundinas ſuam in urbem Germanos negotiatores alliciebant , ut ita Tergeſtum totius Hiſtriæ emporium eſſet . Quoniam verò hujusmodi antiquum jus ſervandum erat Juſtinopolitanis , ex decreto Senatus proceſſere armati in Tergeſtinos Sanctes Gavardus , & Antonius Martianus , de injurioſo populo vindicias exacturi : alter proximos à mari agros rapinis exhaustis , & hoſtium plures confodit : alter , ubi copias Utino deductas circa mœnia diſpoſuit , tripartito agmine molitus eſt oppidi expugnationem . Ab hac ut deterrerent oppidani , crebrò turmatim in caſtra fecere impetum ; ſed illam animantibus legatis Vitali Lando , & Jacobo Antonio Marcello , tanta milites inceſſerat obſtinatio , ut tandiù circa urbem hædere decreverint,

portum intrat , & permissio classiariorum descensu totam insulam , & ejus nominis oppidum aggreditur , ita ut brevi appareret , obsessos aut deditioe , aut vi , ac impetu in nostrorum manus casuros . Verum contra Venetos pugnabat fatum urbium , & insularum oræ illius : à superveniente enim barbaro perturbatur obsidium , atque ex eis ad tria millia cæduntur . Non perterrita hæc clades virum magni animi Ursatum , qui restauratis viribus utroque Marte Mitylenem invadit , attamen nihilo meliorem expertus fortunam cum cæde rursus repellitur : sed neque terga vertisset , nisi vocatus in Eubœam adversus Othomannicam classem , quam prosperè , retenta , munitaque insula , disjecit : delatus postea Methonem , ibi præ animi mœrore occubuit , dum secum plus nimio conquereretur de tristi apud Mitylenem eventu . Defuncto subrogatus Jacobus Lauretanus , cui in Græciam naviganti occurrit nuntius , & acceptæ cladis ab Andrea Dandulo juxta Mantiniam Arcadiæ , & Rhodiorum in nonnulla nostrorum navigia insultus : quare ab his primùm decrevit illata damna reposcere , mox per Hellespontum in Callipolis oram irrumpere . Utrumque peregit feliciter . Interim Malatesta repetiit Italiam , postquam multa virtutis militaris exempla in Græcia reliquisset . Spartam

ab hostium manibus eripuit, ac deinde sæpiùs prælia detrectando summa dexteritate, & ingenio, quàm dimicando barbarorum conatus, viresque infregit; suo exemplo reliquos docens, exultantem, ac ferocientem hostem non audacia, nec viribus, sed consilio, & cunctatione plerumque vinci. Ad hæc maritimis rebus iterùm præficitur Victor Capellius. Accepta classe in Eubœam ex Methoneo littore deferitur, inde in hostes, à quibus Aulidem recepit: ad Piræum appulsus Athenas Græcarum urbium antiquitate, & doctrina quondam celebres impetu factò capit, spoliaturque, divisa militibus præda: postremò Corinthiacum sinum emensus, Patras oppugnat: sed in expositos milites Turca victor irruit, dum illi agrum populantes dispersi vagantur. Non hostium virtuti, sed suorum temeritati jure eam stragem adscripsit Capellius: at cùm in ipsa quoque expeditionem alios immitteret, eandem patitur sortem. Patræ nihilominus audacissimè sunt expugnatae, & cum Turcis dimicatum sæpiùs. Porro dum aliæ insuper, & aliæ penè innumerabiles superveniunt hostium legiones, sternuntur ingenti occisione Veneti. Capellius, re malè gesta, Chalcidem Eubœæ, hodie Negropontum, tenuit; ibique pari cum Justiniani fato, præteritarum cladum, atque bellicorum eventuum infelici memoria expiravit.

Ænum

*Ænum à Venetis captum: Chalcis
à Turcis expugnata.
MCCCCLXIX.*

Pius Secundus Romanus Pontifex, à pio bello pontificatum exorsus, Mantuæ conventum indixerat, ubi fermè tota confluente Europa de profectione in Turcas actum, proposito periculo, quod Christianorum cervicibus imminebat: verùm, Deo ita volente, quicquid Catholicus Orbis in communem hostem paraverat, id brevi post eyanuit, Pontificis obitu, qui Anconæ contigit paulo antequàm Christophorus Maurus Princeps in piam expeditionem evocatus ad eam urbem cum instructissima classe appulisset. Una Venetorum Resp. tantam belli molem non abjecit, transmissò Nicolao Canalio in Eubœam, ut ejus auspicio classis regeretur. Ubi appulit, cum viginti triremibus præternavigata insula Thermaycum ingreditur sinum, factaque descensione in Thessalonicensem agrum, continuo vastat omnia, fugat ubique Turcas, & Æni munitissimi Thraciæ castri oppugnationem molitur. Summo mane in oppidi conspectum totam classem exposuit, admotisque repentè scalis intrò militem jussit descendere, tantoque silentio, ut priùs perfractæ portæ essent, cæsiq; vigiles, quàm sentirent

k oppi-

oppidani, se in manus hostium venisse. Incruenta quidem, & insignis fuit victoria, sed ultra jus victoriæ sævitum legimus, plusquàm Turcica barbarie, quod scelus Calcidis expugnatio, & Veneti imperatoris exilium expiarunt. Direpto, combustoque Æno in Lemnum navigat Canalius, quo tempore hostica classis ab Tenedo in Eubœam promoverat; jamque expositis turmis ad fatale Chalcidis excidium constiterat. Trecentarum navium apparatui terrestre robur par erat: viginti quippe hominum millibus mœnia circumsepserat Othomannus, ut nulla deinceps esset reliqua obsessis annonæ, & auxilii spes. Chalcis, Eubœæ præcipua urbs ab Aulide, Bœotiae portu, euripo dividitur: hujus angustias tenebat Canalius; crebrò per occasionem laceſſebat hostilia castra; atque ita impigrè tractabat rem bellicam, ut sua, & erumpentium oppidanorum virtute territus Othomannus non semel de tollenda obsidione cogitarit. Hæc tamen stetit fatorum obstinatione, adhortanteque Asiaticæ oræ Præfecto, ut per noctem terra, marique, totisque simul viribus obsessi, nulla quietis mora, vexarentur. Adeò nihil tam arduum, quod patientia non superet. Igitur Chalcidenſes oppugnabantur acerrimè, & Canalius ad subsidia pervicaci superſedit animo, consulentibus respondens, tum cer-

ta se in hostes victoria iturum, quando altera classis appelleret, decreta ab Senatu, ad quem jam illius urbis necessitas perlata erat. Ita quasi plus in imperio esset, quàm in victoria, omnem rei bene gerendæ occasionem rejecit Canalius. Hæc propter obsessi omni desperato subsidio post irrequietam sexaginta dierum oppugnationem in barbarorum prædam, & captivitatem venire, vulneribus, inedia, pervigilioque adeò confecti, ut in miserandas corporum reliquias nemo, præter Turcam, desævisset. Canalius, ut se negligentia purgaret, Othomannicam classem Chium navigantem insequitur, sed iterum ab egregio facinore illum invida, vel potius ludibunda fortuna avertit, oblata recipiendæ Chalcidis spe. Conversis itaque prorsis in Eubœam redit, illudente à tergo hoste, se satis hospitaliter à Veneto acceptum eo in itinere; ac terrestri, maritimoque aggressu, unaque simul impressione oppidum tentat; sed quoniam à pedestribus copiis nimis prope-
 ranter in expeditionem proceditur, in destitutas à reliquis erumpentium Turcarum fit impetus, & cædes tanta, ut consternatæ navales manus trepidè in proximam Aulidem confugerint. Ad novam expugnata Chalcidis famam lacrymabilis moeror Venetiis oboritur; & acris indignatio adversus Canaliū, qui maritimo exutus

império confestim in perpetuum exilium amandatur. Per eos quoque dies Turca ad pacem inclinabat, ne ob illatam nostris cladem in se armaret Europam; sed cum Venetis legatis Nicolao Cauco, & Francisco Capelio ex dicerentur conditiones, quæ minime è Reip. dignitate essent, à Patribus repudiantur, ultima pati potius cupientibus, quàm antiquum decus, & Veneti nominis existimationem alicujus turpissimæ pacis nota commaculare.

Socialis expeditio in Turcas.

•MCCCCLXX.

Chalcidis Turcico imperio subactæ fama, atque constans cum Veneta Rep. bellum, cæteros Italiæ Principes, & in primis Sixtum Quartum Pontificem summè commovit, concussitque Neapolis Regem Ferdinandum, quia Apuliæ, & Calabriæ maritima ora insaturabili hosti nimium exponebatur. Hi ergo communi consilio, & ope parandam cum Venetis classem decernunt. Pontifex viginti quatuor triremes in bellum contulit: totidem Rex: quinquaginta Veneti, sub quorum auspiciis cæteri succurrerent. Dum à sociis complentur promissa, mittitur in Persidem Catharinus Zenus ad Usuncassanum Regem orator, ut impio Turcæ hostis etiam extra maria quæreretur: & Canalii dignitas

gnitas Petro Mocenico defertur . Hic Cyprii Regis , & Rhodiorum comparatis auxiliis in Ægeum navigat primum : mox per retentas in fide minores insulas transit in Joniam , & Passagium oppidum , Orientalis negotiationis emporium diripit . Relata in naves opima spolia , delataque sunt innumera Turcarum capita , pro quorum singulis totidem aureos nummos receperunt interfectores ex imperatoris classici decreto . Ab hoste recedens classis Gnidum Cariæ appellit , prædatum immittit equites , & everso eo oppido contenta , Methonem navigat , ut ibidem opperiretur Pontificiæ classis ductores . Horum demùm adventu in majorem rei benè gerendæ spem erectus Mocenicus Athalias Pamphilæ urbem adoriri deliberat : factus est omnium Ducum in eam sententiam , concursus , atque illicò missus cum decem rostratis Victor Superantius qui portum occuparet , ita contigit : parique eventu Stephanus Maripetrus cum terrestri manu in hostium loca penetravit . Non tamen oppidum simul oppugnaturis eadem fortuna arrisit : duplici quamvis muro potiti in internas tamen munitiones descendere prohibentur , quia scalarum , quoniam illæ breves , nullus fuit usus , & irrita quoque murorum demolitio subterraneis dolis . Quoniam igitur obsidioni parùm tuta erat scopulosæ

Pamphiliæ ora, conclamatis vasis, Rhodum petit Mocenicus. Utinam in mari ea facinora gessissent fœderati, quæ in continenti Rex Persicus; quippe erepta Turcis Armenia, præclara legatione universos Christianos Principes in Othomannum animare studeat: proh dedecus! cum nullo sollicitante nos plusquam satis adversus Barbarum deberent impellere & acceptæ clades, & adempta regna, & quod profitemur, nomen, ac religio. Hinc fortasse aliquo affectæ pudore Veneta, & Pontificia classes, quod nihil adhuc præclare gessissent, Smyrnam invadere decrevere: quæ autem animi ardore in expeditionem se contulerint, id facile indicat, quod unica impressione munitissimam illam, arcem ceperint, & expugnarint, deletis propugnatoribus, ingentique abducta præda. Inde majores de barbaro hoste victorias animo concipiebant; verum ille nunquam ex Bosphoro in Ægeum prodire ausus est. Post hæc Pontificii in Italica hyberna recessere, Veneti in Peloponnesiaca, quo tempore venerunt à Perside legati ad Nicolaum Thronum Principem, quibus Usuncassanus bellica tormenta, atque alias id genus postulabat machinas, in Turcam exercendas. Regi perhumaniter satisfactum, & cum armis illustria dona transmissa, erga illum amicitiam, & munificentiam cum primis Venetæ Reip. testantia.

Bet-

Bellum in Cilicia.
MCCCCLXXI.

Veneti , ne Ciliciæ Reguli inopia ,
auxiliorumque cunctatione ad Tur-
cas deficere cogerentur , Mocenico impe-
rant , ut in subsidium transfretaret , mari-
timaque Ciliciæ , nunc Caramaniæ , op-
pida hosti eriperet . Profectus cum classe
dux Venetus , Corycum æneis machinis
postratum , Seleuciamque urbem , suo sa-
tis conditore illustrem à Turcarum mani-
bus extorquet . Hanc natura , & opere
probe munitam Nasambegus Bassa rege-
bat . Sed ut Mocenico constitit à meticu-
lo præside gubernari , caduceatorem
præmittit , qui oppidanis , nisi se dedissent ,
vincula , cædes , extremaque omnia de-
nuntiaret : sed cum eos à deditioe alienos
esse intellexisset , castra circum disposuit ,
Orontem fluvium classe obsedit , atque
ad primos tormentorum ictus nudavit de-
fensoribus mœnia . Tunc machinarum
strepitu territus Nasambegus , urbem
tradit oppugnantibus : sicque integra Ci-
licia suis dominis restituitur . Mocenicus
acceptis à grata Principum manu muneri-
bus , proras in Cyprum direxit .

Bellum in Lycia:
MCCCCLXXII.

VErùm ne in pacifica Cypri statione torperet otio miles, adhuc bello intactam Lyciam petere voluit. Naviganti in eam provinciam Mycra munita arx primum occurrit: ut cæteris Venetæ virtutis daret experimentum: ita si hæc caperetur, cùm sufficere ad reliquarum deditionem speraret Mocenicus, repentina terra, marique aggreſſione eam vexat, tormentis quatit, & proxima quæque loca deurit, ut pejora timerent obſeſſi, niſi ſeſe traderent. Egregiè tamen reſtitit Mycra, fiduciamque oppidanis fecerat nuntius, haud procul inde abeſſe Ajasbegum validi exercitus ductorem. Venienti reverà hoſti obviuſ it Peloponneſiacuſ eques, initaque manu certamen miſcet, quod diu de victoria utrinque duceſ habuſſit ſollicitoſ: porrò cadente Turca, projectoque in Mycræ muros occiſi Ajaſbegi capite, in voluntariam deditionem conſeſſim venire civeſ, hoſtiumque præſidia: attamen ad exemplum, direptionibuſ, ac flammis vovetur arx: Dum interim continua felicitate per alia Lyciæ caſtra Mocenicuſ victricia arma fulminat, in Ciliciam literiſ Catharini Zeni apud Perſaſ legati vocatur: ſiquidem in minorem Aſiam ſuaſ

suas copias traducere Usumcassanus adversus communem hostem cogitabat. Attingit ob id iterum Cilicum littus, & Mirenæos agros populatus, inde Turcas expulit. Sed cum nondum pro certo constaret de Regii exercitus adventu, ex ea provincia minus tuta nostris placuit recedere.

*Scodra, & Naupactus Turcica
obsidione liberata.
MCCCCLXXIII.*

Scodra non ignobile quondam Liburniæ oppidum, Scutara recentioribus, in arduo monte collocatum à natura munitissimum habebatur. Eo diruto Othomannus ad occupandam Epirum, Illyricumque nobiles provincias facilem sibi aditum aperiebat: quare illius expugnationem centum armatorum millibus aggressus est. Mocenicus ad famam properè conversus è Peloponneso Corcyram venit, consuluitque de movendis illicò in hostem armis. Concutiebantur subinde Scodrenses muri jugi machinarum verberatione, & per Antonii Lauretani Præfecti virtutem, ac vigilantiam nihil intereà artis, aut industriæ omittebatur, quin diruta mœnia statim reficerentur, & defenderetur Scodra impigrè. Ex alia parte classarii, ascito in belli societatem Illyrico Principe, qui

quinque rostratis Drilonem fluvium, Lys-
samque Scodrae proximam arcem maniv-
re. Ex his crebra fuere cum hoste certa-
mina, & in primis singularis ea pugna,
ad Bolianam commissa, qua Turca multa
clade fufus, fugatusque est. Cæterum
adhuc fatigabatur oppugnatione oppidum,
dirutisque propugnaculis, muri quoque,
planè conciderant, Turcæque per ruinas
tentabant irrumperè: at oppressi, auda-
ciam, spiritusque ex periculo lumentes, du-
ce Lauretano, barbaris ingruentibus op-
posuerunt corpora tanta pertinacia, ut ob-
stupefceret Othomannus, quòd sibi non mi-
nùs negotii videret cum semidiruta Sco-
dra, quàm fuerit cum integra. Strenuè
quoque navales turmæ adoriebantur ali-
quando Turcicas stationes. Verùm hæc
inter Resp. à Mathia Pannoniæ Rege
foedera impetravit, & auxilia, quæ per
annua stipendia magno usui fuere. Igi-
tur cùm primùm Rex in Thraciam au-
xiliares copias immisit, Scodra libera-
tur, tertio, postquam obsessa fuerat,
mense, duobus oppidanorum millibus
amissis. Abit inde Othomannus, ne dum
uni castro inhæret, integram amitteret
provinciam. Post hæc Mocenicus in pa-
triam rediit opportunè, de rebus à se
præclarissimè gestis suprema munera rece-
pturus, dum concordi Patrum consensu in
Nicolai Marcelli locum Venetus Princeps
decla-

declaratur : virtus quoque Antonii Lauretani dignitate crevit . Accepto enim rerum maritimarum imperio in Ætoliam divertit : evalgata Naupati obsidione affuit in tempore , & obsessis necessariam opem tulit , & auxilia , quibus strenuè illi se tutabantur , sumebantque animos à fortunatis plerumque velitationibus , quas crebrò classicus miles cum hoste conferebat . Quatuor menses duravit obsidio , in qua cum Turca nihil proficeret , fatigatus bello , non animo turpiter recessit . Dum tamen opinatur Venetum plures dies reficiendo oppido intentum , ipse Lemnum traducit , hanc insulam veluti per otium occupaturus . Rei monitus Lauretanus celeri navigatione , & vix barbaro credita , apparuit , oblessoque Coccino castro suppetias importavit . Tandem non pugnando , sed sedendo hostem vicit , cum ille militum curationem , quæsitam ordinandi certaminis moram interpretaretur .

Croja à Turcis capta .
MCCCCLXXV.

REmpublicam regebat Andreas Venedramenus , cum parum prosperè terrestri bello pugnatum est . Crojam Chaoniæ montanum oppidum , quod sine grandi obsidione capi non poterat , numerosissimo exercitu conclusit Otho-

k 6 man-

mannus . Veneti subinde importato com-
 meatu , submissoque milite spem , auxilia-
 que dabant oppidanis ad repellendam vim ;
 sic erumpendo sæpiùs omnia hostilia machi-
 namenta turbabant ; nec minùs classiarii op-
 pugnando Turciea castra ea moliebantur di-
 scrimina , quæ hostem , majora timentem ,
 summo verent . Porro in planitie Tyranna
 (locus calamitati omen fecit) fortunæ ty-
 rannidem experti sumus : Congressi no-
 stri obversas copias multa cæde profliga-
 runt ; mox insæcuti , quò quemque fuga ra-
 piebat , in ipsa castra feruntur : hæc cùm
 cepissent , prædaque impedirentur , omnes
 à retrò ingruentibus barbaris , uno relicto
 eladis nuntio , internecione mactantur . Ita
 partam victoriam amisimus avaritia , præ-
 dandique libidine ; & hanc postremò adau-
 xit calamitatem Crojæ deditio , domitæ ta-
 men non armis , sed rerum omnium ege-
 state , fameque , cui nullum invictum mor-
 talium opus resistit .

Turcica irruptiones in Forum-julium.

MCCCCLXXVI.

NON Crojæ fœdior clades ea , quæ
 irrupentibus Turcis Foro-julio
 illata est . Patriæ Foro-juliensis fines de-
 cem Turcarum millia intrarunt Asnar-
 bėjo duce , ac tumultu omnia , terrori-
 busque complexuat : populati locupletem

provinciam, ad Sontium amnem, ductasque per Aquilejenses paludes extruunt munitiones, atque Italiam, cui Othomannus inhiabat, ex tam vicino loco hostis vehementer conterruit. Sed non alius, nisi Venetus opponitur tumultuaria manu, qua primum Hieronymus Novellus ductor statuerat intra castra rem Venetam defendere, non eam aperto discrimini committere. Sed missis ab urbe copiis, mutato consilio extra proflire decrevit, quacumque hostis occurreret. Unius audaciam secuta sunt aliorum consilia: tutius tamen hostile robur mora frangere post ruinam creditum fuit, quam viribus adhuc vegetum in se convertere. Asnarbejus quasi præfagiret nostrorum inscitiam, trajecto Sontio, expeditissimas turmas, quæ Venetos ad pugnam elicerent, immisit. Concurrentibus, & castra obequantibus arreptis continuo armis nostri eunt obviam: at vix benè inter inimicas acies conferitur prælium, cum Turcæ, simulata fuga, reecedunt: insistunt illi fugientibus, timore hos cedere rati: verum, ita in paratas ad Licinifium montem insidias pertrahuntur: in incautos profligant latitantes, & redintegrata pugna prorumpunt. Nostri astu, casuque circumventi quaquaversum profligantur. Cecidit Novellus, & complures alii honesti viri. Hostis victoriae usum rapinis,

incendiis, ac desolatione provinciæ finiit. Attamen ut aliis Barbarorum incurfibus tutiora objicerentur impedimenta, placuit validioribus præfidiis jam extructa propugnacula firmare, & castra ut in posterum cautiùs defenderentur, Carolum Montonium seligere. Hæc vix in hunc modum disposita, cum Turcæ opulentissimæ regionis vel non obliti, vel, quod verius, ab Othomanno innissi, ut Veneta arma retraherent ab Scodra, iterum in Forum-julium venire, & majori quàm antea numero confedere inter Sontiacas, & Gradiscanas munitiones. Hic explicata acie importunè obstrepebant, & Venetos ad bellum proclamabant præteritæ victoriæ, nostræque dementiæ memores. At Montonius acceptam à Novello cladem secum revolvens, de procaci hoste cunctando maluit triumphare. Quare edocti Turcæ, cum alio duce sibi fore pugnandum, non multos post dies moræ pertæsi, futuriæque comineatuum penuria exhausti, victis penè pares, abcesserunt.

Scodra Turcis tradita. Pax.
MCCCCLXXVIII.

Scodræ arcis obsidio, jam antea infelicitè tentata ab Othomanno, adeò Barbari animum lancinabat, ut insignem gloriæ suæ maculam inustam putaret, si eam

tam imperio suo non adjungeret. Alteram
 itaque parat expugnationem majori vi,
 odioque, in quam defecti sunt Alibegus,
 & Solimannus viri truces, ac bellicosi.
 Horum sub imperio quindena mortalium
 millia transmissa legimus, murales insuper
 machinas penè innumerabiles. Tanto ar-
 morum, militumque apparatu expugnanda
 erat Scodra, quæ à duobus propugnantium
 millibus defendebatur: atque sic illam
 Turcæ circum circa vallaverant, ut non
 nisi cœlesti auxilio aditum reliquisse vi-
 derentur. Hoc pacto repetita est obsi-
 dio, & oppugnatio ita promota, conti-
 nuataque, ut ex solis missilibus, machi-
 narumque pilis in deturbatū muri locum
 obfessi aggerem contrā extruxerint. In-
 terim ad stuporem hostium intrepidè
 pugnabatur: cūque his per disiectos
 muros tentaretur irruptio, horrenda
 Turcarum strages est edita, oppidi Præ-
 fecto Antonio Legio rem bellicam admi-
 nistrante: ita ut barbari duces non tam
 Scodrensiū virtutem, quàm Veneti
 hominis constantiam pertimescerent. No-
 vissimè ipse Turcicus Imperator obsi-
 dioni, quæ ultra opinionem protrahe-
 batur, interesse voluit, ut sua præsentia,
 propositisque præmiis milites animaret.
 Hinc facti omnium periculorum imme-
 mores pertinaciter nostrorum propugna-
 culis sic inhærebant, ut certum mor-
 tis

tis discrimen subeundum esset obsessis, si
vellent insistentibus diutius resistere. Sed
omni neglecto metu per tela, per hostes
ruunt, magnaque clade, & ignominia ir-
rumpentes repellunt. Fassus est Othoman-
nus se pugnare cum hoste, cui esset pro-
positum malle mori, quàm cedere. Perse-
verante autem obsidione, nec remittente
fati malignitate, vicina expugnantur mu-
nicipia: captivi fermè trecenti omnes an-
te Scodrae mœnia in duas partes secantur:
vallato denique fluminis ostio binis arcibus
nullum ampliùs subsidium importari po-
tuit. Tot itaque angustiis, & adversæ for-
tunæ calamitatibus conflictati Veneti, post
sexdecim annorum, quod cum Turca ge-
ferant, bellum, de pace agere cœpe-
runt, quæ hisce conditionibus firmata est, ut
Respublica Othomanno cederet Scodram,
Lemnumque, hic ponticam navigationem.
nostris negotiatoribus immunem, tutam-
que relinqueret. Evulgata pace, Sco-
drenses, detestati Turcicum dominium,
solum patrium ad unum deseruere. In
eos, qui Venetias commigrarunt, se præ-
buit Senatus longè gratissimum, ac sum-
ma edidit benignitatis argumenta in fœ-
minas, quæ obsessa Scodra pro mœnibus
steterant, & quæ tanta in urbe castitate
excelluisse dicebantur, ut celebris cu-
jusdam pudicitiae famam, & nomen
in hodiernum usque diem retulerint.

B. li.

*Bellum Ferrariense secundum sociale
cum Insubre, & Aragoniis
in Venetos.*

MCCCCLXXXII.

PAcem maluit necessariam inire Resp.
quàm armis cum potentiore decertare,
& omni externo auxilio destituta Turci-
co furori tradere oppida, sibi reliqua in
Græcia. Non sine insigni Christianorum
Principum dedecore id factum, qui non
modò Venetis aut nullas, aut exiguas ali-
quando suppetias contulerant, verùm etiam
eos revocarant in Italiam, primùm pro
Florentinorum libertate implicitos, mox
Ferrariensibus armis laceffitos. Florenti-
num bellum uno ad montem Sperellum Pe-
rusini agri prælio confecit Robertus Ma-
latesta, fuditque hostiles copias, intercep-
toque militari apparatu amico populo pà-
cem reddidit. Sed Ferrariensi vix aliud an-
teà gravius gessere Veneti: hoc tamen eò
alacriùs susceptum, tractatumque, quòd
per eos dies, frustrà tentata Rhodo, in-
terierat Othomannus. Ab Hercule Ate-
stino Ferrariensium Duce profecta est
belli causa, dum rerum novarum cupi-
dus, ac regia Aragoniæ gentis affinitate
tumidus, Venetum Magistratum, Vice-
domini titulo Ferrariæ jam multos an-
nos constitutum primò negligere, con-
tume-

tumeliisque afficere cœpit : mox Reip. limites hostiliter vexare, peccare in fœdera, atque amicitiam à suis majoribus sanctè cultam contemnere. Ut injuriis abstineret, ab Joanne Mocenico Principe non una missa legatio, quibus cùm nihil profectum esset, confestim indicta sunt arma, & ictum fœdus cum Sixto Pontifice, qui æquè Atestinorum domitam temeritatem, correctamque superbiam peroptabat. Itaque in juratum hostem proficisci duplici classe decretum est : Padana altera, ut à flumine Ferrarientes agri vastarentur : altera maritima adversus Ferdinandum Neapolis Regem, si quid à pelago, ut fama erat, in affinis opem tentaret. Conscriptæ sunt etiam terrestres copiæ, & his duo fortissimi viri, ambo Roberti nomine, præfecti, Severinas, qui circa Padum curaret rem bellicam; Malatesta, in Flaminia hostiles adversus Pontificem conatus, si qui forent, reprimeret. His tam prudenter decretis, Severinas cum Antonio Lauretano Legato exercitum per Tartari fluvii stagna in hostem traduxit, & ad depopulandam provinciam, & ad oppugnanda municipia subito conversus, omnia pavore, strageque complevit, pluraque castra, aut deditione, aut vi Venetæ ditioni subjecit, quibus & Ficariorum quoque munitissimam arcem per eos dies adjunxisset, nisi ab Federico Ur-

Urbinate Atestinarum copiarum ductore circumventum iri dubitaret, qui, occupata Hostilia, in extrema agmina impressiones faciebat : Sed ut hinc inde distraherentur hostium vires, Christophorus Amulius copias movet in Adrienses minoribus navigiis; datoque certamini signo, unica hora universa ferè Adria conflagravit : tanti impetus causa fuit cædes Dominici Ericei, qui primus vim intulerat, cujus mors nostros milites adeò irritavit, ut ejus manibus oppidi, arcisque everfione parentandum jurarent. Comaclum, audita Adriensium desolatione, spontè Veneto se dedit. Damianus quoque Maurus Padanæ classis Præfectus prosperè ad Pilosellam confligit : ibidem Atestini communiverant utramque amnis ripam, Padumque extractis miro ingenio castellis, productisque per medias aquas repagulis, ne ulterius adverso flumine Veneti agerentur : in eandem curam expeditissimi equites per anfractus riparum brevioribus semitis occurrentes invigilabant. Maurus, impavidus vir, in vectus in obversas machinas, non tam fluviatiles dissipavit munitiones, quàm terrestres fugavit copias, imperataque per vicinos agros decursione opimas prædas navalibus fociis revexit. Hac animatus victoria Ficariolum adnavigavit, quod castrum à Severinate oppugnabatur, summo tamen labo-

labore, cum vix impedire posset, ne Urbinas necessaria inferret obsessis: attamen ille obviam ire cuique volens, per abrupta tormentis mœnia irruptionem molitur, quamvis hostes armati ruinis superstantes munimenti loco se se opponerent; sed tandem Veneti ducis virtute, & audacia captum oppidum, dirutaque propugnacula fuerunt, atque inde tutius per Polynesum discursum, subactaque Rhodigini agri municipia, adjuvante cum primis Jacobi Laurentii Avantii studio, ac militari solertia, qui propterea ab Senatu summis honoribus, & dignitatibus auctus, tandem immis- sis ab hoste sicariis ob incontaminatam ejus in Rempublicam fidem fuit trucidatus. Dum hæc in Ferrariensibus: ab Alphonso, Ferdinandi Regis filio vexatur armis in agro Veliterno Pontifex: ad opem jussus est accurrere Malatesta, & Romanis, quacumque necessitas postularet, præsto esse. Hic ut in provinciam venit, Alphonsum vidit explicatis signis bello promptum; at ubi primùm conferta est manus, Aragonii victi, fugatique sunt: nec parum nostram illustravit victoriam fama superati validissimi exercitus à paucissimo milite: tantæ suæ non diù tamen gloriæ super- vixit vir strenuus. Cum igitur pro as- ferenda Pontificis dignitate præliaretur, in Apuliam transfretavit Victor Superan- tius, eamque regionem, & proximam ei

Cala-

Calabriam agrorum, vicorumque depopulatione maximè deturpavit : postremò è maritimi in fluviatilis apparatus imperium traductus, non minori fortuna Venetis navibus Padi aditum aperuit ad ripas usque Lacus, quem dicunt Obscurum; & ulterius progressus ad res hostium intercipientes milites ablegavit. Hi tamen ad prædam veriùs, quàm ad pugnam profecti, inopinato Sigismundi Atestini adventu fœdissimè appetuntur, sed accurrente properè Severinate intercepta sunt spolia : fugatique Ferrarienses spem nostris fecere occupandæ Ferrariæ, cùm nullo obice per patentes campos volitarent, sæpiùsque prodirent, refracto Parci muro, in urbis conspectum ordinatis agminibus. Cæterùm cùm ea, se potituros crederent, inexpectata Pontificis aversione decipiuntur. Ille, qui primas bello huic faces subdiderat, ab Veneta tunc divulsus societate, cum hostibus in Remp. percusserat fœdera, edictumque, ut quod illa bellum in Ferrarienses tractaret, impium esset, & injustum : ac anathematis fulmine feriebatur, quæ sua jura tueri nitebatur. Verùm ne publicæ dignitatis ratio parvi duci à Patribus videretur, nihil tot minis, & conspirationibus de bello remissum est; quinimò ad majora facinora elati sunt animi, contendente per ea tempora Galeatii Mediolani Ducis uxore cum Ludovico Sfor-

Sfortia, qui sub specie tutelæ nepotis invaserat principatum. Severinas cum parte copiarum è Ferrariensibus in Insubriam, superato Abdua, castra ad Trecium locat. Hinc in hostium fines continuæ actæ impressiones, & superata castra: territi, ac perculsi populi, convasatis rebus, fortunisque suis trans Alpes aufugerunt. Inetrim Ludovicus in Cremonenses venit, conjunctoque cum fœderatis exercitu adoriri Venetas stationes decrevit. Consilii monitus Severinas Bergomum adit, ne viribus impar uni variantis fortunæ alex cuncta exponeret. At ubi audiit hostes liberè discurrentes ad deditionem compulsi quicquid Brixienfium inter Mellam jacet, & novos Urceos, longioris moræ pertæsus egreditur, & Venetas ditiones ab Insubrum incurfibus, & imperio vindicavit. Hæc agebantur in continenti, quando à mari affertur, Ferdinandum Neapolis Regem cum instructissima classe Dalmatiam tenuisse. Ut hosticas inde detruderet cum suis triremibus extemplo navigat Jacobus Marcellus; at dum plus nimio in re navali curanda moratur, in suspensionem cadit, quominus Aragonios prope Corcyram nigram non profligarit. Illius tamen partes explevere optimè Georgii Viarii, & oppidanorum virtus, fidesque, hostibus tota insula expulsi. Post hæc Marcellus Callipolim, Calabriae advectus pristi-

pristinam, si quæ erat, infamiae maculam, proprio sanguine delevit : quippe inchoatam ejus oppidi oppugnationem tanto spiritu prosecutus est, ut dum antesignanus, cæteros ad irrumpendum invitat, tormenti globo ictus ceciderit. Classica administratio ob Marcelli interitum Dominico Maripetro obtigit : tum opus tali quidem duce fuit, qui post captam Callipolim, Aragoniam temeritatem coerceret, multis illatis cladibus, occupatisque oppidis in Calabrizæ, Apulizæque littoribus. Quapropter Ferdinandus, ne ulterius in sui Regni viscera penetrarent Veneta arma, unâ cum fœderatis ad pacem deflexit. Venetæ tamen ditioni accessit Rhodigium, totumque Polynesum. Verùm hanc pacem, è Reip. dignitate firmatam, non nihil morstam reddidit subsecuta pestilentia, & nuntius direptarum à piratis in Britannico mari navium, quas Bartholomæus Minius onustas mercibus in eas insulas advehebat. Porro hæc est humanarum rerum conditio, ut nunquam solida, vel perpetua obveniat felicitas.

Bellum Rheticum Austriacum secundum.
MCCCCLXXXVI.

Promota de finibus controversia ab Arcuanis Comitibus adversus Ripenses, Benaci accolæ, orta que inter utros-

utroſque lis de argenti fodinis, quæ in Noricis, tùm Veneti, tùm Auſtriaci juſtis habebantur, præſentis belli ſemina extitere ſub principatu Auguſtini Barbadici. Sigifmundus Auſtriacus Tirolenſium Comes in armis primus viſus eſt, & Roverenſe oppidum per crebros inſultus laceſſivit, Gaudenzio Amaſiano duce: illud tamen ſtrenuè multos dies defendit Nicolaus Priolus Præfectus. Sed cùm interim Reſp. ſe parat ad bellum, militumque habet delectus, quos ductore Julio Camerte Rhætis opponat, Priolus, qui non ſatis virium ad majores conatus haberet, imminuto ſubindè præſidio, ac territis, qui ſupererant, militibus novo pilarum ignitarum, ſeu veriùs fulminum genere, oppidum deſerit, ac in arcem profugit. Creſcente in dies bello, novas quoque copias conſcribebat Senatus: & quamvis crederetur, præteritis jam bellis fractus non poſſe potentiori diutiùs reſiſtere, nihilominùs ſtetit periculis audacior, ipſique profuit communicata Roberto Severinati cum Camerte rei bellicæ adminiſtratione. Addidit animos Hieronymus Savorgnanus, qui Germanicas aliquot turmas, Carnicos fines populantes, vel cæcidit, vel in effuſam fugam conjecit. Attamen hæc inter Rovereti arx bellicis machinis paſſim diruta, neque ullum oppugnatis ſperatum auxilium, Præfectum in deditionem

com-

compulit. Sub hæc etiam cœpere tumultuari Germani milites, & quia deficerent commeatus, & quia stipendia non solverentur. Hac de re Amasianus, ne à propinquis Venetis insignem aliquam cladem reportaret, cùm præsentissimæ exitii auguria sint in exercitu discordiæ, motis repente castris, incensoque Rovereto, Tridentum petit. Severinas, cui, ægrotante Camerte, totius belli summam detulere Lucas Pisanus, & Hieronymus Marcellus Legati, hostis abeuntis terga infecutus, Tridenti obsidionem parat: verùm, ne quid hostile post se relinqueret, ad expugnandam Petram arcem selectos milites præmisit. Hi ponte Athesi transmissi, contra quàm ille mandaverat, cœpere dulcedine prædæ vagari incompoti: interim perlata Tridentum inopinatæ rei fama, conclamatur properè ad arma, quod majorem, quàm pro re, terrorem ea in urbe excitavit. Egressæ duæ equitum turmæ, collectaque in unum agrestium manus, sua multitudine non contemnenda, facto impetu, quæ effusa populatio nuntiabatur, nostros jam trepidos, & dispersatos fœda clade, turpique fuga opprimunt, repelluntque. Severinas opem laturus oppressis advolavit, dumque objurgando, hortandoque sustinere hostem, & suos continere conatur, ferox prælium orditur. Verùm nihil ducis im-

L perium,

perium, nec majestas, aut exemplum valuit: ipse namque à fugientibus, & suo fato raptus in amnem dejicitur, in eoque vir clarus periit. Hinc animosiores Germani urgere aciem, micare gladiis, persequi nostros, qui raptim ad pontem confluebant, ut eo superato fugæ finem, & corporum securitatem invenirent. Sed illi antea fuerat rescissus legatorum jussu, quia sperabatur ex necessitate virtus, ut sublato effugio milites acrius in hostes converterentur. Non admisit consilium timor, quin potius in flumen præcipites ferebantur, & paucis in alteram ripam natando deventis plurimi aquis absorpti sunt. Unus postremò Guido Maria Rubeus Parmensis Germanos undequaque instantes parva manu summovere potuit, ac sternere: nec dubium erat, hostes terga daturus, si nostri parum resistere valuissent. Senatus decrevit, ut Arcum municipium suscepti belli causa deleteretur: jamque conversum ad legendas recentes copias Innocentius VIII. Pontifex hac pacis conditione mitigavit, ut restitutis damnis nihil amplius de finibus cum Rep. innovarent Austriaci.

Cyprus Veneto imperio adjecta.
MCCCCLXXXVII.

CYprus, felix quondam insula, inter majores mediterranei maris locum sibi vindicat. Hæc Græcis ab Richardo Britanniarum Rege erepta, cum Europæi Principes ad Sacrum bellum confluerent, Guidoni Lusiniano Gallo tradita est. Hujus posterius per annos propemodum trecentos regnum in Insula obtinere, sed variis subinde fortunæ casibus agitati, Janus prælio navali cum Ægyptiis commissio in potestatem Barbarorum venit, qui tandem, ut se captivitate redimeret, ingenti auri vi, & annui solutione tributi ab Soldano victore insulam cum administratione recepit. Huic Joannes filius iisdem legibus successit, qui ex Helena Palæologa conjugē unicam suscepit filiam, nomine Carlottam Ludovico, Allobrogum Ducis Ludovici secundo genito, desponsatam: ex concubina Jacobum habuit, quem adhuc juvenem, Nicosiensi Archiepiscopatu destinavit: Joanne mortuo, sine aliis liberis, Allobrox in spem novi Regni erectus, Cyprum uxoris nomine sibi postulabat. Cyprii Jacobum, nulla ejusdem regni lege imperio prohibitum, deposcebant Patri successorem. Inter dissidentes non leve exarsit bellum. Verum cum

Jacobus ægrè Allobrogem depellere posset; ad Soldanum profugit, cujus tributaria erat insula: ab eo exceptus impetrat libero jure totius regni administrationem: reversusque cum auxiliis competitorem, & socios tota Cypro exterminat. Ita Jacobus pacatæ Insulæ Rex salutatus: in uxorem postea sibi delegit Catherinam Marci Cornelii patricii Veneti filiam, ab Repub. quoque filiali solemnitate adoptatam per Nicolaum Marcellum ejus temporis Principem. Tandem vita excessurus Rex fœtam conjugem cum posthuma prole Regni hæredem supremis tabulis reliquit: atque interim tutelæ, ac Veneti Senatus patrocinio commendavit. Porro defuncto Rege, continuò repentinis tumultibus insula vexari cœpta: & primò eam turbavit Jacobus apud Ferdinandum Neapolis Regem Orator, dum se acturum pollicetur, ut notho sui Regis filio pariter filia Jacobi spuria nuptui, atque adedò dotali nomine Cyprus Aragonio daretur. Placuit regiæ cupiditati consilium, &, ut promissa adimplerentur, illicò in Cyprum cum armatis triremibus remittit Legatum. Hujus adventu in Reginam, ejusque familiares oritur conjuratio, qua illius patruus cum primis, Andreas Cornelius opprimitur. Sceleri additur postea violentia, coacta Regina, ut ad Petrum Mocenicum, sub id temporis Venetæ classis imperatorem,

scri-

scriberet , Cornelium denegato præsidia-
riis stipendio sublatum ; eodem nomine ad
Senatum decreti Oratores : cæterum in
hac rerum perturbatione ratas nuptias le-
gatus paciscitur : interim fraudis per oc-
cultos nuntios certior redditus Moceni-
cus , è vestigio Victorem Superantium
cum selectis navibus præmittit . His auxi-
liis exhilaratur Regina , ac in pristinam
quietem , securitatemque traducitur ; quia
expositis ad Tamaßum copiis jam indictum
perduellibus bellum videbatur : sic illi ar-
morum fama , classisque conspectu perter-
riti se mulctant voluntario exilio , & Cy-
pro optata pax restituitur . Hoc pacto ex-
citatas turbas compescuit Venetus anno
MCCCCLXXI. Sed ne amplius , aut tam
facile emergerent conspirationes , anni-
tente Regina , destinavit , veluti Præfe-
ctum Insulæ , eundem Superantium ; &
sic integris sexdecim annis Cyprus man-
sit incolumis , ac omni metu secunda : quo
demum tempore , quia ferebatur Bajaze-
thus Turcarum Imperator insulæ ani-
mum adjecisse , timeri cœptum est , at-
que tum major injectus timor , cum
idem Barbarus comparata valida classe ,
in proxima maria ducenda , ab Senatu
commodum Cypri appulsum petiisset .
Verum Patrum constantia omnem me-
tum excussit : negatus est enim Barbaro
accessus , novaque classis instructa , ac

Francisco Priolo demandata Insulæ propugnatio. At quoniam ab externo non solum hoste, sed etiam à domestico timendum erat (adhuc enim remanserant, qui Aragoniis, Allobrogibusque faverent) ex Senatus consulto Georgius Cornelius, Reginae frater, Cyprum navigat, ei persuasum, ut permissa Reip. Regni sui gubernatione, ipsa, tum parvulo filio orbata, vellet in patriam transire, tutius victura in natali solo, quam in rebeli Insula, tamque remota, & circumdata ab immanissimis hostibus. Illa fraternas adhortationes lubens admisit, Venetiasque subeunti totus Senatus fit obvius, qui nihil ad summos honores, & verè regios in ea excipienda, colendaque omisit. Mortua tandem Regina, Cyprus in Venetam provinciam redacta est. Turcæ nunc paret, inani potius, quam speciosa Christiani Principis contentione, cum prius vi, quam jure, ac titulo asserenda videatur ejus possessio.

Bellum Gallicum ad Tarum.

MCCCCXCV.

Jura sanguinis, ac pietatis officia violavit Ludovicus Sfortia regnandi libidine: datus enim tutor Joanni Galeatio nepoti, hunc in primis corruptissimis moribus curat instituendum, ne unquam Mediolanenses vecordem, & improbum Ducem

cem sibi exoptarent; mox ne ille unquam sui principatus administrationem reposceret, eundem non sine veneni suspitione de medio sustulit. His sceleribus addendo scelera, ut etiam defuncti nepotis deleret affines, adversus Ferdinandum, & Alphonsum Aragonios, in Italiam Gallos promissa ope, tanquam Neapolitani regni dominos, pellexit. Hanc igitur ob causam Carolus Octavus Gallorum Rex Italiam per Cottias alpes ingressus, tanto cum exercitu Neapolim festinavit, ut horrendo omnibus terrore, quacumque pergeret, incusso; brevi regnum illud fermè totum in deditionem reciperet, rebus supra vota fluentibus. Tàm repentini, ac prosperi Gallorum successus metum, odiumque apud Italicos Principes, liberarumque civitates injecerant, quòd ad totius Italiæ imperium tendere crederentur. Concitavit itaque in eorum perniciem universam propemodùm Europam, percussis foederibus cum ipso Ludovico, quem jam poenitebat suorum consiliorum, haud ignarum, ut ea sæpè sunt perniciofa, ita in auctorum capita plerumque recidere. Confœderatis militibus Franciscus Gonzaga Mantuanorum Dux datur imperator, qui cum Veneto præcipuè, ac Sfortiano e exercitu Regis in Galliam reditum, intercluderet. Carolus per eos dies, superato Apennini dorso in dexteram Tari

annis ripam juxta Forum-novum descen-
 derat: ibi Gonzaga, Marco Antonio Mau-
 roceno, & Melchiore Trivisano, Venetis
 legatis, pugnam dissuadentibus, quòd
 non dùm omnes copiæ adessent, Gallos
 aggredi designat. Diviso itaque equitatu
 in quinque turmas, ipse cum selectiori
 flumen trajecit, alteras ordine submitte-
 re, pro necessitate, jussus est Rudolphus
 Gonzaga. Rebus ita compositis, Regem
 ultra annum jam progressum insectatur,
 majore quidem animo, quàm consilio.
 Gallos enim à tergo petitos adèò irarum
 plenos in se convertit, ut inter utraque
 agmina, eodem ferme numero, & armis
 paria procedente certamine, dubium ali-
 quandiù prælium fuerit. Interim secunda
 equitum ala in subsidium immissa est,
 quæ recens, & integra plurima strage
 hostiles cuneos dissolvit: verùm certa
 nondùm victoria, & audentibus favisset fors,
 nisi illam nostris indignè eripuisset Fran-
 cisci Severinatis mora, qui in præmissa-
 rum turmarum opem, tertiam submitte-
 re recusavit. Ille Sfortiani militis ductor,
 vel non est ausus tentare vada fluminis,
 suborta pluvia intumescens, vel moni-
 tus à Ludovico, suspicante ex prospe-
 ra illius certaminis fortuna, Venetam
 gloriam, & potentiam nimis auctum
 iri, subsidium afferre neglexit: hocque
 apertiùs comprobatur, cum idem Lu-
 dovi-

dovicus Bernardo Contareno interdiceret , ne abeuntis Regis extremam aciem carperet . Subinde pugna obstinatione creſcebat , & noſtrorum numerus deficiebat , qui tandem ſperatis auxiliis fruſtrati , loco moveri cœperunt unde Galli acriùs , vehementiùſque inſurrexere , atque ita unius ex fœderatis invidia converſa ad hoſtes fortuna plures egregios viros protrivit , aut dedit captivos . Illud Venetæ virtutis , & conſtantiæ ſpecioſum argumentum , quòd eorum nemo ex eo prælio vivus in Gallorum poteſtatem devenerit . Tria hominum millia interfecta dicuntur : uterque exercitus victoriam penes ſe ſtare profitebatur : neceſſario fortaiſè commento , ne ſuperſtites copiæ terrerentur : dubio tamen procul noſtri viciffent , ſi fati neceſſitas humanis conſiliis abrumperetur , aut comes virtutis livor non eſſet . Tradunt annales , Venetos ſuperiores extitiſſe , quòd hi bellica omnia impedimenta interceperint , opimaque præda abducta coegerint Regem præ timore ſubſequenti nocte ſub dio agere , fugamque moliri victo ſimilem . Aſta fugitivum excepit , nec noſtris defuit animus , quò minùs altera die tergadantem laceſſerent , eaque in urbe obſiderent Ludovicum Aurelianenſium Ducem , qui , ut cum ſuis tutò in patriam

rediret, crebras eruptiones faciebat; sed mira in cohibendo hoste Contareni solertia effecit, ut extrema penè fame maceratus, & ad sordida quæque alimenta compulsus in eas pacis condiciones venerit, ut Novaria Sfortiæ restitueretur. At Resp. quæ Gallos cupiebat penitus ab Italia ejectos, non tam terrestres, quàm maritimas vires ad Ferdinandum transmisit, ut iis pulsus Regnum recuperaret. Cum classe solvit in Apuliam Antonius Grimanus, cujus adventu, & ope in regnum integrè restitutus: auxilianti Reip. tradidit Aragonius Thranum, Hydruntum, ac Brudusium oppida, donec expensum in eam expeditionem aurum rependeret. Per hæc Carolus eadem celeritate, quæ id acquisierat, regnum amittit: tanta nempe fortunæ vis est, ut sæpè unico momento simul perita, & sperata decorevertat.

Bellum Pisanum cum Florentinis.
MCCCCXCVI.

Vix se Gallici furoris metu liberam credebat Italia; cum nova in Hetruria exarsit bellorum origo. Pisanis Carolus libertatem magno auri pondere vendiderat, dum ubique locorum victor Neapolim tenderet. Illi ne semel excusum servitutis jugum iterum subirent, ex-

extrema quæque pati malebant. Qua de causa adversus præpotentem Florentinorum Remp. Romani primùm Pontificis, mox Cæsaris, postremò Ludovici Sfortiæ, ac Venetorum auxilia implorarunt. Sed non ab aliis promptiora, firmaque magis obtinuerunt Pisani subsidia, quàm à Venetis, qui ut amicorum libertatem integram conservarent, arma in Hetruriam intulerunt; atque in eo bello, quod varium, diuturnumque fuit, ita se gessere, ut pro libertate propria pugnare viderentur. Itaque post multas acceptas clades, merías, disjectasque naves, comineatus interceptos, oppida direpta, Florentini, ne pejora in dies paterentur, Gallorum Regem supplici legatione orarunt, ut denuò transiret in Italiam, justæ eorum causæ opem laturus. Constans fama erat, Carolum hanc in provinciam alteram parare expeditionem. Sfortia igitur veritus, ne imminens illa ab Alpibus tempestas in se unum caderet, demissè admodum cum Venetis egit de accersendo Maximiliano Cæsare, qui Gallo, Italiæ hosti, opponeretur. Cæterum ille, qua pollebat perfidia, venientem Cæsarem dicitur allocutus, idque unum ei persuasisse, ut se Pisanæ controversiæ judicem constitueret, antequam Veneti aliqua magni momenti urbe in Hetruria potirentur. Acquievit Maximilianus consiliis, sed nihil sua majestate dignum

gnum imperando profecit . Illi namque , qui spem omnem recuperandæ urbis in Carolo collocarant , arbitria respuebant : Nostri verò , ut apertius constaret , nulla ampliandi domini cupiditate Pisanis auxilia præstitisse , per Franciscum Foscarum legatum suscepti belli titulum Cæsari aperiunt , suadentque , ut , cum certa Italiæ tranquillitate , discrepantes inter se populos componeret : ad id non defutura navigia , quibus ille Pisas veheretur , nec arma , quibus contumaces domarentur . Sic Venetis reconciliatus Maximilianus in Hetruriam fertur , Pisanos , & Florentinos ad concordiam hortatur : verùm quia cum his omnia irritò eventu procurata , eosdem armis terrere statuit . Junctis itaque cum Venetis armis , Liburni portus , & oppidi imperat obsidionem , quæ cum concepta ipse diuturnior evaderet , ille moræ impatiens , pertæsusque , se rem cum pervicacissima gente molitum , ex ea provincia suas in sedes remigravit , nullo ibi relicto tanti nominis egregio facinore . Veneti nihilominus susceptum bellum prosequiebantur , illudque ad optatum finem perduxissent , nisi Sfortiæ ingenium , ad dolos , fraudesque natum , Reip. decus illud invidisset , aut illius dignitatem læsisset Hercules Atestinus : alter enim quâ vi , quâ dolis nostrorum conatus debi-

debilitavit : alter verò datam fidem non servavit . Pisani ultrò Veneto Senatui se dederant, acturi quæ ipse sentiret , modò ne iterùm inviso populo succumberent : hac una conditione firmanda pax erat , qua ab Atestino promissa , sed non servata, Pisas in pristinam obedientiam redegere Florentini : Veneti verò nil præter ejus belli impensas receperunt ; cùm possent usque in Ligusticum mare nomen cum imperio protendere .

Bellum Turcicum quartum .
MD.

C Aroli Octavi repetendæ Italiæ consilia mors interrupit : ea tamen Ludovicus duodecimus Regno potitus non distulit, quin & in ipso initæ publicæ administrationis die sœdus cum Rep. ictum in Ludovicum Sfortiam Mediolanensium Ducem publicaret : eo jure, quòd, defuncto Philippo Vicecomite, res Mediolanensis ad Valentiam , Joannis Galeatii Ducis filiam , sibi que aviam spectaret . Veneti ob Cremonam per eos dies furtim ereptam in societatem coivere his conditionibus , ut Rex, ejecto Sfortia , Mediolanensem obtineret principatum : Respubl. Cremonam, totamque Abduæ Glaream . Itaque Aubignio, Trivultioque ducibus Gallica tempestas in Alexandrinos primùm perstrepuisset ,
ac

ac uno velut impetu ex ejus nominis oppido, deinde ex reliqua Insubria Sfortianos depulit. Venetorum non minùs armorum fragor circa Cremonam intonuit tanto strepitu, ut è vestigio consternati cives, & circumjacentes incolæ pristino obsequio se addixerint. Ludovicus Sfortia tot malis undique circumdatus, frustrà & à Venetis, quos toties deceperat, injuriam deprecari, & litem de Mediolanensi ditione cum Gallo componere per conditionem annui tributi conatus est. Hinc periculi certus, consilii inops properè in Germaniam profugit, ut Maximilianum Augustum in Gallos concitaret, cùm in Venetos jam hostem Bajazethum, Turcarum Imperatorem, impia legatione quæsisset. Utrumque his persuasionibus ad bellum promovit, quòd nempe Galli, Venetique post subtractam, divisamque Italiam, illi Germaniam, isti Asiam evertere meditarentur. Hanc unam ob causam rediit in Græciam Turca, quem discordia Christianorum Principum, ac sæpiùs eorundem in Remp. florentem invidia concitavit. Quem igitur terra, marique militarem apparatus sub id tempus instruxerat Bajazethus, brevi omnem in Venetos ferebatur moturus, eo prætextu, quòd illi Principes Illyricos adversus Turcica arma defendere statuissent. Cùm autem in dies magis belli fama cre-
sceret,

seeret, missus est Andreas Zancanius, quī Bajazethi animum erga Remp. exploraret. Regressus orator hoc Barbari responsum attulit : illum pacta cum Venetis à Mehemeto fœdera non esse violaturum : sed quæ fides penes infidum, & barbarum hostem ? Ne itaque terrestre imperium, maritimamve oram præsiidiis vacuum inveniret hostis, omnia necessario firmantur milite ; & præter copias, quæ Forum julium servarent, instructissima CC. penè navium classis paratur, quæ, imperante Antonio Grimano, Turcicæ opponeretur. Hæc dum Venetiis expediuntur, Turcas extra suos fines exiisse, Jaderæ, Sicique agros populatos esse, ac abductis ex tota Dalmatia prædis, universam provinciam vastasse, nunciatum est : classemque Deuthe Præfecto in perniciem Reipub. Hellepontico mari egressam. Hac rerum fama satis clarè apparebat rupti fœderis indicium, illatumque prius, quàm indictum bellum. Quapropter jussus Antonius Grimanus, ut in hostem collectis undequaque viribus iret, acceptasque clades ulcisceretur. Sed in Peloponnesum navigans, Turcis obviam factus, incertum, cur superior viribus non conflixerit. Subinde opportuniorem alteram rei benè gerendæ occasionem declinavit apud Sporadas insulas, incautos dubio procul facilè oppressurus. Fatendum certè, cum Vene-

ti ducis inertia pugnasſe Bajazethi fortunam . Ægrè tamen ferentes tantam incuriam Albanus Armerius, & Andreas Lauretanus trierarchi, barbaros ſuis triremibus adorti, unam præcipuè navim immenſæ magnitudinis, ex qua mille Turcæ præliabantur, ſub ipſius Grimani conſpectum harpagonibus ita alligarunt, ut deſperati hoſtes, ne tandem in noſtrorum manus venirent, ultrò excitarent incendium, quo victi, victoresque ſimul concremati . Eo ſpectuculo alii perterriti nihil interim moliri auſi ſunt . Unus quoque Vincentius Polanus ſua navi in hoſtes delatus, plures eorum roſtratas tormentis attrivit, multosque è barbaris occidit, ac reverſus ad ſuos incolumis proprio experimento oſtendit, fortibus viris omnia cedere . Per hæc odio, & conviciis exponitur Grimanus, qui tandem certior factus, alia adventare ſibi auxilia, Zacynthum divertit, ut ibidem Rhodias naves in ſupplementum acciperet, auctuſque viribus cum Turca tutius conſligeret . Ille tum juxta Tornefium converſis in mare proris littori hærebat puppibus, veluti in tristem navalis prægnæ eventum, terra fugam cogitaret . Proceſſum eſt in certamen, & aliquandiu proſperè dimicatum : poſtremò continuante vel claſſarii ducis infortunio, vel navium præſectis minùs opportunè juſſa exequentibus, Turcæ metum diſcutiunt,

tiunt, & ulteriùs transgressas naves, reliquis auxilia remorantibus, facilè oppugnant, capiuntque, ac denique per apertum mare Naupactum versus dant vela: circa eam urbem jam antea constiterat Bajazethus pedestri robore, quæ, ut primùm cœpta est premi, nostræ classis desperans opem, deditionem facit. His omnibus cum ingenti mœrore auditis, Grimanus classis imperio privatur; venientique in patriam gravato vinculis causam dicere ob rem turpiter gestam injungitur, mox irrogatur exilium; cùm ea inter Melchiori Trivisano navalis administratio demandaretur, & Turca victorias cumularet victoriis, qui Naupacto adjecit in Epiro Dyrrachium, & insulam Cephalleniam. Noster tamen increvit metus, cùm recens nuntius afferret, hostes in Forum-julium, inde in Tarvisinum agrum populabundos irrupisse. Decem barbarorum millia altissimis superatis fluminibus in feracissimam regionem effusa, nullo resistente, luctuosissimè grassabantur: in victoriæ usum non ferro, non igni parcebant: plena tumultu vicina oppida, & urbes metuebant: hinc vidisses trepidantes ad incendiorum flammæ volare currus, qui infelicissimos incolas in tutum deveherent: tanta denique trepidatio non priùs sedata, quàm immanissimi Turcæ è provinciâ abiisse dicerentur: dispersi super Tilavem-

vempti ripas, captivorum, quos gravior ætas præpediebat, ad quatuor millia trucidarunt. Profectus hæc inter in Græciam Trivisanus, dum præclari alicujus facinoris famæ studet, vindicandæ scilicet ab hostibus Cephallenæ, sibi ex vano conatu interitum, & hosti parat commoditatem appellendi Methonem, quam per eos dies Bajazethus à terra obsederat. Audacter nihilominus, ac fortiter Methonæi Turcas non semel inter murorum ruinas repressere, unde in propugnantibus nata spes omnino fugandi hostis, etiam modico nostrorum auxilio. Tunc Trivisani locum ex turmarum consensu obtinebat Hieronymus Contarenus. Hic relicta Zacyntho, ut oppressis afferret opem, cum Turcica classe configit spectante Sphagia insula: & in hostilia rostra sine metu concurrit, & pro se, prospera flante fortuna, ab initio apparebat stare victoriam; sed orta extemplo (ut omnia barbaris favere crederes) maris tranquillitate, navium onerariarum usus illi eripitur, quæ mole sua stantes, quasi torpedine præpeditæ loco moveri nequiverunt: & ex his tota belli alea pendebat; quare qui antecesserant, diffusi, ob earum tarditatem, auxilio, remis insteterunt festinanter, ne præda essent hosti. Contarenus duabus ex infausta decertatione amissis navibus, alterum fortunæ momentum experturus, tribus rostratis hosticas

sticas impavidè prætervehitur, & Methonæis arma, commeatusque suppeditat. Verùm urbis interitus ab ipsa ope promanavit: oppidani enim, mœniumque quotquot erant propugnatores, ut citiùs inferrent necessaria, simul omnes ad portum cucurrere. Hostis interim opportunitate usus, scallas admovet, mœnia custodibus vacua ascendit, & in opidum diversis partibus irrumpit. Ita capta est Methone totius littoralis Peloponnesi munitissima arx, non virtute, sed casu, quoniam in fatis erat, ut superba, & contumax Græcia aliquando Barbaris deserviret, & cum religione mutaret imperium. Civium captivitate, rerum omnium direptione, Veneti præsidii cædè absterritos Coronæos, & circum sparsos populos spontè obtinuit Bajazethus. Nauplia non semel machinis ita concussa, ut de deditione cogitaret, sed Prætoris opera, ac vigilantia per eos dies fidem retinuit. At dum hostes libera populatione per Peloponnesum excurrerent, Benedictus Pisaurus, rerum maritimarum electus imperator Corcyram applicuit: & per Senatum missi Oratores, qui Christianos Principes de Turcicis victoriis admonerent. Hæc propter in Bajazetho metus suboritur: crevitque diversis rumoribus, fama que ex longinquo aucta, Hispanos, Gallos, atque Italos in communem hostem facta conspiratione validissimas parare classes: quamobrem in Thraciam suas

suas reduci jubet tùm pedestres , tùm maritimas vires . Pisaurus ex hac Turcarum trepidatione Ægium petit , interfectisque occulta machinatione præsidis , oppidum Reip. rursus addixit : Mitylenem , Tenedumque prædatus opulentissima spolia suis militibus distribuit : ulterius progressus extremum hostilis classis agmen , nondum Hellesponticas fauces ingressum cum clade excepit , turbavitque , plurimis interceptis navigiis hostium , quos ad unum resticulis suspendi jussit : deinde etiam Samothraciam , maris Ægei insulam in voluntariam deditionem recepit : direptaque Carysto Eubœæ multa dives præda Naupliam repetiit . Videbatur non alium coercendis tantis hostibus idoneum magis imperatorem hucusque elegisse Resp. quæ subinde auxiliari Hispanorum classe , ductore Confalvo , cui Magni cognomen militaris virtus attribuit , validiorem Turcæ , veluti torrenti omnia disjicienti , obicem posuit . Pisaurus recreatus recenti ope , Cephaleniæ oppugnationem decernit , pergensque sine mora in expeditionem Insulæ utrumque portum majoribus rostris obsidet : imperatoque militum descensu cuncta replet ruinis , volitantes hostium cuneos reprimat , atque tandem ita cum subsidiariis Hispanis se gessit , ut post præclara integri fermè triennii facinora Cephaleniam recuperarit . Plurimum in repellenda ab Insula

sula

fula Barbarorum colluvie Consalvi robur ;
 & ingenium profuit , quem postea Senatus
 Neapolim revertentē abundanti gratiarum ,
 ac munerum largitione honestavit . Solus
 deinde Pisaurus in bellum incubuit , qui
 monitus à speculatoribus , Turcicam classem
 in Ambracio sinu morari , ad illam oppu-
 gnandam festinavit , & selectioribus præ-
 missis navibus in pugnam traxit ; contra
 Turcæ non armis , sed arte rem gerere ma-
 lebant : at ille cognito astu , vehementiùs
 in obversas puppes insurrexit , & de ho-
 ste , non prælio magis , quàm suamet
 consternatione turbato victoriam repor-
 tavit : captæ undecim triremes , totidem
 submersæ , laceratæ plurimæ hanc victo-
 riam ad Prævesam , antiquis Nicopolim ,
 insigniter nobilitarunt . Cum his dedu-
 ctus Leucadiam dux Venetus totam in-
 sulam , in uno expugnato ejus nominis
 oppido , superavit . Utinam Galli , qui
 altero anno ex hybernis in auxilium
 venerant , eadem circa Mitylenem mo-
 liti essent . Sic Pisaurus , rerum gestarum
 fama , gloriaque notissimus , Bajazethi
 fregit audaciam , superbumque in hanc
 pacem deflexit , ut Cephalleniam Vene-
 tus haberet : ille Leucadiam reciperet ,
 arma terra , marique retraheret ; capta-
 que oppida cederent victoribus :

Bellum Faventinum .

MDIII.

MOrtuo Alexandro Sexto, cujus Pontificatus insignis Italiæ fuit ob gravissimos bellorum motus, omnis penè Æmilia, Flaminiaque illustres provinciæ, ejectis Cæsaris Borgiæ præsidis, & excussa tyrannide, aut in libertatem, aut in benigniorem administrationem transiere. Ariminum nomine Pandulphi Malatestæ Venetæ dominationi tradidit Galeottus Gualdus: quem virum & principis, urbem dedentis, affinitate, & vetusto generis splendore clarissimum eo publicæ munificentiae testimonio excepit, dimisitque Senatus, ut ad rei famam alia circum præstantiora oppida in ditionem ultrò venerint . Ipsa quoque Faventia, quamvis essent, qui illam Hectori Manfredio assererent, sanctum, & augustum Reip. imperium amplexata est. Ad urbem hanc recipiendam, tuendasque pro Veneto arces missi legati, non tamen recepti sunt, scissis in diversa civibus, ac patrocinantibus Manfredianæ factioni Florentinis, non aliam ob causam, nisi quia Veneti tanta potiti urbe, totam denique Flaminiam facile essent adepturi . Exinde cum Florentino, declarato hoste, sæpius commissa manus, editæ clades, & diù, multumque
circa

circa Faventiam elaboratum; postremò, impigrè administrantibus rem bellicam. Christophoro Mauro, & Nicolao Fuscarenno legatis, urbs subruta muralibus machinis, subterraneisque dolis eversa Senatui Veneto paruit, atque in certæ fidei, ac obsequiitestimonium oratores Augustino Barbado Principi destinavit. At quia nullum illustre facinus mutationis, aut livoris dentibus immune, æstuantibus invidia vicinis Principibus, sævaque ludente fortuna, non diu Resp. aut Faventiæ, aut aliarum in Flaminia urbium accessione gaudebat.

Bellum Austriacum tertium.

MDVII.

QUàm sanctè coluerint Veneti inita, cum Gallis fœdera satis constat, denegato pluries Maximiliano Cæsari transitu per Reipubl. fines: suspicati, ne, ficto Romam versùs itinere, Gallos Mediolanensi Principatu exturbaret, quia frequentiori, quàm par esset, milite iter suum instituebat. Hæc propter non semel Cæsareo legato responsum, Maximiliano non nisi cum iustis ad præsidium turmis liberam per Venetas ditiones fore viam. quamobrem minatus ille, sibi iter aperturum vi, ferroque, Vincetium Quirinum Oratorem ab se dimittit, infestisque armis attentat quod bellum

lum indixerat . Provocata accingitur ad
sui defensionem Resp. destinavitque in bel-
licam procurationem Andream Gritum, &
Georgium Cornelium, quorum alter in
Rhætos missus, alter in Carnos, ubi pri-
mum Germanici tumultus turbo auditus
est, deinde majori quàm alibi fragore in
Tridentinis faucibus . Terrestribus copiis
præficitur cum summo imperio Nicolaus
Ursinus Petiliani Comes . Hic Cæsareas
turmas per valles Athesis irrumpentes re-
pressit, expugnavitque Petrense munici-
pium . Subinde etiam Bartholomæus Li-
vianus vir fervidi, & audacis ingenii, qui
secundus ab Ursino militares obibat vices,
alteram Germanorum manum per nivosa
Carnorum jura ita repulit, cæciditque, ut
exinde ei facile contigerit Cadubrii mu-
nitissimi castri oppugnatio . Ad hæc il-
lato armorum metu complura nobilissi-
ma oppida in deditionem venere, & fu-
sus est hostis in Tarvisino agro . At quia
bellum non uno loco grassabatur, Livianus
superatis montium jugis, Tergestum
rebellem urbem obsedit : adjuvante mari
Hieronymo Contareno, ita pedestres co-
piæ ad aggressionem, irruptionemque
animatæ sunt, ut illam paucos intra dies
domitam, captamque Veneto juri reddi-
derint . Rebus tam præclare gestis illu-
strior factus Livianus æquali honore,
parique auctoritate jungitur Petiliano .
Inte-

Interim Cæsar, cui res parum prosperè successerat, rejectis incerti belli deliberationibus, cum Veneto per legatos de pace egit. Verùm Patribus placuit, procurante Zacharia Contareno, inducias in triennium pacisci. Postremò ad hunc, (quod nunquam antea auditum) virum privatum, peculiari legatione Joannem Raublerium destinavit Maximilianus, rogatum, ut quemadmodum paulò antea inter se, & Remp. induciarum auctor extitisset, ita & pacis foret. Tantam apud externos, summosque Principes existimationem sua virtute, integritate, ac prudentia sibi Contareno conciliaverat. Porro Ludovicus Gallorum Rex conqueri tum graviter cœpit, quòd nulla sui recordatione nostri cum Cæsare transgissent. Hæc una parvi momenti causa, quærenti novitates oblata est, ruptisque indignè fœderum, ac amicitiae vinculis, primò cum Rege Ferdinando in Liguria de invadenda Repub. Veneta consilia iniit: postremò sollicitatis reliquis Italiæ, ac fermè totiùs Europæ Principibus, Cameracensem illam conflavit tempestatem, quæ multos annos sub principatu Leonardi Lauretani suprema propè clade Venetam Rempub. anhelantem prostravit.

Fœdus Cameracense in Venetos.

MDVIII.

VEneta Resp. quæ propagatis longè ,
 latèque terra, marique imperii sui
 finibus, multis florebat opibus, auctorita-
 te, & fama, non tam finitimis populis, quàm
 etiam longinquis odio, & invidiæ fuit, præ-
 fertim per hæc tempora, ut Cameracensi
 fœdere omninò debilitanda crederetur, fu-
 turaque cæteris exemplo, humanam po-
 tentiam fatales habere limites. Verùm hæc
 religione, justitia, & moderatione firmata,
 quæque semper artibus pacis magis, quàm
 belli studuit, cum orbe est perennatura.
 Cameraci itaque, quod est in Belgis oppi-
 dum, contra Venetos percussum fœdus,
 quod primùm apud Savonam Ligurum
 Ludovicus XII. Gallorum Rex cum Fer-
 dinando Hispano contraxerat: adhæsere
 huic Julius Secundus Romanus Antistes,
 & ipse Maximilianus Cæsar; tantoque si-
 lentio societas hæc per legatos sancita dici-
 tur, ut cùm demùm ejus suspicio emana-
 ret, Venetiis nequaquam crederetur. Por-
 rò tam diræ conspirationis famam intrep-
 idè Resp. excepit: & quis crederet con-
 jurantibus in unum tot Regibus illam,
 propè parem extitisse? Sed adversus tot
 hostes, tantis florentes exercitibus, arma-
 vit, animavitque una ea cogitatione, non fo-

re

re diuturnam concordiam, quæ constaret dissimilibus animis, neque prolixum bellum, quod à multis, iisque variantibus inter se susciperetur, quando primos impetus vel propulsaret, vel parùm sustineret. Belli causæ hæ publicatæ. Singuli ex fœderatis repetebant urbes, & oppida, quæ tunc à Venetis aut jure belli, aut voluntaria populorum deditione legitimè possidebantur. Pontifex imputabat, quòd Ariminum, Faventiam, aliaque in Flaminia Romanæ Sedis castra occuparent: querebatur Maximilianus, se potissimum Verona, ac Patauio contra fas spoliatum: ægrè ferebat Gallus Cremonam Mediolano detractam: Hispanus haud integrum sibi contigisse Neapolitanum regnum, cui deessent maritimæ aliquot urbes ab Aragoniis Veneto oppignoratæ. Cameracensi quoque vinculo devinciebantur Ferrariensium, & Mantuanorum Principes, ut & hi suis ditionibus redderent, quæ oppida in Mantuano, Ferrariensique agro tenebat Respub. Dux etiam Allobrogum ob Cyprium regnum conjuraverat, nec non Britanniarum, & Pannoniæ Reges, ut nullus propemodum in Europa extaret, qui contra Venetos non sentiret. Turca solus repertus, ad notandam cæterorum perfidiam, & dedecus, qui memor datæ pacis non modò servaret fidem, sed etiam indignè oppressis auxilia offerret.

Verùm, ut Christianam decebat Remp. ea fuerunt rejecta; victoria enim maximè sperabatur à Divino numine, violatorum fœderum ultore certissimo.

*Bellum cum fœderatis hostibus ad
Caravagium.*

MDIX.

L Udovico Gallorum Regi prima inchoandi, peregendique belli alea obtigit. Illud superbè, ac minaciter denuntianti hoc Venetorum fuit responsum: Non adèd humilem rem Venetam, ut suis hostibus per summam licentiam despectui, & prædæ futura sit: adesse arma, & dextras, animosque: neque virtutem, & fortunam justis, neque Deum ultorem. fœdifragis defuturum. Subinde festinato militum delectu, brevi enumerata sunt in castris XXX. peditum, equitum VII. millia; tantisque copiis præfecti Nicolaus Ursinus Petilianus comes, & Bartholomæus Livianus, viri ambo militari experimento celebres: datique sunt procurationi bellicæ legati Andreas Gritus, & Georgius Cornelius. Hæc inter Galli, superatis Alpibus, cœpere omnia infesta reddere, Carolo Ambosio duce: hostium irruptionibus levissimis quidem, pugnis reluctati sunt Veneti: at denique gliscente bello, multa clade, & oppi-

do

dorum direptionibus certatum. Gallus Trivilium secus Abduam occupat: Franciscus Urbinatium Dux Pontifici, cui militabat: Ariminum, & Faventiam conatur vi asserere: Gonzagianæ turmæ Casale in Padana ripa castrum recipiunt: atque ita pluribus in locis oppugnatur res Veneta. Cæterum recuperandi, si quæ amisissent, spes omnis erat Patribus in eo florentissimo collocata exercitu, qui in Abduana Glarea contra Gallos stabat. Et cum hostium numerus, ipso adventante Rege, augeretur, cui erant in armis XXXX. hominum millia equestris ferè ordinis, accessere terrestribus nostris maritimæ etiam vires, plurimis comparatis navigiis, quorum alia adverso Pado deduceret Sebastianus Maurus: alia deduceret in Benacum Zacharias Lauretanus. Interea ultra Abduam arma transferenda clamabat Livianus, ut regii exercitus transitu prohiberentur: atque ob id susceptam Trivilii oppugnationem peregit egregiè, recepitque Asulam ingenti Mantuanorum cæde, & captivitate, ne post se hostile aliquid relinqueret: cæterum hinc tanta intervenit mora, ut tandem ipse frustraretur, quominus Gallos à flumine arceret. Transitionis fama admonuit Livianum, prætergressos hostes illicò invadendos esse, & eò promptius, quò lætiores redditi nostri ex primis successibus,

bus, non tam sibi ominabantur Reip. tutelam, quàm securitatem Italicæ libertatis. Constat ex alacritate Veneti exercitus trepidasse Ludovicum, & relicto bello voluisse iterum pacisci fœdera: sed erant, quæ Venetus lueret. Rex suorum animo in paratam expeditionem excitatus, quas præmiserat Helvetiorum phalanges, tranato Abdua, sequitur. Livianus dum repellendi hostis consilium rejicit in alteram diem, tam densa caligo campis incubuit, ut ne cæcus in temeritatem rueret, à proposito abstinuerit. Subinde ratus, Gallorum machinamenta adversus Cremonam diligenti celeritate posse anteverti, invadenda eorum castra, aut in illos aperto Marte procurrendum censebat. Secus Petilianus, qui mora frangi Gallicum robur; nihilque in re bellica cunctatione melius, nihil audacia deterius. Hæc Ducum disceptatio, aut æmula orta prius simultas Rempub. in perniciem trahebat. Nihilominus pugnae avidus Livianus cum suis certamen aggreditur, primoque ipso conflictu viro audaci arridere visa est fortuna; quippe victor, turbatis, quæ anteibant, Gallorum aciebus, ad ipsa usque Regis castra penetravit: postea illa suo more instabilis falso evulgat per infidos Veneti equitatus ductores penè fusas, profligatasque esse pedestres copias. Ea credita fama Gallos confir-

firmavit, & Petilianum subsidio retinuit. Quapropter urgere hostes, & nostros loco exturbare cœperunt, versosque in fugam palantes, atque dispersos occidere, aut rapere captivos, inter quos ipse Livianus, amisso ex vulnere altero oculo. Hac funestissima clade desiderati optimi quique duces, cæsa militum X. millia, vastata castra, direpta impedimenta, illustratusque Gallorum victoria Aignadelli apud Caravagium vicus ignobilis. Fuit ea nostrorum veluti suprema calamitas, vulgò ad Gieradaddam dicta, modico Gallici sanguinis impendio: unde meritò dici potest, nobis inauspicatiùs Abduam fluxisse, quàm Romanis quondam Alliam: non ita tamen Venetias allatus cladis nuntius perterruit Senatum, ut animum abjiceret. Decrevit itaque extemplò legatos Christophorum Maurum, & Petrum Duodum, qui Brixiam, Veronamque adproperarent, vagos milites colligerent, recentesque conscriberent largo stipendio. Et quoniam magis in justo bello fortunæ vices pensandæ, cùm ea haud in optimis consistens, ad pejora sine judicio deflectat, datæ sunt publico nomine litteræ ad Dominicum Grimanum, & Marcum Cornelium Cardinales, ut Julium Pontificem conciliarent Reipub. atque ut inde Flaminiae oppida reciperet: ab urbe etiam discessit Antonius Justinianus ad Cæsarem

legatus, ut pacem impetraret, restituto Tergesto. At quia omne tùm cum Romano præside, qui nuper Venetos sacris excluſerat; tùm cum Augusto, qui Forum-julium, & Hiſtriam vexabat, irritum fuit obſequium, creditum eſt, non fuiſſe ſuperis curæ ſecuritatem Venetam: Cùm interim continentis urbes adventantis cum terrore hoſtis impetum, aut ipſam urgentem famem haud ſuſtinere poſſe viderentur, prudentiſſimo Senatus decreto, omnes à præſtito jam fidei juramento liberantur: atque ita temporis momento terreſtri imperio diſceſſit, quod majorum providentia integro ſæculo maximis artibus, domi, bellicę adminiſtrata Rep. civitati omnium nobiliſſimæ adjecerat. Utinum tamen in Foro-julio: & in hac noſtra provincia Tarviſium, plebejo ſtudio animatum, Venetam fortunam ſequi voluit: cùm ejus libertas extremum penè ſpiritum traheret.

*Patavium, receptum à Venetis, fruſtrà
à confœderatis oppugnatur.*

MDIX.

Venetus, qui non ita pridem de imperio, & ſalute publica deſperare viſus eſt, oblata rei benè gerendæ oportunitate, Patavium recuperat. Cùm enim pro explorato habuiſſet Andreas Gritus, Germanos, quibus ſe tradiderant

Pa-

Patavini, torpori, ac vino deditos minùs cautè tueri urbem, delecta equitum, pedumque turma, noctu Tarvisio egreditur, confectoque per tenebras itinere haud procul consistit in insidiis. Actum paulò antea erat cum agrestibus, quorum studium singulare erga Venetos, ut portæ urbis, quæ Cauda-longa dicitur, pons obverso de industria fœni plauastro impediretur: itaque patrati astus opportunè monitus Gritus è latebris celeriter adeò, ac inopinanter, occupata porta, irrumpit, ut in foro priùs Veneta signa conspecta sint, quàm ullus hostium præsenferit: non in alios sævitum, nisi in cives, qui alteram defectionis suspicionem de se fecerant: arx insequenti die recipitur, eam dedente Cæsaris præfecto Leonardo Trissino: ad Patavii recepti rumorem plurima circum municipia Venetæ dominationi ultrò adhæserunt: jamque satis persuasum erat, fortunam hanc primam præ pudore languentis clarissimæ Reipub. viam ad pristinum assequendum imperium aperuisse; cùm etiam Serravalium, Lemniacum ad Athesim, aliæque præclara oppida reciperentur, pulsus inde Germanis, fusoque Atestinorum equitatu. Sub hæc Pontifex morari nostrorum victorias fucato pacis titulo excogitavit: nempe ab se inter Cæsarem, Venetosque compositum, ut hi, restitutis recenter occupatis oppidis, Tarvisium, & Forum-

M 5 Ju-

julium libero jure possiderent. Interim Senatus has condiciones examinanti nuntius è Pannonia retulit, Romanum Præsulem, & Galliæ Regem summè eniti, ut Pannoniæ districtis nunc in Remp. armis, opportunè suo regno redderet ademptas sibi urbes in Histris, & in Illyrio: attamen nihil illum moturum, redolentibus perfidiam postulatis. Exinde omnis Patrum cura in communiendo Patavio locata est, mandatumque Petiliano, ut cum selectiori exercitus parte eandem in urbem rediret, ad cujus expugnationem propediem venturus erat Maximilianus. Hæc inter ingruentes in provinciam Germani, fugatis ex Alpium arcibus præsiidiis, direptis, incensisque Carnio, ac Feltrio agro, Tarvisinum populabundi sua multitudine operiunt. Christophorus Maurus primam hostium irruptionem parumper sustinuit. Interim Franciscus Gonzaga Mantuanorum Dux, Verona ad Cæsareana castra iturus apud insulam Scaligeram opprimitur: extractusque è latebra, agrestî exploratione, Venetias captivus deducitur. Sed Maximiliano Patavium obsessuro jam quoque accesserant Pontificis, Galli, Hispanique Regum auxilia: jam Alphonsus Ferrariensium Princeps, multis nominibus Reipubl. infensus, majora tormenta, & innumerabiles penè machinas ad belli usum suppeditaverat. Quoniam verò

consta-

constabat, urbem facile capi posse, si ea fluminis pars, quæ Patavium influit prope Liminis arcem, in alteram derivaretur; capta arce, abscissionem, deductionemque inchoant Germani milites, summo quidem labore: idem opus in Bacchilionis alveis commissum, ne quis illorum amnium aquæ obsessis esset usus. Hostes tamen ab incæpto desistere coacti sunt, acriter à nostris, frequentissimè erumpentibus, divexati. Nihilominus expugnato Ateste, in Montem-silicem per saltus, crepidinesque irrepserunt Hispanorum virtute, quæ docuit, nullum oppidum, vel natura munitissimum; capi non posse. Visus est denique propior ad urbis mœnia stare Cæsar, & eò iratior; quod per id tempus Belunum, Feltria, & in Noricis præstantiores aliæ munitiones, Hieronymi Savorgnani robore, Venetis essent restitutæ; suoque in exercitu octoginta mortalium millia censâ dicuntur. Tantis viribus oppugnandum erat Patavium adversus Venetos, qui pro tutela suis in stationibus equitum tria, peditem millia XV. adnumerabant, præter primarios ex patricio ordine adolescentes ferè ducentos, singulari in Rempub. charitatis exemplo. His potissimum data cura præcipuis in locis vigilandi, ne qua dolosa hostium fieret irruptio: propterea & Venetias evocati suspectæ fidei cives, iussique non recedere durante bello. Sub-

inde Patavium ex ea parte, quæ Septentrionem respicit, ubi quondam Helenæ fanum urgeri, & concuti cœptum est, jamque muri ad tormentorum jactus corruerant, & per aperta mœnia Germanus miles ingressus esset, nisi Petilianus supremo virtutis bellicæ opere militarem excitasset aggerem per totum ferè urbis ambitum, quàm modò viderentur hostes facturi impetum, adjecta extrinsecus profundæ altitudinis fossa. Extructæ molis propugnatio uni præ cæteris viro armis præclaro Citolo Perusino demandata est. Illam Galli, Germanique Cæsaris pollicitationibus animati junctis viribus demoliri aggrediuntur: sed cum irritò conatu opus tentassent, turpissimè deturbantur. Hispanis igitur eadem aggeris expugnatio committitur, quorum audaciam, impetumque dum Citolus eludere meditatur, disposita in vallo idonea igni, fumoque excitando materia, intra munitiones selectiores milites, quasi in insidiis, collocavit. Hispani interea continuatis probris, & ad felium venationem jocis militaribus irritati non magis, quàm Augusti præsentia incensi, aggerem, turres, murumque ea alacritate, fortitudine, odioque superant, ut duobus ibidem fixis vexillis, spem certam in oppidum irrumpendi facerent: at ubi sat hostium iræ, vindictæque explendæ in muro, & in ipso vallo consistere

flere Citolus conspexisset, occultum succendit ignem, & fumum maximum excitat, cujus vi, & fædo nidore miseri consternati, excæcatique non ordines, non ducum imperia observare potuerunt. Exiere confestim cæteri è latebris, advolavitque Petilianus, & in quos flamma, vaporque non lævierat, ferrum distrinxerunt. Miseranda continuò strages, & effusa ubique trepidatio exoritur, qua usus Ludovicus Malvetius urbe egreditur, & pervadens Cæsareana castra reluctantium cæde, hostilia configit tormenta, revehitque in tutum stipendia, quæ Patavium mittebantur, decepta Hispanorum phalange, in contrariam curam excubante. Nulla posthac dies præteribat, qua nostri frequentissimis insultibus non fatigarent obsidentes, & non nisi victores, multaque onusti præda reverterentur. Hi rerum eventus palàm demonstrabant, Cæsarem deinceps ea in oppugnatione nihil aut armis, aut dolis profecturum: propterea vir, alioqui bellicosus, & in dubiis ausibus plerumque pertinax, postquam Hispanos à nostris repulso vidit, & inexpectata abruptos clade, ab ultima certaminis alea temperandum sibi duxit. Quadragesimo itaque obsidionis die, Octobribus Calendis, sublati castris Meduacum trajecit, & per Vicentinos re infecta raptim, exemplo improsperi successus, Alpes transmisit.

Vicentia Recepta.

MDIX.

R Egreſſo in Germaniam Maximiliano, quæ fiducia ſucceverat in Venetis, brevi ſe priſtinæ dignitati reſtituendi, dies aliquot elanguit Petiliani interitu : confectus curis, vigiliis, ætate. Vir ſpectata militia clarus, magno, ac publico Senatus mœrore, occubuit. Quamobrem Andreas Gritus bellica conſtantia, ac diſciplina haud impar jubetur exercitibus præeſſe. Hic animoſè ſibi fidens, veluti omnes interceptas urbes certò recuperaturus, per magnos imbres, difficiliaque itinera Vicentiam ſigna primò intulit, atque ex inopinato irruptionem parat. Dionyſius Naldus primipilus mœnia conſcendit, & penetrare in urbem potuit, repulſo impigrè Gaſpare Severinate, Cæſareanorum præfecto; exinde reliquæ hoſtes pacti ſunt deditiõem, qua liberi, & immunes à cæde recederent. Et quia proxima quæque victoria inſtrumentum ſequentis eſſe debebat, Veronam ſubito mota ſunt caſtra, ut urbs celeritate magis, quàm contentione caperetur. Præmiſſo equitatu cœpere nutare oppida, & quædam Veneto duci ſe tradidere, hoſtilium præſidiorum interneciõem. Interea noſtri obequitando, provocandoque

que sæpiùs cum exeuntibus Germanis velitarunt; sed cum à transfugis, captivisque relatum esset, urbem magnis teneri præfidiis, maluit Grîtus suos tutos in Patavinos reducere, quàm viribus dispares certo destinare periculo. In reditu Montanianum vi obtinet, ultrò in fidem recipit Ateste, aliaque castra, exturbato hoste, qui ea pro Cæsare tutabatur. Sub hæc etiam affertur, Aloysium Delphinum, in Foro-julio legatum, robustam Germanorum alam, in Liburnia grassantem, compressisse, & ab Angelo Trivisano Flumen, in Histris municipium, igne consumptum, quoniam incolæ Reip. insignia lacerassent.

Bellum tertium Ferrariense.

MDIX.

ALphonfus Ferrariensium Dux, qui unà cum aliis in Venetæ Reipublicæ damna conjuraverat, cæterosque commeatu, armis, reque omni bellica adjuverat, quo potissimum tempore Patavium obsidebatur, Patres illatæ injuriæ vindices habuit: hi, quod perstreperante eo bello distulerant, nunc persequi voluere, ulturi hostem eò magis infestum, quò reliquis vicinior esset. Classem itaque viginti rostratarum, plurimarumque biremium Angelus Trivisa-

Trivisanus ex Senatus decreto in Padum tra-
duxit, subitamque hostilis agri direptionem
impetravit. Alphonsus auxiliaribus copiis
succinctus, populantem Venetum aliquan-
diù cohibuit, duasque triremium ignitis
machinis laceravit. Ea propter Classarius
Præfectus, reducto navali apparatu ad
Pilofellam, firmum ibidem propugnacu-
lum erexit, ac ita insequentem moratur
hostem. Tutius nostri rem gerebant ab
altiore aggere, & ausum quandoque subi-
re Alphonsum intra suas stationes cum
clade sæpiùs repellebant. Hæc agebantur,
cùm expeditæ equitum turmæ in auxilium
classis venire, quas Trivisanus transverfis
triemibus, veluti factò ponte in hostilem
agrum trajecit: omnis illicò circum regio
miserrimè vastata, adeò flammis, ac mi-
litari licentia ubique debacchatum, ut Se-
natui necesse fuerit suis imperare, absti-
nerent à vastatione, & incendiis. Sed ho-
rum egregius ultor extitit Hippolytus
Cardinalis, Alphonsi frater, dum insue-
tum facinus felici ingenio peregit. Perfo-
rato siquidem perpetuo Padi aggere, ma-
jora tormenta in singulis foraminibus eo
modo disposuit, ut à nostris haud observa-
ta certo classis detrimento statuto tempore
fulminarent: Dolo ipsa quoque fortuna
favet, cùm repentino imbre auctus amnis
summas planè ripas adæquaret, suoque
incremento Venetas triemes ita evehe-
ret,

ret , ut commodè machinarum pilis objicerentur . Noctu ergo , nihilque tale suspicante Trivisano , repentinis , ac frequentissimis ictibus concutitur classis , tota verberata , infandaque strage dissipatur . Ille inopinato casu perterritus , ægrè ab inter necione se subtraxit , vixque integro navigio Venetias delatus est ; ac Atestini Duces quindecim triremes , demersis reliquis , atque omnia classica instrumenta , Ferrariam justo cum triumpho abduxerunt . Hæc ruina non parùm turbavit Remp . Angelus Trivisanus à toto procul dominio relegatur , quia præcipuè tumentis fluminis aggeres non abscidisset , certa illuvione castra , hostiliaque machinamenta obruturus .

Promiscui Bellorum successus.
MDIX.

ALternabat fortuna res Venetas modò prosperis , modò adversis successibus . Ob inflictam in Pado cladem animosiores , qui Veronæ præsidio erant hostes , urbe sese effundunt , & nonnullas nostrorum cohortes ad pagum Martinianum malè excipiunt , latèque circum agros , vicosque populantur , quia concessa illis præda pro stipendio erat : atque ob hanc causam concubia quandoque nocte per oppidi plateas , viasque
de

decurrentes Reip. nomen collaudabant ;
conclamabantque, Venetos intra mœnia
esse, ut erga illos civium voluntatem hac
fraude noscerent : quare cùm iis acclama-
tionibus hilariter à plurimis responderetur,
pertæsis barbaræ gentis imperium,
singulas eorum domos, è quibus credulæ
voces emittebantur per tenebras obsignan-
tes oborto sole ad unam hostiliter exau-
riebant. Adrienses sollicitati ab Alphon-
so, ut in sui obsequium redirent, Vene-
to auxilio hosti strenuè resistere, quem
in fugam actum Joan. Paulus Gradonicus
non tam astu, quàm virtute profligavit.
Inito enim à nostris ex industria tumultu
magis, quàm prælio, compositaque fuga
universæ hostiles acies suis è munitionibus
profiliere : has demùm Venetus ductor
non dolo, sed apertâ vi debellare vo-
luit. Proprio igitur exemplo suos ad
pugnam hortatus, omnium primus in-
eas impetum fecit, atque ita se gessit,
ut ex æquo Padanam cladem repende-
ret. Auxit mirum in modum victoriæ
gloriam captivorum numerus, præda
ingens facta, & obtentæ munitiones.
Sub id tempus Veronæ occupandæ spem
dedere cives, qui non amplius externo-
rum injurias ferre poterant : cùm itaque
oppidanorum studium in Venetos con-
versum esset, hi nocturna metatione
prope urbem insidunt cum ea exercitus
par-

parte, quam non multitudo, sed virtus commendaret: interim moniti de vigiliarum obtruncatione, tacito agmine pergunt ad facinus, quod scalis erat perficiendum, quæ ut muri altitudine breviores repertæ sunt, alteram alteri jungendam dum curant, ex temerè percepto strepitu, veriti se detectos ab hostibus, in castra rediere inglorii, & laudabili incœpto frustrati. Patefacta audacia majoris curæ admonuit præsidarios, cæterosque milites, qui subinde aucti viribus Lemniaci oppugnationi se accingunt. Gritus tantæ arcis tutelam Vanissæ Dalmatæ commiserat. Is hosti antequam accederet, obuius, tam acriter reluctatus est, ut nullo è suis desiderio, integram Gallorum cohortem deleverit. Per eos quoque dies Alphonfus libero transitu in Rhodiginos parato, occisis fluminum custodiis, alteram sui exercitus partem ad agrorum ruinas, alteram ad urbis excidium destinat. Viso hoste Venetus Prætor sibi timens, quia inferior viribus, tuto potiùs, quàm decora consilio Rhodigium deserit. Inde cum Patavio novum immineret periculum, Grito Senatus mandat, inter eandem urbem, & Vicentiam castra poneret, ut pro opportunitate utrique datis auxiliis prospiceretur. Etiam Francisco Polano, Histriæ Præfecto imperat, ne suis navibus Clodiæ deesset, in quam

motu-

moturum apparebat Atestinum ex incenso Laureti pago . Hac veluti Venetorum trepidatione Galli omnia audentes , in Vicentinum agrum excurrunt , ac liberè tandem ubique grassantur , Veneto præ metu cis Meduacum regresso . Vicentini , auxilio destituti cùm auro empta corporum incolumitate se Gallis dedissent , paulò post ab Germanis violata fide pessimè excepti sunt : expilatæ namque sunt domus , in captivitatem ducti cives , & qui in proximas cavernas , antraque se abdiderant , canum sagacitate conquisiti , flammarum , fumique vapore barbarum in morem necati . Post captam Vicentiam , subactaque in confinio castella , incitante Alphonsio , Galli Montem-filicem expugnant . Prosperè per Venetos alibi pugnatur . Fori-julii Præfectus Aloysius Delphinus è Gradiscano præsidio cum expeditioribus egressus plures Cæsareanorum manus , subiectam planitiem more latronum infestantes , oppressit , auxiliaresque copias , quæ vindictæ avidæ accurrebant , celerrimè tranato Sontio tanto tempore remoratus est , ut sui , numero impares , intra munitiones integri recipi potuerint . In Patavinis quoque plerumque fortunato eventu conferta manus ; non continuè tamen , neque junctim , sed prout hostes laceſcebant . Tandem Galli rursus , ductore Carolo Ambosio , Lemniacum adoriuntur , ponte
Athesi

Athesi superstructo. Huic expeditioni Alphonfus interfuit, cujus ope, productis Ferraria æneis tormentis, tanta vi quassati sunt muri, totque in partes disjecti, ut præfidiarii, animos ob terrorem despondentes, se cum oppido, & arce victoris arbitrio permiserint. Post hæc in muniendo Patavio omnis Senatus cura, suspicantis iterum illud obsidione tentandum. Tarvisium quoque ad belli subsidium necessaria comportantur. At cum diù dubitatum esset, quò se potissimum verterent hostiles acies, quæ tum XII. armatorum millibus constabant, tandem in Montem-silicem grassantur, à nostris paulò pridem receptum. Universis hinc inde viribus eam arcem obsepiunt, ac post varios insultus occupant, diripiuntque. Prædantibus cessit Sebastianus Naugerus Prætor, quem dum Hispani suum esse captivum asserunt, Germani eundem sibi deberi, miserrima præda inter rixantium manus laceratur, voveturque flammis oppidum, & castra, quæ essent Atestinorum conditionis, Alphonso restituantur. Hæc non procul Patavio improsperè gesta: intra alpes felicius. Aloysii Mocenici obstinata vis Bellunum expugnat. Non multò post reddita huic provinciæ fortuna, visa est per tot vicissitudines constantiori animo, vultuque rei Venetæ con-

consulere. Vicentia imminuto Germanorum præsidio rursus Reip. obsequium præbet, nec secus omnia ferme Patavini agri municipia ejusdem leges, & gubernacula amplexantur.

Fœdus cum Julio Secundo Pontifice.
MDX.

Post receptas Flaminiae urbes Julius Pontifex non nihil de odio in Venetos remisisse videbatur, haud ignarus, quodnam tenderent externa arma, & cum primis Gallorum, qui amœnissimam hanc provinciam occupare nitebantur. Hinc prudentissimum Leonardi Lauretani Principis consilium, ut de Romano Antistite Venetæ Reipubl. conciliando quamprimùm cogitaretur. Confestim itaque Hieronymo Donato Oratori injunctum, ut Julii animum omni obsequii genere placare conaretur, ageretque, ut contractis fœderibus, conjunctisque armis Italicæ prospiceret libertati. Pontifex generosum hunc, & pium Reipub. animum libentissimè amplexatus est, & interposita fœderum sanctitate cum illa in gratiam, amicitiamque rediit, indicto quoque Ferrariensibus bello, si deinceps rem Venetam infestassent. Novæ hujus reconciliationis, societatisque famam ægrè ferentes reliqui fœderati Principes, arctius ob

ob id sese uniunt , & se Pontificis quoque
hostes declarant , atque omnium primus
Rex Galliæ cū Atestinos defendendos
fisciperet. Quamobrem Julius , & Veneti
bellum aduersus Gallos præcipuè , & Fer-
rarienses gesturi , X. Helvetiorum millia
socio in castra traduxerunt . Gens hæc ,
inter ferrum , & arma nata , invictissima
semper est habita , & iis , quorum fides ,
ac promptis stipendiis militat , persæpè im-
pendio sui sanguinis insignes victorias pe-
perit .

Irrita Verona oppugnatio.
MDX.

AD primas Helvetiorum irruptiones
hostilia arma cœpere imminui , ac
separari , ut quisque propriæ occurreret
necessitati . Cū autem frangi faciliè possit
quidquid diuulsū est , jam vicisse sibi vi-
debatur Resp. cū in partes hostem dire-
misset . Ut igitur fama increbuit , Gallos
secus Abduam ab Helvetiis esse fufos , An-
dreas Gritus legatus cum Lucio Malvetio
exercitus imperatore certa spe debellandi
fugientes Gallos erectus , ad Larium la-
cum movit , prudenti sanè consilio , ut il-
los inclusos commodiùs opprimeret . At-
que utinam pari mente pugnassent , accensis
cum primis peditum animis , & rem inte-
grò prælio decernere cupientibus . At sibi
tunc

tunc minus decorè temperarunt Veneti ducēs, quando, quos in fugam datos à fronte adoriri debebant, à tergo persequi maluerunt, atque etiam ita cunctanter, ut dispersi antea in unum postea coirent, & Veronam sine metu se reciperent. Malvetius præ pudore irarum plenus in Veronensium mœnia conversus, sic ea muralibus machinis concutit, ut brevi introeundi viam sterneret militibus, ad omnia impigris. Quoniam verò fortuna ad primum conspectum parùm nota, sæpè non reditura præterfluit, frustra bellica instrumenta admota sunt, vanique omnes conatus fuerunt cum insigni nostrorum jactura, dum cadit Citolus Perusinus, vir militia incomparabilis, qui ad repentinam hostium impressionem sustinendam ne sui cæderentur, solus accurrerat. Allatus deinde rumor, adesse Gallos, qui sua multitudine obsidentes appeterent, Malvetium in stationes Martiniani vici reduxit, indignante milite, qui certam potiundi oppidi spem suo vigore, & alacritate conceperat; sic quandoque imperatoris vigilantia in militis strenuitate desideratur, cùm aliquando fortuna ducum tarditate neglecta effugiat, ubi sequentes non videat.

Bellum quartum Ferrariense .
MDX.

ICto jam fœdere cum Julio Pontifice, Venetam classẽ in Ligusticum mare duxit Hieronymus Contarenus , ut Gallos Genua expelleret , quod summè erat in votis Romano Antistiti : in Alphonsum , diris devotum , traduxit per Padum navigia Joannes Maurus , editumque publicè est , ut cuilibet in hostili solo prædari liceret , quare ducentæ , & ampliùs privatorum naviculæ repertæ , quæ Atestinorum res majorem in modum affligerent . Ad hæc Pontificiæ copiæ oppugnationibus cuncta penè continentis oppida , Veneti classarii omnia secus Padum , ac præsertim Rhodigium , occuparunt . Non eadem tamen maritimo prælio felicitas . Genua enim hostium oppugnationibus strenuè restitit , licet eam vir infracti animi Julius semel & iterum , terra , marique aggressus esset . Cæterum Alphonſus , adjuvante Gallo , incendit naves , quæ Padi custodiæ à Mauro datæ erant , per campeſtria diffusus unà cum sociis , effusi amnis instar , singula sibi obvia prosternit , Occurrens Andreas Gritus , ut obicem poneret , nutantia primùm castra confirmat , mox hostibus circa Athesim , ru-

N pto

pto ponte, ne fugerent, in certamen vocatis, magnam eorum partem cecidit. Sed, ut Alphonfus majores illatæ injuriæ pœnas daret, Patres gravissimi belli molem transmittunt in Franciscum Gonzagam, quem, Julio Pontifice deprecante, captivitate liberaverant: & Mauro injungunt, classem rursus conscendere. Hic nulla mora Padi ostium Vatreum appellatum, ingreditur, & solo adventus sui nomine fugavit hostiles biremes, quæ piratico more crebrò illac navigantibus insultabant: eo quoque tempore Gritus unà cum Paulo Capellio equitum ductore Rhodiginos fines denuò percurrrens, hostium expugnat munimenta, incolas redigit in potestatem, Ferrariamque præ metu non parùm consternat. Verùm hæc urbs timore demùm liberata est, cùm Venetus Bononiam pergere jussus, ad famam Gallicæ expeditionis in Pontificios, quæ Bentivolis illud oppidum asserendum ferebatur. Ob id etiam Grito imperata, nova militum conscriptio, datæque litteræ ad Gonzagam, ut muneri suo non ampliùs deesset. Is Mantuæ detinebatur quibusdam veluti præstigiis uxoris, quæ non tam maritum retrahere, ne adversus fratrem Alphonsum militaret, quàm, ut Capellio, Padum transeunti, armis reluctaretur, conata est. Interim Galli, réceptis, nostrorum absentia,

in

in Ferrariensi agro municipiis, in Bononiensem postremò latè ruunt. Hinc Julius in primis studens, ne Bononia cederet Bentivolis, quibus major civium pars, præsentē Gallo, favebat, Venetos moræ incusat, sed tandem Capellii adventu recreatus, viribusque auctus, hostium conatus infringit, & urbem retinet in obsequio. Post hæc conversis Mutinam signis eò oppido, Rhegioque Lepidi Alphonsum spoliatur, Gallis non una arce exturbatis. Cæterum præclarissime enituit Capellii virtus in Mirandulæ expugnatione, quam ipse Pontifex sua præsentia, atque constantia illustravit. Ob captam munitissimam arcem nostri, ac Pontificii milites concepto belli ardore se majoribus victoriis accingunt, & rursus in Ferrarienses ruunt, cunctaque luctuosis direptionibus complent, non tam è continenti, quàm à flumine, reversa in Padum classe, quam denique multa divitem præda Maurus ad Fluvii ostia Volane, & Primarium revexit, cum frustra hostes in perforatis Padi aggeribus tormenta iterum disposuissent, recenti memoria decepti aliàs ea fraude ductoris Veneti. Sub id tempus Andreas Gritus hostiles munitiones circa Lemniacam arcem invadit. Hæc in vicina provincia. Cum ea inter in Æmia Bentivoli Penoniam occupassent, nuntius Patres admonuit, copias

intra oppidorum propugnacula redigendas esse, ne victor, & superbus hostis, qui ubique ferebatur cum impetu, illas in campistris morantes, parùmque munitis in stationibus lacefferet.

Bellum in Foro-julio, & Histria.

MDX.

Bellum adversus Ferrariensium Ducem obstinatione, & odiis adhuc invalescebat, cum Veneta arma alibi etiam contra fœderatos distringerentur. Joannes Delphinus Feltriæ Præfectus, contracta indigenarum manu, Cæsarianos aliquot pagos prædis mulctavit, factisque per Tesinos agros populationibus, vix rapinis sufficere diripientium manus: ita ex æquo vindicavit, quæ damna prius Germani illi populo intulerant; congressusque cum spoliis, reposcentibus, omnes in fugam versos, ac intra specum, cui Covoii nomen est, actos compulit in deditionem. Postea ab Alpibus in Forum-julium terror hostium illatus, nulloque resistente, totam fermè eam provinciam ingruentibus patefecit. Utini Præses Aloysius Gradonicus ad famam vicini hostis præsidium sibi in fuga comparat, deserto oppido. Eo potiti Cæsariani Foro-juliensem Patriam circumeundo rapinis, & incendiis cætera castra, hominibus præ timore

timore vacua usque ad Liventiam amnem
 facilè consequuntur . Verùm neque ullum
 extitit fugæ solatium indigenis : nam qui
 in propinquas Tarvisinorum collium silvas
 profugerant, ab Gallis ex altera parte, de
 industria eos quæritantibus, aut cæsi, aut
 in captivitatem abducti sunt . Subinde
 Patres ad nuntium subacti Sacilii Carnici
 auxere milite Gradiscarum præsidium :
 at ubi semel pavor timidorum animos in-
 vadit, irrita cedit omnis diligentia . Vix
 hostes ejus oppidi mœnibus insultarunt, cum
 illicò in eorum deditionem venit . Oso-
 pium, castrum in monte situm, diù fru-
 strà, & blanditiis, & minis tentatum, uni-
 cum in Foro-julio mansit Reip. Illi præerat
 Hieronymus Savorgnanus, fide erga
 Venetos singulari, & propterea à Sena-
 tu in patriciorum numerum relatus .
 Per eadem tempora in Histriam quoque
 impetus armorum factus . Christophorus
 Frangipanius Mugiam, prope mare mu-
 nicipium, aggressus, sub primis velita-
 tionibus faucibus rejicitur ; demùm re-
 versus robustior obsidione ipsis portis in-
 hærens, muro machinis diruto irruptu-
 ris facilem aditum patefecerat : sed op-
 portunè adveniens Justinopoli Andreas
 Civranus obsessorum recreavit animos,
 imperataque eruptione vertit in turpif-
 simam fugam obsidentes . Indurato ta-
 men animo Frangipanius tertio adfuit ,

verum eundem propugnatorem Civraurum iterum in se concitavit acrius, vehementiusque, ita ut acceptis vulneribus, projectisque insignibus cum ignominia bello excesserit. Sub hac Joannes Victurius Goritianas turmas ab Cremonense maximo animi robore dispulit. At dissimili sorte circa Gradiscas Gradonicus pugnavit. Defensores enim alacriter se tuentes exprobrabant, tunc propugnari oppidum non à meticolosis, quales essent Veneti: pessimum urbium, atque arcium custodem, timorem esse.

Varia hinc inde hostium expeditiones.

MDX.

Post receptam à Bentivolis Bononiam, cum Julius Pontifex ex Æmilia Romam trepidè concessisset, planum erat, solos Venetos victori hosti relictos in prædam. Veronæ præsidarii tam crebrò ex urbe erumpebant, ut auderent etiam nostra castra in Leonicensis agris adoriri: coactus Gritus ad Ateste metari, Veronensis agri oppida, & proxima quæque castra, veluti contagio quodam correpta in hostium manus corruisse, summo animi mœrore audiit. In vicina quoque provincia omnia erant adedò plena hostico tumultu, ut in ea trepidatione integram de fugientibus.

tibus victoriam reportasset, nisi objecta præda insequentes morata fuisset. Patavium, Tarvisiumque tumultuario milite, annona, omnibusque ad bellum necessariis confestim munita; atque jussu, ut alteri urbium ipse Gritus, alteri Joannes Paulus Gradonicus eum imperio præsiderent: delecti etiam patricii plures, qui ad illarum tutelam excubarent. Hostes interea ducti à Palicia Gallo, viro andacissimo Vicentiam eumprimis obtinuerunt; postea direpta civitate in proxima loca dispersi cuncta lacerabili vastatione ita fedarunt, ut nihil reliquum crudelitati fecerint: in captivos barbarè sævitum: domus, templa, aræ, vicique passim rapinis, furore, incendio afflicti: triste mortalibus spectaculum exhibebat Vicentinus, ac reliquus in confinio ager: & hæc inter gravis cura angebat Senatum, quemnam potissimum imperatorem suis copiis deligeret. Tandem cunctis suffragiis in Joannem Paulum Balconium sententia Patrum inclinavit, virum armis præstantem, & quod est in bello magni ponderis, summæ militibus earum. Hæc domi, forisque: cum inde arrepta occasione Atestini Venetos fines circa Padum iterum turbant. Igitur expedita classis à Clodiæ portu ad Vatrene ostium navigat, hosticasque biremes profligat, ac ingentem reportat prædam: clara quoque victoria poti-

tur Federicus Contarenus, & opimis locupletatur manubiis : cùm enim neque dux militi, neque miles duci deesset, quingentos equites delevit, eripuitque victis spolia, quæ pro primitiis Paliciæ afferebantur : in alteram quoque expeditionem profectus Castrum-francum Gallis eripuit, intromisso milite per ardentes unius portæ ruinas. Eodem tempore Germani prædatum ultrà Plavim jerant, conquerente Gallo, qui à sociis tranato amne, ac in patriam quodammodo tendentibus, deferi suspicabatur. Quare collectis in unum copiis Patavium inter, Tarvisiumque metatus, utramque urbem quadam veluti obsidione tenebat, & dubio procul unam, vel alteram expugnasset, nisi sæpius à nostris exturbatus, interceptaque fuissent ad belli usum necessaria. In primis, qui erant Patavii Legati Veneti, cùm ab exploratoribus renuntiaretur, magnas equitum cohortes è Suavio Veronensis agri castro in Tarvisinum profecturas, extemplò virum acrem deligunt Guidonem Rangonium, ut eas in itinere ex insidiis dissiparet. Audax ille, nocturnum ingressus iter, Suavium, quò loci morabantur, prima luce scalis, & irruptione adoritur, ac interfectis vigiliis irrumpit incautos, eosque cum ipso municipio feliciter cœpit. Profligati auxilii nuntius reliquos Gallos trans Lipientiam fluvium

vium adegit : verùm liberè secus ripas ad maritimum usque littus divagati omnia rapinis infestarunt . Ille tamen tractus à populationibus vindicatus esset, si destinata in latrocinantes navigia celeriter applicuissent : postremò conjuncti Germanis in Tarvisinas stationes rediere , nec multò post Vicentiam, desperantes Tarvisii expugnationem , Itaque illis abeuntibus cuncta penè in Carnis oppida , & in Ferrariensibus Rhodigium, Venetorum justitiam, benignitatemque olim experta , iterùm eorum publicam administrationem recepere.

Brixia recepta, mox amissa.

MDXI.

Julius interea Romanus Pontifex nihil non meditatus , ut Italia Gallos ejiceret, Ferdinandum Hispaniæ Regem, & præcipuè Maximilianum Cæsarem Venetis reconciliare , ictisque fœderibus contra Gallos conjungere plurimùm nixus est . At non omnia impetravit ab Senatu , Cæsare cum primis Patavium reposcente : cum Hispano igitur amicitia inita est , renovatumque fœdus cum Helvetiis, quibus in Italiam venturis Augustinus Maurocenus publico nomine commeatus , bellica tormenta , ac quingentos equites promiserat . Hæc nova fœdera Pontificis auctoritate, & odiis

N 5 po

potissimum confirmata, ut ad aures Ludovici Regis pervenere, omnem penè Galliam uno quasi impulsu in conjuratos excitarent. Tum Gasto Foxius, Nemorosi Dux, militiæ monstrum, cum prius imperare exercitibus, quàm tractare arma novisset, in Italiam innumeris comitatus legionibus advenit. Hoc duce in Bononiensibus primùm Gallica protella deferbuit, tanto impetu omnia quatens, ut momento temporis, servata Bentivolis urbe, Pontificios, Hispanos, Venetosque eam tum obsidentes milites ad unum turbarit. Hæc in Æmilia: verùm in Transpadana regione Aloysius Avogadrus Brixiam ab externo servitio liberaturus, illius occupandæ Venetis ducibus affert occasionem; modò clàm Venetæ copiæ accederent. Andreas Gritus factæ spei monitus intempesta nocte cum suis affuit, frustrà tamen, detecto Avogadri facinore. Cæterùm vix in patriam pius oppido furtim egressus, maximam sua auctoritate contraxit agrestium manum, vertitque in hostes, ita ut iterùm Grito commodum faceret potiundæ urbis, sponderentque fortunatum exitum civium animi erga Remp. Itaque secundo movens, & quidem nocturna expeditione, Brixiam tuto accedit, portas ferreis machinis convellit, præeunteque Avogadro urbi se

immittit. Inopinatus hic ingressus valde hostes exterruit, & cum tumultu in montis arcem fugavit, quam evertere Gritus non potuit, quia majora tormenta, quibus tum opus, secum non attulerat. Bergomates ad eam famam, recepto in Prætozem Antonio Justiniano, Gallica præsidia expellunt. Sed quia ingentis felicitatis semper insignis aliqua calamitas ferè comes est; Foxius, percepta Brixie defectione, violento fulmine rapidior è Bononiensi per Mantuanum agrum tanta celeritate se propripuit, ut suæ profectionis nuntium anteciret. Nec defuit properanti amica fors, cum Veronenses ingressus fines Balonium Veneti exercitus imperatorem, ad Villam francam cum univèrsis fermè copiis sedentem, improvisa pugna debellasset. Hoc obsequentis fortunæ auspicio, Brixiam accessit, & à suis in montanam arcem receptus est. Porro Gritus, etsi stæpiùs ad expugnandam arcem petitas machinas nunquam ab Senatu acceperat, urbis tamen defensionis probè intentus, ne, qui secum erant, pedibus, sed virtute auxilia quærent, oppidii portas occludi jubet, & ad excipiendum hostem jam jam erupturum disponit militem. Dum parat hæc Venetus, Dux Gallicus altero sui adventus die, excussæ sagittæ instar, in subiectos ruit; quippe illum præter virtutem, fortu-

namque adjuvabat copiarum numerus, locusque superior: igneæ faces, pilæ, hastæ, bellicaque omnia non tanquam ex æquo missa vana cadebant, sed suis librata ponderibus certo ictu infigebantur: diù Veneti sustinuerunt Gallorum impetus, & præclara invicti animi argumenta, adversante licet fato, dedere: non enim, nisi omnibus interfectis, aut captis, Galli urbe denuò potiti sunt. Gritus vivus ab hoste retentus in Galliam ducitur, Avogadro medio in foro caput abscinditur: cruentissima edita est oppidanorum strages: direptæ tùm profanæ, tùm sacræ domus, nulli sexui indultum, & ita ubique sævitum inhumaniter, ut nobilissima ea urbs horridi veluti deserti faciem præ se tulerit. Gasto tanto elatus facinore, qua venerat pernecitate in Æmiliam reversus est, ibi suo interitu Brixienfium manibus parentaturus. Nam immoderatæ virtutis juvenis post expugnatam Ravennam dum concitato equo in fugitivos hostes rapitur, ut integram sibi victoriam affereret, à gregario milite cæsus occubuit.

Gallorum Fuga ex Italia.

MDXII.

NULLA unquam major calamitas, metusque perturbavit Senatum, quàm
præ-

præceptæ sibi Brixæ casus, cæsi-
 exercitus strages: insuper augebat pu-
 blica damna indigna Pontificis obstæ-
 tio, qua se Remp. deserturum minaba-
 tur, nisi illa cum Maximiliano, jam
 dictis conditionibus, conveniret. Atta-
 men ea fuit prudentia Patrum, quæ præ-
 sentes minas contineret pollicitationibus,
 nihilque magis curaret, quam ut ite-
 rum Brixiam sui juris faceret. Cæte-
 rum hanc parantibus expeditionem re-
 pugnat Pontifex, Alphonsum Atestinum
 rursus bello petiturus. Obtemperandum
 fuit, ne hominem bello magis, quam
 paci natum ab se periculosissimo tempore
 distraherent: ingens telum necessitas.
 Quare decretæ naves in Padum, quæ
 multum Pontificiis conatibus profuere.
 Verum moras trahente bello, & tota cir-
 ca Brixiam pendente Rep. Alphonsus
 Rhodigium suæ dominationi restituit, &
 Pontificios milites, nostramque classem
 deturbat. Hinc itaque arbitratus Julius,
 nihil se profecturum, nisi Venetis conjun-
 cto Cæsare, fœdus, pacemque inter
 utrosque stabilire nititur, hisce legibus,
 ut Verona, & Vicentia Maximiliano ce-
 derent; Patavium, Tarvisiumque Ve-
 neti possiderent, auri summa persoluta:
 de Carnicis verò oppidis ipse arbitrare-
 tur, quibus potissimum illa ad judican-
 da. Respuit Senatus, uti incongruas,

eas conditiones. Et quis non admirabitur
 insignem in tot adversis fiduciam, & sin-
 gularem animum, ac spiritum Veneti Se-
 natus? Porro, ut aliquid obtinuisse Julius vi-
 deretur, inducias cum Maximiliano in proxi-
 mos decem menses pepigerunt. His ita com-
 positis, Cardinalis Sedunensis opera Helve-
 tii suis ab sedibus denuò evocati, per Tri-
 dentinos saltus in Cisalpinam Galliam de-
 eurrunt: hi Venetis copiis associati in Gal-
 los, nostram provinciam occupantes, ma-
 gnis animis, majoribusque odiis feruntur.
 Exercitum Reip. deduxit, promovitque
 Baleonius, atque simul cum extera militia
 hostes adortus, illorum memorandam stra-
 gem edidit, ultus ad satietatem, quam cla-
 dem ille pridem juxta Villam francam ac-
 ceperat. Qui ab Atheſi, Oleo, Abduaque
 fluminibus cædi superfuere, Ticinum in-
 gressi sunt, & à persequentibus nostris eo
 in oppido obsidentur. Quare Palicia non
 ausus obluetari, cum à fœderatis, trajecto
 amne, urbem corona cingi, sibi que inter-
 cludi aditum animadverteret, in rem nato
 consilio usus, fiduciariis suorum postha-
 bitis auxiliis, cum superſtite funeſti exer-
 citus turba clam, raptimque sese in Gal-
 liam proripuit. Cæſis in hunc modum, di-
 lapsisque Gallis, Julius Pontifex Helvetios
 Romanæ Sedis propugnatores appellat, si-
 bique ſoli, communem aliàs cum Venetis,
 Liberatæ Italiæ titulum adſcribit.

Bri-

Brixia Hispanis prodita.

MDXII.

Soluti Gallico metu Veneti , quamvis adhuc hostilibus ejus gentis præsidis eaptæ urbes tenerentur , alacrius ad expugnandam Brixiam parantur . Itaque contractis undique copiis , ut primum se ostendunt urbi , & majoribus machinis rem agunt , passim concidunt muri , ruinis implentur fossæ , & irrupturis non uno loco aperitur aditus . Sed nihilo segnior erat oppidi propugnatio ; nam vibratæ faces , emissæque telorum veluti nubes , tota penè castra horrore , & incendiis complebant : nunquam tamen summoti Veneti , imò audaciores inflictis vulneribus reddebantur . Spem interim Brixiae citius obtinendæ non tam circumjacentium municipiorum voluntaria deditio (unde illa arctius obsidebatur) quàm Baleonio dabat Bergomensis arcis occupatio , receptaque Crema : unde præclara habebat exempla , quæ sequeretur . Cæterum cum proximè capienda esset jam armis , & fame lassata , venire in nostras stationes Hispanarum copiarum ductores Prosper Columna , & Raimundus Cardonius , ut data operamaturarent oppugnationem . At Cardonius , vir subdolus rem Venetam se curaturum dum proficitur , tacitis nuntiis Gal-

Gallorum ducem Obignium , se dedere meditantem admonet , ut Brixiam Hispanis tradat , & cum suis , factaque præda innoxius inde abeat . Gallus non tam compulſus neceſſitate , quàm opportunitate uſus ferendæ inter fœderatos diſcordiæ , Hispanos , palàm excluſis Venetis , in urbem , arcemque admifit . Cardonius in eo fuit datæ fidei cuſtos , conceſſæ nempè poſteſtatis , ut rapinas , quas ingentes capto antea oppido Galli fecerant , domum revertentes liberè aſportarent : quod reſiduum erat , Hiſpani totum abſtulerunt . Cùm igitur Raimundus Cardonius Brixiam , uti ſuo Regi acquiſitam , indignè , ac pertinaciter retineret , pro hoſte eſt habitus , & ab Hiſpana ſocietate jure reſeſſum .

Fœdus Venetorum cum Gallis .

MDXII.

EDocti experientia Veneti , Hiſpanos , ſub honeſtis fœderum nominibus , hoſtilem , & alienæ rei appetentiſſimum , tegere animum , ſuæque tantum conſulere utilitati , conſeſtim infidorum hominum amicitia , ac ſocietati renuntiarunt . Sed non tam intercepta Cardonii fraudibus Brixia commovit Senatum , hoc tempore , quàm Pontificis , nulla honeſtate ſua conſilia metientis , recens odium . Venetis indignatus , quia pacem

ab ſe

ab se cum Maximiliano pronuntiatam adhuc respuerent, iterum vehementioribus irarum motibus æstuans adversus Remp. concitat præter Germaniam, Hispaniamque, ipsam toto orbe divisam Britanniam. Cæterum opportuna mors eripuit meditantem turbulentissimis bellorum procellis totam concutere Europam. Italia tamen nondum sua scelera, multo etiam sanguine effuso, luerat. Denuò enim quasiatur, vastaturque conversa ad Gallos Republica, & proclivi in concepta fœdera Leonis Decimi ingenio, qui Julii, non tam successor in Pontificatu, quam odii in Venetos hæres extitit. Hæc inter, ut quod suum erat ab injustis possessoribus vi extorqueret Senatus, per Andream Gritum, qui cum Bartholomæo Liviano in Gallia captivus detinebatur, cum Rege de pace agit, initque amicitias, opportunam nactus occasionem, cum subinde Rex consilia agita- ret, quonam pacto Mediolanensem Principatum reciperet, Helvetiorum auxiliis Maximiliano, Ludovici Sfortiæ filio restitutum: Gritus magna dexterritate omnia perfecit, pacisque, & fœderum sanctionibus Veneto Regem conciliavit, easque gerendi belli conditiones statuit, ut primùm Gallo in Mediolanensi expeditione auxiliaretur Respub. ipsa deinde, adjuvante Rege, ob-

ob effas ab hostibus urbes haberet: præterea captivi omnes libertati restitueretur. His ita constitutis, Rex suis exercitibus Tremolium, Trivultiumque clarissimos duces præfecit. Veneti è captivitate revertenti Liviano novas copias cum nova belli mole, & imperio tradidere, electo Grito, ut legati officio in Gallicis castris fungeretur. Ille, ut sui muneris accepit insignia, lustravitque exercitum, summa felicitate Veronensium castra pertentavit, majoraque moliturus, per medias paludes, & Tartari amnis loca invia Cremonam adortus est, eamque, dedentibus se civibus, Venetæ addixit majestati. Sub hæc circumstantes Novariam Galli, congressi cum hoste læti principii tristem exitum sortiuntur: sub primis enim impressionibus, veluti prospero belli præludio, erumpentes fundunt Helvetios: tandem redintegrato conflictu, ut sunt incertæ bellorum vices, vincuntur, qui vicerant, cædunturque ab effuso undique hoste, fuganturque insigni castrorum direptione. Novariensi huic pugnae Gritus spectator fuit. Porro elades, quæ initio certaminis foret sociorum animos distrahere, minime inconstantem Venetum reperit, illamque Livianus celare, quoad potuit, summe contendit: verum tandem cer-

tis auctoribus quotidie magis evulgata, ipse Cremona excessit, stipatisque agminibus Brixiam prætergressus, territavit non parum hostica præsidia: mox Veronam perlatis tormentis veluti obsessurus, conabantur hunc in modum dissipatos Gallicæ stragis rumores comprimere, aut certè ostentare hosti, neutiquam ob inflictum vulnus animum, viresque abjecisse. Eadem Liviani consilia secutus Baleonius, ipso transitu, Lemniaco depulit audacter Hispanos. Strenui nempe ducis est, ut suos confirmet, se nullo teneri metu illis ipsis persuadere.

Venetorum clades ad Creatinum.

MDXIII.

Profligatis ad Novariam Gallis, Hispani cum reliquis in Rempublicam, fœderatis hostibus, Venetam ingressi provinciam in omne scelus per militarem insolentiam feruntur. Livianus victoribus occurrere prudenti consilio non ausus, relicta Vicentia, alteram exercitus partem Patavium, alteram Tarvisium cum Baleonio reduxit. Vix hæc disposita; cum Raimundus Cardonius, & Prosper Columna rejecti ab Cremonensi oppugnatione, Laurentii Ceritis virtute, post latè circum directos agros, haud procul Patavio castrametantur: at nihil productis etiam machinis,

chinis , proficiunt in urbis incommodum : emissæ subinde à Liviano expeditæ equitum alæ , delectæque militum turmæ , omnia hostilia debilitabant , infestabant populatores , & in ipsas munitiones quotidiana exercitatione irrumpebant . Ita hostibus propiùs neque accedere permissum , neque complere aggerem , per quem tutò irent sub mœnibus , subrutisque cuniculo , intrarent oppidum : præterquàm quòd certo semper eorum damno majora tormenta graviter offenderent . Igitur tentato nequicquam Patavio , desperatoque in agrum Venetorum descensu , in proxima quæque oppida , villasque rapacitatis , ac furoris impetum effuderunt . Quippe tanquam impii belli sacramento obstricti obvia quæque flammis absolvebant , ac profanis divina miscentes cuncta populabantur promiscuè ; miseros quoque mortales ad lanienam conquisitos trucidabant , cædibus addentes ludibria , & diris ubique vastationibus , ac barbara prorsus immanitate grassabantur . Meduaco transito , in suburbano nostro littore Venetæ nobilitatis regio sumptu ædificata , palatia , plenas deliciarum ædes , igne , & ferro solo æquarunt . Tota quaquaversus regio ardentibus ruinis operiebatur , spectabanturque incendia ex urbe ab ipsis Patribus ; nec majori unquam rabie ante debacchatum , sævitumque legimus,

mus , quia potissimum Hispani vicere Hunnorum furorem : sed neque teterrimos hostes , quos jam præda certè expleverat , satiavit adhuc feritas animi ; cum enim ad Margherium maritimum oppidum pervenissent , eo fine contenti , ipsa interveniente natura , prospectantes brevissimo maris interjectu Venetam urbem , contorserunt in aquas tela , & in contumeliam invisæ gentis plures tormentorum pilas exonerarunt . Non tulit ulterius tantam ignominiam. infracti animi Senatus , quominus è vestigio imperaret Liviano , non secus æstuanti in vindictam , ut nulla mora moveret in hostes , unàque cum Baleonio acceptas injurias ulcisceretur . Nullus gratior nuntius Veneto Duci pugnandi cupido , & cum primùm Patavio in ulteriore Meduaci ripa locata sunt castra , hostili vastitati modus imponitur . Ille , qua in metando usus fuerat celeritate , Hispanum præcipuè turbavit , cui fluminis transitu jam intercluso ut quavis ratione connitentem repelleret properè advolavit Livianus , præoccupatis etiam proximorum collium angustiis , & communito Ulmo , Vicentini agri pago , quæ hostes necessario erant transituri , si amnem superassent ; nulla enim commodior via relicta videbatur , quæ illos Veronam deduceret . Interim haud longè à Venetis castris confidere coacti sunt ,

sunt, & totam proximam noctem agere in tenebris, ne destinatis tormentorum ictibus peterentur. Summo manè protecti densissima caligine retrocedunt Bassianum, ut declinata cum fervido duce pugna per Tridentinos saltus, etsi longiori via, tuti Veronam intrarent. Nebula erat adhuc ad multum diei densa adeò, ut propinquo etiam congregientium inter se conspectui visum eriperet. Edoctus Livianus eo fortunæ munere tectos hostes abiisse, hos cunctationis impatiens, neglecto acierum ordine, persequi voluit, tanta victoriæ fiducia, quasi pavidum gregem insectaretur. Ventum est igitur ad Creatium, quo loco ille quadrato incedentes agmine adoritur hostes, qui eo alacrius susceperere oblatum bellum, quò tumultuosius nostri ferebantur. Inito congressu, Bernardinus Antiniola, Liviani nepos, postremum agmen cum suo equitatu jussus invadere, prævalente Hispano, momento temporis dissipatur, ac in fugam dissolvitur. Victo avunculo addit animos, unàque restaurant certamen, pugnantque ex integro ingenti contentione, parique contumacia. Sed si militares ordines servasset Livianus, aut sibi tum ex opinione anteaactæ virtutis in præcipiti festinatione victoriam non esset ominatus, utique delevisset hostes, nec Veneti eam cladem accepissent.

sent, quorum illi tantam multitudinem interfecere, quantam per integrum diei spatium licuit: cum non nisi ingruentibus tenebris fusorum, ac palantium cædibus temperatum sit: sic itaque infelici nostrorum clade nobilitatum Creatium. Execratus numina Reip. ac Italico nomini nimium infensa, Patavium se recepit: Gritus hærentem tergo hostem declinavit, funibus intra Vicentinos muros receptus: capitur Baleonius; & Andreas Lanretanus, legatorum unus ab altercantibus de præda obtruncatur. Hoc vulnus rei Venetæ illatum omnes Livianæ temeritati adscribere. At ludente in humanis fortuna ea plerumque exequi cogimur, quæ infasta sunt, ac periculorum plena.

Crema obsidione liberata.
MDXIV.

Creatiana clades, qua nulla unquam Venetis contigit, vel exitu foedior, vel hostium incommodo levior, Sfortiam, Mediolani Ducem in lassos, fractosque alacriter impulit. Vocato itaque in subsidium, & opem Prospero Columna Cremanam Venetis auferre nixus est. Verum ea urbs non tam arte munita, quam incomparabili Laurentii Ceritis vigilantia, & fortitudine defensa, universos obsidentium insultus elusit, quibus ille, crebro
per

per intempestam, illunemque noctem erumpens, non modicas intulit clades; quodque fuit illustrius, præteriens ipsa hostilia castra Bergomumque progressus est, & oppidum, jam Hispanorum spoliū, invasit, & Regii quæstoris ædes populatus, reversus Cremam, prædam militibus distribuit. Columna tanti viri virtute fractus, soluta obsidione recessit inglorius.

Marianum proditione amissum.

MDXIV.

PActis inter Maximilianum Cæsarem, & Senatum Venetum induciis, ut interim de componenda inter utroque pace Romæ ageretur, malè rebus nostris consultum est, proditione occupantibus Germanis Marianum oppidum intra Aquilejenses paludes. Præerat illi Alexander Marcellus, cujus intimus quidam familiaris, impetratis unius portæ clavibus, ut de more sub prima luce venatum iret, Christophorum Frangipanium, non procul ex composito in insidiis abditum, intra mœnia, facili astu admisit, deditque in captivitatem Marcellum. Prodicti castri nuntius Patrum auget mœstitiā, quia loci natura nimium opportuna erat alendo bello propè Urbem. Maturè itaque decretum, ut quàm maximæ terra, marique copię

copiæ contraherentur : classi Franciscus Mustius, pedestri exercitui Balthasar Scipionius, & Hieronymus Savorgnanus præpositi. Interea Frangipanius robusto milite castrum muniverat ; unde postea tum maritimas, tum terrestres nostrorum vires infregit. Mariani quippe oppugnatio paludibus undecumque septi haud facilis cedebat ; quamvis enim classarii non semel , quacumque sprete difficultate , audacter in muros scalis evasissent , non ita commodè pedites auxilio in tempore esse poterant , & aliquando his ob viarum angustias præpeditis , navales manus rejectæ sunt , fugatæque cum cæde , & unius triremis jactura . A pugna rediit vulneratus Scipionius , ac inde tanta in militibus orta confusio , ut obsidionem de repente solvere tutius à ducibus consultum sit . Ultio interim de capto proditore habitæ , populari rabie in frustra dissecto , omnium animos paulum à tristitia revocavit .

Bellum alterum in Foro-Julio .

MDXIV.

R Ejectis pacis conditionibus , adhuc dura exigente Maximiliano , qui saltem Vicentiam Reip. adimere conabatur , Pontifice , atque Hispano auctoribus , omnis nostrorum cura ab oppidoi-
 O ruu

rum munitionibus pendebat, cum tot adversis rebus minimè frangi didicissent. Patavium in primis, Tarvisiumque conscripto etiam Venetiis milite confirmant: jamque Livianus satis amplas bellatorum manus in speciem justì exercitus coegerat. Hæc inter Cardonius cum reliquis hostium ducibus in Patavinis consistit, Ateste diripit, urit circum agros, liberaque vagatus populatione, Rhodigium capit: missò deinde exercitus non infirmo robore in Forum-julium, omnia illius regionis oppida terrore percussa recipit, præter Oso-pium, quod unicum & hoc tempore Veneto paruit obsequio, Savorgnanorum fide, & constantia. In eam provinciam repressurus Hispani ductoris insultus adpropinquat Livianus, & extemplo ad Pordenoni oppugnationem dirigit acies. Ex arce, qui erant præsidio, quotidie pabulatum exhibant, atque per occasionem eum nostri crebra inibant certamina: sed Livianus, ut eos in integram dimicationem pertraheret, cataphractam Malatestæ Ba-leonii cohortem propius jubet excurrere, eamque si hostis adoriretur, veluti meticolosam effugere ad insidiarum loca. Germani, viribus, & numero inferiores nostros universis penè eductis copiis invadunt, illi callide cedentes incautos in insidias adducunt, ubi subsidiaria manu adjuti, frontes obvertunt, ruentes excipiunt, oppri-

opprimunt, fugantque, capto eorum duce Rizanio. Palantes reliquias infectatus Livianus oppido victorem exercitum applicuit, & cum nulla deditiōis signa acciperet, integra unius noctis expugnatione obstinatos fregit, redegitque in arbitrium, concessa militibus præda. His actis, Tilavemptum superat, ut Osopienses à Frangipanio durè vexatos liberaret. Hostis metum adventantis sensit: referre itaque signa placuit, ne in incertæ pugnæ discrimina suum committeret agmen, jam victum fama Liviani. Verùm cum segniùs hæc Frangipanius exequeretur, tergo hærentem Venetum experitur: quare in turpissimam fugam sedat, relictis etiam impedimentis, quò expeditiùs evaderet. Cæterùm insequente Provinciæ Legato Joanne Victurio nihil ei profuit effugium, atque municipia, quæ metu, aut vi Cæsari antea obtemperaverant, nunc denuò in Venetam transeunt potestatem. Sub hæc Victurius, inexplorata ingressus itinera, hostium fit præda, parùm sua sorte lætatus, cum paulò pridem circa Glemonæ saltus, virum summè infensum Veneto nomini interceptisset, Christophorum Frangipanium. At Livianus oppugnandis arcibus intentus, Goritiam, & Gradiscas, omnium munitissimas, aggreditur. Sed, ut inde Venetum ducem averterent Hispani, unà cum Cæsarianorum

copiarum parte ad rapinas, vastationesque in Patavinum agrum rediere.

Rhodigium Hispanis ereptum.

MDXIV.

Cum de incursionibus hostium quere-
rentur Patavini, Livianus præter-
missis in Foro-julio expeditionibus, oppres-
sis laturus auxilia, festinanter advolat, &
ad pagum, cui Brentellarum nomen, tu-
tissimam sibi stationem erigit, monitus ab
aperto bello, memoria præteritarum cla-
dium, abstinere. Quotidie tamen hinc
inde excursitabatur, ac impigrè se gerente
Mercurio Buæ plures hostium cunei dissipati,
Ateste nocturna aggressione captum,
tentatumque Montanianum, Cardonii ibi-
dem sedentis, atque præ timore pugnam
detrectantis, objurgata socordia. Postea
Venetus imperator, Athesi trajecto, in
Padanam insulam clàm transit, nihil æquè
animo volvens, quàm ut illatas sibi ab ho-
stibus injurias ulcisceretur, præcipuè offen-
sus Antiniolæ nepotis captivitate, direpto-
que municipio, quod Cittadellam vocant
incolæ: quippe sciebat, res humanas, si-
cuti perpetuæ nunquam felicitati, ita nec
adversis semper infortuniis patere. Hæc
cogitantem non deseruit fortuna: profe-
cturus itaque in Rhodigii expeditionem,
milites sui consilii ignaros esse voluit, in-
dicto

dicto in Vicentinos itinere: ea propter per tenebras movit castra, indigenas, & obvios quosque cepit, non tam ut hostes celaret adventum suum, quam ut, quid de ipsis foret, exploraret: tandem imperavit, Malatestam Baleonium cautè obequitare Rhodigium, admonuitque, ut nusquam, præter necessitatem, se belli fortunæ committeret. Hic Hispanos, qui in aliam partem conversa audierant Veneta signa, metu vacuos, solutis, neglectisque excubiis torpentes, apertasque ob nundinas oppidi portas offendit: tantam nactus opportunitatem celeri, ac peracri impetu perrumpit, nulloque resistente penetrat in medium forum: è vestigio itaque turbat ibi omnia, imparatos prosternit, ac demùm superveniente Liviano, hostes omninò cedere, ac sese dedere cogit, armis turpiter projectis; ipse verò præsidii dux Garæias Méricus Venetis carceribus mancipatur.

Recuperato Rhodigio, facilè cætera illius Peninsulæ castra Reipub.

restituuntur: pari fermè

astu, ac sollicitudine

per eos dies

eripitur

iterùm hosti Lem-

niacum.

*Crema rursus servata. Bergomum
recuperatum, repente de-
perditum.*

MDXIV.

Quantæ molis sit in bello Ducum fo-
lertia, ac fruendis hosti insidiis in-
genium, Laurentii Geritis facinus in pri-
mis docuit, qui rursus à Sfortia, eodem
Columna duce, Cremæ inclusus, iterum
quoque magna sui nominis fama urbem li-
beravit. Cum enim hostium molestias am-
plius ferre non posset, audaci consilio eos
summè afflixit. Pyrio namque pulvere,
qui ad tempus ignem conciperet, ligneis
tubis, ollisque testaceis disposito, perrexit
tacitus in hostilia castra, in eaque prospe-
ro eventu paratos dolos contorsit: cum
igitur concepta flamma statim tentoria cor-
ripuisset, & vagum passim, furensque in-
cendium concitasset, volantibus undique
flammarum globis, nemo loco consistere
audebat, & quisque in foedam subito tre-
pidationem, fugamque rapiebatur. Ceri-
tes hostes probè confusos, consternatosque
aperto Marte aggressus internecione profligavit,
castris exiit, & multa dives præ-
da in oppidum rediit. Exinde majora ani-
mo concipiens, & Bergomum concubia
nocte progressus, receptusque à civibus,
nimia Hispanorum superbia, & avaritia

oppressis, præsidium inexpectata irruptione profligavit. Hæc fama excivit è vicinis munitionibus Cardonium, & Columnam: propterea Cerites urbem, quò validior esset adversus totam ingruentium Hispanorum vim, novis machinis, muris, aggeribusque obfirmare omni ingenio studuit. Verùm cum illi rem bellicam, & oppugnationem sedulò tractarent, & per diruta tormentis mœnia non uno loco pateret oppidum, Cerites cùm sibi, ac suis liberum in Cremenenses transitum, civibus pariter rerum, & corporum incolumitatem impetrasset, Bergomum Hispanis ducibus reliquit; qui promissorum immemores, causæque militum indignationem, ob interdictam prædam, Bergomates pecunia multant: inde in Livianum vertunt agmina, qui horum adventum præfagiens, novo, & à nullo antea tentato itinere è Lemniaco per limosas, difficilesque paludes exercitum ad Caput-aggeris; mox Patavium deluso hoste, traduxit, qui Venetum ducem si in veterem Brentellarum stationem rediisset, aut fluminibus inclusum opprimere, aut omnino apparatū bellico se certò spoliaturum arbitrabatur.

Helvetii victi ad Marignanum.
MDXV.

VIta functo Ludovico XII. Gallorum Regi successit Franciscus Valesius , hoc nomine primus , qui ut primum Regni imperium suscepisset , extemplo suas & ipse vires, conatusque omnes in Insu- briam expeditionem convertit , renovato cum Venetis foedere . Quamobrem Maximilianus Sfortia perpendens, quanta sibi calamitas impenderet , imploratis Maximiliani Cæsaris , & Leonis Decimi auxiliis, Helvetiorum penè innumerabiles manus accedentibus Gallis opponit . Sub hæc Raimundus Cardonius , & Columna Pontificio exercitui modò datus imperator , ut aliquo belli terrore nostros ab Gallis se- jungerent, uno , eodemque tempore Vi- centiam , & Patavium simulata oppu- gnatione perterrefaciunt . Porro in Vi- centiæ propugnationem è præsidio vene- rat Cerites, Patavium Livianus . Omni- bus autem militum præfectis constans erat consilium , ab oppidis propulsare hostem , non in apertam pugnam descendere , donec accederent Galli , ut denique conjunctis exercitibus ex æquo ulcisce- rentur injurias , quas superioribus annis Veneta Resp. fraudata victoriæ parte , potissimumque ab Hispanis decepta ac- ceperat.

ceperat . Cæterum nihil aggressi sunt hostes in hac provincia , ad obstruendos solium montium aditus delati ; ne Galli descenderent . Sed hi copiis ingentibus instructi , equitatu in primis florentissimo , Palicia , & Humbercutius duces in Italiam per Liguriæ fines venere . Ingressi bello destinatam regionem ad Villam-francam agri Veronensis invadunt Prosperum Columnam , Sfortiæ auxiliarium , victumque , deletis , aut interceptis Pontificiis turmis in Galliam captivum mittunt . Sub id temporis Cerites , in Cisalpinos reversus , Mediolanenses diris vastationibus ter-ritaverat , & Odethus Lautrechius , magnæ existimationis dux , Novariam occupat . Postremò ducente Rege validiores copias ad Marignanum , quod Mediolanum , ac Laudem Pompejam interjacet , castra promota sunt : haud procul Regiis stationibus jussus est consistere Livianus cum exercitu , qui ex fœdere constabat X. armatorum millibus , atque in id sua vigilantia incumbere , ne cum Helveticis reliquæ fœderatorum hostium legiones jungerentur . His ita dispositis , Mediolanum urgeri cœptum est : nam primaria urbe capta , cætera in deditionem ventura credebantur . Ex eo oppido Helvetii confertis agminibus non minùs , quàm arroganti Novariensis pugnæ recordatione in Ga os procurrunt , qui sedentes

tes adhuc in castris , & inopinato petiti-
 facile sub primis congressibus loco dimo-
 ventur ; sed ubi Rex affuit , suosque su-
 stinuit hortando , pollicendoque omnia
 prædæ victoribus futura , redintegratum
 est certamen . Helvetii tamen ea pertina-
 cia , & vincendi spe dimicabant , ut ite-
 rum ab Gallis trepidatum sit : producta
 nihilominus usque in alteram diem cruen-
 tissima dimicatio , ad quam postremò vo-
 cato in defessorum subsidia Liviano , Rex
 maximum suis rebus , & summæ demùm
 victoriæ momentum attulit . Venetus im-
 perator cum levis armaturæ equitibustre-
 centis è Laudensi agro , in hostiles acies
 velocissimè supervenit , suos hortatus , ut
 se , in contrarias phalanges ex transver-
 so irruentem , sequerentur . Quare ea
 vi , atque impressione Helveticos cuneos
 adortus est ; ut hostes in se Venetas om-
 nes turmas uno eo impetu motas credide-
 rint : ob id cæsi , fugaque dissipati ; me-
 morabili , atque illustri exemplo , quo su-
 perba Natio intellexit , quantum Itali vir-
 tute , ac generositate præstarent . Mc-
 diolanenses XV. Helvetiorum millibus de-
 sideratis , ne quid deterius ab irato victo-
 re acciperent , veniam , & pacem matu-
 rata deditiōne impetrarunt : urbis arcem ,
 dies aliquot oppugnatam , ipsius Sfortiæ
 captivitate Rex obtinuit , brevique to-
 tam sibi subegit Insubriam : attamen

infi-

infinis de Helvetiis victoria Liviani virtute parta, suo auctori minus læta obtigit. Nunquam is bellorum laboribus intermissis, fessus, ætateque gravis, utpote sexagenario major, paulò post ex febre interit vir omni bellica laude dignus, & quo nemo melius militares leges percalluit; si frequentius in ipso expeditionum cursu bona fors illius consiliis, factisque respondisset.

*Brixia, Bergomum, Verona à Venetis
recepta.
MDXVI.*

B Artholomæi Liviani manibus non tam exercituum, quàm Patrum lacrymis diù parentatum est. Corpus Venetias delatum, in Protomartyris æde honorificentissimè conditur: & quia nullo unquam tempore de se benemerentibus ingrata fuit Reip. tanti ducis memoriam, erecta ibidem marmorea statua, nostra hac tempestate posteris renovavit. Extincto Liviano nemo alius repertus, qui dignè succederet, quàm Joannes Jacobus Trivultius. Igitur per Senatum ab Rege impetratur, ut ille susceptas expeditiones compleret. Hæc inter Georgii Hemi Legati imperio ductus miles omnia fermè Veronensis agri nobiliora municipia Reip. acquisivit, & ubi Trivultius exercitibus im-

perare cœpit , circum Brixiam militares ordines distributi sunt , erectæ muniti-
ones , concussa tormentis mœnia , & pluri-
bus in locis tentata irruptio : cæterum va-
lidos globorum jactus solidæ murorum
structuræ , ac præsidarii militis vigor , af-
pernabantur , unde cùm nihil viros belli-
cæ , artesque profuturæ viderentur , ipse
Trivultius diutinam obsidionem dehorta-
tur . Porro mens Regis , in Remp. grati ,
ea erat , ut illa in pristinam sui status ma-
jestatem rediret . Dato itaque supplemen-
to Brixie acrius insistitur , frustra tamen :
& cùm dies aliquot mœnibus demoliendis
nequiequam concertatum esset , omnium
ducum sententia ea fuit , ut impeditis iti-
neribus , interceptisque com meatibus fa-
me , & inedia assequi conarentur , quod
armis difficile videbatur . Sub hæc suos in
obsidentes eduxit Cardonius , & excitata
fama accepti ab Germania subsidii eos ab
inceptis deterruit . Hinc turpiter mutatis
terrore animis Brixie terga verterunt ;
Galli Mediolanum festinarunt , quasi vo-
cati ad opem adversus hostiles acies , quæ
dicebantur eam urbem oppugnaturæ : No-
stri , qui soli robustissimas copias sustinere
non poterant , eosdem sequuti sunt : hunc
Gallorum , Venetorumque recessum pro
apertissima fuga accipientes Hispani , Me-
diolanensem agrum urere , vastare , & di-
ripere cœperunt ; eoque atrocius , quod
nihil

nihil usquam adversum hæc calamitates provisum fuerat, & quia pronum ad obsequium credebatur Mediolanum. At fœderata nostrorum agmina, in se ipsa reversa, tantarum injuriarum ultricia arma in hostes converterunt, pugnandoque eò redegerunt Cardonium nimium sibi fîsum, ut proxima nocte bello excederet, aliis futurus exemplo, quod nemo celerius opprimitur, quàm qui nihil timet. Repressis Hispanorum insultibus, Gallisque constantius adjuvantibus, Odetho Lantrechioduce, Veneti alteram moliuntur Brixie expugnationem, & hanc peragere volvere non quidem machinarum impetu, & irruptionibus, sed impedita annona, interceptisque auxiliis. Obseptæ sunt igitur, obseratæque viæ, ac jugi patientia toleratæ hostium impressiones: tandem ut ad fœdus, fordidaque ventum est, quæ in cibi usum necessitas vertebat, neque ulla comitatus, aut subsidii spes appareret, de deditione actum ea lege, ut nisi in posterum diem afferrentur suppetiæ, exiret militari more præsidium, & urbs non Venetis, sed Gallis traderetur, à quibus illam Hispani acceperant. Assensit quibusque conditionibus Andreas Gritus, & innatum ei genti fastum sprexit, modò Brixiam obtineret: fortiores subinde manus imperavit, quæ attentius observarent aditus, & obsessam annonam, subsidiaque intercluderent;

hac

hac diligentia maturatur deditionis dies, & omnium primus Lantrechius urbem ingreditur, eamque ab Hispanis receptam subsequenti Grito restituit, tanto civium applausu, & renovati obsequii alacritate, ut inde satis constiterit, firmissimum illud esse imperium, quod populi ultrò amplexantur: pari studio circumjacentia oppida, Bergomumque, exturbatis præsidariis, Venetorum leges, & administrationem læta receperunt. Verona clara urbs ad victoriæ, imperiique dignitatem restabat. Hanc Cæsareo nomine defendebat Marcus Antonius Columna, qui ut ejus obsidionem impediret, præmisso equitatu munitum pagum Valegium pro statione sibi occupat, atque in primas Venetorum acies, remorantibus Gallis ob non soluta stipendia, erumpens, Gritum ultra Mincium propellit: sed ubi sociis satisfactum est, & in unum contractæ vires, nostri obversis frontibus loco Cæsarianos deturbarunt, eosque insecuti intra oppidi munimenta rejecerunt; eo tamen facto non ita ducem terruerunt, quin Vicentiam nocturna aggressione præderetur: sed interim majoribus tormentis ita quatiebatur Verona, ut per amplas murorum ruinas irrumpi intra mœnia posset: at hostes animante Columna audacter obstabant, neque ullus erat propugnatoribus vacuus locus, summaque.

que celeritate novus pro diruto murus ob-
 jiciebatur. Ipsa denique fortuna obsessis.
 vita benignior, cum sive casu, sive dolo,
 quicquid sulphurei pulveris in urbis expu-
 gnationem à nostris paratum erat, illud to-
 tum unico temporis momento concepta
 flamma conflagrarit. Hinc hostibus data
 quies, donec ad castra major. ejusdem pul-
 veris vis convecta est, instaurataque oppu-
 gnatio. Tandem Grito visum est, oppi-
 dum non esse amplius irruptionibus tentan-
 dum, neque cum desperatis agendum. ar-
 mis, sed fame, quæ omnem audaciam pro-
 sternit. Crovariam itaque ad ripas Athesis
 arcem expugnandam, ac Vicentinos col-
 les obsidendos: non enim aliunde ho-
 stibus importari necessaria. Galli verò
 ad omnes impetus proni, crebrò sibi
 per diruta mœnia aditum quærebant: at
 quia nulla murorum pars sine præsidio,
 aut vacua machinis, ferè semper ma-
 xima subeuntium strages edebatur, ne-
 que alia spes apud inc usos, continuante
 obsidio, quàm propria animorum virtus,
 & constantia, præeunte Columna, ut
 verè appareret, tanti æstimari exerci-
 tum, quanti ducem. Postremò, ut pla-
 cuit, diuturno huic bello, maximisque
 ærumnis finis impositus, pace Bruxellis
 inita inter Franciscum Gallorum Re-
 gem, & Maximiliani Cæsaris nepotem
 Carolum: cum Venetis pactæ sunt indu-
 ciæ,

ciæ, ut interea sanctius de pace firman-
da agi posset. Itaque hortante tandem
Rege in eas conventiones cum Carolo
itum, ut persolutis ducentis aureorum
millibus Respublica Veronam haberet.
Quoniam verò hæc pactio aliquam Impe-
ratoriæ existimationi maculam irrogare
videbatur, Brixia exemplo, Verona Gal-
lo, non Veneto, permessa est. Senatus
nullas non æquas condiciones duxit, mo-
dò optatissima urbe potiretur. Hanc Lau-
trechius sibi à Cæsarianis traditam Gri-
to cessit. Et hic Cameracensis fœderis in
Remp. bellicue, quo jam octavum annum
Italia miserè deflagrabat, exitus fuit: in
eo quis fortunæ, & humanorum even-
tuum vicissitudines satis miretur! Una
Veneti Senatus in turbidis rebus, con-
verso in se totius fœrmè Europæ impe-
tu, constantia, atque prudentia, amissa
recepit, pristinumque imperii decus cum
dignitate consecuta triumphavit.

FINIS LIBRI TERTII.

JOANNIS BAPTISTÆ
V E R I
CANONICI PATAVINI
RERUM VENETARUM
LIBER QUARTUS.

Bellum Insubricum septimum.
MDXXVII.



Ax, quæ in Italia diù integra
sperabatur, sopitis jam tum bel-
lorum incendiis, mutua æmu-
latione, & odio duorum poten-
tissimorum Principum, Caroli Quinti
Imperatoris, & Francisci Primi Gallo-
rum Regis, disrupta est. Ille sibi Me-
diolanensem Principatum, quem Cæsa-
rum appellabat patrimonium, ereptum:
hic se Neapolitani Regni hæreditate
spoliatum contra fas, acerbissimè quere-
batur. Hæ causæ bellum conciverunt
toti Christiano orbi luctuosum: nam per
ea tempora dissidentium nostrorum Prin-
cipum ambitu, & pervicacia, altius
erexerat animos Solymanus, Turcarum
Imperator, civilesque Christiani populi dis-
cor-

cordias in sua commoda vertens, haud cunctanter arma sumpserat : & ea bellorum tempestas Venetam quoque Remp. involvit, lassam adhuc Cameracensi vulnere . Porro ut in parta tranquillitate Italia tantillum conquiesceret, Leo Decimus Pontifex cum Gallo primum, mox cum Veneto Senatu, quem Italicæ libertatis assertorem nuncupabat, fœdus contraxit in Carolum : ne si armatus, ut fama erat, hanc provinciam ingrederetur, confirmatæ pacis fructum ei adimeret . Igitur ex fœdere conjunctis in unum copiis, dum adversus ferocem hostem pugnandum erat, sese aperuere Leonis consilia, Parmæ, ac Placentiæ dominationem affectantis : cum enim eas urbes suæ familiæ acquirere Gallorum amicitia desperaret, in Cæsarianas partes, ceu questuosiores, & in fœdus iis legibus deflexit, ut Cæsar expetita oppida sibi traderet, ipse verò Neapolitanum Regnum occupanti addiceret . Tanta rerum, animorumque subversione commota Respubl. confestim per suos Oratores admonuit Pontificem, majoribus, quam antea, calamitatibus, bellorumque turbinibus patere Italiam, imò totam subiacere Europam ; cum jam pridem, evulgata Caroli, & Francisci discordia, Solymannum ad arma conversum certi afferrent nuntii . Cæterum, ut primum
in

in Gallos fœderatorum erupere odia, funestissimis bellorum incendiis Insubria potissimum miserè jactari cœpit, Veneti sancti cum Gallo fœderis tenaces, Lautrechio, septem armatorum millibus, parant auxilia. Parma belli prima sedes à confœderatis hostibus destinata est: illam Prosper Columna Pontificii ductor exercitus aggressus, tanta Gallorum, Venetorumque consternatione cepit, ut omnes simul copiarum veluti unica impressione simul fuscæ viderentur. Oppugnatae, ac domitæ urbis rumor ad sui recuperationem mirum quàm sollicitavit Lautrechium. Is submissis Mediolano copiis Parmam altero defectionis die & obsidione cinxit, & recepit, incredibili apud omnes admiratione. Post hæc magni nominis dux, Helvetii obstiturus, ad Oleum amnem victrices copias deduxit. Eadem Natio uno, eodemque tempore Cæsarianis, Gallicisque stipendiis merebat, & in se invicem ferebat signa. Sed apud venalem gentem fas, ubi merces major. In Brixiensibus ad Octolengum omnia turbabat, horrenda in omnem sexum, ac humanas, sacrasque res grassatione, fœderum sanctitati prælata pecunia: cum tamen è primis velitationibus animadverteret Lautrechius superare hostes numero Mediolanum signa retrahit; & Venetos ad ferendam Laudipom-

Pompejæ opem destinat : verùm inde recedunt haud pares propugnationi adversus Columnam, toto exercitu circumvallantem oppidum, quo tandem etiam potitur, & pleraque alia castra consequitur, quæ nulla prorsus vi expectata, defecerunt. Sed ubi ad manus ventum est juxta ignobile municipium, Piccocam, infelicissimo Gallorum exitu, tota visa est tremere Italia, veluti externæ gentis dominio paritura. Exinde cùm omnia magis arderent bello, & quilibet terrore tùm præsentium, tùm jamjam imminentium malorum metu trepidaret, Veneti, qui nunquam antea non auxilia suis fœderatis suppeditabant, ut ob id Gallicæ fortunæ individui comites appellarentur, sibi tandem unis rati finitimorum Principum, ac nobilissimæ provinciæ securitatem conceditam, in Cælaris amicitiam, societatemque transiere, suadente Andrea Grito, qui rediviva semper virtute se ipso major, clariorque per id tempus ad clavum publicæ administrationis sedebat. Videbatur abundè satisfactum Gallico fœderi, malebatque Senatus Venetus invidiæ objici, quàm communi deesse causæ. Tanta novitate iratus Franciscus, Insubriam summa vi percontat, duce Gulielmo Gauferio, qui regia arma quocunque circumduxit, omnia ad deditionem prona habuit, Nova.

variam, Laudem Pompejam, & proxima
 quæque oppida. Sed hæc prima Gallorum
 brevissimi temporis felicitas; ab Cremonensi enim oppugnatione Gauferius Venerorum constantia repellitur, fugaturque demùm ab Cæsarianis memoranda strage. Rex suorum internecionem ubi audit, & quàm verè diceretur Italia Gallorum esse sepulchrum, ipse sese hostibus, ac Regiam opponere majestatem decrevit, eoque citiùs ob delatam Caroli Borbonii defectionem: sic in dies magis, magisque gliscentibus bellorum seminibus, Italia, facta veluti decertantium arena, tot, tantisque repletur copiis, ut universi orbis imperium tenere iterùm potuisset, si illa, non in sua viscera, sed in imminencia barbarorum capita convertisset. Ut igitur per Taurinos regia castra movere, & insonuere armorum strepitus, fortuna Gallorum conatibus adfuit: Mediolanum repentè subigitur, vicina castra, urbesque, dato quasi signo, victoribus se prosternunt, inde præ fuga è munitionibus propulsantur nostri, atque intra Ticini, Laudisque Pompejæ moenia arctissimè sepiuntur. Interim tamen fregit Regis consilia ineluctabilis fatorum vis: nam cùm divis hinc inde armis, quæ in una Ticini oppugnatione simul coire debuerant, hostes variè distractos, implicitosque

tenere voluisset , erumpente cum Cæsarianis Borbonio , Gallorum stationes minus defensæ , vacuæque necessariis præsiidiis occupantur , ingenti illorum strage , ac ipsius Regis captivitate , qui , cum nemo ingruenti undequaque hostili agmini frontem obverteret , equo semel , atque iterum suffosso pedestre certamen inire cogitur , & ab hoste traducitur in Hispaniam . Hac infanda expeditione , ac lacrymabili pro Gallis pugna , octo eorum millia cæsa dicuntur , cuncta bellica impedimenta amissa , & quod majus , tota Insubria Carolo restituta : bello tamen oborto nullus finis dari posse videbatur , nulla Italiæ quies , vel capto Rege , vel Cæsare victore . Hic rebus tam prosperè gestis audax , feroxque animum ad altiora , & non concessa portendere visus est , ipsetaque initorum fœderum sanctione Franciscum Sfortiam in Mediolanensi arce clausum obsedit : & quia non alia pacandæ Italiæ spes confœderatis reliqua esse videbatur , nisi Sfortia in pristinum statum restituto , nova Principum societate Cæsareæ ambitioni erat obstandum . Venetus prudentissimis consiliis eò inclinabat , ut amplectenda censeret ea pacta , legesque , quæ tutò Italicam securitatem promitterent . Quamobrem cum ejus temporis Pontifice , Clemente Septimo , cum Florentina Rep. cum ipso de-

demum Gallorum Rege devincitur, qui Hispani custodia liberatus, se iis conditionibus haud teneri profitebatur, quas non voluntas, sed necessitas expressisset. Fœdus in Coniaci oppido igitur: decretumque, ut constitutæ societatis auspiciis ab liberatione oblecti Sfortiæ fierent. Ad hæc expedit Carolus Legatum, qui Pontifici, Venetoque denuntiet, se & ad pacem, & ad arma paratum: alterutrum eligeret, qui aut quietem mallet, aut belli incommoda. Constanter, ac unanimiter responsum: à tot Principibus itum esse in fœdera, ut Italica libertas integra staret: ab illis haud recedendum, nisi communi consensu, & certa cujusque regionis incolumitate. Interim Venetæ, ac Pontificiæ manus Petro Pisauo duce Laudem Pompejam vi capiunt, captamque haud minori postea solertia Malatesta Baleonius retinuit. Summa tamen auctoritate Franciscus Maria Feltrius Urbinatum Princeps præerat exercitibus, ac præsertim Veneto, qui inter cæteros decem armatorum millibus constabat. Hoc robore Mediolanum petendum erat, & Sfortia eximendus obsidione. At dum cunctando res agitur, nec præsto essent Helvetii, quorum novem millia Reipub. impensis erant conscripta, Sfortia, cui jam alimenta, & auxilii spes deerant, arcis deditionem facit,

una pro conditione Comum sibi pactus .
Hæc inter Baleonius vi Cremonam obti-
nuerat, quam ex fœdere Sfortiæ tradidit.
Mutuæ interea singulis fermè diebus fie-
bant urbinum quassationes, deditionesque,
& interdum uno, eodemque die ab hoste
captæ à nostris recipiebantur . Proceden-
te bello, cujus molem sola Veneta Resp.
sustinere videbatur, satis apparebat, pa-
cta fœdera plus auctoritate, & fama, quàm
viribus valuisse . Gallica enim tardabant
auxilia, Helvetii in castra solutis ordini-
bus descendebant ; ac per eos dies Pon-
tificiæ opes acriter à Columnensibus,
Cæsareanarum partium fautoribus, sol-
licitabantur . Hæc propter Venetus suo-
rum finium propugnationem Feltrio im-
peravit . Quare nihil ampliùs tentatum,
sed aucto milite, urbibus, castris, po-
pulorumque tutelæ prospectum, præter-
missaque à nostris Mediolanensis expedi-
tio, ne, dum aliena curarent, propria
perderent . Cæterum Carolus Borbo-
nius, armis aliò conversis, Romam con-
tendit, atque in nomen iusti belli ad-
versus Pontificem attexit denegatum,
sibi transitum in Neapolitanos, quos per
id tempus maritima nostrorum classis
exagitabat . Aggressus ille temerario au-
su Romanam urbem, quasi suo fato ob-
sequeretur, dignum expeditionis fru-
ctum consecutus est . Sub mœnibus enim,
dum

dum inter primores pugnam ciet, glande plumbea percussus interiit vir tanto exitu clarior futurus, si pro ejusdem urbis defensione concidisset. Milites cædis sui ducis ignari, concepto impetu fervidi, Romana mœnia expugnant, captamque urbem Hunnis, ac Vandalis sæviores diripiunt, tanto sacrarum rerum, personarumque contemptu, tam promiscua miserrorum civium cæde, ut nulli ætati, nulli sexui, nulli denique sacrilego facinori parcerent. Romanæ calamitatis fama, totum Christianum orbem pervagata, universos Principes summè commovit, atque in primis confœderatos; ita ut illicò missis ultrò, citròque legationibus, immortalis penè odio simul in Cæsarem accenderentur, renovatisque fœderibus indigni sceleris vindictam exposcerent. Dum igitur ultioni, ac Romanæ sedis patrocinio parantur exercitus, atque adeò jam Lautrechius, auxiliario Veneto, Buschum, Alexandriam, Ticinumque occupasset, Clemens parum decoris conditionibus ad Cæsareos inclinavit, vel captivitatis impatiens, vel vindictæ avidus in Florentinos, qui tum à suis desciverant, ejectisque Medicæis, popularem statum instituerant. Exemplum secutæ ferè omnes Flaminiae urbes in diversa studia scindebantur: Cervienses, ac Ravennates non aliis,

P

quàm

quàm Venetis obtemperare decreverant ,
eorum dominium ipsi libertati præferen-
tes.

Bellum Neapolitanum secundum .

MDXXVII.

MAri quoque adversus Carolum Quin-
tum, Italicæ quietis perturbatorem,
hoc tempore pugnatum est : & quidem
ex condicto cum Gallis fœdere , primùm
navigavit in Tyrrhenum Aloysius Arme-
rius viginti rostratarum classe , & cum
Prorege Neapolitano navali certamine
tàm prosperè conflixit , ut ob partem de
eo victoriam , & insignem hostium jactu-
ram , Galli iterùm ad Regnum Neapoli-
tanum animos admoverint . Prope Sestrium
in Genuensi ora primò commissa pugna ,
mox datus classi Legatus Augustinus Amu-
lius ; demandataque terrestrium copiarum
cura Petro Pisauo , & Andreæ Civrano ,
Neapolitanam provinciam unà cum Gallo-
rum ductoribus Veneta agmina terra quo-
que invadunt . Expugnatis primò Puteo-
lis , reliqua secus littus oppida facilè, capta
sunt , eademque armorum felicitate in
mediterranea penetrantes , edita Surrenti-
norum clade , quia restiterant , univer-
sum Samnium subjugarunt . Post hæc ,
suppleta classe , Petrus Lando è Corcyra
in Campaniam trajecit , ibique , missus ab
Rege ,

Rege , Lautrechius etiam affuit , ut junctis simul terrestribus , maritimisque viribus oppressi adhuc Pontificis vindictam, & Italiæ libertatem reportaret. Quamobrem Gallus , Veneto ubique socio , Genuam , & Liguriam omnem Regiæ potestatis fecit: Venetus, favente Gallo , Molam , Polignanum , & Monopolim, urbes, quæ jampridem moderato Reip. imperio assuetæ , ab Hispanis cupidissimè rebellant , in deditionem accepit : ac consequentibus sese victoriis Brundisium , omniaque Calabriae , Apuliæ , ac Salentinorum municipia occupasset Landus , nisi ex Senatus decreto Gallis obsecutus , Neapolim cum classe excurrisset. Ea urbs obsidioni , ac expugnationi destinata , dies aliquot in summa rerum penuria , ac desperatione hostes morata est. Landus , cùm primum applicuit , omnem mari commeandi facultatem sustulit , eandem terra Galli eripuerunt : inde obsessi brevi erant se dedituri , recasuraque Neapolis in Gallorum dominationem , victis maritima decertatione hostibus laud procul Salerno . At interim pervagata exercitum lues , extinctus Lautrechius , dissipataque procellis classis , & oppressæ immodico æstu Gallorum reliquæ , Neapolitanum obsidium fregerunt , quasi tot æumnis fortuna edicere voluisset , Italiæ imperium Gallis non esse decretum , neque Venetæ Reip. sub

Apulo Cœlo virium suarum propagatio-
nem.

Bellum Insubricum Octavum.
MDXXX.

DElata ad Cæsarem Gallorum , Ve-
netorumque impressione in Insu-
briam , ac Neapolitanum Regnum , ex-
templò Henricum Brunsvicensium Du-
cem cum exercitu ad ultionem propera-
re iussit in Italiam , quæ nondum fato-
rum rabiem tot continuatis calamitati-
bus exsaturaverat . Hostis , qui famam
sui adventus prævenerat , ab Tridentino
jugo in Veronensem agrum diffusus , vil-
larum incendiis bellum primò miscuit :
postremò ad oppidorum conversus ex-
pugnationes, Pilscherium, aliaque circa
Benacum fortia munimenta in Cæsaris
obsequium vi traxit . Pejora moliturum
Germanum hominem cohibuit Franci-
scus Maria Feltrius, Urbinas, Veneti mi-
litis imperator , qui motis è Bergomati-
bus castris insultanti sit obvius , & com-
missis per occasionem certaminibus eò
penuriæ , metusque adegit Cæsarianum
ducem , ut nunquam ausum è stationi-
bus egredi , fame , ac militum fuga iner-
mem propè redderet . Profligato , atque
ita fracto hoste cuncta deinceps prospe-
ra fore videbantur , modò Antonius Le-

va , Hispanarum acierum ductor Mediolano pelleretur . Huic Feltrii sententiæ adhæsit Franciscus Borbonius , ab Rege per eos dies Lautrechio in bellica administratione suffectus . Sic ad animorum concordiam accedentibus fœderatorum Principum viribus , Ticinum , paulò ante receptum ab Hispanis , nostrorum validæ oppugnationi primùm succubuit : oppidum enim corona cinctum , & majoribus tormentorum machinis diù concussum , obsidentibus tandem patuit , cùm per abrupta mœnia cæteris antesignanus Feltrius ad interiora penetraret . Hac victoria , quæ ad totius Mediolanensis Ducatus occupationem erat instrumentum , incertum , cur noluerit uti Borbonius , suscepta tunc in rebellantes Ligures expeditione . Victoribus nihil præter Mediolanum reliquum , erat quo subactò jam neminem vinci puduisset . Verùm abeuntem Gallum à tergo insecutus Leva , noctu , ac sine militari strepitu , ut illum falleret , circa Landrianum repertum malè multavit . Exinde Hispanus , concepta spe nostri etiam dissipandi exercitus , nulla mora cis Abduam castra disposuit , Feltrius insectantes hostiles manus simulata fuga decipiens , compositisque dolis ferme peditum duo millia trucidavit , atque Levam veluti è naufragio fugientem cum paucis Mediolanum uique persecu-

tus est. Sub hæc certis nuntiis evulgabatur, Cæsarem in Italiam venturum, totisque viribus oppugnaturum Remp. quæ una illi rerum Italicarum fortunas interturbabat. Non usq; adeò timebat eam famam Vanetus Senatus, jam professus, se omnia Carolo redditurum infesta, modò Gallis eadem cura esset: qua de causâ facti novi militum delectus, firmioribus præsidis munitæ Apuliæ urbes, adjutus Sfortia pecunia, & milite, quo impigrè bellum suos in hostes capefferet; recentesque ornatae classes, ut nemo non ad stuporem miraretur Venetam Remp. ex Cameracensi conspiratione adhuc anhelantem, tot cogere exercitus, tot in locis resistere vi, atque constantia, ac reliquis Italiæ Principibus optatam provinciæ quietem per se solam restituere potuisse. Versabatur in hoc rerum statu Italia, atque in dies magis, magisque terrebatur adventu Cæsaris, cum nuntiûs de pace affertur, sed muliebri firmata ingenio, Margaretæ scilicet Austriacæ, & Ludovicæ Galliæ Reginæ: eaque Cameraci sancita, exclusis cæterorum Principum Legatis, Carolo tantum, & Francisco prospiciebat; Nobis verò nihil consultum, sed quid boni sperari ex ea urbe poterat, ex qua paucos ante annos omnium miseriarum colluvies emanaverat; Meritò igitur commota est Resp. quòd nulla sui ratio esset habita: quare Gallo-

rum

rum locietate rescissa, omnia devovit Sfortiæ, ne avito spoliaretur imperio, atque in novum belli apparatus summa cura incubuit. Tandem, Deo propitio, ad pacem animum adjecit Carolus, in Pannonia per ea tempora Turcicis armis dive-xatus. Igitur in Bononiensi conventu decretum est, ut erogatis Cæsareæ majestati centum aureorum millibus Veneta Resp. quascumque urbes, oppida, castra, juraque obtinisset in continenti, liberè deinceps, ac pacificè possideret, Pontifex Flaminiae civitates reciperet, occupataque Regni Neapolitani municipia restituerentur: ita demùm Resp. post diuturna, ac gravissima tot annorum bella, tantasque calamitates, quas non sine Divino numine in experimentum Venetæ virtutis, & constantiæ illatas putandum, pacem, ad quam semper sua consilia, viresque direxerat, cum dignitate obtinuit.

Bellum Turcicum quintum.
MDXXXIX.

DUm in Italia, rerum quondam domina, Christiani Principes, fatiſne, an invidia, odioque inter se, tùm de gloria, tùm de potentia præliabantur, alibi barbaræ gentes nostrorum sanguine squalabant. Quantum scilicet cruoris hausit Solymanus, Belgrado expugnato, vastatis

Pannoniis, occupata Buda, Viennaque ob-
 fessa : nec minus formidandus maritimis
 viribus, capta, direptaque Rhodo, atque
 inde pulsa Hierosolymitana Religione,
 passim direptis, ac incensis oppidis, ac po-
 pulis immanem in modum cæsis. Hisce
 cladibus, & injuriis excitati Clemens VII.
 Pontifex, & Carolus Imperator in unum
 coeunt, ut effrænem, & barbarum ho-
 stem repellerent, & ita, quam Cæsari
 pacem communium sacrorum religio sua-
 dere non potuit, extorsit Turcarum me-
 tus. Interim Solymanus accepto decre-
 tæ in se expeditionis nuntio, Chariadeni
 celebris piratæ opera Tyrrhenum littus
 populatur : ut à Barbaro illata damna,
 reponeret Andreas Auria, jussu Cæsa-
 ris, in Græciam solvit, repulsoque ex
 Ambracio sinu Himerali, Othomannicæ
 classis præfecto, Coronem, Patrasque in
 Peloponneso obtinuit. Nec defuere præ-
 clara ingenia præliis tum maritimis, tum
 terrestribus enarrandis, quæ per ea
 tempora inter Cæsarem, Turcamque
 commissa sunt. Veneti autem instru-
 ctis sexaginta triremibus cura, ac im-
 perio Vincentii Capellii, insularum, ur-
 bium, littorum, subditorumque defen-
 sioni consuluerunt. Interea per occa-
 sionem belli, quod inter Cæsarem, &
 Turcam gerebatur, non defuerunt, qui
 piraticum in morem nostra maria infe-
 sta-

starent. Prædonum ultio Francisco Dandulo, Adriatici Sinus præfecto mandatur. Hic ad Sasonem in Epiro latrocinantes insequitur: at numerosiores aggredi non ausus, versusque in fugam eorum fit præda, atque Constantinopolim deportatur, posteaque è captivitate reversus, Jaderæ ob rem turpiter administratam mœrore contabuit. Haud multò post Maurus Alexandrinus, ex Coronensi obsidione solvens in Africam, Hieronymum Canaliū, classis legatum, apud Cretam offendit. Noctu id accidit, atque uterque diū inter se falsā de hoste conjectura dimicavit, Venetus sibi obvios piratas, Turca, Hispanos esse suspicatus: superante Canaliō, Maurus, totis penè suis exutus viribus, captus est: attamen statim dimissus, cum nomen ediceret, expeditaque ad Solymannum legatio, quæ nocturnum facinus excusaret, ne Venetus peccasse in fœdera crederetur. Sub hæc, fugato Chariadeno, Carolus Quintus Tunetum recuperat, & precarium regnum Muleassi reddit. Moritur interim Romæ Clemens Septimus, eique Paulus Tertius sublegitur; quo tempore ex Francisci Sfortiæ interitu, novique Pontificis electione, aliæ spes, alii hominum animi, alia quoque Italiæ fortuna videbatur, dum ex publicis

perturbationibus privata commoda sibi a-
 struit ambitio. Absente Carolo, Francis-
 cus Rex ad veteres redit inimicitias; quia
 continuum inter æquales discordiæ malum.
 Allobroges primi omnium Gallica arma
 sensere: eorum veluti contagione infecta
 est Insubria, longoque temporis tractu pe-
 stis illa in Italia morata est, occupatio-
 ne, munitioneque castellorum, captisque
 semel, ac iterum à diversis unis, iisdemque
 urbibus. Postremò resedit morbus, Re-
 gisque cupiditas restituit, cum ad suos
 conatus trahere nequicquam Venetum
 tentasset, qui ex instituto Italicæ liberta-
 tis vindex acerrimus non aspèranda mi-
 litum manu res! Mediolanensium tutabatur.
 Hinc indigno Christianissimi Regis con-
 silio: apud Solymannum criminatur Rem-
 publi. quòd cum Cæsare sentiret, quòd-
 que tandem conjunctis viribus Græcia
 petenda esset. His querelis Barbarus in
 nostram perniciem extimulatur, unde
 illud bellorum erupit incendium, quo
 multos annos grassante penè conflagravi-
 mus. Impia igitur disseminante Ora-
 tore Gallico, æstuanteque in Turca la-
 tius dominandi libidine, advenit Con-
 stantinopoli legatus, sciscitatum, an
 quem socium, vel hostem haberet So-
 lymanus, eundemne Respub. esset ha-
 bitura, utque ea de re Senatus pronun-
 tiaret. Hic quamvis se amicum, fœde-
 ratum

ratumque Othomannicæ domus assereret, atque amicitiam sanctè ampliùs culturum, nihilominùs proposito edicto Veneti mercatores ubique locorum Turcicæ ditionis cum mercibus intercepti sunt, interfecti plures, captivi pessimè habiti, eductæ regia urbe ducentæ naves, Luphtibejo, & Ænobarbo ducibus, atque terra innumerales legiones ad Aulonem profectæ. Tanti apparatus fama expeditiones ad bellum Venetos reddidit, extemplò festinati delectus, procinctæ centum triremium classi præficiuntur Hieronymus Pisaurus, & Joannes Victurius: hisque imperatum, ut alter Corcyræ, alter sinus Adriatici curam, propugnationemque susciperet, sed neuter eorum nisi provocatus in pugnam iret. Porro Turcica rabies per id. tempus in Hispanos effunditur. Barbari nostra prætervecti maria inoffensi, eùm militaria amicitæ signa edissent, in Salentinorum oras grassationibus, & incendiis desævire. Tandem impotentii odio conversi in Venetas ditiones omnia hostiliter agere, prædas abducere, rapere mortales in servitutem, tentare oppida. Incitatus præter destinationem in Rempubl. ferebatur Solymanus quorundam nostrorum ducum temeritate, quoniam regium sibi captum navigium, interceptam cnerariam, ejectumque Adriatico Janusbejum trierarcham.

cham conquerebatur . Hæc propter ab Senatu missa legatio , quæ Barbarum deliniret , sed omnis sollicitudo , studiumque incassum adhibita . Hostilis itaque classis , Hydrunto egressa , Corcyræ parat expugnationem , adjuvante terrestribus copiis . Chariadeno : porrò hostium consilia maturè detegens Pisaurus , utramque oppidi arcem validissimo præsidio munivit , admonuitque subiinde Patres , Turcam non nisi pari virium robore debellari posse : propterea in societatem adversus communem hostem reliquos Italiæ proceres facile perlexit Respub. Ea Romæ inita , atque in primis contracta cum Cæsare , intentioni cura se bello expedit Venetus , eoque alacrius , cum nullus in urbe esset , qui non cum fortunis vitam ultrò proferret . Interim Solymannus Corcyram toto invaserat bello , arctèque vallaverat . Sed obsessi , Aloysii Ripæ , & Simeonis Leonii Venetorum excitati virtute , erumpendo sæpius , æneisque machinis , hostiles undique vires adedò debilitaverant , ut , relicto tandem oppidi munimento , situque , atque exploratis propugnantium viribus , hostis re infecta discesserit . Verùm dum Constantinopolim repetit , in ipso transitu Buthrotum , in Communitia castrum , occupat , deportatis in servitutem incolis . Hæc Turca agebat , cum Pisaurus , in Adriaticum

deflectens, Venetis obtinuit Scardonam, opportunam ad invadendam hostilem regionem arcem, non procul à Sico. Victurius quoque Obroatium vi subjugavit, oppidumque tandiù retinuit, donec postea Liburnorum, seu Uscochorum, adversæ nobis gentis auxilio, Præfectique incuria, amitteretur. Solymanus ex his confirmato odio majus bellum eoquebat, ut exinde Cassino, & Chariadeno præciperet, oppugnandum quidquid Veneto- rum esset. Itaque per Cassinum Nauplia, & Epidaurus oppugnantur, irritò tamen conatu; alibi eversa Ægina insula est, Paros subacta, Naxus facta tributaria, atque Chariadeno, quacumque ductabat classem, reliquæ è Cycladibus parvere. Perturbatæ tot ærumnis Reipubl. major accessit trepidatio, cùm fama per Italiam augeretur, Solymanum præsentì anno MDXXXIX Cretam insulam aggressurum. Hinc nullam ulteriùs moram passi Patres, explicato jam bello adversus Tyrannum, Cæsaris, ac Pontificis auxilia festinarunt. Nulli non metuendus erat hostis, nec nisi robustissima vi coerendus. Itaque ex fœderum legibus maturantur suppetiæ, summaque maritimarum rerum cura, ac in cæteros navium ductores imperium uni Andræ Auræ, Cæsarianarum virium moderatori, confertur: nostræ classi Vincen-

tius Capellius: Pontificiæ Marcus Grimanus, Patriarcha Aquilejensis præerat; totusque apparatus CC. ferme triremibus constabat. Nondum tamen Venetus classiarius urbe solverat, cum jam Chariadenus, Ægeum permensus, atque in eo sparsis potitus insulis, Cretam applicuit C. ac L. navibus. Porro in Rethymnum agrum temerè suos exposuit, quia supra fidem durè nimiùm ab exeuntibus oppidanis excipiebantur. Sed ab Suda Cydonemisque tutiori descensu quidquid obvium habuit Barbarus more suo afflixit: urbis denique attentans excidium ab Andrea Grito Præfecto sommovetur parva Italarum manu, totaque postremò ab insula turpiter ejicitur. Interea Cassinus Naupliam in Peloponneso rursus invadit, Nadinum, & Tranam arces evertit, & ulterius inferens arma tanto terrore corripuit Illyricum, ut momento videretur Turcæ cessurum, nisi Sicensium constantia in toleranda obsidione eam provinciam confirmasset, solertique patientia docuisset, nullo metu costernari libertatis custodiam. Hic rerum erat status antequam ex compacto convenissent Capellium Corcyra in insula Pontificii, Hispanique classiarii: & ubi de belli ratione condictum est, Grimanus Ambracii sinus municipium nomine Nicopolin, Prævesam hodie, Pauli Justiniani virtute propè captum omninò subjugasset, nisi dissipatus

tus in vicina rumor Nicopoleæ oppugnationis finitimos barbaros ad opem concivisset. Quare ille à validioribus turmis petitus obsidionem solvere cogebatur. Ita invidente fortuna, egregii ausus laude fraudatur Pontificius ductor. Terrestris potissimum ea erat expeditio, quæ nunquam Aurix placuit, qui Turcam navali tantum pugna delendum opinabatur, ideòque supervacuum ducebat circa arces, murosque immorari. Mari ergo rem statuit decernere: eadem in hoste videbatur voluntas, qui ex Epiri faucibus in apertum classe promotus nostris pugnandi copiam exhibuit, & insigni quidem audacia, quia majori pollebat vi, sed certamen haud detrectavit Christiana classis. Capellius primum aciei locum, Grimanus postremum obtinuit. Ille hosticam, quo fremebat irarum æstu, impetuque adortus Aurix sententia victoriam retulisset, nisi è vestigio Veneti ducis nomen, & virtutem reformidans Chariadenus. notas angustias, latebrasque captasset, & obversis puppibus in Ambracii finus anfractibus sese abdidisset, ubi aut omninò perdi, aut exitu prohiberi potuisset, si eadem Aurix mens fuisset, qui patienti tantum æquore cum Turca pugnandum inclamabat, frustra conquerente, ac obiciente Capellio, Christianorum esse aut generosè vincere, aut pro patria, & pro ipsa religione gloriosè occumbere. His

tandem victus Auria prælium imperat . Sed cum Veneti consilio nequicquam fortuna votis initio respondisset , magis in arctas fauces penetrante hoste , palàm Cæsarianus dux se subducere , prælii meturre discrimina , angustias declinare , timere insidias , declinandis , quàm contemnendis hostibus melior . Turca victus haud dubiè fuisset , si nostri ausi essent vincere . Inde cum ipsi cresceret audacia , è faucibus erumpens foederatam carpsit classem , eique duas onerarias , totidem majores naves , triremes quatuor ademittit . Ob suspectam quoque Auriae fidem restinctus in cæteris ducibus generosi animi ad gloriam impetus elanguit . Ex hac veluti fuga Corcyram proræ conversæ : ad proximam insulam Paxum vectus Chariadenus , ut exprobraret , traheretque in pugnam meticulosos . Corcyrae hybernatum est : deindeeducta classis per Rhizonicum sinum ad Neocastri oppugnationem . Hanc præcipuè moliuntur Veneti magnis curis , animisque , ut acceptam superiori anno labem obliterarent : in muros munitissimi oppidi compactis scalarum vice remis conscendunt , tutioremque expositis postremo loco Hispanis reddunt accessum . Sic mari , terraque re satis gesta feliciter , Neocæstrum capitur , ejusque arx , quæ quasi altera civitas reluctabatur , triduo post domita est . Oppidum conjunctim subactum .

Etum ex formula fœderis Venetæ Reip. debebatur : illud tamen Hispani suo juri asserunt, præsidio imposito. Facinus uti erat indignum, ita acerbè reprehendit Capellius, atque Auriam, hominem Ligurem, antiquum Veneti nominis hostem execratur, cùm quæcumque ageret, ad unius Cæsaris utilitatem revocaret. Eiusdem quoque vel ignavo, vel maligno consilio effectum, ne post debellatum Neocastrum penitùs etiam mari deleretur Chariadenus, quem capti oppidi fama properantem ad subsidium fœda tempestas aggressa ad Sasonem insulam totius fermè classis jactura, strageque exarmaverat. His de causis, & quia suam Auria maturavit in Siciliam profectionem, odisse cœpit Venetus Hispanorum ingenia imperii avida, infidaque, cùm præsertim Neocastri, ejus gentis, præsidium in Ascrivienfes quoque crebrò per scelus infiliret. Itaque averso à societate animo, in spem futuræ pacis inducias à Solymano petendas statuit. Attamen ille ferox, furensque amisso Neocastro, collectis in unum viribus bellum, vindictamque sollicitabat, deductisque in Peloponnesum copiis Naupliam, Epidaurumque acerrimè premebat. Sub ea quoque tempora Dragutes, classis præfectus, nostra maria belli tempestate præclusit, Cretam attrectavit, atque imminuta Francisci Pâschalici clas-

classe tribus abductis triremibus, Cydonium agrum populatus est: urbi demum imminentem militare Antonii Calbi Prætoris robur depulit. Ad hæc Chariadenus, reparatis naufragio navibus, Neocastrum vi petit. Obstinati hostis metu perculsi Hispani Veneto illud idem municipium tradere peroptabant: sed quæ debita ex fœdere sæpius antea petita nunquam obtinuit, importuno quidem tempore oblata recusavit. Cum itaque dies aliquot concussum esset oppidum, Turcæ iterum patuit, præfidiariis aut occisis, aut in servitutem raptis. Finitimæ gentes, quodam veluti morbi contactu, barbaro manus dedere victas: concidit eo pacto Rizanium: stetit Ascrivium Matthæi Bembi constantia. Hæc agebantur, cum Petrus Landus Princeps ad Turcicum Imperatorem Legatos mittit, ut, quæ pacis studia Venetus animo volvebat, eadem apud Solymannum perficerentur. Thomas Contarenius Barbarum cum primis frustra adiit iniqua flagitantem; mox Aloysius Baduarius. Cupiebat Resp. se novennali bello, eoque gravissimo explicare: nullum nempe fœderi fructum experta: suspectam esse Hispanorum fidem: in se denique unam belli prima, & ultima damna intentari. Accedebat his summa rei frumentariæ penuria: & quod commeatus ab confœderatis Principibus denegati, à Turcico Mœsiæ præfecto

Et concessi uberrimè in urbem comportarentur. Baduarius itaque Constantinopolim ablegatus, ut pacem pecunia redimeret: sin id parum procederet, quovis modo obtemperaret secretioribus mandatis, quibus injunctum, ut ex necessitate Nauliam, Epidaurumque Turcæ publico nomine offerret. Non defuere perfidi cives, qui rem silentii sacramento actam detegerent, unde Baduarii in regiam urbem ingressum prævenit prodita fides. Inde quævis pecuniæ summa expetitarum urbium, loco ab Solymanno constantissimè neglecta; atque ita in eas pacis condiciones ire Venetus Orator coactus est, quas Turca maximè optabat. Non alio modo firmata pax, cujus nuntius Venetias allatus, etsi omnium ordinum sui expectatione crexit animos: ubi tamen de conditionibus est relatum, mirum, quàm acerbus dolor, ac veluti stupor universam civitatem occupavit. Proinde in Baduarium fremere vulgus, jactare convicia, illum postulare ad supplicium. At demùm proditione detecta, sumptaque de perduellibus pœna, viri illius nomen, famaue illustrior emerfit, ac gratior pax extitit, quæ cuivis bello etiam iusto præferenda est.

Receptum Marianum.

MDXLII.

Marianum, Fori-julii oppidum Venetis adhærens æstuariis, Reipub. Cameracensi conjuratione sublatum proditione, hoc anno Ferdinando Austriaco Romanorum Regi subtrahitur Beltrandi Sacchiæ Utinensis astutia. Hic cum sibi notis, fidisque sociis mercatorem ementitus intrat oppidum, Germanumque præsidium ejecit: accitoque Petro Strozio Florentino exule castrum Gallis acquisitum voluit, erectis regiis vexillis. Molestus Senatui hic nuntius fuit, quia ob id factum Austriacis esse poterat suspectus. Se verò à fraudeliberum, foederumque cultorem publicavit, multæ tatis carcere Sacchiæ affinibus, subrutisque munitionibus, quas Strozzius mare versùs extruxerat. Proximum interea bellum urbi imminere videbatur, cum jam invicem committerentur Gallus, & Germanus. Ille Marianensibus importabat auxilia: hic non tam terra, quam mari oppugnationem movebatur. Maritimas vires impediabant Veneti, ne ullum sibi jus Ferdinandus acquireret in Lignano portu, quò Tergestinæ naves ad obsidendum convenerant. Subinde à Strozio venit legatio, qua sibi Mariani dominium regia Francisci donatione pro-

proprium fateretur, illudque Reip. venditum; emptionem si recusaret illa, non deesse præpotentem Principem, cui quovis ære placeret oppidum. Patreshaud ignari, eum esse Turcæ addictum, cum nihil acerbius ducerent, quàm in suæ ditionis visceribus, atque in conspectu ipsius urbis spectare Barbaros, statuere pecunia redimendum esse oppidum, numeratis Strozio trigintaquinque aureorum millibus. Propterea ablegati sunt ad Ferdinandum Oratores, qui exponerent, non tenuis potiundi castri libidine, sed necessitate compulsam Senatum, minitante Gallorum duce Strozio, se Turcis illud traditurum, Castrum coemisse: nihilominus quæ suboriri inde poterat inter Austriacum, Venetumque dissensio, prudenti Senatus consilio alia non modica Germano Principi nummumerogatione discussa est: atque exinde in Marianensibus suum jus quietè in hunc usque diem Resp. tuetur.

Uscoci primùm compressi.

MDXLVI.

L Iburnia supra intimum Adriatici sinus recessam, vel ipso antiquitatis testimonio latrociniis infamis, ab sævo, prædæque assueto populo incolitur. Veluti è Narentanis cineribus enata gens, quæ iterum rapinis, fraudibusque rem-
Ve-

Venetam turbaret. Perditis, furiosisque latronibus, quos Uſcochos vocamus, audaciam dabat alieni belli tumultus, implicataque gravissimis curis Rep. impune grassabantur. Etiam ausi non semel Turcicas ditiones prædari, Solymannum in ultionem sæpius provocassent, nisi memor pacis Senatum prius admonuisset, ut infensos latrones reprimeret, ne sibi demum necesse foret classem ablegare in Adriaticum adversus rapacissimam gentem. His querelis non minus, quam acceptis incommodis jussu Patrum in grassatores multis biremibus procursum est, atque ita primum ejus gentis strage, fugaque compressi impetus, solum, salumque truci prædone purgatum, Turcica ira discussa.

Expediſio ſexta in piratas.

MDXLVIII.

PIratae plures annos hæc maria veluti obſeſſa tenuere, ut nihil tutum reſtaret ultrò, citròque comineantibus: direpta navigia, intercepta corpora, furta, cladesque Venetiis quotidie ferme exaudiebantur. Humani generis hoſtes, mandante Senatu, Laurentius Amulius perſequitur. Hic dum toto errat Adriatico, ut graſſantem peſtem extingueret, Sabbam piraticum caput cepit, & occidit.

dit. Rustenus, digressio in Persidem Solymano, Constantinopolitanus Præfectus viri sibi amicissimi necem armis ulcisci parabat. Quamobrem ad placandum Rusteni animum, ne alieno tempore in se periculosissimum bellum converteret, Reipubl. maris imperium Amulio abrogat, imperatque exilium, donec sopita Barbari indignatione, patriæ, ac pristinis honoribus restitueretur. Quartodecimo post anno invalescentem magis piratarum injuriam coercuit Antonius Canalius, qui latrocinantes insectatus ad Picentum littora fugavit: illi in continentem pro effugio dilapsi malè ab incolis excepti sunt. Sub idem tempus etiam Christophorus Canalius haud procul Cephalaria pari exitu prædantes oppressit, & ad Sasonem quinque piraticas adortus aut captivitate, aut fuga debellavit, duabusque in potestatem redactis, reliquas intento quam maximè remigio insecutus pessumdedit, ultimo tamen fato, cum ex acceptis impigrè vulneribus Corcyræ occubuerit. Altero inde anno Philippus Bragadenus adversum idem barbarum genus in Apulam oram effusum opportuna ad ultionem classe navigavit. Res prosperè navata est propè Sipontum, ubi, quos cum infami biremium apparatu non castigavit occisione, prædaque, vivos ad vicinarum gentium rabiem propulsavit; ut enim

nim attigere solum, à convolantibus undique agrestibus necati sunt. Eadem ferme tempestate cum Dragute, qui oppugnatis, captisque juxta Ænariam insulam aliquot Christianorum navibus Ægeum repetebat, Petrus Thronus Cretici maris custos concreditur. Victus, trucidatusque hostis est, licet se non piratam, sed Solymanni militem assereret: verum regi frænis nequit ira, victoriaque feroces primos impetus habet. Delatam in hunc modum viri necem graviter adeo tulit Turcicus Imperator, ut illam se bello vindicaturum denuntiaret, nisi à Veneto sibi ex æquo satisfaceret: ea propter Senatus in Thronum animadvertit exilio, quod pacis violasset conditiones, quibus cautum, ne in Turcas milites à certamine superstites capite sæviretur, sed vivi Byzantium in custodiam remitterentur: sic punita Throni audacia, adjuvanteque apud Solymannum Danielis Barbadici Legati dexteritate, irati Principis animus reledit. Postremò varios in dies congressus nostri Classiarii committebant cum effera ea prædonum colluvie rapinarum, ac sanguinis avida, commixtis in unum Turcis piratis, Uscochisque, qui tum ob corporum, naviumque pernicitatem, tum astum in exercenda piratica nunquam penitus extingui potuere. Sub hæc tempora Equites Rhodii magna sui nominis invidia in nostros non dissimili arte involuti fue-

fuere : nam primum duce Capuano Priore, Rhodiæ naves per Ægeum, & Lybicum mare infestis prædis agebantur, nec Turcarum manubiis contentæ, Cyprios etiam, & Cretenses populabantur : in hos incruento bello animadversum est, evulgato edicto, quo Hierosolymitanæ Familiæ opes, quæ in Reipubl. ditionibus locupletissimæ sunt, sequestra inhibitione detinerentur, quousque per Rhodiorum Magnum Magistrum damna, ut factum est, dominis pensarentur. Eisdem ad Chisamum quatuor triremibus similia aulos Philippus Piscalicus Cretensis custodiæ Præfectus potenti, ac irata classe turbavit, captis ratibus, & viris. Ultio hæc per Europam mira prævaricatione Venetæ sinceritatis notata est ; verum ubi Reipubl. studium marinæ quieti intentum innotuit, eandem ab omni labis macula liberavit.

Bellum Turcicum sextum Cyprium.
Nicosia subacta.
 MDLXX.

SElymus ad Turcici imperii gubernationem evectus, mortuo Solymanno patre, dum latius dominandi cupiditate flagrat, ac legi in primis optat inter ditiones, titulosque suos Cyprum, in ejus insulæ opes impetum machinatur :

Q.

tur :

tur: ita nulla alia causa, nullaque iusta belli occasio unquam prælata, quasi ex arte novi Imperatoris esset pejerare, rescindere fœdera, omniaque agere ad voluntatem. Accedebat Mustaphæ aulici magnatis assentatio, potentiam, vires, majorumque exempla cupido Principi commemorantis, Christianorum quoque discordias, civiles pervicacias, & inertiam: differebat contra verbis, & gratia Mehemetus Præfectus Prætorius, quem Barbari Visirum appellant supremæ apud suum Regem dignitatis. Omnia hæc litteris Marci Antonii Barbari Legati ut asserebantur, sic credita: neque enim, quæ secretò etiam agitabantur, diù vigilem ministrum latere poterant; cum & per id tempus nonnullæ mercatorum Venetorum onerariæ diducerentur, quasi iis opus esset regio usui ad res omnino diversas, & distantiam alio orbe expeditionem. Igitur prætexentis Turcæ fraus Senatum diù in suspenso non habuit: cœpti delectus, omnisque Illyrici, & Epiri futuris incursibus patens ora valido præsidio, & com meatibus instructa: Legato Joanni Legio injunctum, ut navibus, Julio Savorgnano, ut terrestribus copiis eam provinciam, quæ opus, tutaretur: in Cretam abire iussus Laurentius Amulius ad supplendam XX. triremium classem, Lucæ Michaelio Cydon demandata, Sebastiano Venerio Corcyra:

Fran-

Franciscus Duodus majoribus triremibus XI, minoribus LXXX. nauticæ peritissimi cives præfecti sunt: navium procuratio Petro Throno, nuper patriæ restituto commendata, & his omnibus mandatum, ut parerent Hieronymo Zannio totius classis Imperatori, quæ erat triremium LXXX., quinquere-mium XI., onerariarum navium X., & myoparone ingenti. Sfortiæ verò Palavicino omnis rei terrestris summa administratio commissa. Quoniam autem instantis belli graves procellæ non solum Veneto imperio, sed cæteris quoque nationibus præfagia inconditi periculi ex alto ferebant, nulla mora visum est impendentis ruinæ admonere in primis Romanum Pontificem Pium V. per Michaellem Surianum. Ille ad certissimæ calamitatis famam excitatus, & ad Venetæ existimationis memoriam, & versus beneficia in Sedem Romanam promptus, inter etiam purpuratos Patres obloquente Granvellano, studio Hispanicarum partium, nec meritis Reip. nec officio defuit suo. Jam primum statutis per suffragia Cardinalium subsidiis, quem vicinæ fortis contagio cauturum sibi inter alios noverat Philippum Hispaniæ Regem, Ludovico Torreo Oratore, hortatur ad fœdus, inquam curam Leonardus Donatus jam

tum à Rep. eòdem fuerat ablegatus . Maximiliano Cæsari ad hæc per Joannem Michaelium , Caroloque Gallorum Regi per Aloysium Contarenum est significatum , in quid Selymus incumbere , dum sub alieni belli tumultu , Venetæque ditionis aviditate , impunè orbem Christianum sibi provinciam destinaret . At ille induciis cum communi hoste jam antea pactis ; hic provincialibus turbis , suorumque dissidiis à tam gloriosa , & necessaria ope sese excusavit . Thamafum Persarum Regem aliæ rationes , & rerum momenta distraxerunt : cum sedulo cum quoque bello huic implicare , nobisque addicere studisset Vincentius Alexander fidelis industriæ civis , & orientalium linguarum peritissimus . . Emicuit promptum sanè Italorum Principum in juvanda Republ. studium . Interim dum Senatus per diversa negotia hoc modo diducitur , Turcæ in Illyrici , atque Epiri regionem latrocinantes erumpunt ; nostrorumque naves , & mercimonja horribili furore diripiunt . Hæc damna ut humanæ societatis hostes pari vice pensarent , omnes Venetiis degentes Turcas , eorumque merces publicæ custodiæ Patres subjecerunt . Sed per eos dies magis procerax Turcarum insolentia emerfit , cum Hibraimus à M. Antonio Barbaro Cyprium

prum peteret. Prætextus regiæ libidinis erat vel fiduciarium jus Ægyptiorum Regum in Othomannos transfusum; vel quasi per nefas favisset aliquando Cyprus piratis, hoc armis esse vindicandum. At Venetus Legatus cum & fidem conventiculi, & jura fœderis sanctè à nostris observata diceret, neque ullam subesse justæ belli causam, nihil aliud tum apud perfidos, quàm ad moram intervallis verborum profecit, ut interim, dum Cubates Zausius orator Turcicus Venetias commigrat, Senatus accuratiùs expediendi belli tempus nancisceretur. Cubati Cyprus polcenti, armaque sui regis minitanti, ni pareat Resp. maturè responsum, Venetæ dominationis eam insulam esse, quibus animis Patres illam susceperunt defendendam, iidem ad necem usque retenturos: adesse Deum immortalem, qui justæ causæ patrocinetur, & eundem, fœderum ruptorum ultorem, scelestis non defuturum. Subinde Hieronymo Zannio mandatum ad Jaderam operiri quinquaginta triremes à Philippi Regis subsidio. Hoc tempore dum pessima lue, fœdisque morbis ad excidium penè corripitur Veneta classis, rei gerendæ occasio traxit hostes in agrum Sicensem, ubi Retbilizum, & Dassena oppida illius provinciæ quasi assurgentes speculas multa strage, hoc

minumque captivitate expugnant , & populantur : parumque abfuit , dissentientibus militari simulatione tribunis nostris , quò minùs ultrà pergerent ad occupandum Sicum , nifi irrumpentes fortium scæminarum continuisset audacia , quæ intentis alibi viris , vacua urbe egressæ , tandiù naviculis , pilis , saxisque sinum , & portus fauces tutatæ sunt , donec Petrus Pisanus Cestæ promontorii custos auxilio veniret , ac muliebrem vim fugientes hostes quà cæde , quà vinculis debellaret . Pari fortuna captum , & exustum Dobrovodum Turcicæ ditionis municipium , duce Alexandro Donato Antibaris Prætore . Sub hæc revertitur Byzantium Cubates cum Veneti Senatus responso , quod , vix dici potest , quàm superbum Regem omnia suo fastu complexum pupugerit : prohibitus ob hoc M. Antonius Barbarus Legatus , custodia addita , domo exire , idemque in alios Alexandriæ , & Assyriæ Venetos Consules statutum . Iussus Amurathes cum XXV. triremibus subsidia Cypro avertere , & Pialis cum LXXV. reliquam Mustaphæ manum ad Rhodum expectare . Ita seriò per hostes evulgatum est bellum , dum interim apud nostros contentionibus ad ignaviam certabatur , subsidente more suo Auria , qui ambigua Philippi auxilia nostris copiis adjungere obtentu regii mandati sese pos-

se negabat . Marcus Antonius Columna Pontificiæ classis ductor cum XII. triremibus Veneto agmini adhæsit fideliter . Cæterum otii , quietisq; impatiens Sebastianus Venerius , ac sua incensus virtute in proximum continentis Chaoniæ oppidum Suppotum , montanum , & celebrem latronum , piratarumque nidum evertit . Verum quoniam sine accolarum studio consilia haud ita facile cessura videbantur : mixta donis ingentia promissa , pertæsum jam inde etiam Turcici dominatus Epirotam in nostras partes traxere , atque sic jurejurando , & datis obsidibus firmata locietate in hostes promotus à classe miles acriter bellum miscuit , diùque tentatam & impetu , & tormentis alpinam sedem , scalis ultimò ad irruptionem aggressus est , omnia ferro , & flamma , si votis cederet , vastaturus : hoc postquam incluso hosti perspectum esset , noctu ille muros transgressus per scopulos , cautesque vitam fuga redemit : nostri sub auroram vacuis mœnibus potiuntur : quo terrore pleraque circum loca Veneto adhæserunt . Dum hæc fiunt , Turcis multum , & anceps fuit de belli primordiis consilium : quidam infestandum Adriaticum mare , alii impedienda in Cypro subsidia , nonnulli Cretam hostili motu terrendam suadebant : at avido Regi infedit desiderium ipsam , qua insaniebat , insulam ado-

riendi . Ita obtinuit , ut Chium peteret
quamprimùm Pialis , eoque loci omne
futuræ expeditionis robur cum Musta-
pha expectaret . Principis voluntatem
consecuta extemplo sunt prospera facta .
Rhodum cum CCC. navibus in unum
collecti hostes appellant , in Cyprum
inde pro commodo trajecturi . Ubi in
publicam vocem tantorum motuum fa-
ma erupit , Zannius , ut venienti bello
occurreret , tempestivè in Cretam
transmisit : ibi navalium sociorum ja-
cturam partim voluntario remige , par-
tim invito , & ex hoste adjacente tra-
cto redintegravit . Hispana classi per
eos dies regio jussu Venetæ jungitur . Sic
sociatus miles quò ad subeundum labo-
rem inertior , eò ad discordias prom-
ptior , inanibus primùm jactantiis , mox
frivola rerum circumspeditione , & va-
no consilio , classiariis Turcicis aggre-
diendæ expeditionis tempus reliquit . In-
terim Mustaphas , & Pialis de Christia-
norum gestis edocti , nihilque ultrà nec
verendum , nec cunctandum rati , secu-
ro tandem cursu Cyprum tenuerunt .
Kalendis Quintilibus è Papho Barbara
classis conspecta inter Curium pro-
montorium , & Limissum subsedit . Cir-
cumferebatur interea , quàm maxima
poterat , in omnem partem , & in uni-
versam insulam diligens cura Reipubl.
tùm

tum subveſtando intra oppida, & arces
commeatu, tum opportuno milite, &
opere dubia firmando, paſſimque & na-
viter ad tantæ molis experimentum didu-
cta, & circumfuſa auxilia. Neſtori Ba-
leonio ſupremo caſtrorum Præſecto Re-
gni ſedes Nicoſia, antiquis Trimethus,
demandatur. Marcum Antonium Braga-
derum Tamaffo, ſeu Famaguſtæ, adſi-
ſtere placuit. Nicolaus Dandulus per Ve-
nerii abſentiam totius inſulæ imperium
vicario honore ſuſcepit. Deliberatur in-
ter belli duces de omni fortuna: & in pri-
mis ſparſa circa Nicoſiam loca, vicique
complanati, quò proſpectus in hoſtem li-
berior ad omnes caſus pateret. Porro ni-
hilo æquè ſtatura Cyprus videbatur, at-
que robore, nerviſque militum Italorum,
ſed ſœdum, & atrox exitium intra eos
dies ita miſerum vulgus putri morbo,
& ſæva lue confecit, ut per ſummam
vaſtitatem nullus omnino par hoſti nu-
merus ſuperſuiſſet, niſi ex iociorum de-
lectu utcunque in præſens ſuſſecti ordi-
nes fuiſſent. Meliore fato Othomannica-
rum partium proceres momenta rerum
captabant. Nam cum alibi Petrus Ronda-
cius Epirotarum ductor infeſtiorẽ his in
terram redderet deſcenſum; verſis navi-
bus ad Salinas, ſecuro, patentique littore
concedunt, noſtræque admirabundi ſegni-
tiei, nullo obſiſtente, XX. peditum mil-

lia exponunt. Ubi igitur solitudinem vident, certique nullum subesse dolum, pari clamore, & impetu res Cyprias invadunt, omnes circum incolarum opes proterunt, fruges, & agros ferro, ac igne vastant, diripiunt vicos, passimque omnis crudelitatis, ac ferociæ edunt argumenta. Hæc inter à ducibus agitatum; placeretne primum Nicosiam, an Tamassum adoriri. Pialis, cui prius hæc tentanda videbatur, situm urbis natura, & arte adhuc debilem extollebat, & imparem obfessorum numerum, ac proinde minores animos: exemplo demum ejus loci cessura per metum reliqua. At Mustaphas in Nicosiam, ceu belli caput ingerenda spicula differuit: plus meticulosæ turbationis inter plures esse, imò plura laborum præmia ex ingenti, & diuturna felicitate divite oppido. Sic decretum, eductæque in eam expeditionem: L. peditum millia, & quingenti supra duo mille equites: simul armatorum IV. millia cum recentissimis equitum adversus Tamassum immissa, una cum impedimentis auxiliorum, cæterisque usui cessuris. Igitur ad Nicosiam hostiles obtentatæ vires, explicata nullo obstante castra, omne tormentorum genus aggestum, militarique vallo circumdata urbs. Hæc ut procul à Dandulo Regni Præfecto visa sunt, ingenti formidine trepidare, pavore concuti, omnia des-

spe-

sperare , ut paratissimum quemque
 exemplo pessimo quasi certi exitii præcius
 consternaret . Tamasso ob id in spem
 subsidii evocare placuit Baleonium , &
 admonere periculi morantem in Creta Zan-
 nium : at Bragadenus virum , quo sibi
 tum opus erat , neque dimittere potuit ,
 neque navis speculatoria mali nuntia ,
 impediende Turca , optatum tenere cur-
 sum . Sic desperatis rebus , quam Dan-
 dulus ignominiam , & labem abolere hu-
 mana virtute , & virili manu poterat ,
 votis , indistaque prece conatur avertere .
 Pium populi studium mira Francisci
 Contareni Paphii Antistitis religio excep-
 pit , & promovit . At hostes prosequi
 valde oppugnationem jugi tormentorum
 verberare , fesso per diem militi nocturnum
 subrogare , nihilque penitus omittere ,
 quod propugnaculi Constantini , & Po-
 docatari excidium maturaret . Ea neces-
 sitas , seu fortuna nostros quasi lapsos
 ultima lege restituit : obfirmati enim in-
 ter se denso procursu exceperunt Turcas
 meridiano labore , æstuque torpentes ,
 consternatisque nostri instare , sternere
 obvios , palantes occidere , tormenta cla-
 vis configere , metum cæde miscere .
 Hæc læta initia hosti esse potuissent fatalia ,
 si equitum phalanges monitu Dandulimar-
 tem æquassent : at ille solita excors igna-
 via ab egressu cupidos vel propria manu

retraxit. Sic ubi timidissimus imperator
 neglexit fessos & sole, & pugna juva-
 re milites, sub ipsis portis à recolle-
 ctis hostibus mactantur, scelere ducis
 exclusi. Hinc Nicosiæ mœnia quantò
 minùs spei obsessis ad præsidium, tantò
 plus fiduciæ Barbaris ad victoriam dabant,
 qui proinde clade sua cauti ultrà instare,
 oppugnationem firmioribus operibus, vi-
 neis, & cuniculis properabant: jam-
 que legiones hosticæ fossis oppidi, & pro-
 pugnaculis hærebant: quin etiam pone
 instantium ictibus cesserant defensores.
 Ex his languere palàm Cypriorum animi
 omni opus spe frustrati, cedere labori, &
 fortunæ visi sunt, nisi quos aut deditioni
 proposita spes, aut sanè præclaræ mortis
 solatium animabat. Non jam amplius
 clausorum languidæ vires Turcas mo-
 rari poterant, quò minùs vallum sub-
 ruerent, effoderent Podocataram muni-
 tionem, quaterentque portas, gladiis-
 que, & securibus captivæ urbis aditum
 sibi aperirent. Irrupere ergo armatæ co-
 hortēs in sævitiam, & cædem, supra
 quàm credi possit; ubi quidquid inter ca-
 stra, forumque vacui immodica strage, &
 varia ubique cadentium forma, ac omni
 imagine cladium completum est, Musta-
 phas post hæc cruentam urbem ingressus
 primum edixit, ut ab armis, necibusque
 cessaretur, promissa inermibus salute:

fa-

facinori fidem suo jussu addidit Dandulus, utque arma abjicerentur, in spem vitæ cavt. Tum verò securitate corruptior hostis militari licentia ubique grassabatur, non dignitas, non ætas, non aræ protegebant: & matronæ, & religiosissimæ virgines, & sexus omnis ferro, ac stupris fœdatus. Nicolaus ipse Dandulus, Contarenus Paphi Pontifex, cæterique magistratu, & fama clari contrucidati. Inde facibus sævitum, quas, ubi prædas extraxerant, in vacuas ædes, & inania tecta jaculabantur. Hunc Nicosia habuit lacrymabilem omni ævo exitum: XX. hominum millia eo die cecidisse constat: XX. ex timoribus tantum superfuere exitio patriæ. Destinata barbaro Regi opulentissima spolia Constantinopolim cum vererentur, arserunt ingenio memorandæ Virginis Cypriæ Arnaldæ Rocasæ, pudicitiam, & suorum cineres novo igne vindicantis. Tamassum inde perniciousis armis, ventisque promotum XIX. Kal. Oct., ubi ad terrorem Danduli rescissum caput Bragadeno ostentatum, ne quam ultra spem foveret. At ille, verso in virtutem metu, urbi sibi commissæ undequaque prospicere, duces stimulis gloriæ, milites fiducia excitare, atque in omnium aspectu perfici rem sacram jussit, jurejurandoque fidem à paratis civibus tulit in omnes casus duraturam. Emissæ

non-

nonnullæ leves turmæ non inutili velitatione hostes ab operibus bellicis distinguere, cum interim murales quoque machinæ in subeuntes non sine strage immitterentur. Quare majoris periculi pavens Mustaphas, inclinante jam etiam anno, castra dimovit Tamasso. Discedentium stationes aggressus Baleonius solo complanavit, non paucis à tergo cæsis fugitivorum. Sed nulla longi temporis felicitas: & hæc dum fiunt, variatum non leviter inter nostros classarios duces in Creta de auxiliis maturè deferendis. Auria causatus hyemem, & imminutam lue classem, cessit tandem Zannii consilio, ut in hostem iretur: dicta profectio die, ad Heracleam, quæ nunc Sitia, jungi classes convenit. Hinc cum ad Chelidonium promontorium è regione Ciliciæ transportarentur, subortæ tempestate Pontificæ, ac Venetæ triremes portum ejus provinciæ, incolis Vathium, ingressæ sunt: Auria sub Anchoris in alto stetit. Sic morantes infelix Nicosiæ nuntius heu nimium tardos excepit: singulos duces pudor, & conscientia deficiæ mutuis obtutibus arguebat: præclarum fuisset, & utile, ut quicquid irarum in castris conceptum erat, in hostium capita continuo effunderetur; quia puncto sæpè temporis maximarum rerum momenta vertuntur: unum Cypriæ salutis

auxilium in celeritate situm erat. Verum Columna, & Auria muneris sui obliti occidentem solem deliberato in hyberna animo spectaverunt: ita, proh nefas! continuata socordia Veneti quoque, relicta Cilicia, Cretam repetiere, quò tutum omninò Turcæ triumphatori Byzantium pateret via. Levia exinde, ac variæ sortis prælia ad Parum insulam gessit Vincentius Maria Priolus, & ad Pargam Franciscus Cornelius: ille de speculatoriis hostium navibus, vel in morte victor; hic illustris jactura oppidi, atque adeò in ipso quidem aspectu Corcyreæ classis notus. Intereà perculsus improsperis successibus Senatus Zannio diem dixit, summumque maris imperium meliori spe Sebastiano Venerio commendavit, designatis in bellicam legationem Marco Quirino, & Petro Throno, ut vel sic cum ducibus fortuna tandem mutaretur. Pium quoque Pontificem non levis publici excidii angebat cura, nec prorogandam censebat hostium vindictam, cùmque non posset ab uno Veneto imminens Christianæ Religioni servitium repelli, salubri, constantique opus esse fœdere. In hoc dum summus Antistes Hispanum accuratè concitat, Granvellanus ambitiosa controversia cuncta suo Regi deferens societatem nobis cum pernicie, sibi cum fortuna securitatem deposcebat. Cæsarem

haud

haud oblitum induciarum memoria octennalis pacti: Carolum Gallorum Regem intestina diffidia nunc etiam à laude, officioque continuere.

Tamassus expugnata,
MDLXXI.

QUasi non esset usquam dimicatum, sic arma rursus præsentī anno tractata, licet Turca, ut Barbarus Venetus legatus nuntiabat, belli calores diffilaret mendacio pacis. Primum Marcus Antonius Quirinus copias auxiliares XII. triremibus cum supplemento Tamassum festinare iussus: & secuta consilia ducis est mitior aura, quæ intra quintum diem classem in portum dedit, ubi desidia, & securitate effusos hostes circumvenit, eosque cum insigni navium clade disjecit, ac suos annona juvit. Verum, qui per bellicompendia Epidamnum tentabat Venerius, modica fama, & exitu nullo Corcyram discessit, ut Paragam muniret, cui, fusoid temporis Emanuele Murmuro, Turca imminēbat. Pari fortuna acta res apud Alexium Scodræ munimentum per Jacobum Maltestam, rebus tamen adversis laudatum, quod à suis desertus caperetur. Subinde in maximam spem belli, lætis ubique omnibus, Venetiis nuntiatum est, foedus Romæ sancitum inter Pontificem Pium, Hispania-

niarum regem, & Venetum Senatum : in
 legem mutuæ fidei CC. triremes, naves
 C. decretæ, quibus L. millia peditum Eu-
 ropæorum, IV. equitum, & quingenti
 cum valido apparatu per Joannem Au-
 striacum summum totius classis Præfectum
 in hostes quamprimùm moverentur. Sed
 hæc Principum Christianorum studia cito
 occurſu eludenda sibi ratus Selymus im-
 perio ~~his~~ Pertaum acrem virum suffe-
 cit, abrogato Piale, qui per ignaviam
 Cypro superiori anno digrediens, Vene-
 tis Cilico littore jactatis peperciſſe fereba-
 tur. Halis quoque, destinato cum mili-
 te per Lybicum mare, ascitis sibi in iti-
 nere Epidauriis, & Mitylenæis auxiliis,
 in Cyprum primo vere trajecit. His au-
 ctus Mustaphas, positis confestim operi-
 bus, Tamassum circumſedit; at iterum
 Bragadenus contracto militum robore cum
 Baleonio insultantes Turcas ingenti ani-
 mo, & civium fide sustinuit: plura ausu-
 rus, si de suppetiis Nicolai Donati consti-
 tiſſet, quem mari orta tempeſtas in Cre-
 tam denuò rejecerat: eoque loci maxi-
 mam belli famam agebat Pertaus circa Cy-
 donem urbem, ferro, & flammis in obvia
 quæque læviens: erat eadem in ora Qui-
 rinus XXX. triremibus, & in oppido
 Lucas Michaelius incolarum fido robo-
 re subnixus. Hi disposita classiariorum,
 & civium opera ingruentem tum maxi-
 me

me Turcam à portis cum strage repulere .
 Hæc propter ille in Rethymnam trahitur
 prosperiore eventu ; cùm inde egressus
 Hieronymus Justinianus cum parva suo-
 rum manu in tutiora loca viam sibi aperuif-
 set , densatos hostium cuneos cædendo :
 ita in vacuam urbem translata sunt arma ,
 militibusque permissum vastare , urere ,
 agere prædas , atque etiam desævire in
 sepulcorum cineres insigni flagitio , quod
 tandem post diro naufragio , strageque
 non modica eadem in insula castigatum
 accepimus . Parem barbarorum insolentiam ,
 furoremque Cythera , Ægialia , &
 Zacynthos perleñsit ; nonnullæque nostro-
 rum naves fraude deceptæ in arbitrium
 hostium venere , at vix integræ , pro-
 pugnantium fortitudine . Joannis Thomæ
 Constantii virtus florenti adhuc ætate ,
 & pro religione consecrata captivitas nul-
 la privata laudatione indiget . Omnia
 Senatui à Venerio nuntiabantur : quam-
 obrem illi Patrum responso injectum ,
 ut , relicto ad Corcyram opportuno præ-
 sidio , ad Messanam Siciliæ urbem se
 Pontificiis , & Regiis conjungeret , com-
 munitibus consiliis in posterum usus .
 Digresso Venerio , amor potiundæ Cor-
 cyræ hostes invasit : quare in provin-
 ciam reversi , & ex insperato aliquot no-
 strorum triremes adorti , Franciscum
 Thronum trierarcham in ipso portu in
 vin-

vincula conjecerunt : ad hæc, dilapsis in fugam reliquis auxiliariis, Pargam occuparunt, conversisque prorsis, virisque Supputum primum vi, inde Olchinium deditione ceperunt, pacifcente Hieronymo Venerio urbis Prætor corpora, & vitam : sed nihil in barbaro milite sancti : pro genio, odioque gentis debacchatum : turpis exempli, similisque exitus contagium contraxit Alexander Donatus, & Augustinus Pascalicus : hic Butuam fuga reliquit hostibus ; ille, quamvis incitante Joanne Bruno præfule, ut pensitaret, quid patriæ, quid sibi deberet, Antibaris exitit inutilis Prætor. Elati successibus hisce Barbari, & Adriaticum ingressi Uluzzalio duce cum LX. triremibus Corcyram nigram (ea hodie est Curzola) invaserunt : non fortior hic Rector, neque robustiores oppidani, qui cum Antonio Balbo Prætor conjugum, ac liberorum immemores silentio noctis in specus, & latebras abjecerunt. Memoriam apud posteros æternam assecutæ sunt mulieres, quæ armatos, & incubantes urbi Turcas fugientium virorum armis aditu prohibuere, vigilas, stationes, & si quæ alia præsens usus exegerat, viriliter inter se partitæ. Ad nuntium intimæ classis mediterranei quoque hostes in Epiro, atque Illyrio in fines Reipub. irrupere, Salonamque, & Saxum castrum subverterunt. Spalat-

tum

tum in fide mansit . Sævum hoc cladis miserandæ fatum vix verbis exprimi potest , quàm Patres , & cives , intumescente magis , magisque hostilium victoriarum cursu , torserit . Etenim cùm de unius remedio consultaretur , alia superstabat calamitas : quin vis credebatur etiam strui , qua , domita Histria , excidio urbs ipsa Venetiarum destinaretur . Verùm nihil ommissum in ancipiti hoc Reip. statu ; volutatisque rationibus , placitum , littora communiri solertia Vincentii Mauroceni , & subinde Julii Savorgnani præsidio firmari . Sensit hostis ex metu vim , & socia arma citiùs opinione sua parari , & ideò reditum in Hellespontum occludi posse : itaque , neglecto Ascrivio , Aulonem primum , inde , ~~curata classe , Coreyræm~~ *Coreyræm* latius est haud læto exitu . Animum ab ipsa necessitate mutuatus Aloysius Georgius , cæsis , qui per imam planitiem obstabant , cæteros omnes suburbiis fractos , & nihil prætereà ausos in classem rejecit : illi , fœdata incendiis insula , Naupactum navigarunt . Hæc inter legati ab Senatu missi fœderatos ad bellum , & ad opus tempestivè ciebant , ne , si diutiùs protraherentur suppetiæ , Tamassus belli causa per cunctationem hostibus cederet : itaque effectum , ut maturatis plus solito rebus , Barchinone tandem Joannes Austriacus Genuam , inde Neapolim solveret ,

ret, ubi XIX. kal. Septembr. fœderatæ militiæ signa solemniter suscepit : hinc digressus Messanam pervenit, festivis à classe acclamationibus, & omni genere cultus à ducibus Columna, & Venerio exceptus. Porro, dum hæc ad Messanam, in Cypro Tamassum sua fata agebant. Huc enim intentus Mustaphas, & accelerandæ victoriæ attentior tractare omnes oppugnationis vias, & quatuor erectis munitionibus, XXIV. magnis tormentis, suffossis utrimque ad tutos remeatus aggeribus, mœnia certissimis ictibus verberabat, ita pluribus diebus hostium assiduitas egregiæ disciplinæ ducem Baleonium non sine aliquo damno fatigavit. Orta sub hæc à milite sæva lues promiscuis morbis urbem miserabiliter afflixit, quæ res non leviter Bragadenum exercuit, coegitque inutili plebe ceu pestis esca urbem exonera-
re. Cæterùm Turcæ stratis viis, congestisque telis augere obsessis pericula, & propinquo terrere discrimine, amoliri-
que defensores. Nostris haud absimili vigore reddebant intorto igne inimicas vices, simulque ultionis, & gloriæ avidi perfidos hostes pilis eminens fundebant. Sed & apertæ vi occultos etiam dolos Turcis addere visum est : cuniculis enim indiderunt tormentarium pulverem, qui concepto igne ita repentè solum, urbisque muros elisit, ut horribili fragore
tota

tota insula quasi suis sedibus avulsa contremisceret, disruptæquæ ingentis ponderis moles urbem ceu quodam destinato fulmine ferirent. Hinc Mustaphas hortatur suos, ut in denudatas phalanges impetum facerent, viamque strage Venetorum in mœnia capescerent. Sic plerisque irruptionem conantes Nestoris Martiniengi, & Herculis Malatestæ occurrens virtus continuit. Turca, quia tum non vicisset, quasi pro victo esset, ad tertium Id. Quintil. oppugnationem aliquantò atrociorē, quàm ante, aggreditur. Eo die profato concursū, utriusque necessitas aderat: spes hosti in sua virtute, salus ex victoria Veneto erat, cui expectationem externæ opis per id tempus imminuerat nuntia ē Creta navis. Igitur hostis inaudito stratagemate urbem aggreditur: pice illitas frondes, & sicca virgulta, & si qua materies apta alendo, fovendoque igni, ad mœnia eoagmentat, farcitque stupa, & plumis, qua inflammata tantum repenti mixta caligine incendium excitatum est, ut miseri cives fumo, & nidore propè suffocarentur, aucto etiam per eos dies ventorum impetu, quo tetra illa nubes facilius sese in miserabiles animas insinua-
ret. Hisce tenebris addita frequens oppugnatio, quæ continuos dies, noctesque summa laborum, & cladum specie durata est: emissæque muralibus machinis hor-

horridæ grandines : quantoque conspicui
 minùs propugnatores, tantò pluribus vul-
 neribus obnoxii . In hunc modum promo-
 tæ vires, artesque in III. kal. Sext. ubi ex-
 oneratis primùm omnibus æneis tormen-
 tis, patentes ruinas corona adorti, per
 summam contentionem muris hælere aut
 mortem, aut victoriam eo momento repor-
 taturi . Prioris voti compotes fuere primi
 murorum inscensores acriter, & ab invicto
 hucusque Bragadeno, & Baleonio accepti
 missilibus flammis, quibus ità temperatum
 legitur, ut sub hanc diem in summa co-
 pia tres tormentarii pulveris cadì obfes-
 sis solum superessent . Et erat ea Vene-
 to duci mens commissæ sibi urbis ruinæ
 immori, ni Mustaphas mentione collo-
 quii civibus fiduciam vel pacis, vel vi-
 tæ intulisset . Simul itaque primores ci-
 vitatis Prætorem circumfusi orant, ne, si
 erga Rempubl. Venetam sat fidei, & san-
 guinis datum ab omnibus insulæ ordini-
 bus constaret, Tamassum mallet immi-
 nentis excidii triste bustum, quàm vivam
 communis constantiæ, & laudis imagi-
 nem : hæc gemitu, & lacrymis omnium,
 & maxime futura volventis Baleonii hor-
 tatu ferebantur . Itaque sibi ipsis per-
 missi cives deditionem cum jurato Tur-
 ca his pactis præscribunt, ut militi, &
 si cui alteri magis liberet, discessus ex
 insula tutus esset : incolis futuris libera
 re-

religio , integræ fortunæ , utque omnis injuria plena pace sopita foret . Mustaphas judicium in præsens haud aspernatus , primos congressus Bragadeni , Procerumque mira lenitate captavit non vultu alienatus , non verbis , ita iram barbarus condiderat : vagis deinde sermonibus Prætorem criminatus , contra fidem suprema nocte ducentos Turcas in arce necatos arguit : neganti accusationem vincula , & contumelias adjecit Mustaphas , prolapsumque ad pedes ambabus auribus obmutilari jussit , mortem quoque minitatus . Itali sub id , & Græcorum plures à juris humani ignaris occisi : inde in publicam ferociam itum , solo , & parietibus erutæ humanorum corporum reliquiæ , objecta feris cadavera , aræ , & Divini numinis majestas sacrilegio fœdata , versæ in superstitionem impii ritus sacræ ædes , totaque civitas cruore , & probris commaculata . Bragadenus duodecimum post diem hostilibus castris extracto , ubi nequicquam blanditiis ad novam gentis , cultusque infaniam pellectus esset , vivo detracta pelvis , acerbissimo genere mortis , laceræ carnes bestiis projectæ sunt , fartamque palea eutem ad vivi hominis simulacrum per vicos , & urbis compita barbarus miles , perque Ciliciæ , atque Syriæ littora circumtulit Turcica classis , ut sic mortuo etiam per scelestum ludibrium illu-

illuderent hostes , utque nullus extaret locus , in quo crudelitatis , ac perfidiæ impressa vestigia non inspicerentur . Hæc Tamassi celeberrimæ in Cypro urbis expugnatio fuit : hic totius Insulæ occasus : ipoliis , viris , terris ingens victoria Barbaris , quorum evertendo imperio utique suffecturæ essent Christianæ vires . Sed dum inanibus titulis hac tempestate jactamur , ab iis contenti non lacessiri , pacis , bellicque momenta expectamus , ac interea nostris vitiis , & sua virtute feliciter Turcis imperium sternitur .

Navalis de Turcis victoria ad Echinadas .
MDLXXI.

CÆterum hunc ipsum annum omni posteritate memorandum effecit navalis de Turcis victoria . Ne igitur fœderati imperatores cunctando semper Messanę desides hærent , lustrata classe Corcyram XV. kal. Octobr. adnavigarunt pari consilio , animisque , ut quamprimùm prælio cum hoste decernerent . Ubi illum Naupacti sinum CL. navibus tenere cognitum est , Uluzzalium Methone commeatus aliis L. procurare , tum in altum prosecta Christianorum classis , quæ CC. erat triremium , quinquerehium majorum VI. navium verò XXV. & complurimum navicularum , post varias in rem præsentem de-

R libe-

liberationes , Nonis Octob. sub primam lucem ad Echinadas scopulos Acarnaniæ adjacentes ex adverso ostii Acheloi fluminis, vulgò Curzulares, subsedit. Hic hostem in conspectu habuit auctum robore, suffultumque triremibus cccxx. biremibus LX. quamvis errore speculatorum utrinque pauciores crederentur . Interim numero suorum Halis falsò confisus è portu Corinthiaco solvit , sinuataque in medium orbem fronte Galatam tenuit , postridie ad libitum nostros, ut rebatur, invasurus : proinde fœderati in Corinthiacum tunc vacuum sinum proras & ipsi obvertunt, inter quas freti fauces cùm laxare commodis intervallis non possent remorum ordines , superata portus angustia hostem non plus millia passuum XV. cominùs obvium conspexerunt, cùm, subitò consecuta maris tranquillitate, sudum cœlum factum est , ut Superos præsentis naumachix spectaculum duxisse fatereris : Joannes Austriacus præsentium rerum momento quàm maximè permotus , celocum hinc inde pernix singulos duces , militesque virtutis admonuit , atque ex ea acie cunctis aut compedes, aut certè direpti , possessique maris ingentes manubias pendere : nec minùs Venerius maritima nostræ gentis trophæa , & in hos ipsos hostes olim illatas strages , & communia libertatis hucusque jura proponebat . Sed &
 ipsi

ipsi Turcæ diversis ducum verbis incitati
vorum strepitu , armorumque tumultu
truces more gentis personabant. Cùm in-
tra teli jactum remigio hinc inde proven-
tum est , Halim ferunt non mediocriter
defixum hæsisse , ubi paratas ad prælium
nostrorum vidisset naves , quas fugam me-
ditari opinabatur , specie stationis ab Au-
ria in altum effusæ . E quinquereuibz
in proximum , procacemque hostem in-
primis detonuuit Franciscus Duodus, simi-
liter cæteri myoparonum præfecti jacula-
bantur glandium nubes , quas dum exter-
riti. Turcæ per citatos remiges & à fron-
te, & à tergo, & à lateribus ingruentem,
declinare student , in dispares , intricatos-
que giros dissipatur nauticus labor : ita
per confusos circuitus , nifusque statis or-
dinibus erratum est : inceptam auxere
turbationem nostri majorum , minorum-
que tormentorum jugi , ac horribili fra-
gore , qui circum jacentibus scopulis , &
anfractibus repercussio gemitu terras , &
maria concutere ruina gravi , & cælum
ipsum largo mugitu subvertere videba-
tur . Nec segniùs ignibus suis furebant
barbari , dispare tamen clade : quippe
eminentes suarum triremium , navium-
que proræ altiùs globos projectabant ,
quàm ut submissas nostrum puppes con-
tingerent : nostræ recta , nec incassum
unquam in hosticum apparatusum colli-

neabant : sic non paucæ perforatæ, contusæ-
que sub initium aquis demersæ sunt : atrox
exinde pugna, & promiscuæ clades, nunc
hos, nunc illos impellente fortuna. At spem
pugnantium augebant ipsi Imperatores Au-
striacus, & Venerius, qui in triremem Ha-
lis vivido conatu delati, ipsum belli ca-
put adfectabant : & hic accerrimus quis-
que novissimam vim parabat : nec minùs
effusis hostibus ad tutelam acrior impetus, &
jam nostros ab infessa puppe exturbave-
rant. Porro nova acie impetitus Halis
plumbea glande corruit, & imperatoriam
navem nostris, vitamque simul deseruit.
Halis præcisum caput in conto omnibus
statim ostentui fuit. Postmodum altera
capta navis, qua præfecti classis veheban-
tur liberi, Pertai, & Caracoza tribuno-
rum triremes quoque in potestatem vene-
re, momentoque ipse Pertaus in fugam
actus Naupactum se recepit, Caracoza in
prælio cecidit. Sic media acies uno conatu
profligata est, cùm interim ex alia parte
XXX. rostratæ in cuneum strictæ à reli-
quis fuga disjungebantur. Non tulere in-
cruentam hanc hostium fugam legati An-
tonius Canalius, & Marcus Quirinus, per-
secutique fugientes crebris tormentorum
ictibus disjecere. At verò in dextero cor-
nu horribilis armorum erat facies, & aliæ
super alias cædes impigrè utrinque ge-
minabantur. Uluzzalius in XV. foedera-
tarum,

tarum, quæ spatio à cæteris avellebantur, libero illatus cursu, cùm viribus, & numero impares invenisset, pessimè turbatas habuit, culpa plus justo distantis Auræ, qui tamen ratione callidioris disciplinæ exinde vitium textit, quasi in restrictos, & circumventos hostes incitatore à tergo impetu fuisset recursurus. Cæterùm Uluzzalius, cùm ob hæc & scissum agmen, & fractos ordines signorum, & furdas ad imperia suorum aures, & in se properos hostes videt, è re periculum instans cavit, cursuque celeri per hosticam lapsus classem, obversis in Echinadas proripitur effusa fuga in Corinthiacum sinum: cæteri hostium suo fracti periculo nostris concesserunt. Hoc maximè modo ad Echinadas à confœderatis Principibus navali prælio pugnatum est, quo fusus Turca documento fuit, Barbaros vinci posse: maximum ad victoriam momentum fuerunt Venetæ majores quinquereemes sex, vulgo galeaciæ, quæ ipsius Austriaci judicio solido robore, & usu tormentorum longè alias naves præstiterunt. Certatum est à decima septima diei ad vigesimam secundam, victoriaque parta, quam Pontifex verè Pius certam à Deo fuerat pollicitus; eiusque lætus, ac felicissimus exitus non per homines, sed per cœlestes nuntios eidem allatus dicitur

tur ipsamet die , qua contigit , Nonis Octobr. martyri Justinæ sacris , in cujus templo Senatus memor ingentis beneficii solemnitate anniversaria convenit . Atque in ea celeberrima pugna alter ducum alteri ita profuit , ut dijudicari vix possit , uter utri virtute anteferendus , Pontificius , Hispanus , & Venetus laudatis facinoribus se gessere . Nullus de loco , summis ut antea simultatibus , contenderat : singuli privatas controversias pro Republica tunc periclitante in hostes vertere , tanto virtutis consensu , quantum præteritis annis fortassè fuerat inter diversos moribus , & æmulatione dissidium . Captæ triremes fermè CC. ad XXX. Turcarum millia extincta : VI. millia captivitati tradita : Christianorum XV. millia servitio exempta : ducta ingens præda : nec ulla re magis hostium strages , quàm sub vesperam patuit , cum per infectum sanguine , & spoliis æquor sex millibus passuum victrix classis veheretur in portum Petalam : unde divisis prædis , & jam ingruente hyeme , Austriacus Messianam , Columna Romam abierunt . Nostris per varias impressiones acta hyems est , Malgaritinum in Epiro funditus excisum , duce Venerio : Suppositum à suis metu derelictum flammis exustum : Leucas terra , marique nequiquam tentata per Jacobum Superantium imbr-

imbribus , & hostium disciplina nostris infauſta fuit.

Varii cum Turca conflictus. Pax.

MDLXXII.

MAjus videbatur imperium ſuum Selymo , quàm quod ullis externis viribus debilitari poſſet . Pertinacem itaque animum in noſtros ſua armabat rabie ; nec cunctanter quidem Uluzzalio ferocia pro virtute erat . Is anno inſequenti ſummus classiſ imperator cum C. & X. triremibus , compluribuſque aliis navibuſ Helſiponto egreſſus noſtrorum cogitationes , & conſilia non parùm acuebat : & multum fanè Reipubl. deceſſiſſe videbatur morte Pij Quinti , etſi in Gregorio XIII. idem ſtudium revixiſſet , ut communibuſ viribuſ , renovato inter Chriſtianos Principes ſœdere , communis hoſtis penitùs debellaretur . At dum plus nimio ab Hiſpanis mora trahitur , Senatus veritus , ne quid Auſtriaci tarditas præſenti rerum ſtatu imminueret , Jacobum Fuſcarenum Venerii legatum jubet cum Marco Antonio Columna iterùm in expeditionem deſtinato Corcyra per Ionium in Turcas quamprimùm ſolyere . Classiſ , quæ erat CIX. triremium præter alias omniſ formæ naves , & myoparones , ad Gomenitias primùm delata à ſpeculatoribuſ

R. 4 intel-

intellexit hostem in Argolico sinu tutum nec propelli natura, & situ loci, nec in pugnam trahi posse: quare ad Maleam visum est abire, ut vel sic aperto mari ultrò prorumperet. Ita elatæ aliquot hosticæ triremes cùm in Colubrarias insulas eveherentur, nonnullis tormentorum ictibus in certamen sollicitabantur. Uluzzalius victricis classis impetum retardare contentus cunctando, fugiendoque novis artibus nostrorum conatus elusit. Ejus tum impetum veritus ad Cytheræ littus suas naves inducit cauta vasritie, ut eodem tempore quinqueremium fulmina evitaret, & simul, ubi res suaderet, facile in terram è propinquo exiliret. Dolus Legatum haud latuit: ille continenti prior succedens hosticas in agmen trahere connixus est: at hostis nostrarum machinarum, fumum, & atram caliginem tormentis suis excitans, cùm jam etiam tenebresceret, nocte, & astu cum tota classe ad Tænarium promontorium confœderatorum ictus, & oculos pariter evasit. Illi fugientem aliquantisper insecuti sera nocte Cytheram reversi sunt: neque hîc diù hæsitatum, quin altera suborta luce, Turcam excirent. Hosti non nihil increvit audaciæ, pugnamque, ubi necessitas postulasset, non detrectando, erupit, paratisque lunata specie puppibus, veterem ignominiam aboliturus

turus in certamen processit: è vestigio adfuit à dextero cornu Jacobus Superantius, jugique vi Turcam momento ferme perturbatum obliqua strage preffit, & in ipsa fuga dissipavit. Plurimum nunc quoque nostrorum ducum virtus in media acie potuit, ubi Uluzzalius dire exagitatus cunctari, subsistere, nec sat mentem, & arma expedire, undique hostili captus manu. Hanc prope conficiendi belli occasionem cernens Fuscarenus in desperatos, & jam cedentes vocavit Columnnam: hic verò, nescio quid causatus, subsidens, hosti commodam, probe nefas! præbuit fugam: atque ita Uluzzalius cito remige, sed magis nostris dissidiis vitam tulit. Exinde, surgente notho, cum nihil aliud posset, nostra classis Cytheram delata est. At enim Nicolaus Surianus Adriatici sinus Præfectus ignitis artibus, & valida oppugnatione Scardonam novam aggressus eandem scalis admotis hosti extorsit. Interea Austriacus cum Hispanorum classe Corcyram venit, cui obviam universæ fœderatorum tarmæ socias jungunt puppes: & visum est præter cætera Fuscarenæ cum toto apparatu CC. navium in perturbatos hostes ferri, qui, ut habebatur, imminuta multum incondita fuga, & pestifero morbo classe, partim ad Pilum, partim ad Methonem auxilia expectabundi morabantur.

R 5 Hos

Hos adoriri placuit, indictaque acie Uluzzalius per multas horas evocatus, cum praelium detrectaret, Coronem nostri deferuntur, cujus periculo excitatus Turca, relicta Methone classe, in eam oram duo millia peditum exponit, Austriacus totidem Hispanorum: ubi dum levibus dimicationibus pugna laecessitur, fœderatis animus subit Pilum, vel Methonem oppugnandi. Negotium Alexandro Farnesio cum sex millibus demandatum exitu nullo; patentibus quippe campis, nec materiam circa Pilum munitionibus, aggeribusque aptam suppeditante humo, in naves truditur aperta strage. Quibus difficultatibus pressi Austriacus, & Columna, nullo alio memorabili facto, in Italiam non sine aliorum querelis, & propria nota properarunt. Qui recessus, ut aliis, multum Patres perturbavit. Hos nempe esse socios, qui ne bellum tolerarent, rixas induerent; quorum pars amica parum Venetis, pars amica tantum nomine; nulla boni spe classem ab ultimo oceano evocatam tempus itineribus, non bello terere, & ubi manus miscuerint, cuncta sibi prætere, ab hoste securitatem haberi post pacem; ab infido sociis nec in pace quidem; tandem præteritam victoriam divinitus contigisse. At non cunctabatur Selymus: ad CCCC. varii generis naves, duce eodem Uluzzalio, primo pro-

proximi anni vere educturus nuntiabatur. Qui ingentes apparatus cum reciproca classe, & opera excipiendi forent tempestivè, nihil tamen aliud parabatur apud socios, quàm societatis, & fœderum splendida nomina, & leves arrogantiae tituli: immutato jam tum etiam Pontificis per nonnullos animo, in quo salutis cardo versabatur. Videndum itaque prudentibus erat, qua potissimum via bellum omne Veneta Resp. conficeret. Eam sane Purpuratorum unus Mehemethus Legatum docuit: bellum pertæsus, ruinas, & incertos exitus, & quam vel maximè Scylmus oderat, navalem nostrorum gloriam, concordiae nomen per internuntios cum Barbaro Veneto Oratore attrectavit. Quare, ne Veneti semper externæ opis indigerent in communi malo, ne vita populorum per incerta maris, & tempestatum sine lucro, sed cum cæde volveretur, ne urbium, & provinciarum copiae civibus turbas, non salutem parerent, Patres sub principatu Aloysii Mocenici pietatem suam adhiberi passi sunt his conditionibus, ut Suppotum Turcis restitueretur, possessa ante bellum in Epiro, atque Illyrio oppida eorum essent, quorum tunc temporis in potestatem devenissent, redderentur utrinque, quæ bona negotiatoribus, nondum soluto in pugnam dissidio, adempta fuissent.

Uscocchi denuò repressi.

MDLXXVI.

QUamvis, composito Turca, maritimos turbines sustulisset, nondum tamen ad quietis stabilitatem profecerat Venetus, cum fomes quidam, & quotidianæ turbationis causæ Uscocchi superessent: & ut illi discretis, variisque prædationibus maria turbaverant, sic à nostris quoque imperatoribus non continuè flagitii pœnas persolvebant. Primum sub hæc tempora, Sebastiano Venerio Duce, in eos classem intulit Hermolaus Theopolus, cum illi piraticam rabiem per finitimos Turcas, Venetosque pari crudelitate exercuissent: jamque videbatur ipsum Hydræ receptaculum, & fons Senia artissima fame casura in dies ad tantæ pervicaciæ internecionem, nisi diligens Maximiliani Cæsaris causa latronum pœnis, satisfactionibusque nostros per dilationem tantisper exarmasset. Nec diù apud assuetam latrocinii gentem & jura gentium, & leges sui Principis potuere. Inscendere enim biennio post myoparones suos, & Illyricum subinde præternavigantes primum Turcici juris Macarscam furtis, facibusque, inde Venetæ ditionis Siceses, & Almissanos pudendis damnis perculerunt. Etenim cum Rodolphus sua
suc-

successione per eos dies nihil præter bonam mentem turbatis rebus, severitatis verò, & modi in suos experts imperium attulisset, Aloysio Balbo jussum, facinus piratarum acerrima obsidione, & quovis genere cladium vindicare. At non est morituris necessitas, versa in rabiem fame, inventaque ex aliis latebris insolenti eruptione in Narentam amnem, ubi navigium Venetum multa, ac pretiosa merce dives per scelus raptum est, & viginti Turcæ occisi. Non Senatus ultra, non Præfectus maris vim extremam differendam censuere, conjectantes præcipuum argumentum magni, & implacabilis Turcici motus, si, ut aliæ gentis cædes, hæc quoque Amurathi fervido dignitatis suæ assertori nuntiaretur. Rudolphus igitur, quantò summæ belli propior, tantò impensius pro pace niti cœpit. Itaque Carolo Archiduci non jam levem rei circumspeditionem soliti moris, sed finem tam nocenti malo, solidamque vicinorum requiem demandavit. Latrones, perlatto certæ mortis supplicio, paulum ficta obedientia siluerunt. Sexennio quiescere: ac tandem rediit mos crimini suus, excursusque frequenti rapina mare non sine gravissimis Turcarum dispendiis, & querela. Hermolaus igitur Theopolus rursus classi præficitur cum mandatis, ut bellum ad internecionem in perfidos

latrones administraret, eoque necessitatibus adigeret altrices impiorum terras, Seniam Fluminis, Vinadolique fauces, ut sua vastitate apud posteros fidem facerent nefarii, & execrandi hospitii. Theopolum, ut iussus erat, per continentis oram ultra, citraque scelestos nidos igne, ferroque populatur. Serisam etiam, & præsidia castris aggressus loci Præfectum trucidat: turres quondam perfugia latronum solo coæquat, famem intentat, omnia ultimo excidio depressurus: & jam ipsa vis dubios oppresserat, cum ad nuntium Turcicæ expeditionis circum Ubizam, quæ ad Seniæ littus protrahenda à Turcis ferebatur, victoria dirempta est. Quippe Senatus reliqui maris tutandi cupidus vincentem Theopolum, & extrema prælii meditantem ad Ascrivium cum classe ablegavit. Non ideo tamen tot cladibus pressi latrociniis diù abstinere: seu levibus stipendiis, seu prædæ dulcedine permoti, rursus infurta sua, & in suas naves resiliunt, & rapacius, & latius, quàm antea. Nam Pharo, Brachia, & Corcyra nigra insulis expilatis, obvia quæque tùm Christianorum, tùm Turcarum navigia, & merces depopulabantur: & jam labem omnibus portibus incubantem. Amurathes in perpetuum volens extinguere, instructo apparatu Seniam cogitabat,

tabat, nisi singulari consilio Marci Venerii Oratoris prospectum esset, ne classis emandaretur jure sancitæ pacis, & obtentu præstandæ in posterum per Venetos maritimæ securitatis. Et severiora quidem remedia temporum, ac pietatis conditio abhorrebat, infessa Pannonia, Mysia, & Liburnia: nam metus incefferat diffluere Turcam, odio Austriaci Principis, maxime quia Clissam, astu militari rapuerat per Uscochos in nostrorum confiniis, in quibus nihil movere fidei, & quietis ad communem Italiæ tutelam intererat. Profectus tamen in Illyricum Benedictus Maurus est, ut jam auluros populares vicino successu in officio contineret: nam erat animus compvincialibus juvare Clissenses; sed eos exterruit Maurus huc, illuc ferens arma, & Uscochos nostris maribus auxilia comportare ausos opportuna classe cohibuit, quæ res Clementem VIII. non mediocriter affecit: sed omnia tentare præstat tuendæ Reipubl. causa, & etiam barbaris servanda sunt sua fœdera. Cæterum anniversarii hostes nec ob id suarum artium obliti ad longum tempus sunt. Rovinii namque portum in Histria ingressi nocturna manu mercatorias omnes diripuerunt: cumque Hermolaus Theopolus scelerosos ad ultionem quaquaversum inquireret, ipse in accuratissimo conatu vitam

fata.

fato reliquit ad maximam perfidorum licentiam. Illi metu soluti, quingenti Curictam delati, trecentis, qui facinus jam tum inibi expectabant, junctis, in ipso portu quinque Epirotarum longa navigia, & duas triremes invadunt: Epirotas, infesta sibi nomina, ad unum omnes trucidant, cæteros miserrima clade conficiunt: idem ausuri in Albonam, si per Marini Molini, tunc loci Prætoris, violentiam licuisset: hæsit tamen in Flanona barbaries, occisis incolis, occupatoque castello, ubi probro Venetorum Cæsariana signa extulerunt, extorto etiam per vim ab oppressis oppidanis sacramento fidelitatis. Neque atrocitas hæc per oratorem Ferdinandí Archiducis Josephum, Rabatam excusari, aut componi potuit apud Venetos. Concitus per hæc Nicolaus Donatus non modò Seniam, conterminosque tractus, sed etiam ipsum Tergestum acriter insedit, in prædones ubique intentus, erectis duabusmunitionibus, qua transitus sædæ genti patebat. Non tamen animus pervicax ob id cessit, non quidem fiducia virium, sed quia extrema mole bellum pariter liberis, conjugibusque ingrueret, & quia maxime vegeti solent esse impetus pro vita dimicantium. Igitur insuetum iter in Histros per abrupta montium juga, & confragosos plerumque saltus, qui Germaniam determinant,

in-

ingressi omni genere populationis in provinciam feruntur, vulgus trucidatum, ira, & fames sanguine, & rapinis satiata, annonam ex victoria retulere: & jam omnia circumfusi prædonis famam horruerant, & infestum agris agmen fugiebant vicinæ gentes, cum Franciscus Cornelius furorem latronum pari motu, reciprocisque damnis continuit in pessimam Austriacorum perniciem, quæ demum populorum miserandis ejulatibus adaucta aures Cæsaris Matthiæ, & Ferdinandi allisit, ut incisis mali fibris orbi Christiano medicatum vellent: nec distulit Josephus Rabata in fontes, qui totis ferme viginti quatuor annis res alienas sollicitarant, ultimam supplicii legem: securi enim in prædonum duces, & capita ad cæterorum terrorem severa animadversione detonuit, & ipse infami latronum manu mox inhumaniter trucidandus. Sic non nihil paci consultum est.

Expeditio septima in piratas.

MDCI.

AT sub hæc non semel ipsi Neapolis, & Siciliæ Proreges conjuncta classe maria ad quæstum fœdarunt: nec dubiè Franciscus Superantius Orator Philippo Regi facinus detulit; sed hujus litteræ suorum damnantis furta magis
apud

apud Senatum optimæ voluntatis fuere testes, quàm apud prædatores imperii notæ: proinde majoribus etiam remediis, & navibus Reipubl. sibi prospicere ad repellendam vim placuit. Nec minùs furor Australis hæc nostra littora afflavit quinquennio post: cùm circa Corcyram in nostrorum navigia sæviissent quinque Numidicæ triremes, missus est Augustinus Canalius classis Legatus, qui deliberato rei gerendæ momento cum Sinus Præfecto Francisco Molino ita bipartito excursu in fugaces delatus, ut ultimam hosticarum ad primos appulsus tormentis disjecerit: nec segniùs in primam Lucæ Pisauri puppem effrænis hostis mortem trudebat, dilabentibus aliis, cùm sibi integram victoriam eripi latronum fuga putaret, Legatus incitato remigio fugitivis insistit. Ferebantur in singulis Numidicis præter socios remiges militum C. & XL. Nostris in robore constabat virtus: itaque rates hostiles vel latè conquassatæ sunt, vel alto demersæ, fures aperta strage trucidati. Sic per extrema connixum improbum genus alienum æquor suo sanguine infecit. Dragutes Archipirata Peloponnesiacus Canalii quantumvis faucii manu confossus interiit. Eandem virtutis gloriam brevi post adeptus est Antonius Civranus, qui in Meli portu aggressus piraticam pestem unà cum infami-

mi-

mibus lignis furta latrocinantibus extor-
sit, & iccelestas Barbarorum animas ad
Orcum detruxit.

Interdictum Pontificium in Venetos.
MDCVI.

A Piratico bello ad contentionem ven-
tum est scribendi apparatu, & li-
centia summam; sed exitu levem. Hoc
enim ad pompam inter togatos Principes
dissidium, non tam momento suo, quam
sermonibus populorum æternitati manda-
tum est. Imminutæ Pontificiæ auctorita-
tis suspicio Paulum Quintum Burghesium
in Venetam Rempublicam concitavit. Ille
veluti acerrimus Sacrorum defensor vole-
bat irritum omnino quidquid in Ecclesia-
sticos viros, eorumque bona decretum es-
set: nostri majorum suorum statuta, le-
gesque & temporis, & usus firmata pri-
vilegiis asserebant; ne subditorum contu-
meliæ impunes essent; civiumque patri-
monia distraherentur. Nihil tamen profe-
ctum apud Pontificem: à quo properè in
universam Rempublicam districtæ secu-
res: urbe interdictum: indigenæ diris de-
voti. Patres communi sententiæ Interdi-
cto obstiterunt litteris quocunque loco-
rum suæ ditionis Leonardi Donati Prin-
cipis nomine transmissis, ut populi in fi-
de perstarent; quibus non ignota Ponti-
ficis.

ficis mens, jusque suum. Res interim eo loco erat; urgentibus hinc inde partibus, ut sine ferro, & incendio, lævissimoque bello componi haud posse videretur.

Tandem Christianorum Principum interventu, ac in primis Gallorum Regis Henrici IV. per Franciscum Jojeusam purpuratum Præsulem hæ Italiæ turbæ, rixæque inter pium Patrem, & charissimos Filios sublatæ sunt.

FINIS LIBRI QUARTI.

JOAN-

JOANNIS BAPTISTÆ
V E R I
CANONICI PATAVINI
RERUM VENETARUM
LIBER QUINTUS.

*Bellum Austriacum quartum, Uscochi
deleti.*

MDCXV.



Ræter efferos nativæ ferociæ spiritus hoc tempore Uscochi Aulico quoque favore procaces animos attollebant. Nec dubium erat, Josephi Rabatæ cædem, ab ipsis manifesto læsæ majestatis crimine commissam, apud Ferdinandum Austriæ Archiducem impulari aperto Venetorum studio. Unde egregii quasi facinoris ministri nostrorum criminationibus inconcussi debacchabantur. Quid igitur mirum, quòd Georgio Danicichio duce, Hieronymum Marcelum pro maris libertate excubantem inopinata perfidia ad Bescham vinculis gravarint? quòd Antonium Georgium promissa Scissæ deditione deceptum per summam superbiam angore simul, & minis maceratum Seniæ in ludibrium nationis
tra-

traduxerint? quòd Christophorum Venerium in Mandra Pagi insulæ portu cum trireme agentem furtim interceperint, occisi sanguinem circumlatum ex pateris biberint, cor coxerint, ac devorarint? Inhumana hæc cladium series altiùs exasperarat Patrum animos, quàm ut solitis antea lenitatis, & gratiæ officiis dignæ viderentur immanes belluæ impunè grassantes. Itaque Senatus consulto decernitur conscribi, & comparari exercitus, deligi Duces, & in Archiducalis terras impiæ gentis asyla omnem expeditionem conferri. Laurentius Venerius Dalmatiæ Præfectus eligitur, cujus animo cum altiùs inhærerent tot in Rempublicam injuriæ, & Georgii nex; de ultione sollicitus, adornata classe, Novium oppidum, in quo interceptæ triremis armamenta, magno conatu adoritur; flammis, ferroque expugnat: ac tum capto Præsidi, tum multis ex prædonibus interfectis, furta reposcendo eximium suæ virtutis decus reportat. Subinde ultro res Venetas cœpit laceßere Volfgangus Tersatii comes facinorosorum antesignanus; & Ferdinandus Venerii factis graviter offensus Venetorum in sua ditione degentium bona, quæ damna refarcirent, jussit occupari: quo exemplo docta Respublica, cui majora detrimenta piratæ intulerant, Archiducali-

lium mercatorum fortunas penes se retinuit. Hæc dum aguntur, Volfgangum propria immanitas, & à majoribus quondam suis possessa Curiæta, recensque incensi, direptique Novii casus ad populationes, incursionesque per Istros excitarunt. Aggressus Benedictum Legium castella Tergestinorum, salinasque vastantem: ac proscriptum Petatii Comitæ temeritate captum abduxisset, ni Fabius Gallus chiliarca acriter repugnans insequentem tandiù distineret, donec Legius se in tutum reciperet. Verùm ipse ab exundante hostium multitudine oppressus interiit. Hinc victoria animum arrogantius erexit, qui, flagitiosissimo quoque in societatem assumpto, cui ob egestatem, & odium Veneti nominis vehemens perfurendi libido esset, in Forum-julium irrupit; & cuncta prosperè adversus inermes egit, uctis, compilatisque provincialibus. Petenti Montem-falconium Franciscus Ericius Provinciæ Præses festinata expeditione objecit legiones, Palma, Utinoque excitas, quæ primis congressibus prædabundum coercuerunt. Præmissus etiam cum deleta manu Pompejus Justinianus Ligur navandæ operæ avidus incultæ oræ citra Natisonem pagos omnes, vicisque occupavit, præter Lucinifium, quod in ea regione futuris rebus magis erat idoneum,

neum, ut ipso demùm experimento deprehensum est. Cùm itaque utrinque non modica belli contentione disceptaretur, placuit Senatui Gradisciaë Styriaë oppidi, quondam sui juris, obsidio; pollicente Justiniano ex ea faciliorem transitum in hosticum ultra Natisonem. Jussus opus perficere, tanta celeritate ipso sequentis anni mense Februario oppidum circumdedit aggeribus, & propugnaculis, ut habitatores improvisò conclusi deditionem facturi fuissent, si Venetæ acies continuò irruissent in obstupefactos, ac perterritos. Sed orta inter armorum Præfectos discordia ex invidia, quæ labes in Reipublicæ castris semper viguit, occasionem rei benè gerendæ eripuit. Alii criminabantur Justinianum, qui alienissimo tempore illud instituerat obsidium: contendebant alii, fortunam in bellis pendere à prudentia, non à temeritate. Cæterùm, quæ mora interjecta est nostris, ut valdè nocuit, sic summè profuit obsessis, quibus opitulatum advolavit Adamus Trautmensdorfius cum expeditis Germanorum agminibus: & Gradisciam, eique proximam Norejam, nunc Goritiam, impositis præsidiis, validissimè communiavit. Attamen Ferdinandus ad circumsepti oppidi nuntium veritus, ne dilaberetur in obsidentium manus, cœpit per Pontificem, Hispanum Regem, & Magnum

gnum Hetruriæ Ducem sequestres , explicare negotia aut de pace , aut de induciis . Respublica ad utrumque inclinare visa est : quietis tamen amantior malebat ea servari pacta , in quæ pridem suus Orator Hieronymus Superantius Viennæ convenerat cum Matthia Imperatore : Ut scilicet delerentur Uschochorum receptacula : & illis toto mari expulsis , sinum præternavigantibus illibata securitas esset . Verùm quia non pauci apud Archiducem , & in Cæsaris Aula dynastæ prædonibus patrocinebantur , recusantes Seniæ demolitionem ; spes omnis quiescendi ab armis evanuit : & , vix mense exacto , latrones ad priora scelera suis è latibulis erupere .

Igitur hoc anno , moderante Rempubli-
cam Joanne Bembo , vindicta potius dilata , quàm repressa , gravior ad Gradisciam erupit . Senatus validis primùm armis , concursuque Ducum , & nationum : deinde valido apparatu , instructisque classibus , magnam paravit expeditionem . Ipsos etiam Archiduciales armarunt Germanæ , Hispanæque vires tum terrestres , tum maritimæ : ut jam nemo ignoraret imminere bellum terra , marique acerrimum .

Quassabat Petrus Barbadicus obsidionalibus tormentis Gradisciam ; & emis-
sis peditum copiis , equitumque turmis ,

S fini-

finitimos premebat. Porro, cum magis ad rapinas, quam ad pugnas discurrent, ab erumpente ex insidiis prævalida Uscochorum caterva profligantur. Post hæc rarus concursus: neque ulla cum hostibus per eos dies par dimicatio. Trepidabant milites ex agrestium delectu, quoties ad armorum exercitationem educebantur: gliscebant in castris turbæ ob effrænem Volonum licentiam: & subinde in Ducibus circa belli administrationem dispar consiliumoriebatur, atque de dignatione contentio. Certiores de hoc rerum statu Austriaci nocturno impetu Venetas stationes aggressi sunt: & sepultos tenebris ad unum oppressissent, nisi ad ejulantium voces accurrisset Justinianus; qui, spreto vitæ discrimine, per conferta hostium agmina ruens eos represent, consternatosque, & saucios coegit redire ad suos. Interea, quia nunquam cessabant ab utraque parte bombardarum globi, horum unus ab Gradiscia fortuito ictu prostravit Danielem Antoninum explorantem ex officio obsidionales accessus. Mortui nomen, & virtus beneficio Senatus equestri statua in majori Utini templo condecorata sunt, ut habeant posterum, & cives, quem colant, & imitentur. Horatius Baleonius oppido succedens tentavit per transversa sepimenta astis cuniculis molem portæ præstructam subruere. Inceptum opus non
 carvis-

taruisset expetito eventu , si Gallis , quos ad reptandum audacter per ardua munimenti largitio munerum animavit , alia manus ex populari militum grege compacta ausa esset in auxilium procedere ex condicto , & sustinere aggressores . Quare explorata ignavia , quæ Veneto exercitui erat dedecori : atque per idem tempus renovata à Pontificio legato pacis habendæ fiducia , annuit Senatus Barbadico , ut armis desisteret , & Marianum copias traduceret . Tunc aliquibus nostrorum socordiam deridentibus existimatum fuit oppidum obsidione solutum . At cum primum venit in Provinciam Antonius Priolus , infensioribus animis bellum instauratum est ; accedentibus cum eo universi exercitus imperatore duobus legatis Joanne Baptista Fuscareno , & Francisco Ericio . Mox in belli communi deliberatione decretum , Austriacos proprio exemplo nocturno impetu adoriri . Mittuntur in antelucanam expeditionem peditum quinque millia , & equites mille quingenti . His viribus Camillus Trivisanus levis armaturæ ductor , & Baleonius effusi per hostium castra magnam undique trepidationem incutiunt , capiuntque bina propugnacula , interfectis propugnatoribus : sed ulterius progredientibus con-

sternatione, & cædibus, mora injecta, Epirotarum avaritia; quibus adhuc circa prædas intentis jam dies inclinaverat. Properavit ad pugnae locum Trautmensdorfius, & sollicitus, quod clamores, ac bellantium strepitus illum vocarent, victoriam nostris eripuit. Justinianus, qui militum rapacitate feliciore fortunæ spem abjecerat, sagaci consilio receptui canere jussit, & cum suo non adeò imminuto agmine in aperta planitie explicato, hostem ad certamen provocavit. Hanc audaciam metuens Trautmensdorfius intra munimenta se continuit. Subinde Priolus Gradisciaë obsidionem vehementiùs urgebat, eoque certior de expugnatione, quod opportuniùs ingruens pestis cœperat Austriacas vires debilitare; & Venetæ acies tum occupato Lucinilio, omnem fermè agrum citra Natisonem Reipublicæ subdiderunt. Erius Faræ propugnaculum ab hoste perterrita desertum occupavit, aliaque finitima loca: Vipulzanum, & Caporetum vi subacta recepit, strenuè decertantibus Livio Puppio, & Trivisano. Tolmissum Nicolao Gualdo obstitit, ab arce omni missilium genere propugnatum; quorum jaculationes gregarius miles pertimeſcebat. Pontebam frequens emporium, Italis, Germanisque ultro, citroque negotiantibus in duas partes dividit amnis interfluens, & communis pons determinat

minat Archiduchales, & Venetos agros. Quæ pars Reipublicæ paret, ab Archiducalibus tum fuit hostiliter petita, & usurpata: facinus indignè tulit Fuscarenus, quamobrem coacto agmine in hostes furenti procurrit impetu: oppido eos expulit: & persequutus fugientes usque ad Telminum cuncta sibi obviam diripuit, ac inflammavit. Hoc victoriæ progressu Pontebam Ripublicæ reddidit, divesque opimis spoliis, & gloria præclarus in suas stationes remigravit. Alibi fortuna adversis prospera semper alternans, cum morte ab omnibus complorata Justinianum abripuit: perscrutantem, quo loco Natisoni pontem imponeret, plumbea glans interfecit displosa è tumulo mœnium Norejæ, adversius quam moliebatur irruptionem. Virum magnæ in re bellica famæ publica funeris pompa Senatus extulit: & illius gloriam equestri statua in Sacra divorum Joannis, & Pauli Æde immortalitati commendavit.

Defuncto substituitur Joannes Medicus: hic statim suscepto munere in Trautmensdorfium, qui, superato Natifone, in Veneta castra parabat insidias, Epiroticum equitatum immisit: at is, conspecto hoste, ratus se imparem sustinendo incurfui, retrò ruit, latuitque post loricatedos equites: quæ causa fuit,

ut omnes metu correpti fugam capefferent, peditibusque ponè sequentibus incuterent trepidationem. Magna ea die clades nostris fuisset illata, nisi Medicus opportunè periclitantibus præstò fuisset; cum expeditorum manipulis obuius fugientes sustinuit, sicque repressit insectantes, ut sua præsentia, & viribus audaciores facti in terga persequentium se verterent, cogerentque Trautmensdorfium cedere, & in stativa redire. Cæterùm hæc belli flamma, quæ primùm sparša per Carinthiam, & Forum-julium pluribus in locis flagrans reluxit: mox effusa in Istriam, Dalmatiamque videbatur uno repente incendio omnia consumptura. Idèd non levem illius restinguendæ sollicitudinem attulit Reipublicæ; propterea, ne latius serperet, iussus est Marcus Lauretanus in Istriam properare. Ut accessit, continuò in Austriacos, & Ulcochos per maritimas oras populabundus castra movit: & quæ damna Veneti incolæ acceperant, abundè compensavit Tergestini agri, atque salinarum vastatio: neque his contentus, per hosticum arma circumtulit, & Antignanum ex Pifini comitatu subduxit, interceptoque Galignano, Zemino terrorem injecit solo victoris conspectu. Sub idem tempus navigavit in Dalmatiam Nicolaus Donatus, qui eodem vindictæ, armorumque fremitu Moschenizzam, & Scrisiam

fiam ad Fumii ripas eripuit. hosti : cujus quoque audito accessu , ad rapinas incontinenti expositis classiariis prædanti fuit obviuſ : & , conferta manu , victor oblata ſpolia in fugam aſto extorſit . Scriffiam infame latronum latibulum . Joannes Jacobus Zannius totius classiſ Navarchus intempeſta nocte , validè impetum , pulſatumque crebris tormentorum ictibus , ſpontè deditum recepit , incassum repugnante Scricchio Ulchocho , qui oppido præerat . Hujus ſceleſti hominis caput accolæ Zannio attulerunt , à quo benignè accepti libertate donantur , præter perditiffimæ gentis aſſecclas ad unum decollatos . Trautmenſdorſius ad Scriffiæ caſum ſpe tardior comparuit , quam ut debellatam illicò Zannius ſolo æquari mandavit : ille omne odium in oppugnantes Zeminium Piſinii refudit : uberemque Poleſanæ planitiem , qua potuit , vi , & injuria diripuit , ac diſſipavit . Pejora cogitantem retraxit in Carnos noſtrorum incurſio : at ſuorum facinorum ſucceſſorem reliquit Andream Ferlitichium , Uſcochæ gentis , & peſſimum prædatoriæ artis magiſtrum . Hic in portu Sylvarum appellato ſex armatas celoces , & biremem furtim aggreſſus oppreſſit crudeliter , & cum ſuis captam prædam diſperſit . Per eos dies Aloyſius Geor-

gius postquam in nemore illius tractus constructum propugnaculum subegerat, ampla quoque spolia retulit ab Vermii expugnatione. Non minùs abundè ditescunt nautici milites Justi Antonii Bellenii, quibus, data discurrendi licentia per hostiles terras, in præmium expugnatae Duini oppidi turris, ingens prædandi occasio se obtulit Tergestum usque. Atque ita, ut plurimum latrocinii magis, quàm belli modo tunc pugnabatur.

Hæc intra biennium gesta: sequens annus ex intemperie cœli gravis, ac propè pestilens insanabili quadam pernicio diminuit exercitum. Ducum aliquot in Istria vel mors absumpsit, vel morbus à castris submovit.

Ægrotanti Priolo succedens est Antonius Landus: & hoc imperante, auxere Venetas copias quatuor Batavorum millia, quos Comes Ernestus Nassavius ad Reipublicæ stipendia traduxerat. His viribus, ineunte Junio, nostris transeuntibus in Carnos nullus fuit obex à principio: in progressu Franciscus Strasoldus Gradiſciæ Præfectus cum peditum cohortibus, equitumque turmis, non contemnendis, vadato Natifone, se opposuit. Acies hinc inde, minantibus armis, videbantur pugnam exposcere: sed non ultra processum; cum hostiles præ timore pedem referrent; nullo igitur obſistente, Venetis patuit via ad concutienda faciliùs

Au-

Austriaca propugnacula. His demolendis excubabat Medicei cura, ut Gradisciam militaribus operibus circumdatam ad angustias redigeret: obsidere vias, intercludere commeatus, & in ipsis Norejæ campis locare castra. Verùm ob hanc causam Natisonem transmittere cogitanti denuò obstant Austriaci: in utraque fluminis ripa fuit acerrimè dimicatum, nutante plerunque fortuna inter varios armorum exitus. E superiore loco Stellæ munimenti præsidium acriùs repugnabat: idcirco in spem illius potiùs duo Comites Gualdus, & Montius susceptæ curæ magnoperè incubuere, ut scilicet præsidiarios, nisi aliò diverterent, saltem ad sua tuenda distinerent.

Nocturno itaque, tacitoque accessu alter Gradisciae portam arietans, affixo pyroclastro; alter armata manu in Stellæ munitiones irrumpens, terrore maximo replerunt præsidia: utrumque tamen speratus frustratur eventus; dum nox obscurissima remoratur milites ferendæ opè destinatos. Austriaci, hoc explorato consilio, attentius circa ejus propugnaculi custodiam vigilarunt: cujus situs parùm distans ab Gradiscia in adverso Natisonis litore introducendis commeatibus erat percommodus, atque ob montium anfractus usque immunis ab insidiantibus. Aliud etiam Rubiæ tutamen Trautmensdorfus

diligentissimè observabat: quod expugnatum difficile Mediceus tamen obsidione sepsit. Batavi longò circuitu per Carnos in Nerojæ planitiem traducti & firmissimum propugnaculum, & acrem Ducis industriam assiduis impressionibus diu fatigaverunt: tandem insilientes in muros, Trautmensdorfium portæ munimentum præstruentem castrensis tormenti ictu sustulerunt. Maradius occisi successor, & vindex, recensito non modicarum virium exercitu, haud veritus transare flumen, sub auroram Venetas turbavit stationes. Intempestivus insultus adeò exterruit confusos, ut nullus esset, qui constanti animo vim repelleret. Tribunorum virtus ignominiosæ fugæ turpitudinem delevit, & cohibuit cum paucis audentioribus per castra insolentissimè furentes. Multi in hac dimicatione cecidere: ex nostris non obscuri nominis Marcus Antonius Manzanus, Petrus Avogadrus, Leonardus Gualdus equitum Præfecti. Arcta interea obsidione premebatur Gradisca; etsi omni arte, & ingenio allaborabant Austriaci, ne obsessis annona deficeret, quam excavatis arborum truncis in usum linterium aliquando submittebant. Hæc, quæ furtim; & alia, quæ nonnunquam importabantur subsidia, nostri, ut arriperent, hostes, ut inferrent; hi propugnando, illi expugnando,

do , Natifonis ripas , & aquas multo sanguine fœdarunt . Non ea porro ubique solertia , & vigilantia ; quamvis extructi in amnis alveo detinerent implicitos lintres , ratesque , ne opitulatum accederent : quinimò aliquando aliqua inferret audentius promptum ad difficiliora Principis Valstaini ingenium . Sub oculis Venetorum Ducum aperto sibi per convalles montium itinere obfessis frequens auxilio erat . Horatius Baleonius pari fortitudine ad illos obstruendos aditus cum sexcentis peditibus in eas angustias penetravit . At iniquam expertus fortunam , quasi magno conatu invideret susceptæ expeditionis , ne forti viro res secunda obtingeret , dum strenuè dimicat , à Valstaino interficitur . Hujus ingenti spiritu , & militari disciplina clarissimi Ducis famam Senatus posteritati commendatam voluit , ornavitque honorifico tumulo in augusto Geminorum Templo . Pugnae superstites non inertes , neque incruenti Baleonii necem ulti sunt ; cum , obseptis Valstaino , & Maradio itineribus , ad extrema quæque , suadente fame , Gradisciam redegressent , ut citissimæ deditiois spem obsidentibus non demeret .

*Hispana expeditiones terra, marique
coercita.*

MDCXVII.

NE bellum ullo loco Reipublicæ deesset, Petrus Toletanus Mediolani Gubernator, & Petrus Gironus Ossunæ Dux, Regni Neapolitani Prærex: ambo nomine, atque odio pares in Venetos omni conatu statuerunt hos avertere ab impressionibus in Archiducalibus terris, ut plures in partes distracti ad injurias propulsandas minùs valerent. Primum igitur Toletanus ab Insucribus erumpens armatus, Cremenfis agri pagos, vias, tectaque incendiis, direptionibusque barbarum in modum attrivit, & compilavit. Senatus furenti occurrere jussit Hieronymum Cornelium: hic manu, & ingenio celer collegit ex præfidiis selectiores ad vim arcendam: quibus in hostem suo exemplo incitatis, ejus incursiones cohibuit, ac propulsavit; ut in posterum à vexandis confiniis abstinuerit. Toletani temeritas tota in populationibus coercita fuit, & obstricta conditionibus Pacis superioris anno initæ in Astensi conventu.

Præterea multiplex à mari terror ingruit nuntio præpotentis classis Adriaticum obsidentis. Ossunæ Dux prosperis Venetorum successibus invidebat: &

po-

potissimum, quod, penè desperata Gradiscæ propugnatione, non dubitabant Austriaci, quin illa brevi deditionem faceret. Hinc ille concordiæ, & quietis osor submissis copiis impulerat Toletanum ad arma in Cremenenses: atque ex se constituerat, parata classe, Adriatici maris jura Reipublicæ evertere. Vocat igitur Uscuchos, quibus impensè patrocinebatur, ut consuetis rapinis Venetas navigationes turbarent; & aliquod in Istria oppidum caperent, ex quo tutò paterent in obsessam urbem commeatus. In hunc finem è Brundusino portu bis sena magnæ molis navigia emittit, quæ ductu Francisci Riberælacefferent Venetos, quos Adriaci Sinus usurpatores appellabat. Patres se cuique fortunæ committere assueti, percepto perfidæ classis transitu in suam maria, illicò imperant Justo Antonio Bellenio Navarcho, ut instructo nautico apparatu in illa contendat cum Laurentio Venerio navium Præfecto. Unà egressi ea alacritate, qua militares animi studio pugnæ incenduntur, è Phariæ portu, qui nunc Lesinæ dicitur, non procul Curzola, olim Corcyra Melena, infestæ Ofsunæ classi occurrunt, & ad eam oppugnandam conatu maximo contendunt. At Ribera, cognito periculo, cui patebat, subita fuga mare transgressus, Brundisium repetit. Ille in portu abditus, &

ab arce missilibus protectus Venerium, qui fugientem erat insequutus, diu ludificatus est provocantem ad certamen. Ergo frustra classarii bombardarum, tubarumque clangoribus, & lituorum stridore, intermissis vocibus, conclamantes, sublatiis anchoris digrediuntur, & excursionem facta per totam Apuliæ oram, ubique metus, terroresque inferendo, se Phariæ restitunt. Ostuna rei gestæ nuntio majori concitatus rabie, addit licentiæ scelus, & aliud scriptis molitur bellum, quo Rempublicam expellat de sinus Adriaci dominio. Acuit legulejorum calamos, & commentitiis rationibus probare nititur, nullum esse Venetis præsumpti maris dominium: propterea liberum cuique ejus navigandi arbitrium. Hæc mendacia literis exarata evulgat, provocatque Principes ad commune commercium. Verum quia nemini erat ignotum, quod omnis vetustas acceperat, Adriaci pelagi imperium à majoribus sanguine partum proprio, inconcussoque jure ad Venetos pertinere, insani hominis irritamenta deriserunt. Ad Turcas conversus hos muneribus, & complurium mancipiorum donatione tentavit allicere, ut in Cretam, facerent irruptiones. Porro & Barbari, quos ille barbarie vincebat, indignum scelus abhorrentes responderunt, se potius auxiliaturos Reipublicæ adversus com-

nu-

munem hostem, qui Uicochæ gentis pernicitate, & fraudibus toto mari exturbabat commeantes. Repulſus ab omnibus, obſtinatusque ad parendum regiis præceptis, noluit ab injuriis diſcedere: quin ſecretioribus mandatis prætexebat ſuum odium in Venetos quaſi hoſtes omnium peſſimos, uti jaſtabat, erga Hiſpanos. Interim nec mora, nec requies irato: citiſſimè inſtaurat claſſem una de viginti triremibus regendam Petri Leivæ imperio Ribera comite; utrique injungit, ut; ſorte per omnia tentata, Polam in Iſtria occupatam munirent. Hoc juſſu educta Brunduſio vagatur aliquandiu circa Dalmatiæ portus, ac tandem in conſpectum Phariæ iterum ſe dat; & certior facta ab actuariis, Venetam ibidem contineri numero exiguam, & ob reſſatum non erupturam; Leivam, & Riberam reddit inſolentiores. Ideò noſtros ad eruptionem, & ad pugnam audaciùs evocabant; at hi, nulla obſecundante aura, incluſi fauces portus binis ſeptiremibus armarunt, majoraque diſpoſuere tormenta in utrumque latus: mox frequenter acclamatum eſt à claſſariis, ut illi propiùs accederent, ſtatimque in eos patrio faſtu turgidos longè jaculati miſſilia terrorem inferunt, & formidinem: unde reſpreſſa temeritate coerciti canunt receptui, & ſub vesp̄eram Brunduſium verſus iterum
dixi-

dirigunt proras. Casu accidit revertentibus, cujusdam navis occurfus, quam piratarum more capiunt, & diripiunt. Hoc uno suorum facinorum testimonio Proregem Leivæ succensum, quod nulum à Venetis oris municipium pugnano abduxisset, placabilem sibi effecerunt. Hæc ubi nuntiata sunt, Patres minimè rerum suarum oblitì decernunt augere classem, cujus administratio foret penès Jacobum Zannium, Cretæ gubernacula tunc temporis moderantem: eidem mandatur, ut, confestim abductis ab insula decem triremibus, Phariam contendat, iisque totidem adjungat ex urbe transmissas, & reliquas addat à Bellenio receptas. Sic ex duabus classibus unam componat, iunius ac triginta triremium numero, præter septiemes sex, bisque septem magna navigia, ac multas liburnicas. Cum hoc apparatu egressus de portu lustret omnes Adriacos recessus, percurrat Istriæ, Dalmatiæque littora, cunctaque agat, ne illi, qui Veneti maris ambiret, & affectaret dominationem, ullo in loco damna inferre liceat. Zannius dum sua in statione ex Senatus decreto nauticam instruit expeditionem, nihilo negligentior Ossuna Siponti suam adornabat classem, quam cum Octavius Aragoniæ Dux septemdecim Ligusticis auxisset triremibus, injecta est nostris de Regio consensu suspicio.

cio . In hostica numerabantur triremes triginta tres , duo de viginti gauli , & pauca minora navigia . Illius ducendæ cura demandata erat Aragonio , quem sequebantur Leiva , & Ribera . Præter-
 vectus Epidauri ostia , Hispanis amica , quia Venetis infensa , Phariam adnavigat . Stans in anchoris ante insulæ portum videbatur promptus ad pugnam , quam nostri non detrectabant : erat enim in omnibus idem animorum vigor , & conferendæ manus par cupiditas . At fortuna jam solita invidere prosperis Reipublicæ rebus , eos continuit oclusos , invalescente improvisò adversa ventorum vi . Venerius tamen impavidus , & longioris moræ pertæsus sibi portus ostium vel intempestivè aperuit : navibusque ad tormenti ictum in aciem explicatis , classicum cecinit . Sed hostes ipem provocantis deludunt : ac si magis ad virium suarum ostentationem , quam ut pugnæ aleam subirent , illuc usque progressi essent : sublati enim repente anchoris , altum tenuere è conspectu submoti . Verumtamen , ut docuit eventus , hæc fuga non fuit , sed voluntarius recessus propter certam divitis prædæ fiduciam . Occultarunt se sub scopulis veteris Tragurii latebris : è quibus mox furtim erumpentes triremes , duas numero , quæ oneri ferendo , non prælio committendo aptæ convectabant ad

Ve-

Venetos venales ab Syria merces, interceperunt, simul cum una ex septem ad onerariarum custodiam destinatis, ductore Antonio Civrano : reliquæ intuitæ emînus piraticæ classis fraudes cum viatoribus in proxima littora remigrarunt. Hispani Duces opima præda potiti, ac si debellassent, lætabundi Brundisium, inde Neapolim, remis, velisque contendentes Proregi captas triremes, & spolia in triumphi speciem obtulere. Sub idem tempus quidam rumor, at incerto auctore, dispersus, increbrescebat de prospero conflictu Venetæ classis cum Hispana : propterea universa urbs in lætitiâ effusa, festis ignibus, hilarique voce sua gaudia testabatur. Senatus verò, qui certiores nuntios expectabat, ægrè vulgus à contumelia, & impetu in Alphonsum Quevam Regium Oratorem compescuit. Denique, re comperta, nullum commissum certamen, at liberum Hispanorum cursum per Venetum mare; rapta navigia, factasque prædas, & inter pretiosiora computari onerarias triremes. Mutantur gaudia mœroribus : accusantur socordiæ Navarchi; neque excusationes admittuntur, nunquam potuisse cum hostibus aperto Marte congreâi : contraria semper ventorum, tempestatumque sævitæ : clausos, detentos, neque se liberos unquam pugnam inire cum recusantibus, aut dimicare cum fugien-

gientibus more piratarum in loca tutā. Querebantur de mercium jactura negotiatores, polcebantque incuriæ coram judice Civranum. Qui rem sedula perquisitione decernat, Petrus Foscarenus Senatus consulto deligitur: qui subito profectus in provinciam, accurata indagine perscrutatur, quo modo postulatus reus se gesserit: reversus retulit, nullum in Civrano comperiri negligentiam, aut inertiam crimen: sed, quod acciderat, imputandum inevitabili fortunæ fato. Cæterum summæ anxia Respublica, ne tam numerosa hostium classe finitimæ urbi oræ Metamauci, & Clodiæ trepidarent: vel maritima Polæ, & Parentii oppida illius paterent insultui; omnia Joannis Garzonii, & Francisci Mauroceni sedulitate munienda, atque armanda præsidii curavit. Acceptam insuper injuriam acri ultione flagrans reponere aliarum triremium paravit subsidia: &, amoto Zannio, quem æquæ animi, corporisque urgebant angustia, rei navalis administrationi præfecit Laurentium Venerium; naviumque regimini Maurocenum. Utrique tandem imperat cuncta agere, & audere, quæ Veneta arma, deleta socordiae nota, si quæ inusta foret; in pristinum decus affererent. Delecti Duces conjunctis animis, auctisque viribus, & immensæ magnitudinis navi, quæ Gaulus Balbi ab inventore

tore nominabatur, per Adriaticum huc, il-
 luc volitantes in medio habuere obvios
 hostes; qui, ducente Ribera, Siponto ve-
 niant cum quindecim rostratis navigiis.
 Nostri eo læti conspectu, subitis bombar-
 darum tonitribus Riberam ad concertan-
 dum extimulant: at ille in sua statione
 immotus præstolabatur tacitus provocan-
 tium accessum: ac proinde factum est, ut
 in quasdam, quæ audacissimè præcesserant,
 naves, ea omnis generis missilia jacularen-
 tur; ut una, vel altera fœdè lacerata re-
 trocedendo reliquas pavore, & metu com-
 pleret: eoque deformi aspectu territa
 classis formidaret hostilem incursum. Ve-
 nerius, qui nihil indignius sibi ferendum
 putavit, quàm à suis desereri, conscen-
 dit liburnicam, & classiarios hortatur
 deponere metum, fiduciam induere, &
 unà secum ad victoriam properare. Nun-
 quam tamen potuit confusos rursus com-
 ponere: idcirco, reluctantibus cæteris
 se præeuntem sequi per incerta bellorum
 eventa, ipse cum suis perpeti nocte co-
 ram hostibus stetit, & pulsatos assiduo
 tormentorum fragore consternavit: cum-
 que postero die in eorum navigia colli-
 masset è septiremibus grandiores machi-
 nas, ab harum gravi percussu satis ap-
 paruit, contusis, fractisque nullam aliam
 spem salutis subesse, quàm fugæ. Hanc
 igitur expansis velis Brundisium versus,
 pa-

parantes ille, consensu Balbi gaudio, datoque septiremibus remulco, quanta potuit celeritate persequitur. At quæ vis fati! quo momento fugientium tergo imminet eos apprehendere, & infligere temeritatis poenas sibi arrogantibus Venetinus imperium; repens turbo, & fretum insanis fluctibus horridum intercessit. Itaque in ea maris, cœlique turba timens naufragium iniquo fato obsecundare coactus est, & se credere tempestati. Hujus jactatus, atque agitatus injuriis, tandem in Sanctæ Crucis stationem cum sua classe appulit haud longè ab Epidauro. Eadem ventorum, pontique procella in Dalmatiæ scopulos impexit naves, triremesque, quæ metu concussæ ab hostium conflictu se subtraxerant: ex istis quinque fretum absorbuit: atque adeò ignominiae labem abluerunt aquæ: gloriæ loco, quam virtus patriæ debuit.

Gradiſcia obſidione liberata. Pax.
MDCXVIII.

Postquam Venerius inimicas classes cladis imminenti periculo deterritas toto Adriatico expulit; hoc solum deerat Reipublicæ bonum, ut Gradiſcia expugnata, & Uſcochis exturbatis, optata pace frueretur. Oppidum ad rerum omnium angustias compulsum, clauſo

clauso flumine, intercluso aggeribus agro, validisque custodiis impedito comitantium accessu, deditionem propediem facturum videbatur. Cæterum ne veniret in potestatem, à magnis concordiae arbitris Ludovico Galliarum Rege XIII. & Carolo Allobrogum Duce impetravit. Repentinus nuntius de Pace inter Venetos, & Austriacos firmata has retulit præcipuas condiciones: Suum cuique reddendum: Ulcochorum infame nomen, & exercitium penitus terra, marique exterminandum: myoparones comburendos: omnia insuper latronum effugia, & latibula demolienda. Attamen cum nulla facta fuerit mentio de captivarum navium, triremiumque cum mercibus restitutione, Senatus his, quæ gesserant, se inconsulto, duo Legati, Octavianus Bonus, & Vicentius Gussionius, assentiri noluit: quinimò Parisios festinare iussit Simonem Contarenum, qui utrique publico decreto diem diceret ob neglectum mandatum. Præsentissima tamen Regis officia purgarunt Legatos; asserentes triremium negotium prorsus alienum esse à rebus cum Ferdinando Archiduce componendis. Idcirco, quæ acta fuerant, sequutus est optimi Senatus lubens assensus: quo se non tam vacuum gloria æstimavit, ut post compressos latrones, & armis extortam maris securitatem inane Archi-

chiduci oppidum, ceu virtutis suæ præmium mallet, quàm sinceram famæ laudem, & desideratæ quietis securitatem. Sic adeptus, quæ magis è publica visa sunt, ex decoro Senatus conservandæ tranquillitatis amantissimus in Curictam, Dalmatiæ insulam suos conquistores misit Antonium Priolum, & Hieronymum Justinianum, ut cum Carolo Arcacio, & Joanne Jacobo Edilingo Ferdinandi ministris ratum haberent, quod Parisiis XV. kalend. Octobris conventum fuerat de Pace. Hanc Respublica per integrum fermè quadriennium gravissimo bello agitata magna sua gloria obtinuit; extincta Ulscochæ perfidæ gentis memoria.

Conjuraciones in Rempublicam detectæ, & puniæ.

Sors Venetæ Reipublicæ prospera, ob firmatam Pacem Toletano, & Ossunæ nunciata ita eorum animos exasperavit, ut hostilia molirentur, & moliendo profiterentur suum implacabile odium, vel in mutuæ concordie gratia, vel in communis utilitatis beneficio. Vastus utriusque animus, & audax in Venetarum rerum perniciem, excidiumque conspiravit. Uterque hoc maximè cupiebat clandestinis dolis assequi quod hucusque aperta vi nequiverat. Hi ergo
infi-

insidiarum molitores conveniunt stipendiariorum fidelitatem tentare ; oppugnare municipia ; & ipsos quoque urbanos lares inquietare , convellere . Toletanus jam egerat cum Joanne Bernardo Gallici peditatus Chiliarcha , in Cremenſi præſidio de arce prodenda , & militum plurimos amplis promiſſis corruerat . Aderat facinori præſtituta dies ; & adjutrices turmæ proditoria ſigna expectantes Laude Pompeja morabantur . At Superis placuit , ut quidam è ſociis exoſi ſcelus hoc ad portas deprehenſum proderent . Conſurgit igitur in perduelles Magiſtratus ; Bernardus capitur , & non pauci cum eo infamis flagitii participes . Omnes convicti proditiſſimi crimine , fractis laqueo cervicibus , de ferali trabe pependerunt . Sic ab imminente periculo Crema ſervata , & ipſe Toletanæ machinationis conciliâ .

Per id tempus etiam Oſſunæ naves Adriaticum hoſtiliter pererrabant , latitantes aliquandiù poſt Jaderæ ſcopulos nuntium , qui eas ad occupandam Foſſam Clodiam vocaret , expectabant . Diem , & modum ejus adoriendæ Alexander Spinola Romanus gubernator præfinierat . Actum eſt tamen , favente fortuna , ut priùs quàm fraudes maturescerent , & à perfido proditore urbs traderetur , qua in poteſtatem redacta , pa-

ra-

rata erat in Veneta stagna irruptio , scelerata machinatio pateret indicibus . Proditionis hujus compertus reus strangulatur , inverſoque capite furcæ appenditur . Hic ignominioſus periit ; & hoſtes dejecti cum opprobrio in ſuas ſtationes redierunt . Nilominus à ſtruendis inſidiis nunquam quievit Oſſunæ adverſus Rempublicam livor , & odium , cui facilè par erat invidentia Alphonſi Quevæ Regii Oratoris ægrè ferentis ſecundos illius ſucceſſus . Dum igitur Veneti foris Gradſciæ obſidioni attentiffimè incumbabant , illi domi , & in patrias eorundem ſedes ſceleratas machinantur conſpirationes : & hoc execrandum nefas per milites , qui Reipublicæ ſtipendia merebant . Queva in primis circumiens publica diverſoria , Battavos adhuc peſtis ſuſpectos à Venetis ſignis abducere conabatur , majori ſpe lucri : & alios ex conductis amplis pollicitationibus ſibi obnoxios , fidosque facere . Hæc omnia clanculùm cum hominibus facinorofis , quos ad perturbandam Rempublicam & inſana rabies , & vaſta rapinarum fiducia ſtimulabant . Inter hæc Neapolim appulit inſignis pirata , natione Gallus , nomine Jacobus Petrus , Oſſunæ maximè charus , tanquam aptiſſimus ad omne ſcelus miniſter . Habito de proditione conſilio ; ut hoc regerent , cauſas effingunt inter ſe odium , &

T. ini-

inimicitia gravissimas : alter indignatione plenus Neapoli discedit : alter furore percitus illius uxorem Messanæ detinet in custodia . Jacobus Romam profectus se valde cupidum merendi apud Rempublicam in re maritima Veneto Oratori Simoni Contareno prodit : qui tamen , quoniam de ingenio , & fide hominis dubitabatur , cujus consobrinus Tazzii dominus apud Ossunam militabat ; cautè sua differebat officia . Vicit tandem procrastinantem Galli legati optimum de Jacobo testimonium , non minùs , quàm per eos dies summa ducum , militumque penuria . Dimissus Venetias cum Lengado socio in machinis incendiariis expertissimo ; & duabus navibus conductis , stipendium meruit ducentorum aureorum in singulos menses . Hujus adventum prævertit Nicolaus Rinaldus Taryisinus Quevæ inter conspiratores acceptissimus , confictis literis , & Ossunæ manu obsignatis ; quæ viri militarem peritiam , ac vota Proregis ejus reditum flagrantissimè designantis repræsentabant . Quamobrem , ubi in conspectum se dedit , eò gravior Patribus fuit , quò importunissimo hosti ex animo infensior visus est : quotidie cum plurimis differendo vel de perdenda Hispanorum classe , vel de occupandis eorum arcibus in Apulia . Interdum (donec detestabile facinus crumpèrèt) stipatus facinorosa caterva , quàm maxima

xima parte conflabant Burgundiones , & Galli , totam circuibat civitatem ; publica , privataque ædificia ; insularum , pontium , canaliumque situs , strukturas , & metas diligentissimè observabat : cùmque omnia sibi apparerent admiratione digna , palàm extollebat Reipublicæ majestatem , & urbis magnificentiam . Hisce dolis insidiarum tempori obsequabatur : nocturni cœtus agebantur in secretioribus Quevæ conclavibus : ibi conveniebant conspirantium capita : & crebris subinde tabellariis admonebant Ossunam , ut paratam classem in Adriaticum immitteret ; cùm in promptu esset , quod exitu facillimum pollicebatur commilitonum fides , dispositis concubia nocte per universam urbem oppugnationibus . Armentarium incendere , ærarium subruere , interficere pontes , igni præcipua loca absumere , auxiliorum impedire commercia , ex optimatibus ditissimos , & nobilissimos quosque interficere , domos , & divites officinas occultis characteribus signatas rapere , expilare , omnia denique passim ita miscere , atque confundere , ac si offusa Venetæ urbi sempiterna nox instaret . Hæ machinæ vigilantibus curis pessimos homines exercebant , quorum plures quotidie Marcianam turrim conscendentes ;

ut, quò latiùs patebat in mare prospectus, eò citiùs adventum nautici apparatus specularentur; certiores facti opere completerent nefarium scelus. Ducebat classem vir Anglus cognomento Haillot aliquot magnis navibus adornatam; quæ jussa consistere ad anchoras in Fori-julii sinibus, opportuno adesset subsidio conjuratis; & compluribus parvis biremibus, lintribusque, quorum agilis esset excursus per æstuaria, & euripos; explorata pridem aquarum altitudine à Jacobo, qui cum suis satellitibus ocreatus quotidie incedebat, veluti propediem in expeditionem iturus. Dum hæc perfida consilia alto silentio premuntur, una totius urbis erupit vox, utique cœlitùs emissâ, Ducis Ossunæ classem partim captam à piratis, partim naufragio disperiam, quæ furtim in Adriaticum descenderat. Dissitus rumor sollicitos habuit conspirantes, monuitque Patres sufficere Laurentio Venerio Petrum Barbadicum cum mandatis, ut illicò navigaret: atque inter primores classarios recenseret Jacobum Petrum, Lendagum, & alios, quos ille secum vellet conducere: qui verò remanebant ex conjuratis, in autumnum suos opprimendæ civitatis conatus distulerunt. Sed interim contigit, ut ex eo numero duo Gabriel Montecassinus, & Balthassar Juvenus nobiles Galli sceleris atrocitate commoti, infandæ-

fandæque societatis commercia detestati,
 totam conspirationis! seriem Decem-viri^s
 palam facerent. Statim per nota symbo-
 la, tesserasque in hospitiiis, tabernis, do-
 miciliis, & meritoriis, omni loco, &
 cura perquisiti, & inventi proditores in
 vincula conjiciuntur. Constituta de
 perduellibus quæstione, alii in carceri-
 bus laqueo præfocantur: alii publico
 suspendio plectuntur cum Rinaldo tan-
 ti criminis antesignano. Multi arrepta
 fuga properarunt vel Neapolim ad
 Proregem, vel Mediolanum ad Guber-
 natorem: ad quem & Queva tumul-
 tuantis vulgi metuens lapidationem.
 Eodem die, expeditis myoparonibus,
 nuntiatur Barbado, ut de Jacobo Len-
 gado, cæterisque nominatis perfidi ausus
 consortibus, surdus ad cujuscunque pre-
 ces, & querelas, hoc sumat supplicium:
 omnes singulis culeis inclusos, consutos-
 que in mare jubeat præcipitari, & de-
 mergi. Extinctis in hunc modum, fuga-
 tisque publicæ libertatis hostibus, Deo
 servatori, ac vindici supplices gratias
 egit Senatus, & universa Civitas à cæ-
 dibus, incendiis, rapinis, ac ab omni
 inusitato prorsus, ac tristissimo genere
 calamitatis divinitus defensa, & libera-
 ta. Verùm Ossuna neque hoc suæ te-
 meritatis infelici successu deterritus
 conceptum in Venetos odium concoxit.

Altera classe Adriaticum infestum reddidit latrociniiis: & maximè per extorres Vicochos; horumque omnium scelestissimum, Andream Ferlitichium. In maris perturbatores, qui piraticam facientes Venetas naves prædabantur, insurrexit Barbadicus quadraginta ingentibus navigiis, ac totidem octo supra triremibus, hostesque in mare Inferum compulit, depressis, captisque aliquot eorum navibus. Decollatur Ferlitichius; exhibetur negotiatoribus commeandi securitas: atque per eos dies jussu Regis ex Adriatico Sinu hostilis classis submovetur; & onerariæ triremes ab Aragonio surreptæ restituantur cum mercibus, plurimum tamen ob avaritiam diminutis. Accessit etiam ad pacis complementum Ossunæ reditus in Hispaniam; qui affectati Neapolitani Regni insimulatus, & de læsæ Majestatis crimine condemnatus in vinculis miserrimè obijt. Ex hoc pervicaci, & quietis nescio viro capiat documentum, quicumque insatiabili animo majora, quàm pro sua fortuna pari dementia temerè aggreditur.

Vallis Tellina tumultus exorti, & compressi.
MDCXXII.

Vallis Tellina Rhætis, qui hodie Grifones dicuntur, cum Bormii, & Clavennæ Comitatibus parebat. Hanc Addua

Addua fluvius erumpens ab Alpibus alluit; & è Lario lacu, quo excipitur, emissus inter utramque dominationem Mediolanensem, ac Venetam decurrit in Padum. Superiori tempestate duabus agitata factionibus: altera Catholica, quam tuebatur Rhodolphus Planta vir nobilis, & potens: altera Hæretica, cui adhærebat Hercules Saliceus homo turbidus, & audax, apertis inquietabatur dissidiis. Sibi invicem adversantes Planta, & Saliceus primas tenere contendebant in ferendis rogationibus, designandisque Magistratibus. Cùm igitur uterque auctoritate polleret, trahebat in diversa studia populares; propterea gravissimæ exarserunt contentiones: alii seorsum euntes in alios, discordantes Religionē, à verborum jurgiis ad armorum strepitum processerunt. Ruebant Catholici in Hæreticos, & hi mutuam vicem reponentes civili quodam certamine totam Vallem cædibus, atque incendiis fœdebant.

Præsentēs adauxit calamitates Jacobus Robustellus, qui Vallis populis suavit nunc adesse tempus, quo se Rhætica servitute exuerent, facta Hispanis deditione. Sic illi, eo hujus facinoris molitore impellente, in fidem, ac tutelam recepti, fortique manu adjuti à Feriæ Duce Mediolani Governatore Rhætos inopinato invadunt, & vires suas hosti-

liter ostentat. Qui contrà furentis ultionis ardore perciti omnia ferro, flammisque vastant, ac populantur maximo incolarum terrore, & luctu promiscuè in omnem sexum bacchantes: atque tanta utrinque occisione, ut visus sit Addua sanguine magis, quàm fluctibus redundasse. Per hæc Rhæti conantes reducere ad pristina obsequia rebelles vocarunt Helvetios in auxilium; & externam Gallorum, Venetorumque opem implorarunt. Missis legationibus ad Rempublicam exponebant illud esse Hispanarum arcanum: quodd retenta Valle Tellina, quæ se voluntati eorum, atque imperio tradiderat, Germanicas Austriacæ Domus ditiones conjungere cum Insuorum dominatu; & clausis Alpibus, obsessisque fluviorum ostiis, arcere ab externis auxiliis Italos Principes, eosque cogere in suam clientelam: & hoc esse præcipuum Hispanæ cupiditatis votum. Igitur celeri, ac opportuno remedio occurrendum erat huic certò discrimini, antequam in omnium perniciem se verteret suspectæ gentis machinatio. Quare his rationibus, & præsentis periculo deterriti Helvetii: metuque non contemnendæ suspicionis commoti Rex Gallus, & Venetus Senatus decreverunt percusso fœdere tueri communem libertatem, atque collatis armis efficere, ut Vallis suis dominis restitueretur;

ut

ut Alpium ingressus, regressusque tutò cunctis paterent; perque apertos fluminum alveos, disiectis obicibus, commercia ultrò, citròque liberè commearent. Nulla interim officiorum intermissio facta fuit, ut jus suum cuique redderetur; sed incassum peracta omnia, ac propterea eò citiùs parata sunt arma. Helvetii eduxere in expeditionem tripeditum millia: Veneti validum confecti exercitus robur curæ Nicolai Barbulii commendarunt; Joannes Grangæus Rhætici agminis, & belli administrator cum auxiliaribus copiis apud Tirianum pugnavit cum Hispanis vario fortunæ successu; quædam tamen capta sunt castra, Regia præsidia depulsa, fugati indigenæ, incensi vici, dirutæ domus, profanata templa, atque hinc inde in corpora sævitum insatiabili fermè crudelitate. Cæterùm dum ita inhumaniter pugnatur in Rhætia, de pace Madriti agebatur. Illam curabant Veneti Oratores missi extra ordinem gratulatum Philippo Quarto successionem Regni, & nuptias: Legati quoque Pontificis, & Galliæ Regis in eandem curam incumbebant. Altero inchoati belli anno septimo Kal. Maji sancta fuit his præter alias conditionibus: Reponendæ Vallis in Rhetorum potestatem: sed abolita essent quæcumque decreta adversus Catholicos: Feriæ Dux

arma dimoveret à Valle; auferret præsidia; occupata loca relinqueret; & dirueret arces, propugnacula, & quælibet munimenta vicinis Principibus suspecta. Verùm Feria aspernari ausus initæ pacis conventa nulla in re mandatis. Regiis obtemperavit; immò cum Archiduce Leopoldo agitabat consilia de Valle non deferenda, cujus possessio Austriacis erat valdè opportuna, eo sane iusto prætextu; quòd Tellinæ gens recusaret iterum collum subdere jugo servitutis, & dominitim barbarorum hominum subire. Rhæti furenti rabie stimulatì corripunt arma, & effertis animis irruentes adoriuntur Hispanos. Curiam ingressi impetum faciunt, atque inde fugant Austriacos. Qua eventum prosperitate, & fama asciti in fœdus Al obrogum. Ducis, quem nimia Hispanorum potentia offendebat, Leopoldus, & Feria consularunt è re sua esse, quod temporis ratio postulabat, in Summi Pontificis manus Vallem Tellinam deponere cum castris, propugnaculis, ac munitionibus, donec ille omnem controversiam sua auctoritate dirimeret. Placuit fœderatis oblata depositi conditio recepta anni sequentis mense Majo; sed quæ intra bimestre adimplenda esset: cui Gregorius Decimus quintus annuens illicò fratrem suum Fiani Ducem à se dimisit, ut illud acci-

acciperet. Spes erat cum Vallis restitutione omnem armorum strepitum sopitum iri: hoc unum Principes efflagitabant à Pontifice. Nullus tamen precii locus. Gregorius Catholicæ Religionis causam intuitus, & commiseratus incolarum mala, quæ iterùm acerbior passurî dicebantur, si hæreticis subjicerentur, constantissimè eorum officia rejecit. Hæc inter illius obitus supervenit, & in successorem electus fuit Urbanus Octavus: ad hunc etiam frequentes fuerunt petitiones porrectæ de celeri componendæ litis iudicio; si optaret auferre belia, & in populis contentiones pacare. Qui tamen non secus eadem causatus, quæ suus Antecessor, sententiam distulit, & Principes conceptis votis frustrari sunt. Hæc deliberandi intercapedine visus est Pontifex adhærere Hispanis, & callidum fuisse inventum de Deposito, quod capto tempore augebat Feriæ contumaciam. Tot igitur decepti titulis statuere id bello consequi, quod pacificè sibi concedi negabatur: & ideò in Solidurî conventu, cui cum Gallo Præside interfuere Hyeronimus Cavaccius Venerus Reipublicæ Internuntius cum Rhetorum Primoribus, actum fuit, non discedendum ab armis, conjungendas esse copias, & Vallem præcis dominis restituendam. Dum hæc decernuntur,

Aloysius Valaresius Eques ab Anglica legatione per Helvetios in patriam, transiturus ab Senatu accepit litteras, quibus monebatur, ne ab ea Provincia discederet, acturus de summa belli cum Regio duce Covureo; at paululum ibidem moratus in febrim incidit, coactusque abscedere habuit successorem Aloysium Georgium, qui strenuus, ac promptus citò adfuit suo muneri, secum adducens à Veneto Navali peritos, qui Lintres, celocesque extruerent, navicularios, qui regerent, & epibatas, qui depugnarent: cum etiam in aquis decernendum esset. Francisco quoque Ericio datur in mandatis, ut è Reipublicæ finibus, quando opus esset, militiam, & impedimenta subministraret. Tum Chiarchæ Milandro Germano constitutum stipendium, ut cum scriptis extra Italiam cohortibus in hanc pergeret expeditionem: in quam iussus etiam est properare Comes Nicolaus Gualdus Italarum peditum Præfectus: Dynasta Candalis Gallus similiter huic bello vires attulit ex peditibus, equitibusque confectas. Covureus, qui Regiis copiis præsidebat cum auxiliaribus, lustrato exercito decem millium bellantium, Curiam citato, repentinoque cursu ingressus incantos propellit Austriacos, arcem deditione recipit, ulteriusque victor progress-

gressus Bormium, & Clavennam occupat; quorum fortunam Vallis sequebatur. Hispani adversus omnia insultantes è Ripæ propungaculo audacissimè egressi prorumpunt in aciem. Commissa pugna à continenti, à flumine, & à lacu; primis Hispanorum conatibus arisit fortuna: nam acerrimo impetu in Rhætos inveciti horum plurimos ferro, fugaque dissiparunt: mox, quia varia est, Milandrum excitavit ad vindictam; hic cum suis, & quadringentis Helvetiis illatam cladem Hispanis reposuit: porro avaritia, prædarumque cupiditas effecit, ut, qui victi erant, regressi in campum irruerent impavidi in ipsos, implicitosque rapinis, eosque ferè omnes ad satietatem trucidarent: quo momento & alios commissæ naumachia in Clavennæ lacu vicerunt, quia per apertos lacus aditus ab Insubribus decurrebant subsidia. Hæc utrinque obstinatissimè gesta jam tertium annum implebant, & Vallis Tellina de suo statu maximè anxia querebatur de reciprocis incursionibus, quæ populabantur vastando, urendoque omnia: & præter hæc de pestilentia, & fame, quæ simul bella sequi solent, unde innumeri abrepti, & absumpti interibant, quasi satis non esset, sæviante Marte, uno mortis genere perire. Hæ lacrymabiles miseriarum series, & pertinaces

ces duorum Regum provocationes valde commoverunt Urbanum Pontificem desiderio concordiae, & tranquillitatis. Ideò ne conjuncta cum magna calamitate communis pernicies suscitaret incendium extinctu difficile, mediùs esse voluit inter invicem sese lacescentes, quàm unitantum studere, & in alterius cadere suspicionem. Audierat parari iterum arma, novos haberi delectus, dari supplementa militibus, & assignari stipendia: & denuò fugatis Hispanis, à ducibus fœderati exercitus Valle recepta: propterea opportuno consilio decrevit Franciscum Cardinalem Barberinum suum ex fratre Nepotem ad reges Legatum à Latere mittere, ut apud utrumque pacis sequestrem ageret. Munitus hac autoritate in Galliam iter direxit: splendidissimo ubique cultu exceptus fuit, ac ab ipso Rege singulari benevolentiae, & existimationis testimonio cumulatus. Multa ille loquutus ad communem quietem procurandam, ad tuendum, & conservandum sincerum Catholicae Religionis cultum, obtinuit Regiam propensionem ad pacem, quæ in eo loco, qui destinatus esset, pangeretur. Verùm factorum malignitate contigit, ut hoc ipso tempore concupitæ concordiae spem eriperent plurium postulationes, & jura sibi vindicantium Vallem Tellinam, quæ se Rhæ-

Rhætis non esse subditam contendebat, neque illis parere ullo modo obstrictam. Hi prætextus, quos Galli, Austriaci, & Curiensis Episcopus deferebant, bella, quæ credebantur sopita, recrudescenti ventura mala prælagiebant: Pontificis animum altius pupugerunt. Quæ de causa cum validis peditum, & equitum Turmis Torquatum Comitem militari disciplina conspicuum destinat ducem in Insubres, ac esse intentum jubet in omnes bellicos motus: itidem Cardinalem Legatum ex Gallis regressum dimittit in Hispaniam, quo tempore in Regiis Aulis Principum Oratores sua interponebant officia de difficultatibus pacem disturbantibus amoliendis. Accessit Legatus Regi acceptissimus, & indicto congressu Montione, quæ urbs est Aragoniæ, in eo ab arbitris, & sequestribus expensæ omnes de pace conditiones: hæc post multas disceptationes fuere præcipuæ: Rhætiæ, Vallis Tellinæ, Bormii, & Clavennæ omnia restituantur in pristinum statum: Nulla alia in Valle, Bormio, & Clavenna Religio colatur præter Catholicam: In his locis extructæ arces, & propugnacula depositi nomine tradantur in manus Pontificis. Quibus omnibus ex fide servatis, omnia Vallis Tellinæ munimenta nunquam deinceps ædificanda diruantur. Pax hæc, quia

quia morabatur complere statuta, displicuit Gallis potissimum bella nondum pertæsis. Adhuc erant Germanicis copiis custodiæ Alpes; Rhætis in ambiguo liberum in Valle dominium; Veneti observabant interclusam Vallem ab Insu-
bribus; & erectas arces ad suos confines manere indejectas. Igitur ad arma majori, quàm antea, tumultu conclamatur; & Vallis Tellina iteratò suarum calamitatum spectatrix extitit. Bello Hispanis enuntiato, Dux Rhotomagus Gallus Vallem ingreditur; hanc obtinet, & vicina loca facili victoriarum cursu: Regio exercitui duo millia peditum adhæserunt conducta à Venetis, qui Italicæ libertatis amantes peroptabant, ut, Valle reddita, ad quos de jure attinebat, paratum Italicæ jugum dissolveretur. Quæ demùm integro fermè triennio gesserint hostiliter inter se Galli, adjuvantibus Venetis, Austriaci, & Hispani, non tam infensissimis, quàm obstinatissimis animis, ab aliis fusè, & copiosè explicata habentur: nostri est instituti in pauca multa conferre. Quod ergo incendium parva favilla cupiditatis, & ambitionis excitarat, Deo tandem placuit restinguere Pace Oeneponti confecta. Viderunt Hispani diù experti fœderatorum Principum fortunam suis conatibus non respondere; & factum arduum velle cum illis contendere de-
recu-

recuperanda, retinendaque Valle . Quare & inter alios cogitationum æstus fluctuantes, capta colloquii occasione cum quodam Rhætorum conquisitore in ea urbe commorante, Federici Enriquezii Hispani apud Archiducem legati opera secretum fœdus conficiunt; cuius pacta hæc primum locum obtinebant: Communi vi Gallorum expulsio è tota Valle; Concessum indigenis unius Catholicæ Religionis exercitium absque ullo hæresis interventu; Vallis restitutio, & subiectio Rhætis antiquis dominis; quorum imperium si recusaret, omni auxilio Hispano tanquam contumacem sciret se destitutam. Rhætica Respublica de fœdere monita ad ea promissa porrexit aures, & solutis ante tempus pensionibus corroborata diffudit animum. Rhæti & propriis viribus, & acceptis ab Insubria subsidiis robustiores inopinata aggressione consternant Gallos, intercepto Duce Rhotomago. In custodiis coactus ad arcium, & propugnaculorum restitutionem, omnia tradidit: ac intra septuaginta dies promisit è tota Valle Gallorum militum egressum: admonuit interim Regem de improvviso successu. Elapso denique præstituto tempore libertate donatus à Valle Tellina, & Rhætia relectos Gallos secum abduxit. Porro Vallis populi minimè læti, quia rursùm

in

in Rhætorum potestatem devenerant , supplices legarunt preces ad Regem Hispanum , ut ille suos dedititios in perpetuum dignaretur agnoscere , receptosque in fidem subtraheret ab hæretico , & immani regimine . Verùm hæc submissæ petentibus responsum fuit : Ut quiescerent qualicunque parta patriæ libertate : moderato justoque futuro Rhætorum imperio audientes essent : ipsos nihil acerbius , & gravius in indigenas consulturos , ne , violata fide , ab irritato Rege majora amissa Valle superioribus mala pati cogerentur .

Hic dicitur fuisse exitus belli pro Valle Tellina suscepti; sed gestum fuit præcipuè impensis Venetæ Reipublicæ, non alio proposito fine , nisi ut sibi , cæterisque Italiæ Principibus antiquam assereret libertatem.

Mantuani Belli Origo.

MDCXXVIII.

TEstamentum Vincentii Gonzagæ Mantuanorum Ducum postremi hujus belli origo fuit; quo nullum aliud calamitosius, si Mantuæ urbis antiquæ cladem spectes, vel clarissimarum civitatum ab illato contagio depopulationem.

Vincentius absque liberis excessurus è vivis , Carolum Nivernii Ducem , Lud-

dovici fratris Gulielmi Ducis avi sui filium in Gallia natum sibi ex cæteris suæ familiæ consanguinitate proximiorẽ hæredẽ, & sui Ducatus successorẽ instituit : mox, imminente morte, Carolo ejus primogenito Retelii Principi, sua in aula educato Francisci fratris filiam nuptui tradidit : & à civibus in absentiã patris fidei sacramentum præstari voluit.

Omnia hæc summo peracta silentio, defuncto testatore VIII. kal. Januarii, in publicum prodidere non sine invidia, & indignatione accepta. Aliqui Gonzagiaco sanguine procreati, & præcipuè Ferdinandus Guastallæ Dux, ægrè ferebant Principatui inhiantes, prælatum sibi advenam, &, inconsulto Cæsare, jura successionis perturbata.

Querebatur Sabaudus præreptam eo arcano connubio ex matre neptem, in sponsam Mauritio filio destinatam, ut causam dotis in Monte-ferrato sua jura dilataret. Non minùs fremebat Consalvus Cordubensis Mediolani Gubernator, quòd in Mantuanam ditionem homo Gallus irrepisset : invisæ Hispanis nationi futurum instrumentum Insubriæ crebrò infestandæ : & ostium ad occupandam Italiam opportunissimum.

Interea Carolus certior de extremis Vincentii tabulis, Mantuam per transversa itinera ad hæreditatem capeffendam
pro-

properat, elusis insidiis, quas transeunti paraverant invidi illius felicitati, ut opprimerent inermem, & obnoxium injuriæ.

Intrantem urbem sub incuntis anni exordium cives obviam effusi festis acclamationibus Dominum, & Ducem salutantes excipiunt. Verùm quia sæpè solent lætis rebus immisceri tristitia, hoc Mantuanorum gaudium breve fuit: jam livor, & odium in novum Principem sua arma exacuerant.

Illum Hispani quotidianis criminationibus apud Ferdinandum Imperatorem onerabant: quòd, spreta Imperii maiestate, nullo jure, & nulla sanguinis prærogativa Vir alienigena sibi vindicaret Mantuæ Principatum. Allobroges clandestinum accusabant conjugium: & unà perfidiam exaggerantes, igni, ferroque puniendam esse temeritatem exclamabant, & Cæsaream Aulam ad vindictam urgebant. Ex adverso Veneta Respublica iustæ causæ patrocinata per suos Oratores mitiora suggerebat consilia, à quibus non abhorrebat lenis Ferdinandi animus. Itaque visum est, priùs quàm armorum denuntiatione Carolus terreretur, dimittere in Italiam Joannem Comitem Nassavium; qui ab eo Mantuam Cæsareo nomine reposceret, donec, inspecta consanguineorum serie, illius ex Gonzaga gente
do-

dominatio digna appareret, cui Imperatorium decretum convenire censeretur. Comparuit Nassavius, & ad Carolum Cæsaris mandatum detulit, admonuitque, ut pareret, ne ab irato cogeretur ad sibi indicta Imperiali proscriptione. Hæc exponenti, minantique respondit Dux; nullis legibus obstringi posse, qui à propinquo susceperat hæreditatem; nullam fieri Cæsareæ Majestati injuriam, qui se Austriaci Imperii beneficiarium, victurumque perpetuò cum filiis in ejus ære, & obsequio profitebatur; alios jam misisse Vienne, & postremò primogenitum suum, per quos Ferdinandus edoctus de successionis jure, & de calumniis, quibus malignè afficiebatur, sibi hæreditarii Principatus Imperatorio diplomate confirmationem impertiret. Veneti constantes in protegenda Caroli causa omni ope contendebant, ut Princeps Retelius ad Ferdinandi genua provolutus sui Patris officia, & obsequia deferret, exponeretque conditiones, quas offerebat ad tollendam controversiam: Ut, una excepta Mantua, cum Casalæ arce, diruto propugnaculo, quod incubans urbi offendeat Hispanos, reliqua Montisferrati, & Mantuani Ducatus oppida, Cæsariani milites retinerent, donec justis arbitri Nivernii rationes, & jura decernerent. Hispani verò continuò infensi

fenſi obſtrepebant ; non eſſe è Cæſaris dignitate , quæ proponebantur : nec reſponſa data Naſſavio audienda , plena temeritatis , & audaciæ . Cùm itaque nihil proſectum eſſet , Mediolani Gubernator , & Carolus Dux Sabaudia , facti ſuorum votorum compotes arma pridem parata , in Montem-ferratum expediunt , tanta ejus potiundi ſpe , ut oppidorum , & caſtrorum ex pacto diſiſionem præverterent . Verùm irrita , & inanis utriuſque expeditio . Conſalvus fugatur inglorius ab Caſalis oppugnatione : auſæ quoque ſcæminæ concurrere , ne quis ſexu à laude ceſſaret ; Sabaudus , quæ caſtra parùm munita facilè occupavit , coactus reſtituit , ſupervenientibus ab Rupellæ expugnatione Gallis . Interim Carolus , collecto in Gallia duodecim millium exercitu , juſ ſuum armis defendere ſtatuit ; & Regio protegendus auxilio , Rupella domita , auſus eſt pro viribus referre vicem , & Cremonenſem agrum illatis vaſtationibus laceſſere . Propter hæc Hiſpani acerbiùs conqueſti ad Nivernii conatus compeſcendos repoſcebant à Ferdinando auxilia , memorantes opem datam adverſus rebelles in Germania . Tot querelis exaggerata Caroli audacia Cæſarem impulit ad arma : non auditur Princeps Retelius , & , ne maneat incuſtodiis , admonetur à Veneto Oratore,

re, ut clanculùm ab Aula discedat; Patrique suo nuntiet in eum conflatum bellum pro Hispanorum, & Allobrogum votis.

*Veneta auxilia Mantue à Germanis
oppugnata.*

MDCXXIX.

Ferdinandus Imperator in suscepti belli expeditionem adversus Carolum Nivernii Ducem tot agmina mandavit è Svevicis stationibus educi, quot suffectura viderentur coercendæ ejusdem contumaciæ: & delecti exercitus summam administrationem demandari Rambaldo Colalto: Qui, suis à majoribus hæreditarium, Venetæ Nobilitatis decus assequutus, meruit disciplinæ militari addictus in Cæsareis castris supremos bellici imperii dignitatis gradus. Hoc itaque duce, duo & viginti peditum, tria equitum millia per incustoditos, patentisque Alpium saltus ingressa Italiam tenuere. Tanta inconditæ gentis colluvies, quam pestifera lues comitata est, ut cum duplici hoste pugnandum esset. Matthia Galassio, & Joanne Aldringherio Tribunis, primùm infestavit Cremonensem agrum duris exactionibus: deinde, Olzio flumine tranato, in Mantuana loca abrupti instar torrentis latè sese effudit, vastans

om-

omnia sacra, profanaque immani feritate. Sub idem tempus Ambrosius Spinula pervenit Mediolanum Cordubensis successor: cum quo Collaltus Laude-Pompeja mansit. Inter hos Duces inito de belli cura consilio, constitutum fuit, contra Mantuam urbem Germanas acies dirigere; cum Hispanis Montem-ferratum invadere uno eodem tempore, & impetu, ut pluribus in locis Nivernii arma distraherentur. Non minùs Carolus sibi providus jam Casale propugnaculis, militibusque validissimè obfirmaverat: jam castra, & oppida, quæ in Mantuano agro patebant primis hostium assultibus, Hostianum, Volengum, Gazolum præsidiis munierat. Sed hæc ubi primùm conspexere Cæsarea signa, & phalanges tristia minantes procurrere, & ob oculos micare gladios, protinùs in turpissimam deditionem inclinarunt. Cannelto non modicè munito præsidebat Angelus Corrarius Patricius Venetus, tum ablegatus à Patria. Vir cupidus cum hoste manus conferendi prope- ris litteris accitur à Duce, quem timor incefferat, ne cum præsidiariis accurre- ret, quò magis urgebat necessitas. De- ditis, desertisque in hunc modum oppidis, quæ ingruentes Germanos aliquan- diù remorari poterant, extemplò insur- git ubique terror, metus, & fuga inco- larum, quorum ingens vis ex trepida-
tio-

tione Mantuam confugit. Direpto, & incenso Gubernulo, propè Mincium in Padum influentem, Aldringherius ante confectum urbis fuas copias exposuit; locaque ponendis castris idonea occupavit: qui accessus magnum civibus pavorem intulit. Sed illum Dux ab eorum animis dispellere conabatur, spe, & fiducia in Gallorum auxiliis, atque in proximis Venetorum suppetiis, cum utrisque sancito fœdere confirmatus. Hæc inter Respublica, audito periculo, in quo Mantua versabatur, in Vallegio Veronensis agri loco eminentiore contraxerat sub signis millia militum decem, & octo à Francisco Ericio regenda: & Marco Justiniano aliis quatuor bellatorum millibus mandaverat Addux, & Olli riparum custodiam: ne quis fieret in Venetos fines hostium excursus. Permiserat quoque Duci suis in provinciis conscribere milites, comparare comineatus, & arma; atque pro viribus sperare subsidia, quotiescunque Galli venirent in ejus auxilium. Sed interim Mantuana rura, villas, & ædes omni calamitatis genere hostis effusus diripiebat, vastabatque, & urbem, quam arcta premebat obsidio, dira insuper lues miserè vexabat: cujus sæviente rabie, opus erat & militiæ ob diutinos labores deficienti supplementum dari, & famelicis annonam. Hæc omnia Ericius

V submi-

subministravit, mille milites, decem muralia tormenta, plaustraque centum rebus bellicis onusta subsidio misit, & pecuniam, ne retardata stipendia coactas turmas disperderent.

Cuncta Petrus Quirinus prospero exitu invexit in urbem, & in regressu dedit in fugam hostilem equitum alam, potitus præda, quæ rapta ex incolarum fortunis in castra convectabatur. Tunc temporis, Collalto Cremonæ ægrotante, penes Andringherium erat omnis gerendi belli potestas. Is, cum explorasset, Godium oppidum ad Mincii fauces nimis opportunum ferendæ opi obsessis, ejus decernit expugnationem. Igitur trajecto fluvio, cum expedita militum manu irruit in munitiones: at repulsam passus adeò excanduit, ut admotis tormentis illud diruere, & nemini parcere minatus sit; quare, iis exoneratis, qui præsidio præerat, nihil æstimans nominis infamiam, omnium primus cæteris suavit deditionem. Hic Godii casus Mantuanis rebus visus est extremus: nullus alius tutior aditus relictus erat auxiliis: quo præcluso ostio Germani avidius inhiantes urbis direptioni, è suburbio suas in mœnia collinearunt machinas: & subactò Cereso, per cuniculos moliti sunt sibi transitum in vicinam insulam angusto fossæ trajectu ab urbe sejunctam. Disturbat Durantes Venetus Chiliarcha hostium

con.

consilium : Ceresum recipit , & subter-
 raneos meatus subruit , pro dirutis in mœ-
 nibus propugnaculis alia confestim excitat ;
 & hæc impigrè propugnans cogit oppu-
 gnantes ab incœptis desistere . Carolus
 multis subinde velitationibus Cæsarea ca-
 stra fatigabat : noctu Vergilianam statio-
 nem ingressus plures è præsidio cæcidit ; &
 plurimos in fugam compulsos amnis ,
 fracto ponte , suis aquis obruit . Tum
 ubique discurrendo per hosticum , com-
 mercia quærebat intercipere , & auxi-
 liantibus tuta aperire itinera . Verùm
 dum hæc fiunt , Mantuæ pestilens
 morbus furenter grassabatur : sua quo-
 que virulentia Germanas acies exhaurie-
 bat . Aderat etiam malorum extremum
 fames ; quam vastatus ager , vacuusque
 cultoribus invexerat . Ad hæc Mantuæ
 situs è medio lacu surgentis magnum ho-
 stibus conflabat negotium : illa expugna-
 tu difficilis : & Venetorum constantia in-
 ferendis suppetiis nunquam defutura :
 quibus de causis non semel illi cogita-
 runt laboriosam obsidionem deferere .
 At Mantuæ suum impendebat fatum :
 Vicina Ferraria , Germanis mercando
 Italiæ libertatem , & obsessæ urbis salu-
 tem per summum avaritiæ scelus , acce-
 pto pretio , rei frumentariæ copiam , &
 abundantiam ministravit . Ita vindicati
 ab inedia ; & proxima jam hyeme suis

in castris permanere ; & urbem latiori vallo cinxere ; ac, ut eidem nullum importaretur adjumentum, quotidianis discursibus sedulò invigilarunt. In hoc rerum articulo res Mantuanas fortuna deprehenderat : cùm Urbanus Octavius Pontifex, qui conterminis Ecclesiasticæ ditionis oppidis, & in arce, Urbana dicta, ad forum Gallorum excitata duo de viginti hominum millia imposuerat, miseratus finitimi Principis fortunam legavit ad dissidentes Joannem Jacobum Pancirolum. Cupiebat aut pacem, aut inducias : atque ut, cessante bello in aliquot dies, ageretur de concordia universæ Italiæ optatissima. Pancirolus Collaltum primò, deinde Carolum convenit : verùm cum utroque monita, consilia, preces, & officia incassum adhibuit. Alter petebat iniqua : alter negabat esse sui arbitrii, obstrictus Regis Gallorum nutibus : ex quo irrita legatione Pontificius minister Romam rediit : & renovatæ fuere dimicationes : à Carolo quibusdam in locis res feliciter gestæ ; quibusdam fortiter propugnatæ. Nulla interim in urbe requies : magis in dies gliscebant contagium : augebaturque difficultas introumittendi arma, & cibaria. Hæc duo gravissima mala pestis, & esuries assiduis funeribus exhauriebant miseram civitatem : cui suspecta quoque quorundam nobilium fides videbatur ultimam minari cladem

cladem. Erant, qui Ducem multo curarum æstu fluctuantem, & ad quæcunque credulum malebant potius perdere, quàm servare.

Hoc tempore infirmi Ericii vices ex Senatus consulto implebat Zacharias Sagredus; & Carolus Rhodigum pagum aggredi è re militari, & publica esse putabat; eo quippe subactò, difficile haud fore Venetis com meatibus tutum aditum recludere. Igitur subsidiarias copias petit ab Sagredo duorum peditum millia, & equites quadrigentos: has obtinuit; sed opportunè submittendas Atestini Principis ductu. Ille tamen compulsus à suis consiliariis properè festinare non expectat promissum ex condicò subsidium, & callido obsequutus consilio Rhodigum furens adoritur. At dum, eo capto, exultat, curatque circumvallare, tum detegitur fraus. Erumpit ex occulto majori vi Galassius, solo æquat aggeres; proterit milites; quos captivos non habet, interficit; & Duci fugienti parcens mavult ipsum redire, suis civibus infausti facinoris nuntium. Adverso item exitu fortuna obstitit Alphonso Guernerio, & Carolo Rubeo; qui egressi ad occupandam Hostiliam, vix in ejus conspectum explicant agmen, cum subitò ab insequente Aldringherio, & ab emissis

ex oppido stationariis cæde, & fuga ple-
ctuntur. Sagredus in his successibus ne-
parum cautus putaretur, & providus,
postquam Valegii recensuerat militum
octo millia, illudque constituerat horreum,
& armamentarium; Villam-bonam teneri
voluit à Valleta Gallo fossa, valloque cir-
cumseptam: & eo loco validum extrui
propugnaculum, & muniri militibus ex
numero trium millium, quos ille secum
adducebat. Non latuit hostes, quid Vene-
tus Imperator, obfirmata Villa-bona, mo-
liretur; & arcanum de Godio recuperando:
unde Galassius sua diligentia prævertit
opus: & antequam, solitante Valleta,
inceptæ munitiones firmitus consurgerent,
in eas improvisus insiliit, quem nostri sum-
ma vi, & propugnatione exceperunt.
Ab utraque parte pugnatur obstinatissimè;
dubio aliquandiù prælio, ancipitique for-
tuna, quæ cum in primis pronior Venetis
appareret; prostremò nutare cœpit, at-
que tunc protinùs elusit, quando, eductis
ab Galassio tormentis, compacti recenter
tumuli corruere, & incessanti verbera-
tione percussi, ac soluti, inclusis omne-
vitæ effugium ademittunt. Necantur plu-
rimi: Valleta, dum palantes, dispersos-
que prensare, & confirmare contendit;
circumventus ab hoste capitur. Hic in-
felix exitus Sagredum minimè deter-
ruit, qui in opere multus statim An-
tonium

tonium Conquisitorem subsidio mittit cum validissimo copiarum delectu , non desperans , renovato sine mora certamine , debellatum iri cum fessis . Porro illum hæc fiducia fefellit : nam egressæ cohortes , ubi ad locum , quem Capitellum vocant , præmissas habuerunt obvias , effusas , & consternatas ; panico pavore concussæ cum eisdem regrediuntur in castra turpi exemplo ignominiosissimæ fugæ . Quod infame dedecus Sagredus occultare voluit , ne alios terreret ; illos non fugatos , sed reductos admittens ; & illicò decrevit cum belli consiliariis in Germanos eminens universum immittere equitatum , quem instantes pedestres copiæ ponè sequerentur . Confertæ acies inter se cohærent , & omnes tanquam morti destinatæ vehementi contentione concurrunt . In multas horas atrox efferbuit dimicatio , lufitque sors dubia , quò se inclinaret ; usque adèò instabilis , donec nostros à campo perpulit dejectos ab ictibus ignitorum missilium , quæ hostes clam ex ædium occupatarum foribus jaculabantur : his , cum equestri militia acrius urgeretur , laxatis habenis conversa in fugam , & in peditum ordines irruens magnam eorum partem protrivit . Hinc tanta in Galassio crevit audacia , ut persequendo fugientes haud procul Valle-

gio, insultans diu noctuque multa verborum dicacitate oculos provocaret ad eruptionem. Sed provocanti responsum nullum, nisi per nunquam intermissa tormentorum fulmina, ne propius accederet, datum. Sagredus, cui nihil tam inopinatum, necque tam insperatum contingere potuit; expertus, quæ trepidatio, quæ ignavia esset in exercitu ex vario hominum genere collecto, in eam se opinionem ab armorum arbitris, & ducibus passus est adduci, ut non alios iniquioris fortis tentaret eventus, Vallegium clam desereret: & Pischeriam peteret quam ocyssimè. Decretus itaque recessus concubia nocte: & imperatum militi, ut municipio bellicis impedimentis spoliato, consumptoque igni nitrato pulvere, quisque sub suis signis sine strepitu, & cum silentio ad paratas alibi stationes commigraret. Præceptum hujus profectionis à gregario, rudique peditum vulgò sinistrè acceptum; ac si juberet, ut fugæ se committeret, qui propriæ saluti consultum vellet; continuò meticulosæ turbæ ducentium abnuentes voces, & imperia, dissolutis ordinibus, ruere cœperunt in tenebris, incertæ, quam in partem dirigerent iter; manè usque per agros errantes mox dederunt suæ desertionis pœnas. Galassius, audito nostrorum discessu, Vallegium citato cursu

cursu accurrit : & cum illud prorsus vacuum vidisset, fugientes insequutus est . Quos comperit per campestria dispersos, occidit : & extremum Gallicum Candalis agmen totum fermè profligat . Casu elapsos à furentis manu Pischeria, in qua Sagredus se receperat, & Verona faucios, semineces, & pestilentia infectos susceperunt . Nuntii, & litteræ, quas uno eodem tempore Senatus accepit tum de clade ad Villam-bonam illata Tertio Kal. Junii : deque totius propè exercitus internecione apud Vallegium; tum de peste traducta in Venetam ditionem, vix credi potest, quo incitato animorum furore, & impetu universam civitatem perturbarint . Quapropter Sagredus Venetias accersitus dixit causam suam, &, peracta quæstione, ab Senatu delatis honoribus exuitur . Verùm, infortunium hoc Patris Nicolaus filius redemit, quem ob singulares animi dotes in Magistratibus, in Legationibus ferè cunctis domi, forisque præclarissimè gestis ad Procuratoriam divi Marci dignitatem assumptum, & in defuncti Dominici Contareni Principis locum, præcurrentibus totius Urbis acclamationibus Eligentium vota, suffectum vidimus .

Mantua Germanis prodita.
MDCXXX.

R Evocato Sagredo, Respublica ne scirebus adversis turbari iterum suffecit Ericium: huic sine cunctatione in provinciam profecturo mandat, ne Mantuæ deessent auxilia: & ut reparatis viribus hostiles progressus impediret. Omnem sollicitudinem exigebant & queruli Ducis querelæ, & Gallici Oratoris officia nuntiantis à Monte-ferrato Regias copias discessuras, nisi omni conatu obsessæ urbi subventum esset. Igitur Ericius cum primum Veronam repetiit, extemplo curavit novos largo stipendio legere milites, revocare extorres, dispersos ad signa reducere, & accurata diligentia eum conscribere exercitum, qui par esset non minus Reipublicæ securitati, quàm Mantuæ defensionì. Aldringherius verò cum Galassio, qui stationario milite Vallegium munierat, junctis armis quibus nostrorum socordia paraverat existimationem, ad intercludendas suppetitas ubique struebat insidias. Omni tamen metu deposito, Ericius modò aperta, modò furtiva tum militum, tum comneatum submittebat auxilia. Ab ipsis etiam Brixiani, & Veronensis agrorum finibus convehabantur crebrò subsidia, patefactis

etis vi aditibus . Unde Venetos immeritò calumniabantur veluti Mantuanis rebus parùm utiles ; decebat quidem conqueri inimicam Caroli fortunam : & esse, quod lueret præteritorum Ducum licentiam, & Cives suo luxu perditos . Cæterùm per hos dies Mantuam multiplices angustiae urgebant , cujus mœstissima facies, & sæva contentio cum duplici hoste ; ut quos gladius non occideret, pestilens morbi ingluvies voraret , Carolum impulerunt ire ad Collaltum in Benedictino cœnobio morantem . Accepta fide cum ipso colloquitur , & obtestatur suam in Cæsarem fidelitatem , & obsequium perennaturum in filiis , atque enixè rogat , ut miseris , ac fessis daret requiem, aliqua saltem induciarum conditione . Illas Collaltus supplici concessit , sed in paucos dies , suadente Aldringherio , cui Federicus Gonzaga metuens , ut dicebatur, vicini hostis vires , & insolentiam, divi Georgii suburbium tradiderat , servata arce, quæ ponti incubans prohibebat ingressum in civitatem .

Dum igitur feriatur à dimicationibus , Aldringherius suas copias inducit in suburbium : quæ rei novitate conterriti cives ; & , occupato Cerasorum propugnaculo, sibi extrema imminere suspicantes , cuncta subito miscent tumultu , conscendunt muros , & in quos credebant fœ-

disfragos, tormenta explodunt. Hic non expectatus successus in eundem errorem violati pacti induciarum traxit Germanos: qui repentè correptis armis impetum faciunt in Arcem: &, obtruncatis præfidiariis, intraissent urbem, nisi furentes, & iratos pons opportunè sublatus repulisset. Repentinus casus datam utrinque à bello vacationem sustulit: & Mantuæ validiùs circumfessæ majorem deinceps attulit difficultatem ad opem. Quotidie, ac si parum esset cruento ferro exhauriri, plangebant exanimæ corpora domi, forisque exposita, magis crescente pestilentia carnificina, & metu omnibus propediem similis imminentis mortis: malignos, & semper infra necessitatem apportari victus: viduari mœnia defensoribus: & in jejunis corporibus dominari esuriem: & quod tantis obruebatur ærumnis ob nimiam sui Ducis credulitatem, in deteriora ruentis consilia illorum perfidia, & æmulatione, qui nihil aliud exoptabant magis, quàm publica perniciem privata odia exsaturare. Hæc vulgo. Cæterùm si Carolus tantisper Hispanam induisset personam: si Cæsari morem gessisset, recepto in arce Casalis qualicumque presidio, certissimè res suas servasset, & civium fortunas incolumes. At omnia retrorsum ibant arcana fatorum vi. Tot inter calamitates, ac trepidationes de-

ploratæ Civitatis sola Veneta Respublica reperta est, quæ egenti, & afflictæ subveniret; Gallis excusantibus se, sua auxilia in Montis-ferrati propugnatione detineri. Illa hoc unum frequens in mandatis inculcabat Ericio, ut quoties prospera fors afflueret, transportanda curaret obsessis parata arma, annonam, & pecuniam. Quod quidem munus tanta solertia obivit Venetus imperator, ut Germani admirantes illius constantiam, fidemque in ferendis subsidiis, rursus laborum tædio affecti, & imbecillitate diminuti exercitus extenuati de removendis castris cogitarent. Verumtamen nulla vis humana, vel virtus obstare potest Divinæ providentiæ decreto; propterea suspensis, & hæsitantibus affuit infandæ proditiõis machinator. Hic docuit sub densissimæ noctis silentio parva quædam navigia robusta bellatorum manu repleti; cum his lento remigio tranari lacum usque ad portam divi Georgii: facto ibi tacito descensu occiderentur vigiles, de taciturnitate pridem præmoniti, ne submissum à Venetis subsidium detegerent: post hæc, qui missi erant, portam pyroclastro prostratam occuparent.

Paulò ante Valleta è Godii custodia elapsus has hostiles machinas de urbe furtim per proditiõem intercipiendâ. Duci aperuit: sed ea referenti nulla fides;

des ; quia incredulo sic illudebant aliqui : Nunquam Mantuæ excidium vel ab universo insultante exercitu , vel ab ullo perduellionis reo fore intentandum. Brevis tamen contigit conceptæ fraudis eventus ; & nocturnas per tenebras proditiōnis facinus erupit . Dux exoneratæ machinæ sonitu , strepituque excitus omnia confusè agere cœpit : properat Arcem versus ad egressum : & contendit ab ea parte inimicam reprimere irruptionem . Sed qui dolos dolis contexnerat , claves occuluit ; quæ nullo in loco reperiæ sunt ad referandas fores : neque ulla ad ciendum bellicum instrumenta . Sub ipso momento , quo , comperta fraude , sistitur Ducis impetus ; ex adverso urbis ingens exauditur armorum fragor , qui à proditore confictus eò cives vocabat ad inanem concertationem . Hæc inter duæ portæ patuere hostibus : altera Prædellæ dicta ab Ursino Romano impigrè defensâ usque ad interitum : altera de Ceresio à Durante Veneto tandiù fortiter propugnata , donec ab ingrediente multitudine repulsus vivus in hostiles manus incidit . His expugnatis , Germanicæ phalanges glomeratæ in urbem per pontem eadem , nocte profiliere : confertæque visæ sunt luce prima huc , illuc discurrere ad rapinas , ad vastationes , ad scelera . Eo aspectu Dux pristinum pugnandi ardorem exuit,

exiit, execratusque suorum consilia, & fraudes in Portum Arcem profugit, atque secum traduxit quasi raperet, Nurum cum infantulo inter bombardarum tonitrua enixam: Gallum quoque Oratorem, & alios ex domesticis sibi cariores. Mox, ne plusquam barbaro hostium furori succumberet, de se dedendo has condiciones accepit: Ut bona fide ipse cum suis Melariam Ferrariensis agri castrum deduceretur: ut Cæsariani Arcem Portum tenerent.

Respublica miserata lacrymabilem Caroli Ducis, & Mantuæ urbis casum, Principi eo in loco, quandiū mansit, omnia, quæ opus erant ad victum, cultumque, abundè suppeditavit: atque afflictis, moestisque civibus se nunquam defuturam promisit.

Omnis interim posteritas hujus Mantuæ cladis immemor non erit. Urbs totius Italiæ delictum, quæ situ munitissima, & præsentibus Venetorum defensione auxiliis, per prodicionem, ut videretur aliter expugnari non potuisse, in Germanorum manus devenit hoc anno sexcentesimo trigésimo supra millesimum XV. Kal. Augusti; Hostibus opulentissima præda vix per triduum suffecit. Aldringherius, & Galafius pretiosorem Ducalium Ædium suppellectilem, multa, lauta, magnifica, planèque regia surripuerunt. Cæteri du-

sto-

ctores, calones, lixæ non solum fœda avaritia Templâ, & domos expilarunt: sed etiam ferina crudelitate in sacras, profanasque personas grassati sunt. Excruciabant exquisitis tormentis divitum corpora, ut abdita, & defossa eruerent: nulli sexui parcebat hoc genus hominum barbarum, & petulantissimum, quia sine modo, sine ulla modestia temperare victoriæ, cupiditati, libidini, & iræ suæ nequibat. Deploravit Eleonora Imperatrix suæ patriæ excidium: Cæsar quoque indignum facinus suo injussu patratum summè detestatus est. Ita Deo placuit: & postquam ille Mantuanam civitatem pestilentia, cædibus, incendiis, ac direptionibus non obscuro suæ justitiæ exemplo expiasset; suæ quoque recordatus clementiæ intra paucos dies eidem pristinum Ducem, pacem, & tranquillitatem redonavit. Pax igitur Ratisponæ sancita III. Id. Octobris ejusdem anni Ferdinandi Cæsaris continentiam illustravit: & Caroli Nivernensis obsequium tantæ debitum Majestati expressit. Itaque, datis Viennæ diplomatis, Carolus in Mantuani Ducatus, & Montis-ferrati possessionem summa omnium Italorum Principum lætitia restitutus est.

Octava in Piratas expeditio.
MDCXXXVIII.

E Gressi è Tunetensium portubus Piratæ octo suis myoparonibus ad pugnam, & ad rapinas instructis Adriacum Sinum, atque proxima maria latrociniiis turbabant. In hostes humanæ societatis Marcus Gradonicus Veneti pelagi Præfectus bis septem triremibus dimissus ab Joanne Mocenico totius classis moderatore, eos contentus deterruisse ab infestationibus suarum virium, ac nominis metu; incertum, quo consilio fugientes non sit ulterius insequutus: sed converfis prorsus in Corcyram appulerat. Cythera fuga elapsos occultavit: inde in Creticam oram solventes improvisa descensione pagos, vicosque non opinato, & unius diei furto diripiunt, & inflammant; repetuntque Tunetum plurimis spoliis, & mancipiis graves, & onusti.

Non multo post Halis Picininus triremes septemdecim, quæ Utica (hodie Biserta) educæ ad Hel'esponi custodiam sub illius cura mittebantur (quo tempore Amurathes Turcarum Tyrannus adversus Persas bellum gerebat) in Superum mare traduxit. Impius Archipirata nostræ fidei desertor conficta, navigatione Liburniæ litora oberrat, & quos

quos de suis prædatum emisit, latrocinii, & accolarum captivitate divites recepit. Prædatus est propè Aſcivium onerariam navim; & Apuliam ausus infestare, Nicodrum depopulatus, ad majores raptus adjecit animum. Cum igitur omnibus infestus, quocunque oculos intenderet, nihil nisi furta excogitaret, in sacros Ædis Lauretanæ thesauros rapaces inferre manus cogitavit. Sacrilego operi accinctum, cœlitus contigit, ut repens coorta tempeſtas immiſta grandine, ac tonitribus in Aulonis, nunc Vallonæ portum cum piraticis lignis rejecerit.

Per hos dies Antonius Marinus Capellus inter ſuos gentilitios nomine tertius in locum Mocenici classiſ imperator Cretam inſulam cuſtodiebat. Hic auditis Piratarum excuſibus, quibus maria obſidebantur, decem, & octo triremes, & duas ſeptiremes properata ſedulitate inſtruxit: cum hoc apparatu ex Creta ſolvit in prædones; & ſcrutatur omnes Veneti maris reſſus. Reperit tandem univerſam Halis Picinini prædatoriam claſſem in Aulonis ſtatione latere, & congruum tempus expectare ad egreſſum. Lætuſ hac occaſione ſumendi de prædone pœnas divinituſ oblata, poſtquam dieſ aliquot ante portum conſtitieſet ad anchoras, deliberavit in illuſ facere impetuſ, ne, ceſſante ma-

la-

lacia, reflaret ventus, & perterrefacto postulata venirent auxilia. Sciebat id fieri nulla Turcarum offensa, cum quibus Reipublicæ conventa erant, ubique locorum Mahumetani imperii piratas insequendos esse, & abscissis capitibus mactandos. Itaque per classiarios discurrens omnes hortatur, ut communes hostes impigrè adoriantur, & manus fortiter conterant in spem certam victoriæ, & optimæ prædæ. His dictis, septiremes utrique portus lateri adhærere jubet, reliquas in conspectum explicari, ne ullus Barbaris aditus ad effugium esset. Cuncti accensis animis concurrunt ad pugnam: lacerant majoribus tormentis navigiorum, latera, & fortiter vibrant in oclusos ignita missilia, quibus illi pavidî, atque tumultuantes raptant in custodias mancipia, ne, his libertate donatis, nostri suas vires augerent: profiliunt in litus, & in continenti propugnant egestis tumultis; iisque contacti torquent innumeram telorum vim. Venetos nunquam à certamine remove vel crebri lapidum jactus, vel ab arce fulmina bombardarum, quorum unum, avulso confracti mali fragmento; Laurentii Marcelli brachium percussit; ac debilitavit. Non tamen fluens sanguis absterruit à pugna intentum ad victoriam; qua modico parta cruore, portum ingressi consternatos, exterritosque

que egerunt in fugam . Peraſtini , quos Archipirata ſuis latrociniis graviter læſerat , natantes ſub aquis funes anchorales , catenasque , quibus ad litora myoparones religabantur , dirumpunt , & præcidunt : quo ingenio omnes vinculis exutos Capellus adeptus eſt .

Picininus à mari , & à portu cum ſuis affecſis exturbatus in montana conſcendit ; & inde ſpeculatus ſuas puppes remulco trahi , & ſingulas in triumphum duci , furens , ac rabidus Byzantium feſtinato grefſu advolavit : Baſſas adorat , conſperſus ſudore , & lacrymis hic maledicus rei geſtæ relator ; tantaque in Venetos ingerit convitia , & contumelias , ut illi acriter concitati in iram , & vindictam citiſſimis nuntiis certioſiorem fecerint Amurathem in Babyloſiis caſtris hærentem de Picinini claſſe in Aulonis portu Turcicæ ditionis lacerata , vique tracta ; de oppidi arce muralibus machinis quaſſata ; & inſuper de ipſa diruta Meſquita . Tyrannus ad hæc æſtuans truci indignatione reſcribit vindicari ſcelus ; cuſtodiri Bajulum ; interdici cum Venetis commercia ; detineri negotiatores ; & arma terra , marique parari ad puniendam Venetam temeritatem . Interim Venetias nuntiatum Capelli egregium facinus , quod VII. Id. Auguſti contigit , à Marino Molino trierarcho ingenti læticia complevit

Ur-

Urbem. Hæc duas piratarum rostratas , & insignem Picinini prætoriam suo in armamentario reponi vidit virtutis , ac fortitudinis monumentum : reliquæ exarmatæ , & inutiles in Corcyreis aquis demersæ Insulæ portum obfirmarunt . Senatus memor gratiarum , quæ supremo debentur Numini , illas singulari pietate egit : publicas omnium ferè Principum gratulationes accepit ; & quæ præcipuè officia exequutus est Pontificius Legatus nomine Urbani Octavi , cum quo non armis , sed verbis tunc disceptabatur de quadam sublata ab Aulæ Regiæ parietibus epigraphe in Reipublicæ commendationem , propter gesta contra Federicum Ænobarbum impugnantem auctoritatem Alexandri Tertii , quem illa hospitio suscepit , & irato Imperatori conciliavit . Cujus rei testimonium Innocentius X. successor eodem in loco reposuit . Dum hæc Venetiis aguntur , Byzantii Amurathis imperia opere implentur : Bassæ dant satellitibus custodiendum Aloysium Contarenum Bajulum : prohibent cum Venetis negotiationes : & paratas severæ animadversionis minas intentant . Quæ à Turcis acta sunt , Contarenius suis literis nuntiat Senatui , qui etiamsi dubius de proximo bello , ad terrestres tamen , maritimasque propugnationes se accingit : expeditisque ad Principes legatis ,
orat ,

orat, ut in promptu habeant subsidia in communem causam promissa. Ita agendo non timidè, sed cautè rebus suis prospiciebat. Non minori solertia Contarenius publica negotia curabat apud Bassas armata donis, & largitionibus facundia: asserebat intrepidus, ad omnem injuriam ubique repullandam Venetis, nec proprias vires, nec externa auxilia defutura: illos justissimam tueri causam: in fœdera non peccasse: nam quocunque in loco eisdem data erat facultas impunè sectandi, & occidendi piratas. Demum Amurathes, capta Babylone, sed Persis non devictis, Byzantium redit memor vindictæ in Venetos; & nunquam satur imperii prolatandi. Verùm cogitanti expeditionem adversus Rempublicam Bassæ deliniti Bajuli rationibus, quas amplissima munera roborabant, persuaserunt, ut classes, & arma converteret in Russos Euxini ponti perturbatores: atque ob eam causam fore nunc opportunius aliquid agere cum Venetis de concordia. Acquievit ille, quem pariter auri fames sollicitabat, suorum consilio: & pacatus ad has accessit condiciones: Veneti damna Aulonis arcis, & Mesquitæ illata numerato auro resarciant: restituant unam ex triremibus in suum navale traductis, quæ non erat ex piratarum numero: Bajulo in libertatem vin-

di-

dicato, pristina utrò, citròque comeat navigatio: cæteris in rebus conventa, inter Turcas, & Venetos contra piratas Inferum, Superumque maria infestantes firma remaneant.

Ita armorum turbinem, qui Reipublicæ imminabat, dispulit Aloysii Contareni prudentia, & mira in gerendis rebus elegantia: eique universa acclamavit Italia pacis, & otii tranquillitatem adeptam.

Belli Parmensis causa.
MDCXLI.

PAuli Tertii, & Clementis Octavi summorum Pontificum favor in commodum Farnesiorum Parmæ, & Placentiæ Ducum Petri Aloysii, atque Ranutii Mensam Numariam invenit in urbe Roma; quæ Farnesia dicta horum perplexis rebus prodesset ex collatis ad quæstum pecuniis. Constitutæ Mensæ frumentarii proventus Roncilionis, & Castri fuere addicti: ut cum, iis pro tempore locatores, & Mensarii quotannis per singula bimestria creditorum nomina expedirent. Hic solvendi mos, qui constans fuit in Ranutio, visus est aliquando in Odoardo filio vacillare; ac turbari; atque adedò intermitteri. Quamobrem illi, quos res angustia

ita maximè premebat, crebris onerabant contumeliis Siros, & Grillos Ligures; qui cùm essent locationis, & mensæ ministri, datam fidem ex præscripto non implerent: quanquam cum his immeritò agebatur; quia Odoardus impediēbat exactiones reddituum, qui venum ad alienigenas mittebantur. Propter hæc gliscebant in dies gemitus, & querelæ pauperissimæ gentis, cui retardatæ solutiones surripiebant alimenta vitæ, & postquam tota urbe percrebuisſent, tandem per nuntios ad ipsas Odoardi aures pervenere, ejusque adventum Caprarolam, regium Farnesiæ domus delictum, maturarunt. Eò profectus, ut res suas cum conductoribus abdicare se hoc munere cupientibus componeret, ab Urbano Pontifice invitatus Romam venit. Illum veneratus adeò in sui gratiam, & amorem pellexit acri, quo pollebat, ingenio, & exploratæ virtutis experimento, ut nihil non foret, quod optanti non largiretur Urbani humanitas, & Pontificiæ auctoritatis munificentia. Idcirco eidem alieno ære valdè obruto altera constituitur Mensa secundæ erectionis appellata, quæ ob diminuta pecunias deponentibus lucra plurima augebatur utilitate. Hoc obæratī Ducis levamen ab exinanitis solutionibus, ut insolitum, nemini futurum erat in exemplum. Exinde

Odoar-

de Odoardus cum Urbano frequens, diutius in colloquutionibus, ac semper acceptus Aulicorum in se armavit æmulationem, & invidiam. Hæc duo antiqua vitia in Aula Romana illum pessimum in modum arietarunt, omnia suspecta, invisaque fecere Nepotibus, quæ rara, & eximia in juvene Principe Sanctissimus Patruus referebat ad animi ejusdem amœnitatem. Oblivis itaque cœpit oculis aspici; suboritur dedignatione contentio; debitis privatur honoribus; tandem ob illatas, & relatas mutuò offensusunculas in acerbis utrinque criminationes ventum est: & Odoardum compulerunt ad discessum, quia sermones de eo sinistrè per urbem commeabant. Non tamen prius abire voluit, quàm Pontifici causam sui discessus aperiret; imputando Nepotibus mutata in simultates officia; mox cæteris in Aula Proceribus valere jussis, Cardinales, Franciscum præ aliis sibi maximè invisum, & Antonium cum Thaddæo urbis Præfecto insalutatos reliquit. Propterea Barberini fratres gravi hac contumelia affecti dicuntur acri odio effervuisse: & irati ad vindictam hoc consilio, ut propter æs alienam arma distringerent. Hæc iratis se obtulit occasio. Odoardus suo ex indignatione ab urbe Roma egressu nihil de Farnesæ Mensæ statu deliberavit ad leniendas creditorum offensas: unde plurimi

merupentes in lamenta, & querelas postu-
labant ejus bona venundari, ut æs alienum
solidum solveretur: & miserabilium vo-
ces obtundebant in ipsis penetralibus Pon-
tificias aures. Hinc factum est, ut illicò
Castrum missi sint exactores, qui omnem
rei frumentariæ copiam, quam locatores
Apostolicæ Cameræ divenderant, ceu ve-
ctigalibus obnoxiam in Romana horrea
conveherent. At illi vacui, & repulsi re-
deuntes nuntiarunt, universam annonam à
Duce exactam, impositam navigiis, tra-
ductamque ad externos, violata convento-
rum fide. Insuper ab eodem, qui vim
timebat, ipsum oppidum semilunari-
bus munimentis, propugnaculis, mi-
litibusque validè obfirmatum. Hæc
audita exasperatis animis indidere sti-
mulos severæ coercionis adversus Re-
fractarium. Primùm igitur admonitus
fuit, præceptis, dirisque intermi-
nando, ut intra trigesimam diem dimit-
teret præsidia, & excitatas munitiones
dirueret: deinde sciret, se ultricibus ar-
mis fore oppugnandum, ni actutum pæ-
reat. Hæ minæ impendentis mali fru-
strà intentatæ sunt parato ad propu-
gnandum, conantique probare, datis,
editisque libellis agi contra se ex mani-
festa decretorum, atque denuntiatio-
num sævitia. Intereà dies sæpiùs pro-
lati, ac præfiniti Odoardo, ut resipisce-
ret,

ret, incassum effluxerunt; quare accusata ejus contumacia, de inferendo bello lata est sententia. Hanc vel omninò abrogare, vel prorogare, tam Cæsaris, Regumque Oratores, quàm Veneta Respublica, Magnus Etruriæ, & Mutinæ Duces per suos legatos integro fermè biennio enixiùs contenderunt cum Cardinali Francisco, ut inspectis rationibus, non districtis gladiis exortæ contentiones dirimerentur. Sed quæcunque officia nunquam per id tempus intermissa parvi duci, detrectari, atque aliis ex aliis conditionibus deludi visa sunt hoc responso:

Non esse, cur ampliùs de Odoardi causa agatur: se Beneficiarium agnoscat; Romam veniat inermis; & Pontificiis pedibus advolutus commissi criminis veniam imploret.

*Barberina expeditio in Odoardum
Parma Ducem.
MDCXLII.*

PROfligata spe pacificæ compositionis, postquam aliud quindecim dierum spatium Odoardo datum ad Pontificiis mandatis obsequendum præteriiisset, illicò hastæ subjecta exponuntur contumacis bona, quæ Romæ, quæ foris erant, in debitorum solutionem; & anathemate devotus damnatur læsæ

Majestatis reus, Parma, Placentiaque urbibus, & omni alio dominatu exuitur. Conscribitur miles, parantur arma, tormentaque advehuntur: & Viterbii lustratur exercitus: eique datur Præfectus Ludovicus Matthæjus. Hic jussus exire in expeditionem V. kal. Octobris præmisit Cornelium Malvasiam cum nongentorum equitum agmine, in plures turmas diviso, qui Tuscaniam primò, mox Montis-alti castellum, dejectis præsidiis, occupavit: atque alia loca in Castri circuitu suis excursibus suscepit in fidem. Tandem oppido successit Matthæjus cum peditibus ordinata disciplina in aciem procedentibus: & illud III. Nonas Octobris aggressus postridie ejus diei obtinuit ignavè, ac turpiter deditum à Delphino Angelerio Præfecto, & à præsidiariis, cum primis tormentorum ictibus exteriora munimenta nutarent. Odoardus, audita Castri jactura, valdè excanduit, atque de Angelerio, qui proximum auxilium ei promissum non expectarat, in Placentiæ arce debitas exegit pœnas. Conqueritur, se præter jus offensum vi sibi illata ex injustitia apud Principes affines, & amicos: Imperatorem, Galliæ, Hispaniæque Reges suos exposcit auxiliores: eos communis periculi nomine adversus Barberinos concitabat: sed iterum omnes sua officia, preces, & hortamenta ad pacem obtulerunt:

runt : sperantes hæc vota validiora ,
quàm arma cum his , quibus peculiaris
Christiani Orbis tutela , paxque inter
Catholicos Principes divino , humano-
que jure commendabatur . Hæc Parmen-
sium rerum desperatio , quæ maxi-
mè Italogum Principum animis infide-
bat , Venetos in primis , Etruscos , &
Mutinenses habuit sollicitos : ne incen-
dium , quod à non parva scintilla cœ-
perat , & Castrum jam corripuerat , vi-
delatum in Insubriam , vicinas provin-
cias suis flammis combureret . Itaque
inter se coire decreverunt viribus , opi-
busque , testati , se in Odoardi causa
tuenda Italiæ tranquillitati prospicere .
Dux hac fœderis spe recreatus , bello
promptior , quàm paci Parmam profe-
ctus , continuo admonuit Viros sacro
cultui mancipatos , & in claustris de-
gentes , ne in vulgus schismata diffemi-
narent : si quis dirarum jacula extime-
sceret , aliud solum illicò peteret . Qui
proprio edocti erant exemplo , hoc tem-
pore cautiores à sui Ducis obsequio non
recessurunt . Cives , & vestigales di-
gna se ipso facundia hortatus est , ne in
data semel fide ob illa terribilia
ab ipso deficerent . Non multo labore
id sibi suaderi passi sunt , cum omnes
una voce palàm profiterentur suam fi-
delitatem , & nunquam à suo in eum

obsequio recessuros, prompti pro suo Principe, & Farnesia domo fortunas, liberos, ipsamque vitam profundere. Ita domi rebus compositis, militiæ adjecit animum studio tam celeri, ut brevi eduxerit in aciem validissimam bellatorum manum. Quantocyùs ineundæ pugnæ nulla hostium suorum potentia territus impotenti desiderio æstuabat.

*Principum confociatio in Parmensis
Ducis causa tuenda.*

Auditi armorum strepitus in Etruria; nuntiata Castri deditio; Odoardi bonorum, & nominis proscriptio, suspectaque minarum tonitrua in Parmensem Ducatum impulere Venetam Rempublicam, Magnum Etruriæ, & Mutinæ Duces in unanimum consensum, & conspirationem defendendi amici Principis causam: conjunctisque viribus consulendi populorum quieti, & rerum suarum incolumitati. Singulis tamen visum fuit, priùs quàm properarent ad arma, repetere officia, & multa deprecatione à Barberinis contendere, ut placati darent Odoardo veniam errati, præcipiti juventutis æstu: & satis intercepto Castro multatum in pristinam gratiam reciperent. Sed iterùm hæ inanes, & irritæ rediere. Tunc etiam Senatum, qui semper intentissima cura in omnes

nes componendi diffidii, bellicque amolien-
 di occasiones incumbibat, quædam repen-
 tina novitas valdè concussit. Inaudierat
 Barberinas copias ad oras Policinii tradu-
 ctas excitata propè confinia propugnacula;
 & Melaræ præsidium impositum: hanc
 animorum commotionem sedare conatus
 est Vitellius Legatus Pontificius multa-
 coram Patribus asserendo de amica Barbe-
 rinorum propensione in Rempublicam.
 Verùm non multò post aperuit simulatum
 officium major suspicandi occasio. Ambro-
 sius Carpineus Thaddæi nomine petiit à
 Mutinensi transitum Barberinis agminibus
 per ejus terras in Parmenses: quem si
 dissensus adimeret, vis extorqueret. Hac
 de causa variæ curæ distrahebant Senatum:
 cogitabat angustas Mutinæ res, qui viri-
 bus impar nequibat impedire profectio-
 nem: & identidem, quanta esset illius ju-
 vandi necessitas, animo versabat. Ideò
 mandavit Aloysio Georgio, ut cum festi-
 natione cùs Mincium trasportaret exerci-
 tum cujus Veronæ degens summam te-
 nebat administrationem: & peditum tria
 millia cum centum loricatis equitibus Al-
 phonfi Antonini ductu expediret in Muti-
 nensis auxilium, aliaque submitteret sub-
 sidia, si quis violentus fieret ab hostibus
 transitus. Magnus quoque Dux pari soli-
 citudine Mutinensem pedestribus turmis
 juvit, & Parmensem, numerata pecunia

in militum stipendia. Uterque pugnam anhelans obstantes moras increpabat; eoque magis, quòd rursus eadem Carpinei postulatio Mutinensem urgebat. Hic veluti coactus annuit; modò acies rectà procedentes, & manipulatim suæ ditionis agrum ingrederentur quarto Idus Augusti, & ab eo egrederentur exacto quinto kal. Septembris. Carpineus hoc responso Matthæjo, & sibi gratulatur: ac prudenti viro illa perexigui temporis conditio insidiosa visa est: non ignorabat auxilia transmissa à Venetis: & paratos Duces ad repellendos transeuntes. Quare ne manifestæ cædi exponeret exercitum; qui ea prævisa multorum fuga extenuabatur, tutiori consilio abstinuit ulterius ire, & progredi; sed ne subitus recessus dedecori esset, illum honestavit objecta induciarum conventio. Hæc in quindecim dies data est, ut interim apud sequestres ageretur de concordia: porrò tempus ex pacto concessum exactum est obstinatas inter altercationes. Prætendebant Barberini Pontificia decreta esse immutabilia: Odoardus recusabat à jure suo discedere: Principes, quos societas conjunxerat, profitebantur, se nunquam passuros, quæ publicæ tranquillitati, vel privato amicorum commodo repugnarent.

*Bellum Sociale**Venetum , Etruscum , Mutinense ad-
versus Barberinos .*

R Es eo statu , quem diximus , mul-
tis difficultatibus conflictatæ soli-
citarunt ad fœdus Venetos , Etruscos ,
& Mutinenses ; sancitum Venetiis pri-
die Kal. Septembris , ab eorum delega-
tis , atque his præcipuè legibus confirma-
tum : Ut unusquisque fœderatorum suum
pro viribus conscriberet exercitum , qui
totus expleret numerum duo de vigin-
ti millia peditum : atque numeraret mil-
le , ac quingentos equites : Ut socii mu-
tuo se , relique suas tuerentur . Ut in-
pristinam Castri possessionem inducerent
Odoardum , cui aditus in societatem ad-
mittendus eodem sacramento , quo fœde-
rati . Propterea quæ pro illius causa fue-
re concepta , eidem Senatus per Joannem
Baptistam Ballarinum à secretis expo-
suit .

Sed ne quis bellum hoc nomine
cum Barberinis indicendum grande
crederet aliquod nefas ; palàm prola-
tum est , expers esse omni sceleris macu-
la , & prudenter , ac justè susceptum ,
sanctè custodita Apostolicæ Sedis , Pon-
tificiæque majestatis veneratione , ad-
versus utentes Romanæ potentiaæ ar-

mis, è re sua, ad invisi Principis perniciem. His propterea tribuenda fore sacrilegia, furta, vastationes, cædes, & quidquid mali parere solent arma victis, & victoribus. Initi fœderis fama non adeò terruit Barberinos, ut non sperarent fœdus inter plures pactum facile à gliscente sententiarum discrepantiacirca belli administrationem posse aut distrahi, aut rescindi. Nihilominus dictitarunt omnia fore pacatissima: obligata ab Odoardo unius ex fœderatis fide: se, depositis armis, impleturum ea, quæ decent Pontificium vectigalem. Dux, cognita hostium arte, qui cupiebant illum judicio circumvenire, repudiat judices in sua causa Barberinos tanquam inimicos; & fatetur se paratum ad alia, cum, penes amicum Principem deposito Castro, lis super eo actitata futuro Pontifici reservaretur: alioquin jus suum reponebat in armis, ut injustè sibi ablata reposceret.

Cùm itaque bello gerenda res esset, Respublica collegit bissenam militum millia omnis generis: eaque, defuncto Georgio, regenda tradidit Joanni Pisauero, qui hoc bellum suaserat, & qui Romæ Orator experientia noverat, quo animo Barberini res Venetas prosequerentur. Proficiscenti in provinciam injunctum fuit ponere castra in vico Policinii, Canda; Padi litora muni-

re

re præsidiiis : non ultra , citrave flumen ducere exercitum , inconsulto Senatu . Hæc mandarunt exequenda prudentissimi Patres ; quia nunquam à concordia discordes fuere : atque semper etiam inter bellicas rixas de eadem componenda actum est Angeli Corrarii facundi Oratoris opera ; qui instauratis congressibus plurimum laboravit , ut ferocientes Ducum animos molliret : sed horum fervida juvenia , incitante audacia prorumpendi in hosticam , ab omni suasionem abhorrebat .

*Ducis Odoardi ingressus in
Romanas ditiones .*

Odoardus suo peracri ingenio inauditum facinus ausus est : à quo , cum esset facilius verbis , quàm opere , nullis unquam rationibus , precibusve potuit dimoveri . Parma egressus cum tribus selectorum militum millibus V. Kal. Octobris in Bononiense territorium irrupit , tanto Barberinorum terrore , ut ad famam irrumpentis Thaddæus metu consternatus Ferrariam aufugerit : & Matthæjus castrorum Præfectus , quod nequisset suas copias sistere panico quodam terrore correptas , Castrum-francum properarit . Dux nullo quamvis tormentorum apparatu , exiguoque peditum robore instructus , audentior ta-

men libat. Plumatum sibi ausum repugnare captum diripuit: quod oppidi discrimen omnes circum incolas illius invasionis pavore, & stupore replevit. Denuntiatione ejusdem periculi Bononiam attonitam reddidit: at placatus obsequiis, soloque iacessu contentus intactam reliquit. Alias Romanæ ditionis urbes, & oppida vel mitibus delinita verbis, vel asperis minis deterrita, patefactis portis, tutò pertransiit. Nemini injurius, nisi contrà obnitenti; quamobrem intentata vi Forum-livii prætergressus est. Meldulam flexo itinere petit, Aldebrandinæ gentis confanguineus: inde Magno Duce concedente affini suo ingressum in Etruriam, Aretium provehitur; quo loco Princeps Matthias illum lautè excepit, & ejus militibus in campis pabula ministravit. Refectum ex labore, & incommodo viarum, quas pluviarum defluxus ferè continuus reddidit infestissimas, hortatur ipse ad reditum ob incertum susceptæ expeditionis exitum: at ulterius progredi voluit: nam castrametatus in hostico, putabat non modicum Barberinis incutere metum; & idcò Castellam ad Lacum promovit. Oppidani conantes illum inde deturbare, vim sentiunt ultoris; irrumpit audacter, & occupatum oppidum muralibus machinis exiit, nemine hircere audente. Tunc rumore

dis-

fertur Romæ Dux vicinus: coque increbescente, urbs tota intremuit, ac expavit, tantaque omnium gentium, ordinumque confusio exoritur, veluti si ab imminente procella universa civitas proculcanda, & ad portas Annibal foret. In hac trepidatione illicò mittuntur Legati, qui cum Duce agerent de omni controversia componenda. Et ecce currenti objecta remora. Primus ex sequestribus Lionæus dynasta Galli Regis Orator Castellam accessit, & cum Duce plurima colloquutus de transactionibus illi gratulatus est, quòd propensius esset ad pacem, & paratus, dimisso agmine, Romam proficisci, provolutusque ad pedes Pontificios veniam obsecrare his conditionibus. Si aliquis fœderatus Castrum apud se depositi loco susciperet: & si intra statutum tempus illud sibi restitueret. Lionæus spe constitutæ pacis erectus citatis equis advolat Orepitum, ubi Cardinalis Spata in eundem finem destinatus degebat. Retulit omnia in pacifico statu esse: Odozrdu cuncta obsequii, & obedientiæ signa erga Pontificem coram præstiturum; tum, cum Castrum in Matthiæ Principis manibus depositum eidem ex temporis præscripto redderetur. Sed, ac si nova, & inopinata Cardinali referret, cognovit, purpuratam Virum eò venisse non pacis ministrum, sed morarum.

rum machinatorem. Nihil magis optabant Barberini, quàm aliqua intercapidine se liberos à præsenti sollicitudine, atque ex industria prorogari dies, qui commodiùs ad cogendas vires sufficerent. Dux hæc ubi reſciit, detestatur omnia callidè remorantem : iraque percitus Plebis urbem verſus adequitat : deinde Aquulam, incenſo in via Panicali oppido, quod ſuos pabulantes laceſſiſſet : ut proximiori appuſſu mage terreret Barberinos, & eò citiùs adigeret in propoſitas à Regio legato conditiones. Commeabant ultrò, citròquæ Principum Oratores; & pro Veneta Republica Corrarius, omnes intenſiſſimè laborantes; ut infringent difficultates, quæ à Spata obiciebantur ſuper Caſtri deſposito. Propterea pactæ ſunt aliquorumdierum induciæ, & ipſes rediit reconciliationis inter diſſidentes. Porro Odoardus inſidioſæ procraftinationis pertæſus, conſcius, quò collimarent Franciſci Cardinalis machinamenta : & quòd collecta quindecim hominum millia ex omni ordine ſub Valenzæo Gallo duce magnæ apud illos exiſtimationis propediem contra ſe hoſtiliter erant proceſſura; ſenſit dare ſe pœnas ſuæ credulitatis, quia cunctando tot dies perdiſſet, quod ſtatim promovendo trepidanti urbi eſſet conſequutus, vindex injuriarum, quas crepto Caſtro acceperat à Ber-

à Barberinis. Frustratus itaque spe victoriæ, quam conceperat ab incusso metu, Aquila discessit, metuens ab hostium multitudine circumfundi, & circumveniri per insidias, ad alia indignantis animi gesta. Per Etruscos commeatum suppeditantes, perque Caferonianam in Insubres festinatò descendit animo hyemandi cum Mutinensi Duce in hostico. Subinde fœderati Principes indignatione, & ira succensi (quòd Spata nihil sanè non astutè operatus esset, procrastinando transactionis negotium, ut suum votum maturaret; & nihil agendo aliorum deluderet officia) constituunt armis extorquere eam pacem, quam studium publicæ quietis impetrare non potuit.

Varis armorum successus.

Odoardus Bondenum, & Stollatam occupat.

BArberini, qui propter Castrum incruenta victoria acquisitum, majores sibi obsequentis fortunæ eventus spondebant, minabantur ex valido copiarum delectu dilatum, non dimissum transitum ad subigendum in Insubria Odoardi Principatum. Habebant sub signis viginti peditum, & duo equitum millia in diversis locata stationibus: sed præcipuus nervus sui exercitus

tus cum Thaddæo Ferrariæ subsistebat. Parmæ, & Mutinæ Duces optimè consultum rati, si properatò præverterent hostium cœpta, atque turbarent; uterque impatiens moræ suam instituit expeditionem. Mutinensis Ferrariam affestabat, urbem quondam Atestinæ domus; & illam furtiva aggressione ad pristina jura revocare: latebant intus aliqui suarum partium fautores, eum admissuri, si constitutæ noctis hora signatæ portæ successisset. Verùm quia festinatiùs præter conductum tempus præproperavit, audiunt excubiæ accedentis strepitum, & prodicionem suspicati, movent arma, advocantque propugnatores. Nimia celeritas dolos detegit; festinatio Ducem frustrata est; merces machinantibus scelus suspendium fuit. Sors prosperior Odoardo afflavit: defixerat animum in duo oppida Bondenum, & Stellatam Ferrariensis agri. Quare utrumque exploratum mittit Carolum Soldatam ingenio, atque experientia in arte militari sibi notissimum. Hic renuntiat, neutrum satis firmè à Valenzæo vallatum, munitumque, & ea optanti acriores addit stimulos; quibus captis aperta in Padum navigatione, tutus per uberem provinciam patebat excursus. In hanc itaque iturus expeditionem, quam suos celat silentio, sub capitis pœna indicit, ne quis in itinere

nere molestiam inferat indigenis : hæc effatus, summo manè Bondenum versus contendit. Fama Ducis adventantis exterritus Franciscus Muriconus Præfectus, admonito Valenzæo, opem implorat. Ille in crastinum promittit auxilia; interim jubet obsèpiri vias equitatu, & viriliter venientem repellere. Dux interim sua solertia datum diem occupavit: sub prima noctis vigilia oppidum armorum, vi concussum, pavidumque tenebricoso ingressu obtinuit, Muricono ex metu Ferrariam profugiente ad solvendas suæ ignaviæ pœnas capitis obtruncatione. Hoc fœlici eventu animi plenus, non minori diligentia Stellatam adorsus; cùm præsidii conatus uno impetu repressisset, ea in deditionem recepta, victoriam auxit. His potitus oppidis existimavit sibi abundè pro Castro satisfactum: & quo studio unum, & alterum, Soldato instructore, munita voluit, latiori vallo, instructaque commeatu bellico; præsidiis, vigiliisque: eadem summa cura toto belli tempore observavit: nec ferè unquam recessit à custodia, & metuens suarum virium dispendia sæpè renuit societatem, & suppetias ferre iis, qui pro illius causa decertabant.

Dum hæc agebantur, Cardinalis Antonius prope Lacum-obscurum propugnaculum excitabat, quod utrumque
Padi

Padi aggerem ponte , & catena colligaret : Senatus prævidens illud opus promoveri in Policinium , imperat Pisauro , ut hostilem machinam destruat . Qui promptus ad jussa eò cum valido agmine processit : dataque in conspectum acie propugnaculi demolitionem obtinuit . Sed statim ex hoc aperta animorum dissidia , mutuaque in damna rabies . Epirotæ in Sagis sinu , quædam navigia Ferrariam deferentia , annonam suis dromonibus intercepere : contra Barberini in iisdem aquis detinere nonnullas naviculas , quæ mercibus onustæ Venetias commeabant : paulò post in urbem deducta navis à nostris piscatorio astu decepta , captaque , dum à mari in Padum parabat ingressum . Tandem ad confinia Ferrariensis ditionis eligitur Nicolaus Delphinus , ut adversus portoria circumvectionis fraudantes Reipublicæ antiqua jura custodiret . Vocatus subinde ab incolis in obsequium Veneti nominis propensis accurrit ad Ostia plena fluviatili , terrestrique apparatu ; spe redigendi in potestatem Sagis turrinæ faucibus Padi incubantem , & Arianum munitum oppidum . Quæ igitur opus erat celeritate prævertens subsidia , quæ Ferraria mittebat , nocturna impressione Turrim repente consternatam occupat , data semisomni præsidio libera abeundi facultate . Postea Arianum festi-

stinato incurſu intercepti incautum, deditumque interruptis pontibus reddidit immune ab imminente hoſtium acceſſu. Non minori ſtudio ſequutus exploratorem ſub primam lucem Codegaurum invadit. Municipium à propugnantium valida manu aliquandiù ſtrenuè deſenſum non ſemel repulit aggreſſores. Sed ubi innotuit, proximas eſſe Franciſci de Comitibus auxiliares copias, promiſſa militibus Codegauri præda, ita illoſ animavit ad impreſſiones, ut reſiſtentes deturbarent à muris, irrumperent, & furiis agitati ob interitum Chiliarchi Ucchi in fortunas, & corpora Codegaurenſium effrænate deſævirent.

Exterrita hoc factò alia contermina loca Delphino ſpontè ſe dediderunt. Eodem tempore Anconitanas aquas triremes Venetæ infeſtabant, interturbatis rerum commerciis. Cæſenaticum, à classiariis deſcenſione facta, capitur, fugantur præſidarii, & incendio fortuito excitato conflagrat. Primarii turrim, tormentis à noſtris occupatam, Barberini modico labore recipiunt: & ne iterum in eorum poteſtatem veniret, funditus evertunt. Piſaurus veritus, ne intumeſcentis Padi aquæ, diſruptis fraude aggeribus, extra alveum effuſæ Venetum Policinium innundarent; in riparum cuſtodia ſedulam adhibuit operam: atque,

que, ut securior fluminis foret custodia, quatuor selectos duces dimisit Corru-
cium, Valletam, & Comites, Portum,
& Martinengum, ad tot oppida Mela-
ram, Ficarolum, Lacum-obscurum, ac
Trecentam, Reipublicæ subjicienda. Sed
singula unicuique Duci spontaneam pro-
perarunt deditionem: indigenis novarum
rerum cupidis in Venetos inclinantibus.
Et Pisaurus Trecentæ stativa sibi castra
constituit; commorantibus ad Candam,
Jacobo Contareno, & Deghenfeldio Ger-
mano; qui Scultennæ pontem imponunt,
muniuntque propter amnis liberam navi-
gationem. Per eos dies Odoardus præ-
textu necessariæ pabulationis Padum trans-
ire tentat in Policinium: sed illi obsti-
tit Venetus Imperator; & hanc repul-
sam Dux ægrè tulit: tamen cum pro
explorato habuit, ea loca, ad quæ ani-
mum adjecerat, ad Rempublicam ex fœ-
dere pertinere, suos conatus compressit.

*Multiplices Oppidorum aggressiones, &
propugnationes.*

EX his, quæ agebantur à nostris,
Barberini quodam metu pavid
Ferrariæ se continebant. Tandem col-
legere animos, & egressi Castellum-
francum contendunt, proximi Bonde-
no, & Finario. Hujus municipium
Muti-

Mutinensis Ducatus Angelus Corrarius curabat : qui timens , ne vicina agmina illud circumsepirent , opportunè Ducem vocat in auxilium . Accessit properè cum suis copiis , plenus tamen querelarum adversus Pisaurum in opposita Padi ripa confidentem : ejus quoque morositatem inculabat Parmæ Dux , suspicatus hostilia arma moveri in Bondeni oppugnationem .

His expostulationibus à Corrario relatis , Pisaurus suam ex Senatus decreto excusationem profert ; quo inconsulto , ei non erat permissum acies ad Policinii custodiam in partes distrahere , vel ultra Padum deducere . Hoc responsum à Mutinensi legato Patribus redditum elicuit mandata ad Pisaurum : ut conventa in fœdere compleret : Mutinæ Duci expeditionibus opem ferret , & iis adesset tempestivè . Ille jussa facturum multis in re præsentis premebatur difficultatibus ; videbat , divulso exercitu , debilitata præsidia ; incustodita fluminis litora ; & Policinium patere excursionibus . Tria itaque peditum millia cum sexcentis equitibus Padum transmissura committit Valletæ honorariæ militiæ ductori : parem bellantium numerum Gonzagæ tribuit castrorum Præfecto . Quoniam verò in his trahendis copiis multiplex gerendarum rerum confusio transitionem ipsam tam-

tamdiū morata est, donec Barberini ab exploratoribus acceperint, itura fœderata arma ad Centensis oppidi expugnationem: quare, motis illicò castris, ad ejus custodiam convolarunt. Socii nihilominus eodem voto Valletæ negotium dedere explorandi Centi situm, & loca idonea aggressionibus. Qui diluculò deductus per invia sistitur clara luce ante oppidum; audacter tamen circumequitat mœnia, scrutatur munitiones, & occurstantem equestrem turmam fugat. Fit ingens tumultus in oppido; erumpunt præsidarii: & ille obsistit imperterritus: sed mox repulsus à Matthæjo: incolumis revertitur ad suos, & nuntiat, Oppidum non minùs armis, quàm operibus esse instructissimum. Hac spe frustrati, dum aliis occupantur consiliis, subaudiunt, hostes in Mutinensem agrum effusos omnia perturbare terroribus; Matthæjum intercepisse Spilimbertum, & Saxulum; atque minis armatum in montana consensurum. Mutinæ Dux cum Corrario deliberat Scultennæ palustria relinquere, & hostilem sequi exercitum, cupidus aperto campo decertare. Matthæjus à fronte, à tergo, & lateribus hostibus circumfusus, ut congressus refugeret, capta castella præter Spilimbertum deserit: Dux, dejecto hoste, statuit in Crevalcorium socialia arma dirigere: præcessit

Val-

Valleta cum lectissima pugnantium manu, & duo secum vexit muralia tormenta. Quo impetu, & machinarum fragore, militumque audacia aggressus est oppidum: pari eventu sperabat in subitas deditio- nis condiciones impellere Cautum Ascu- lanum Præfectum. Sed hic non minis, non vi territus hortanti ad deditio- nem oc- cludit aures; clam datis literis, cita ac- cerfit auxilia. Cardinalis Antonius opis indigo ut succurreret, nullam interpo- suit moram. Igitur celeri cursu cum Va- lenzæo improvisus imminet obsidentibus, turbat ordines, persequi jubet fugientes, & dari neci per devia desperios. Valleta minimè animo consternatus aggressionem tam repentina, superstites à cæde, & fu- ga reducit ad signa, repugnat fortiter, non sine spe victoriæ, nisi loricati equi- tes turpiter aufugissent; & imploratum à vicino exercitu subsidium properasset. Igitur dum disceptabatur in castris, utrùm submittendum, an retrahendum auxi- lium; deliberatione facta, non esse expo- nendas copias incertis armorum casibus, nec victori hosti Mutinensem ditionem ad direptionem; Valleta subsidiis desti- tutus velitatim pugnando campo deces- sit. Ducentos de suis in acie reliquit, de tormentis alterum gravioris molis in cœnosa fovea defodit. Hoc Barberini inventum festis acclamationibus Bono- niam

niam invexere ; eminentissimi triumphipræclarum monumentum . Ob hanc victoriam Romæ quoque ingenti gaudio exultatum est ; ac si cum fœderatis debellatum bellum esset : & , deposita pacis negotiatione , Legatis Principum denuntiatur ab urbe recessus . Hoc exemplo Respublica Vitellium Nuntium , qui mollibus verbis multis quotidie pacificis promissis vana spe mulcebat Senatum , Venetiis abire jussit . Cardinalis , ut secundi eventus augeret lætitiā , servato , munitoque Crevalcorio , cogitavit de Nonantula adorienda , qua si potiretur , non diffidebat , socialia arma prohiberi posse ab aperto in Mutinenses aditu , & ab incusso ipsi urbi metu . Ergo nox integra impenditur futuro apparatus ; & quod fuit deliberatum , delecti Duces continuò exequuntur . Sub auroram Valenzæus in castrum profunda tantum fossa circumdatum furenti rapitur impetu cum muralibus tormentis : Matthæjus animo intercludendi subsidia miserat ex militibus promptiores , qui Navicelli pontem insiderent : eoque tempore Cæsar Oddus inter bombardarum strepitus jam minatus erat municipii Præfecto necem , nisi se dedidisset . Omnes momento irruentes armis , & vocibus ubique infiliunt , & provocant : sed alius , ac sperabatur , contigit eventus . Qui præsidio præerat , Eques Fontana , jactatas
mi-

minas irridet : & confestim Ducem admonet , opus esse celeritate , si ab impendenti discrimine vult salvam Nonantulam . Dictum , factum , nullo temporis intervallo : cum auxiliaribus equitum turmis Dux præmittit Comitem Raymundum Montecuculum : ipse tormentis , & peditatu plurimo subsequitur . Interim omnes prætergressus Conquisitor Panzetta jam à pontis infessi custodia propulsarat Barberinas cohortes , quas ex fuga dispersas Comes excepit : deinde auctus à Duce valido pedestris militiæ incremento fulminis instar terret , ac cædit Nonantulæ obsessores ; dum Valenzæus ejus fossam cœperat complere ruderibus . Hostes , postquam sensere impressionem à tergo factam , & ob oculos micare gladios , diffusi custodia pontis , pavefacti tumultuantur , & vagantur ignari , quò se reciperent sine ductore : quare ex hac trepidatione plurimi in Raymundi manus corruere . Hæc fiunt , & Cardinalis facti inscius cum Matthæjo properat ad pontem quasi ad alterum triumphum . Dux certior factus de accessu nihil in mora potius habuit , quàm insidias in transeuntes : occuluit in fossis , obsitis ab utroque latere vepribus , expertos moschettarios : & hoc astu incautè proficiscentes decipit . A furiali glandium turbine concussi fuere gravis armaturæ equites : & hi

præ metu infrænem cursum capeffentes peditum plures protritotos interemerunt . Sors amica favit Cardinali , & Matthæjo , qui inter illa volitantia fulmina incolumes , & ab insequente Duce liberi regressi sunt . Mansit hoc factum Cardinali Antonio alta mente repositum ita , ut illius in hostes referendi causa omnes belli offensiones tum in Mutinenses converteret , pericula , & damna excogitaret . Jussit conscendere in montana milites fortitudine potiùs , quàm numero pollentes , qui hostilia ibidem patrarent : & inopinata procella gentes , & arces concuterent . 'Arx Julia capta fuit , ac magnus monticolis injectus pavor . Dux , postquam ad vindictam destinasset Matthiam Scittonum , promulgat , se per Bononenses grassaturum , ut à montanis hostem retraheret : & à Corrario , qui Venetas acies in Boni-porti statione dirigebat , petit opportuna subsidia : qui , quò forent promptiora , hanc curam delegavit Gonzagæ in Castro-novo moranti . Sed quia Dux aliud præter destinatum , iter instituerat , Scittonum in Montana sequutus : Corrarius , damnato congregandi cum hoste consilio , in iis locis absque impedimentis , & com meatibus ad se revocat Gonzagam non sine gravi Ducis querimonia . Dicebat , quòd ope destitutus aliquot solùm insignia

victoriæ, non victoriam reportasset, Scitono teste, qui cum tercentis militibus per salebrosos montium anfractus, obstructasque viarum angustias multos perdidit de Barberinis, ab Arce Julia deturbavit, & captivos abduxit in castra. Ex his magis cupidus suæ experiendæ fortunæ, ac si ubique prosperè cum ipsa ageret, iterùm de tentanda Bononia cogitabat. Corrarius suadebat à Finario non recedere: attamen, ut omnem de se eximeret contumaciæ suspicionem apud querulum, & facilem in suis ad Senatum expostulationibus, non servari cum eo fœderis pacta, in unum consentit cogere arma, & rectà Spilimbertum pergere. Verùm iter, quod maturandum erat, retardavit viarum difficultas, quæ per id tempus adeò tenaci luto operiebantur, ut qui alterum pedem vellet educere, alterum altiùs infingeret. Interrumpitur ab hac molestia transitus: & qui præcesserant, regrediuntur: nihilominus Dux constans in suæ profectionis sententiâ, relicto Spilimberto, ultra Scultennam transportat exercitum, absque ulla Corrarii contentione, non aberrandi longiùs à Padi litoribus. Ad trajectum fluminis nullus obex præter unius equitum alæ occurrentis, quæ metu correpta sese è conspectu proripuit, nuntia Plumatio, adesse hostem. Oppidani de-

prædationis timore perculsi ultrò sociis ducibus fores aperuere . Ingressi oppidum , quo recepto videbatur non esse metuenda Bononia , milites , quia otiosè confidebant , conspiratione facta exeunt prædatum , nequicquam tribunis intonantibus minas , necesque . Excurrunt arroganter , & petulantius per domos , atque tuguria , quo tempore agricolæ colligendis messibus dabant operam ; tantaque rapacitate pauperrimæ quoque gentis reculas surripiunt , & expilant , ut Duces impensè detestati effrænem audaciam adempta miserabilibus restituerent ; & illam in scelestiores ultimo supplicio vindicarent . Cæterùm à tumultuaria , confusaque agrestium , & incolarum fuga Bononia consternatione maxima concutitur : & ab audita paulò post Bazziani expugnatione , omni spe abjecta salutis , cum quilibet sinister casus in bello terrori sit , extimescebat , ne Barberinis devota direptionibus , & incendiis funditùs interiret .

*Barberina militia irruptio in
Policinium .*

Cardinalis Antonius , cujus animo altiùs hærebant ea , quæ socia arma inferebant , ac minabantur damna , secum assiduè , & cum Valenzæo cogitabat , quo modo & Bononiam à metu
cri-

eriperet, & suis hostibus paria reponeret. Verùm quia omnia pendere videbantur à Republica, quæ propriis viribus magni erat momenti ad bellum, ad eas distrahendas de occulta in Policinium irruptione hoc occurrit consilium: cui si, afflante fortuna, contigisset eam partem, in qua Veneti Proceres suas foveant delicias, militari licentia diripere, vastare, & incendere, nulli erat dubium, quin illi coacti ad sua tuenda, ab alienis infestandis essent protinùs recessuri.

Hanc itaque Cardinalis deliberationem amplexus Ferrariam proficiscitur: ubi specie muniendæ validiùs urbis adversus suspectas hostium machinationes, omnia ad vadandum Padum necessaria accurato silentio disponit. Igitur in navigia clàm parata, quæ cum robustis bellatorum catervis noctu non una vice traductis Valenzæus, aliique strenui duces conscenderant, transvehuntur imposita sex hominum millia, & plurima impedimenta; omniaque exposita in adversos fluminis aggeres ad vicum, cui Paviolæ nomen. Deduxit hanc fluviatilem classem Comes Hieronymus Rossetus litoralium Padi locorum peritissimus: qui & ab exploratoribus accepit, propugnaculum ad Lacus-obscuri pontem architectorum æmulatione nondùm ab humo excita-

tum carere loricis, non exuperabili vallo interceptum, & propterea expugnatum facile, si audax in illud fieret impetus. Latuit nocturnus his transitus nostros eorundem incuria, & avaritia: nullus erat, qui hostilia opera specularetur: nullus explorator, qui audita referret: & ideò signa tunc data à vigilibus de Barberino trajectu habita sunt somniantium deliramenta, donec invalescente per tenebras descendantium murmure, palam innotuit, obsessum litus, & in aggere excitatum munimentum. Qui è proximis stationibus poterant exilire ad repugnandum, aufugere terrore, metuque mortis occupati. Solus ad tumultum obequitavit cum suis cataphractis Eques Tritonius: at dum conatur & novissimos premere, & primos prohibere ascensu, ab ingruente multitudine circumdatus satis habuit se extricare, & periculum eludere. Eo repulso, Barberini, quorum, orta dies prodidit, quot emerissent agmina; catervatim, & furentes proferunt ad expugnationem propugnaculi. Hoc ponti proximum propugnabat Comes Portus, qui cum Marco Antonio Strozza turbatis, ac dilabentibus obvius, hos dum sistere, & aggressoribus objicere totis viribus connititur, à Valenzæo in medio superati propugnaculi à præpotenti manu reprimitur, multis

tis suorum interfectis . Compulsus in propinquum habitaculum cum exiguo militum numero sex horas impigrè obstitit insequentibus glandibus , piliisque ; tandem admotis bombardis , cum tecta diruerent , & nulla subesset auxilii spes , Valenzæo dignis conditionibus se dedit ; à quo fuit perhumaniter receptus ob exploratam animi sui fortitudinem . Non ampliùs ex his , quæ agebantur , erat in ancipiti , Barberinos superasse flumen , & in propugnaculum irruisse . Idcirco Pisaurus festinavit mittere in suorum subsidium quingentos pedites , & equites centum : mox ipse præstò adfuturus cum reliquo exercitu : quamvis illum valdè imminuerant missæ ultra Padum expeditiones , & collocata in pluribus castris præsidia . Antecesserat cum primis copiis Marcus Antonius Brancaccius , qui ubi ad colluviaria vada pervenit , audita à fugientibus Porti captivitate , & propugnaculi jactura , substitit , & succedenti Pisauo causam exposuit sui retardati itineris . Hinc reditus consulitur ad castra , quæ à multis ob metum vicini hostis fuere deserta : curritur ad Corrarium , ut cum festinatione opem afferat rebus periclitantibus in Policinio : cujus partem , quam occupant Barberini , gliscentes numero , & audacia flammis , & cædibus ferociter devastabant . Hæc inter aggressoribus

favebat nostrorum mora in deliberando, quomodo illos propulsarent, & discors opinio (ut constaret, sua quemque sectando consilia complurium imperium bello inutile esse) iisdem opportunum tempus præbet ad extruenda duo propugnacula prope Lacus-obscuri pontem, quæ fluminis utrique litori imminerent: & ad prospectum latiùs diffundendum succidunt arbores, solo æquant ædificia in circuitu, ut prædas securiùs agerent. Per hæc momenta Corrarius decessit Finario; cuius vestigia Matthæjus sequutus ex occasione aut suis opem, aut nostris damnum laturus, excitavit in Mutinæ Duce cupiditatem Centum iterùm adoriendi, sed magis urgebat præsens necessitas; quæ Bondeni coegit in unum socios Principes, & consiliarios, ut omnem cunctationem de rependendis ex æquo injuriis abscinderent. Censebant Dux, & Corrarius, servatis armis citra Padum in Bononiensi tractu omnia hostiliter agi: Bononiam aggredi; cuius discrimen si Barberini animo conciperent, proculdubio, relicto Policinio, accurrissent ad ejus tutelam; quod utique consilium expectationi respondisset. Contrà proponebant Deghenfeldius, & Gonzaga; ille quidem cum equestribus copiis subitum fieri impetum in ipsas hostium stationes: iste non sine peditatu quoque, &
cum

cum Parmensi equitatu. Huic opinioni Pisauro inclinanti Odoardus dissensit; nisi prius data illi dies esset ad suas vires conferendas; & numerata pecunia, ut suis militibus stipendia solveret. Cognitione Deghenfeldius Ducis ingenium; ideò morarum impatiens suum equitatum in aciem de castris produxit, & cum festinatione concurrit. Propugnaculum, Ricciæ dictum, strenuè invadit: acri prælio commissio, reboant tumultu, armorumque fremitu omnia circum loca; nam superato vallo, per vias, septaque propugnaculi ruebat in neces. Ad dissonos clamores excitæ è vicinia reliquæ acies, integræ numero, & viribus, audacis bellatoris impetum, non ardorem restinxerunt. Tunc obstinatiùs confertur manus, at non æquo Marte, dum recentes pugnant cum fessis. Verum, si poscenti subsidarios, qui in omnem eventum parati esse debent, non obstitisset nimia imperantis cautio; metu, ne potior exercitus pars periret, fama est, pristinum armis Venetis decus eo die à præclara victoria futurum fuisse, ut restitueretur. Cum igitur Deghenfeldius ampliùs obniti non posset, confertis ordinibus castra repetiit: & Barberini victricibus signis ubique cursitantes cuncta cædibus, & rapinis fœdarunt. Igni magis, quàm ferro armati nobiliora Policinii loca demoliti sunt. Pro-

ximæ urbes, Rhodigium, & Verona imminentis hostis terrore percussæ conclamarunt ad arma: sed panicus ille timor brevi sedatus est prudentia Præsidum, & Civium constantia. Ex-adverso nuntius rei infelicer gestæ in Policinio Senatum stupore maximo percudit, & ingenti mœstitia totam urbem affecit. Audiebat unusquisque vastatos agros, protrita vineta, dissipatas ædes, fugatos agricolas, incensa Patriciorum palatia, combustas fruges, abacta armenta, & nullum relictum locum in feraci provincia immunem à direptionibus, & sacrilegiis. Hæc damna passi avaritiæ, fœcordiæ, & negligentiae Duces accusabant. Infelix imperantium conditio, ut rerum successu conceptis spe minimè respondente, ipsi omnium latratibus sint obnoxii. Patribus itaque placuit abrogare Pisauero amplissimam potestatem, duobus ei additis Legatis Angelo Corrario, & Michaele Priolo; postea citatus ad carceres, & admissus ad dicendam causam, ita longius se objectum crimen amolitus est; ut, quæ sequuta est omnium votis absolutio- nis sententia, clara ab offusis calumniæ tenebris prodiderit testimonia ejus prudentiæ, integritatis, & fidei in Rempublicam. Igitur in pristinam reversione existimationem meruit tandem supremum Patriæ solium conscendere.

Marci Justiniani Veneti Imperatoris expeditio.

Inauspicatum Comitibus Federici Mirolis facinus.

PIsauro à bello ad iudicium revocato, ei sufficitur Marcus Justinianus; cui dignitate, tituloque pari Senatus detulit rei militaris imperium. Vir ingentis animi festinatò excessit ab urbe, & hac fiducia apud omnes, ut esset deleturus maculas Venetis armis iniustas. Ingressus Ficarolum, & lustrato exercitu, bellum indixit conventum, in quo actum fuit de hostibus à Policinio submovendis. Interfuere Mutinæ, & Parmæ Duces, Legati, & Consiliarii. Mutinæ sententiam, quæ suadebat in Centense oppidum, à quo Matthæjus aberat, moveri arma, corripit Odoardus, postulatis ab eo auxiliis, verisimilia adducens, non posse Bonde-num, & Stellatam suis præfidiis carere. Consulabant aliqui vel oppugnationem, Bentivoli propugnaculi Venetis castris infestissimi, vel cum universis copiis subitam irruptionem in ipsa hostium munita: sed utraque expeditio damnabatur à sociis ut difficillimi exitus: & ita de more altercatum discordantibus sententiis. Porro Justinianus de sua apud Rempublicam existimatione sollicitus,

accusato inter tot concertationes temporis dispendio, illud arripuit consilium, quod, ne cunctando fenesceret, illicè voluit executioni mandare. Hoc fuit in Ricciæ propugnaculum solis Venetorum agminibus ferri. Præmittit in expeditionem Valletam; qui cum tribus militum millibus propugnaculum ab inferiori litoris parte obsideat: vallum erigat: & super aggestos tumultostormenta disponat. Tunc ipse statim se promittit affuturum. cum Gonzaga, eum de rebus ad exitum perductis esset admonitus. Ita factum, sed Valenzæus impiger in rebus agendis speculatus ea opera, irrequieto diù, noctuque bombardarum tonitru extructos aggeres concutiebat: pari damno nostri fulminabant propugnaculum: quare machinarum jacula nunquam cessantia modò Barberinis, modò Venetis viam sternebant ad irruptiones, & pugnas sæpiùs instauratas plurima cæde, & vices suas agente fortuna. Dubius Valenzæus de victoria denuò recurrit ad stratagemata: ut sienti furtivo ingressu in Policinium nostros provocaverat à Bononien-sibus: sic alio occulto facinore eosdem removeret ab oppugnato propugnaculo. Seligit duo millia peditum, quibus ars dimicandi, & præsentis animi ad ardua tentanda. Hos prima noctis quiete cis flumen, cujus libera erat navigatio, du-

ducit cum silentio Comes Federicus Mirolus singularis audaciæ vir. Transvectos, & albis fasciis præcinctos, ut inter se noscerentur, prohibet riparum ascensu, antequam signum ad insiliendum audirent, data tessera à transfuga Corso. His ita dispositis quievit, donec omnes audito signo exilientes, concordî conspiratione invadunt Gonzagæ stationem, & furioso incursu tenebris circumfusos percutiunt. Resonat repentè armorum strepitus, & oppressorum ejulatus, qui Gonzagam excitant ad opem illis ferendam, magis qui somno sepulti, quàm vigiles impunè mactabantur. Sustinuit ad horæ spatium nocturnos aggressores; quos & strenuè connixus est propellere. Verùm abjecta diutiùs obsistendi spe adversus hostem, qui ante comparatis viribus pugnabat; cùm sibi nullum classico vocatum mitti subsidium videret, retrò cedens, castra, & impedimenta permisit diripienda. Sed hujus tenebricosi insultus damna ita molestè tulit, ut ad ea reparanda nihil reliqui ad celeritatem fecerit. Confestim igitur cinctus prævalida Epiroticæ gentis cæterva, firmoque instructus peditatu, sub primum auroræ exortum hostes prædis adhuc intentos inopinatò aggreditur: & cito veluti turbine perculsos vel cædit, vel vulnerat: & qui acti in fugam flumen petiere, vel

gur-

gurgitibus absumpti sunt, vel inter cunctationem subeundi aut oppressi, aut capti. Denique hunc prosperum vindictæ successum magna cumulavit lætitia ipsius Mirolī captivitas: saucium, & fugientem cohibuit in amnis transitu Carruccius Epirotarum ductor: sed non contentus interceptisse gloriantem se illa nocte de Venetis triumphaturum, dum alios in litore palantes persequitur, tergum præbuit lethali vulnere: percussus enim plumbea glande interiit, & suo casu non parum funestavit illustrem victoriam. Hunc virum ex octingentis, ut fama retulit, in utraque acie interfectis, inter suos præcipui nominis Veneti recensuere. Barberini verò Demarchum Sanctacru-
cium.

Varia concertationes.

Cardinalis Antonius, cui militaris avaritia dissolverat Moroli prosperè inceptum facinus; alios ex occulto parabat dolos cum Valenzæo: atque utrique prompto ad iras, & ad insidias omnis procrastinatio erat odiosa. Meditabantur alteram incursionem à flumine, quod, illis absque timore navigantibus, dabat securum appulsum ad ultiores ripas. Non latuere Justinianum, quæ ab hostibus in quintum diem struebantur frau-

fraudes: idcirco cautiore consilio in stationes non longè à propugnaculo dispositas, munitasque reduxit exercitum ab antea actis congressibus valdè fractum, ac mutilum. Hic tamen recessus ab inexper-
tis, quibus dulce bellum, non sine compellationibus, & probris in urbe exceptus fuit, visusque severa aliqua animadversione dignus; quia Barberini, cum nullus obsisteret, suas munitiones pridem acriter oppugnatas, dirutasque eo temporis intervallo validiùs repararunt. Senatus, ne quid suæ, suorumque ducum prudentiæ detrimentum accederet, & existimationi, imperat Justiniano non abesse ab hostium conspectu: & ad quamcunque dimicationem expeditum instructa acie congregari: nihilque, quod agendum, audendumque esset, prætermittere.

Dum per hæc in Policinio gesta fortuna alternis vicibus variabat casus; instructa classis, quam è Dalmaticis oris advexerat Laurentius Marcellus, litora legebat ab Cæsenatico Senogalliam usque, & milites crebra descensione plurima damna inferebant accolis. Tandem hærentes in portu Senogalliæ compressit ab excusso è mœnibus tormento Thomæ Contareni navarchi interitus: ac subinde repentinis tempestatibus turbatum mare. Ideo Marcellus, ne classis periret naufragio, illam veluti expulsam, & eje-

ctam.

Etiam in portum propera navigatione imminenti periculo subduxit. Per id tempus Barberina agmina in Etruria quoque grassabantur: atque ea de causa Magnus Dux Reipublicæ poscebat auxilia. Hæc Senatus fœderato Principi se daturum promisit in proximum annum terra, marique paranda: Armatas triremes novem, quæ sinum Adriacum excurrerent: ac totidem rostratas naves, quæ Tyrreni litora custodirent: præter peditum, equitumque copias, quæ terra adversus hostes pugnarent. Mandat præterea Justiniano Barberinos distinere in Ferrariensi agro aliquo bellico motu, & Mutinæ Duci suppeditas ferre iterum æstuanti cupiditati inquietandæ Bononiæ. Ut morem gereret, ille educto exercitu, & in prospectu Lacus obscuri explicato, ostentavit, quid virium, quid roboris secum haberet; ac si alteram propugnaculi oppugnationem esset moliturus. Sed quia tum nihil audere, & experiri visi sunt hostes, qui anted quodam furoris impetu omnia sibi objecta disjicere minabantur; dato receptui signo in sua castra, eodem, quo exierat, ordine reversus est. Hic regressus, quem aliqui criminati in præsens, à pluribus in futurum laudatus fuit: tunc refarcitæ fuere Mutinenses copię quinis peditum millibus, & equitibus octingentis: & auctæ vires Sebastiano Venerio, qui, Delphino ægrotante, in Po-

Policinii tractu, ad Loretum interfecto præsidio, Coloniae vicum combussit. Tunc Valleta cum aliis infracti animi ducibus navata egregiè opera trans Padum, majorem hostilium copiarum partem in Bononiensibus occupatam tenuit. His diebus Mutinenses Valenzæum in Etruriam properantem à tergo intercipiunt; & Montecuculus Monteviam, Serravallum, aliaque minora oppida suo Duci asserit. Cæterùm Panzettæ de generoso facinore breve gaudium; obscuræ noctis interventu in Crevalcorium sese immisit: & clara voce Mutinæ Principi vitam, valetudinemque precatus confusione maxima replevit oppidanos: verùm dum ingressæ turmæ territis, & consternatis optima quæque surripiunt, præter opinionem accidit Codræi adventus; qui fortiter irrumpens ingressu suo oppressis lætitiâ, & aggressoribus terrorem intulit, intercepto Panzetta, quem deseruere furaces prædantium manus, ut in tutum asportarent direpta spolia. Eadem igitur nocte, qua captum fuit, Crevalcorium Codræi fortitudo recuperat, atque extemplo communit firmioribus præsidiis. Intereâ Valleta à Castro-franco, ubi hostes erant castrametati, profligata equitum ala, Bononiam usque infestis excursibus discurrebat: hunc ad Spilimbertum reductum illi totis agminibus obsidere constituunt:

at dux

at dux bellator ejus consilii non ignarus obviam egreditur, divisoque equitatu, dispositisque in viarum angustiis peditibus, offendit incautos, & compulit re infecta, conceptaque spe vacuos retrò cedere. Non quievit ab offensis, qui manè à transfuga Liburni equitatus ala adjutus stationarios adoritur, plures in castris occidit, ditatusque nobili equorum præda ad suos regreditur. Quo tempore & in Policinio Delphinus, confirmato corpore à fluminis trajectu, apud Gardam robustos grassatorum, latronumque cuneos repressit: & Antonius Grimanus Crispinum tutatus incursantium per agros militum impetus sapiùs propulsavit.

Eadem tempestate etiam in Etruria varii fuere hinc inde armorum conatus; & plerumque Barberinis irriti. Magnus Dux consilio, & opera Matthiæ Principis fratris sui, Alexandri Borri, aliorumque præstantissimorum ducum solertia pluribus in locis violentos hostium conatus fregit: à furtivis Valenzæi assultibus Pistorium vindicavit: castella, oppida vel accepit in deditionem, vel sibi capta recuperavit. Perusium grandi metu concussit; Petiliam obsidentes disjecit multa cæde, & omnibus exuit impedimentis apud Montem Jovinum acri prælio vicit: Marram, inter militares duces præcipuum, Florentiam misit captivum: in fugam compulit Cardinales

les Legatos, elapso, è manibus ob equi pernecitatem Francisco Barberino. Hæc, & alia à Magno Duce peracta, ubique adjuvantibus Venetis, relinquimus enarranda iis, qui de hoc Sociali bello copiosius scribunt.

Quæ interim horrida ingruebat hyems, coegit dimittere milites in hyberna, & feriari ab armis: sed utique hæc expeditiùs instauranda, cùm ver novum appeteret. Propterea mandavit Senatus augeri diligentissimè copias; Helvetias conscribi centurias; & quibus è Germania conduxerat Gildas vir pugnacis spiritus trium millium numero, dari stipendia. Classem quoque instrui, quæ à mari per occasiones vexaret hostes, & sociis opitularetur. Non secus Barberini suos ex exteris gentibus instituebant delectus: & Cardinalis Antonius tunc temporis Romam delatus: & assiduè petebat in proximas expeditiones nummum, com meatuum, militumque subsidia: quæ tamen postulata molestissima fuere Pontifici, & omnibus, qui huic teterrimo bello adversabantur.

*Pax inter fœderatos Principes, &
Barberinos. Castrum Odoar.
do Duci restitutum.*

MDCXLIV.

FElícia auspicia præsentis anni ineuntis: cùm sub finem præteriti Card-

dinalis Alexander Bichius Venetias appulisset, missus à Christianissimo Galliarum Rege Ludovico XIII. ut, rescissis dissensionum nodis, Italos Principes, & Barberinos fratres in pristinam concordiam, amicitiamque redigeret, Patribus coràm vir eminentissimus Regium animum de concilianda pace aperuit, reperitque, quòd omnium consensus par, & idem esset, ut ablegato bello pax succederet, cui semper intentissimè studuerant. Tamen dubitatum fuit de sagaci hostium ingenio, ac præcipuè de Cardinalis Francisci indole magnanima, & mutari nescia. Talia opinantibus ille addidit, Regia arma in eos, qui leges statutæ pacis non adimplerent, parata esse, modò aliud non peteretur, præter Castri suo Principi restitutionem. Hac fide Romam proficiscitur: & ibi adorato Pontifici exponit, quæ cum Veneto Senatu egerat: nullumque è sociis ab illius sententia discessurum: multa mala, non restincto bello, Pontificiæ existimationi suscitari posse cum Italiæ discrimine, & populorum excidio ab eo, cui cura incumbit tuendæ publicæ tranquillitatis. Hucusque foederata agmina prosperiori eventu pugnassee: atque exinde constare, Ecclesiasticam potestatem divinitùs institutam in Catholicorum Principum ruinam, ex privatis affectibus semper habuisse infelices successus. Igitur imperandum esse, ut,

po-

positis armis, componantur amicè lites: non amplius Pax exulet, sed revirescat; & illius sit fidissimus custos Pontificius dominatus. Urbanus ad hæc audita dicitur obstupuisse, valdèque commotus suis exprobrasse rerum gestarum casus, eventusque silentium. Nunc primùm sibi nota adulantium mendacia, referato veritati aditu. Quare Cardinalium conventum indicit, in quo de pacis transactione agatur; & quod fuerit statutum, exequantur Nepotes; prius quàm ille morbo, ac senio confectus migraret è vivis. Qui verò ab omni conciliatione alienus erat, & ægerrimè acquiesceret Castri restitutioni; incœpit quotidie differre, & procrastinare, quæ citò opus erat fieri: atque eò magis, quòd per eos dies remitteret se Pontificis ægritudo; ita ut neque vacua Sedes, neque in hoc casu necessariae induciæ, quæ à Bichio proponebantur, expectandæ. Hæc Romæ agi cum mora, & tergiversatione Veneti à nuntiis accipere; atque Cardinalis Antonii prope ratum in urbem Ferrariam ingressum. Ideò, ne sub pacificis promissis distinerentur à suscepto bello, decreverunt aliquo signo ostendere arma sua in hybernis non torpere. Meditati sunt utriusque ad Lacum-obscurum propugnaculi repentinam impressionem: quorum alterum ultra flumen Valletæ, alte-

ac plures celebris nominis Chiliarchas .
 Cardinalis cursu velocissimi equi exemit
 se . Ducenti referuntur occisi : captivicen-
 tum , ac triginta recensiti : Ex his armo-
 rum contentionibus usque in hunc annum
 agitatis potius ad terriculamentum morta-
 lium , quàm ad perniciem dissidentium , vi-
 derant Barberini irritos fore omnes suos
 conatus : & foederati Principes , quæ sibi da-
 mna ex aliena causa , suisque rebus intul-
 lerant : cùm tantùm Castri restitutionem
 Odoardo Duci exoptarent : qua vi , aut
 transactione expressa , omnes à belli so-
 cietate erant recessuri . Itaque singulis
 in mutua pacis conventa propensioribus
 animis inclinantibus ; illam Bichius conse-
 quutus est victis , & victoribus utilem , his
 conditionibus : Ut Odoardo Farnesio re-
 stitueretur Castrum : arces , oppida , mu-
 nitiones utrinque occupatæ redderentur :
 Farnesiæ mensæ creditoribus antiqua jura
 servata essent : liberos dimittendos captivos ;
 Rex Galliæ pro Odoardo errati veniam
 Pontifici supplicaret : & hæc omnia cum
 fide , & cura intra sexagesimum diem
 unusquisque exequutioni mandaret . His
 peractis , Roma digreditur , Venetias pro-
 fecturus : in itinere Magnum Etruriæ ,
 Mutinæ , & Parmæ Duces convenit ad-
 monitos de optima Pontificis voluntate
 erga omnes . Appropinquant Senatus oc-
 currit læta totius urbis gratulatione : Pa-
 tres

tres magna pompa exceptum venerantur caduceatorem, qui sua eloquentia, & dexteritate difficili bello optatum finem imposuit. In Ducali Palatio decernitur locus ad congressum. Arbitri deliguntur, exclusis Cælareo, & Hispano Oratoribus, ut sanctæ Pacis decus, & gloria penes unum Gallorum Regem esset. Post hæc recitata de inita concordia leges singuli Principum Ministri obsignarunt; & intra Missarum solemnia in Marcianæ Basilica kal. Maii publicata fuit Pax festivissimis acclamationibus: & pro collata gratia celebris indicta supplicatio: gratesque amplissimæ per legatos actæ Ludovico Regi sequestri: quas & Odoardus sua præsentia Senatui persolvit accepto beneficio pares.

FINIS LIBRI QUINTI.

JOANNIS BAPTISTÆ V E R I

CANONICI PATAVINI RERUM VENETARUM

LIBER SEXTVS.

Bellum Turcicum Septimum.
MDCXLV.

PAce composita cum Barberinis fratribus, restituto Castro Parmæ Duci Odoardo, vix unius anni requies Venetis ad recipiendum anhelitum data est. Grave adversus Rempublicam insurrexit bellum à Barbaris illatum, quo priorum comparatione nulum vel temporis diuturnitate, vel rerum successu calamitosius.

Turcis, si vera fateri volumus, idem pretextus, qui olim Romanis; sola nempè vincendi Cretam, nobilem Insulam, cupiditas: his vindicari armis placuit, quòd Cretenses Mithridati favissent: illis ulcisci injurias, quòd Veneti recepissent in Insulam Melitenfès Equites Othomannicæ gentis anniversarios hostes post prædas, & rapinas. Par itaque utrinque

Z

popu-

populo, subacta Creta, insatiabilis dilatandi imperii cupido.

Hoc tempore Andreas Cornelius cum summa potestate præsidebat universæ Insulæ: cujus adventus in provinciam mali omnis apud multos fuit. Constantinopoli a quatuor inde annis regnabat Hibraimus primus hujus nominis, frater Amurathis quarti. Hic profecturus in Persicam expeditionem jusserrat fratres suos necari: nam Othomanni, ut sine suspitione imperent, fratricidia censent necessaria. Præfocatis Orcane, & Bajazethe suspectæ indolis; Hibraimo parcitur tanquam fatuo, & Regno ineptissimo; qui tamen jussa non sunt exequuti, Amurathi à Perside regresso suæ contumaciæ capite dederunt pœnas. Interim ille immunis à laqueo in carcerem trusus intra regii viridarii septa mansit usque ad fratris obitum annis viginti septem. Cum igitur solus esset è regio sanguine superstes, custodia educitur, & à Primo Visiro, qui sub stolido Principe totius imperii arbitrium affectabat, Turcarum dominus, & Imperator acclamatur. His vocibus ratus se illudi, ac potiùs ad supplicium, quàm ad solium duci: hoc noluit conscendere, nisi priùs defuncti fratris cadaver vidisset, & contrectasset. Italicus à metu potitur sceptro, nec pauca dedit ab initio sanæ mentis indicia: quorum primum fuit confirmatæ cum Veneta Republica amicitia, quæ diù permanerat cum

cum sex illius Prædecefforibus. Cæterum haud multò poſt denuò viſus eſt in inſanias relabi, quando ad majores evexit dignitates viliffimum mancipium, Iuſſum nomine, Auraniæ in Dalmatia natum. Hic regios hortos curabat, quo tempore ille in ergaſtulo detentus ejus joci, & facetiis recreabatur. Infamem hominem Selectaris gradu condecorat, ſcilicet ſuum creat Armigerum, inter Baſſas annumerat: & declarat affinem, eidem una ex regiis puellis deſponſata: cæterisque in aula dynaſtis præponit. Verùm neque hoc ultimum inſanientis Principis delirium majus reviviſcentis dementiæ exhibuit argumentum; cùm ipſo inſtigante Iuſſo Venetis ſummè inſenſo (quia eorum Legati illius adventum in Dalmatiam adverſis officiis turbaffent; veriti ſcilicet turbidi hominis petulantiam) pacem violat, rumpit fœdera, & ſine belli denuntiatione furialia arma diſtringit: neque aliam ob cauſam, niſi quòd Creta Melitenſium Equitum eſſet aſylum.

Origo Cretici belli.

Quinto kalendas Septembris anni præteriti fortuitò accidit, ut Melitenſes ſuis triremibus percurrentes Carpathium pelagus, navium offende-

Z 2 rint

rint à magna sui mole Sulthanam appellatam. Vehebat Meham ad Mahumetis sepulchrum ex voto annosum Eunuchum Geslim nomine, regii gynæcei custodem, & unam de Hibraimi concubinis cum impubere Filio; nobili comitatu, & barbarica supellectile ornatissima. Hanc illi piratico more adorti multa utrinque clade oppugnarunt, & in ipso dimicationis æstu supremus navarchus Gabriel Boisbodrandus, & Eunuchus occubuerunt. Locupletes opulentissimis prædarum, & captivorum spoliis Melitam adremigantes Cretica litora, adversis ventis jactati attigerunt. Hic ap-
 pulsus ob improspèram navigationem excusandus Venetis primoribus crimini imputatur, vocaturque in culpam de raptis exuviis communicati cum ipsis commercii.

Perlata Constantinopolim nunciis, ac rumore interceptæ Sulthanæ jactura; vectorum mors; matris, natiq; captivitas, & Melitenfium in Creta cum Venetis negotiatio universam civitatem perturbavit; quæ iratum Hibraimum sequuta furenti militum fremitu vindictam poscentium ad arma conclamavit. Quare sollicita cura extrahitur ab armamentariis quidquid habent machinarum ad instruendum bellum: & in navalibus, urgente Hibraimo operarios, multarum navium classes adornantur. Dicebantur hæc omnia adversus Melitam

litam parari : sed qui hanc suadebant expeditionem in Melitenses, perpetuò Turcica maria, & ligna infestantes, non fuisse admissi. Illorum verò sententia prævaluit, ut, vulgato contra Melitam bellico apparatu, Classis tenderet ad Cretæ oppugnationem : ingens Othomannicis rebus ejus insulæ accessione futurum incrementum. Quam cupiditatem magis incenderunt quidam ab Creta transfugæ præsentis dominii causati severitatem, & nobilium licentiam. Exaggerabant in Venetos primates Insulanorum odia : complurium abalienatos animos : non absolutas oppidorum munitiones : & adeò incustoditam Cydoniam, quæ Canca est, ut captu facilis amplum patefaceret ostium ad mittendam sub jugum totam Insulam. Fuit igitur decretum in Cretam transire : sed magno silentio obtegendum facinus, quò Veneti opprimerentur incauti. Si qui ab hac simulatione abhorrebant eò, quòd contra gentium leges, & fœderum sanctiones haud liceret non indicto bello imperatos aggredi amicos; ii vel exilio, vel capite multati sunt : ignorantes Turcicum Regem posse violare fidem, pacta frangere, & animi sui arcana dissimulare ex Mahumetica indulgentia, in rebus ad Imperii amplitudinem spectantibus. Propterea Joanni Superantio

Reipublicæ Legato suspicanti illum armorum apparatus adversus Venetos instrui, Bassæ expressis verbis sæpiùs inculcabant, nihil hostile in eos movendum esse : imò ad Senatum missum Chiaussium ; qui probaret constantem Imperatoris fidem , ac tutò adduceret Constantinopolim Nicolaum Delphinum electum Bajulum . His dictis captus , & elusus Superantius; Patribus significavit per literas, omnem expeditionem revera comparari in Melitenses . Interim non obscuri nuntii ex Dalmatia , & Illyrio contraria referebant : ex Creta Antonius Navagerius Cydoniæ Cûrator irruptionem metuens cita postulabat auxilia : eadem suspicione angebatur Cornelius , fama per Ægæi insulas de bello Cretico increbrescente . Senatus , quamvis adhuc in incerto erat, illicò tamen decernit militum delectus haberi , & omnis generis navigia ad bellî usum , duas armavit quinqueres ab Hieronymo Mauroceno regendas ; triginta triremibus totidem patricos gubernatores deputavit : Antonio Marino Capellio decem rostratarum navium curam ; & universæ classis imperium tradidit Francisco Molino Marcio Procuratori, maritimis rebus assueto . Verùm hæc per temporis intervalla disponebantur ; quia Senatus adhuc animi pendebat , quò tenderent Turcarum machinamenta : nec volebat festinata ar-

mo-

morum collectione illis fieri suspectus: quæ circumspectior prudentia publicis rebus valdè nocuit ; dum Superantius profuso abundè auro in hominum genus avarum , & rapacissimum , Hibraimi mentem scrutatus comperit meditatum scelus illud esse , simulata contra Melitam profectioe ; omnes copias in Cretam trajicere . Patribus hanc veritatem magnis erutam largitionibus nuntiat ; & bellum maximum , ac formidandum impendere Reipublicæ : iisque de causis inter Bassas præcipuè vulgatum : quòd nunquam memoria exciderint audacia gesta Capellii ; in Aulonis portu Punicæ triremes vexatæ , & captæ : aliæ in Alexandrina statione oppugnatæ , fugatæque ; quarum unam in Cretam traduxerant Christiani captivi libertate donati : quòd Turcæ piraticæ crimine damnati immaniter decollarentur : quòdque nuper in fœdera peccatum fuisset ab his , qui Melitensibus impensissimè studebant , juratis Othomanicæ gentis hostibus . Has causas , & alias prætexebat Hibraimus à Venetorum amicitia discessurus ; propter quas Superantius monebat Senatum de celeritate , ne belli initium à Turcis fieret . Ideò confestim solvit Capellius ab urbe in Cretam : item Jacobus Ripa Tenum versus . Ille prospero cursu confectit iter , & im-

pedimentis exoneratis in Candidam urbem, quæ & Candia, à qua tota insula Candia denominatur, custos accedit Amphimali sinus, qui Sudæ portus ab arce ejus nominis in scopulo appellatur. Hic, trajecto Adriatico cum duabus onerariis, incidit in quinque Punicas triremes, à quibus acriter oppugnatus animi vigore magis, quàm virium robore strenuè pugnavit; adeò ut illarum prætoriani, fugientibus reliquis, in concertatione male multatam mare absorbuit. Pugna dirempta: Ripa victor Tenum appulit: Piratæ Constantinopolim ingressi suis expostulationibus Hibræi animum, plusquam credi potest, effecerunt ad vindictam. Idcirco eò citiùs sumitur bellum, & ut erat dolosis confutum fraudibus, divulgatur collecta in Melitam ea armorum procella.

Turcica Classis expeditio in Cretam.

Oppugnata Cydoniæ deditio.

Potentissimæ Classi per summam fraudem in Cretam velificaturæ deligitur Imperator, quem suprà nominavimus, Isuffus; exultante Constantinopoli præ lætitiæ collati muneris. Ad illum de hoc ipso gratulantes iverunt omnes Principum Legati: accessit etiam Superantius; cui vir subdolus aurea veste donatus juravit Regium mandatum esse,

esse, ut rectà tenderet in Melitam: At hæc fallax, & perfidiosa obtestatio non fugiebat Superantium, qui repetitis nuntiis, & quàm fieri potuit, maximè clandestinis, ne ab itinera obsidentibus interciperentur, Patres, & Insularum Rectores certiores facit de parata hosticæ classis expeditione in Cretam, qua subacta, vastus Hibraini animus universam Italiam peragrabat. Egressa Constanti-nopoli sexto idus Maji præsentis anni sexcentissimi quadragesimi quinti supra millesimum vehebat sexaginta hominum millia dispersita in octoginta triremes, decem rostratas naves, atque totidem Anglicas mercede conductas: accedebant Funetanæ tres, duæ quinqueres, una immensæ magnitudinis Sulthana, atque amplius ducenta diversæ formæ navigia: & sua multitudine totum Hellespontum operiebat. Delata in Ægeum, quas Venetorum insulas præternavigavit Tenum, & Cytheram, comiter, ac benignè accipiebat à Præsidibus quidquid opus erat classiariis, data pro officio sponsione Reipublicæ loca non esse læsuram. Sed Isufius penes se habebat rei gerendæ arcanum Hibraini manu obsignatum, & tunc proferendum, cùm Pylum, hodie Navarinum, attigisset. Classis interim, tutò ubique mari discurrebat: ab Ægeoin Superum deflectens spem Creticis

ostentavit susceptæ in Melitam navigationis : at exigua fuit , & extrema hæc credulitas : nam statim , ac Navarinum pervenit Isuffus , Sexto Kal. Junii , convocatis Turcarum primoribus , & navarchis Regium mandatum explicat , quod continebat subitam exscensionem in Cretam concordibus animis , viribusque . Omnes eo jussu alacres , suoque more ululantes , destinatæ expeditioni obvertunt proras : & Isuffus , dimissa liburnica , nuntiat Hibraïmo , Classem ad ejus nutum in Creticam insulam transfretasle , & Cydoniam primis aggressionibus tentandam fore . Sub lucis ortum Idibus Junii superato Cynamo promontorio littori adhæsit , & suas turmas exposuit in continentem duodecimo ab urbe milliario , nullo obsistente . Hæc Isuffus agere cœpit in Creta : & Hibraïnus de iis certior factus mandavit asservari custodiis Superantium : & Venetos ubique locorum in captivitate detineri ; ne per exploratores penetraret ad Senatum suæ mentis arcannum . Hostium accessus , quem ignes solito crebriores in montibus præmonstrarunt , quemque detexit propinquum plurima agrestium turba , terrore percita Cydoniam versus confugiens , Navagerium excitavit ; ut illicò duo millia ex conterraneis præmitteret ad remorandum hostilem egressum ; donec munito-

nitores aptarent bellica impedimenta, & incœpta propugnationis opera absolverent: verum qui missi fuerant, perterriti multitudine hostium (qui jam emerferant in continentem; & excurrentes ad rapinas, raptis, quæ ferri poterant, cætera subditis flammis vastabant) profugum pedem retulerunt. Eodem tempore Nava-gerius admonuerat custodes arcium Theodoræ, & Turhuru è regione Cydoniæ, ne cessarent à cura, & vigilantia, citò promissi auxilii fiducia. Hæc tamen omnia, confuse, ac præposterè; quippe Isuffus per classiarios utramque arcem occupaverat, licet strage non modica, quando Theodoræ Præfectus Blasius Julianus Histrus, conjecto igne in cryptas tormentario pulvere oppletas, ingruentes catervas dissiliente, atque hiantè solo involutas flammis, & fumo oppressit ingenti ruina, qua & ipse obrui maluit, quàm Turcicam pati servitutem.

Sexto decimo Kal. Julii Isuffus aggressurus urbis oppugnationem, ut fides fieret ibi locari castra, ubi vehementi strepitu pulsabantur tympana, & clangebant tubæ; atque ita decepti Cydonii eò suas vanis ictibus disploderent machinas: alibi ille plures jussit ignes succendere, qui humi latè vagantes, miro artificio compositi, fumosis voluminibus obcæcabant obsessos; &

micanti splendore prælucebant operariis castrametantibus. Hoc astu post diem tertium Urbem quadraginta militum millibus circumfessam irrequieta tormentorum percussione quaterere cœpit; vi-gebat in obsessis fortis, & obfirmatus animus: crebris eruptionibus fatigabant obsidentes: è muris collineantes jactus, certissimis machinarum jaculationibus plurimos prosternebant. Interim Navagerius repræsentabat insulæ Præfecto afflictæ urbis conditionem, & deposcebat auxilia. Cornelius tum à primis irruptionibus obviam ire connixus imminenti Cydoniæ periculo, sub claris ducibus opem submiserat: sed hostis ubique liberè decurrens numero, roboreque prævalidus ex militibus alios fugavit, alios cæcidit, paucis intra urbem receptis. Aliam tamen subsidiariam quingentorum pedum manum ex præfidiis collectam properare jussit: at vix ducenti Cydoniam intrarunt: quare cùm esset non satis tutus terrestris incessus, obstruentibus Turcis viarum aditus, ad maritimos trajectus applicuit animum. Igitur è triremibus tres selegit aptiores ferendæ opi: & è Navarchis totidem Georgium Manroecenum, Barbarum Bernardum, & filium suum Catherinum; qui constantia, & fortitudine pares se devoverunt urbis tutelæ, ac propugnationi. Rebus

necessariis instructi nocte, silentique remigio inter speculatoria navigia penetrarunt in portum, ejus nondum Turcæ erant potiti; & suppetias intulerunt. Invecti auxilii tanta fuit lætitia, ut Ifusus, concepti gaudii cognita causa, excubitorum incuriam abscissis cervicibus punierit.

Tandem Venetias pervenere nuntii tristes de cydonia periclitante, & de Superantio in Custodiis detento, qui Senatuum adhuc inter spem pacis, & belli metum maximo animorum fluctu perturbarunt. Quare, omni procrastinatione rejecta, statutum fuit, pro viribus occurrere, & resistere Barbaris foedifragis; atque in eisdem opem divinam implorare quotidianis supplicationibus: Legatos ad Principes expedire, ut in communes Christiani nominis inimicos sociarent arma: copias ubique gentium conscribere, comparatissime navigiis supplere classes. Interea justus Franciscus Molinus, jampridem expeditæ classis imperator, ut in insulam festinaret, Corcyræ morbo præpeditus progredi non potuit: certus tamen de hostili impressione in Cretam sollicitavit Laurentium Marcellum; explicare vela, & Zacynthum petere: ibique cum Joanne Baptista Grimano trium insularum Præfecto, cæterisque trierarchis consilium capere de Cretica expeditione. Con-

gregati, dedita ad consultationem opera, in unum, & diu considerantes, quid agerent; decreverunt, expectandas esse auxiliares triremes Pontificias, & Melitenſes: ac promiſſum ab Senatu navium ſupplementum. Auſti his viribus hoſtem facilius ab Inſula expellerent: quod decretum à conſulentibus expreſſit obſtinata fatorum ſeries, quæ Cydoniæ caſum moliebatur, illudque ægrè ferens Hieronymus Maurocenus, qui omnia tolerabilius, quàm moram perpeti poterat, quæ cunctando opportuna ſurripiebat auxilia, obtulit ſe cum quinqueremibus opem egentibus allaturum. Iterum animis in diverſa diſtractis; reſtinxit ſtrenui viri ſtudium data cura Simoni Leono, ut armatiſonerariis quatuor milite, commeatuque, ceſſeriter, & conſultò cum ſociis Joanne Baſilio, Franciſco Gritto, & Marino Baduario ſuppetias ire contendat. XI. Kal. Auguſti naves proſperæ Cauri tempeſtate in altum eductæ declinant à recto curſu, reclamante Leono; totaque circumnavigata Inſula ab Aquilone in Auſtrum, Hierapetræ portum ſubeunt. Hic longæ navigationis excuſus Cydoniis fatalis extitit. Iuſſus interim, quem nihil horum latebat, effoſſis ſubter mœnia cuniculis, infeſtiores parabat irruptiones: & aliquando veluti miſeratione commotus hortabatur obſeſſos ad honeſtam dedi-

deditionem , priusquam ille ab coactis
 pœnas obstinationis exigeret : has litte-
 ras deferebant alatae sagittae : iisque per
 eosdem tabellarios responsum fuit , Cy-
 donios malle gloriosa morte occumbere ,
 quàm tanto dedecore se malis eripi (si
 tamen malum in patria , & pro patria
 mori). Post hæc diù , nocturneque vigila-
 bant attenti , quò Turcæ per occultos
 meatus essent irrupturi : nec vana cura ;
 nam illi credentes invadere sopitos , lu-
 cente luna impetum fecerunt in propu-
 gnacula : verùm decepti propugnantium
 custodia , & fortitudine repulsi fuere . Sub-
 inde Navagerius , cognita suarum virium
 imbecillitate ob quotidianas concertatio-
 nes , precibus numero frequentibus adibat
 Cornelium , & valida postulabat auxilia .
 Rogatus , ut hæc suppeditaret , in magnis
 versabatur angustiis : toties expertus pe-
 destres copias à Turcis mutilatas , non
 aliam sibi viam superesse putavit adjumen-
 to , nisi iterum à mari . Jubet igitur Ca-
 pellio , ut duas ex navibus , quibus ille
 præerat , abundanter instructas è portu
 dimitteret , necessariam opem egenti urbi
 laturas . At quia jampridem inter hos du-
 ces ortum erat de dignationis præstantia
 dissidium , Capellius , ne præcipienti pa-
 reret , causatur , se missum ab Senatu
 ad Sudæ portus custodiam , in cujus per-
 peti vigilantia stabat Cretæ incolumi-
 tas ,

tas, ac spes recuperandæ Cydoniæ, si fato contigisset amitti: posse expediri alias triremes exemplo felicitis navigationis ex ante transmissis. Hæc dicenti Cornelius annuit, ne privata contentio publico bono officeret. Porro de instruendis triremibus irritus omnis labor, cum nullus, vel ipso hortante Capellio, ex trierarchis inventus est, qui facinus aggredi vellet ob classiariorum paucitatem, & remigum formidinem, qui tumultuariè collecti servitium timidi recusabant. Tandem duo, cognomine Boni, reperti sunt Otho, & Alexander, qui sponte susceperent, quod alii fugiebant: at, conjurantibus fatis in Cydoniæ ruinam, tanta in apparandis triremibus intercessit cunctatio, ut nuntiata deploratæ urbis calamitas omne submittendæ opis decretum everteret. Ex his audacior Iussus suis in conatibus majori vi tentavit aggredi propugnaculum ad portam Rhitymniam viriliter propugnatum. Hoc hostis consilium sexto decimo Kal. Septembris exequendum detexit captivus quidam in Turcarum castris unius sagittæ volatu; cum eo ipso die Iussus totius exercitus robur admovisset adedò furenti, & rabida impressione, ut à fortissimè obluçantibus prehiberi non potuerit, quin propugnaculi fundamenta suffoderet, ac pertunderet: abderetque in aperto meatu sub ipsis

ter-

terrenæ molis visceribus plures nitrati pulveris cados : qui apposito igne succensi horrifono strepitu exhalarent , proster-nentes totum fermè propugnaculum . Hunc igitur in locum atrox pugna incli-navit universæ confluentis civitatis accur-su , adeò ut cum teneris adolescentibus imbelles mulieres ad reparandum disje-ctum munimentum necessaria comporta-rent . Omnes accendebat Milanus Bencius Antistes , ne immemores religionis , & li-bertatis se , suaque subderent perfidæ , & inhumanæ genti . Hinc ergo contigit , ut Barbari per subterraneâ repentes , & profilientes in mœnia magna clade , & recepto propugnaculo repressi , ac repul-si fuerint . Cæsa in conflictu ad Turca-rum duo millia , agnitis inter cadavera , fortioribus : vix centum è nostris occisi : notæ nobilitatis , & famæ Nicolaus Bo-nus , Alexander Viarus , Andreas Viz-zamanus , Poma , Ljonius , Vimes , Chili-archæ : vulnerati Albanus Gubernator , Catharinus Cornelius , & Vertius archite-ctus : qui omnes conversam in propugna-culum periculi molem novis operibus , strictisque gladiis impigrè sustinuerunt . Nihilominus Turcæ sua multitudine in-solefcentes nullam fessis dabant requiem ; viribus imminutis , & omni spe auxi-lii carentibus . Propterea iteratis cona-tibus , & continuè strepentibus ma-chi-

chinis, quidquid in muris reliquum erat, contriverunt. Exinde Cydonii, ut omnia sibi in dies arctiora viderunt esse, laboribus attriti, nudati defensoribus, & proximè trahendi à Barbaris in prædam, atque internecionem, Navagerio, armorumque ducibus ostenderunt ex mœstissima suæ urbis facie, quàm urgens, & fatalis ea esset necessitas, quæ illos cogeret ad paciscendum cum hoste: diù in calamitatibus constantes probaverunt sinceram erga Rempublicam fidem: eamque satis manifestam Cornelio tot suis in angustiis. Navagerius his precibus victus, adductusque ad miserationem, referente Vertio prostratas vires: munimenta quassata: provectum, atque inexpugnabile obsidentium robur, in sententiam devenit componendæ pacis, quæ nihil haberet insidiarum: licet aliqui cuperent trahere moram, iterùmque fortunæ aleam experiri. At pro certo habebatur, nullum sperari posse auxilium ab iis, qui, quos tutari debebant, patiebantur desertos, quia Classis adhuc Zacynthi hærebat in novi commeatus expectatione, cecidit irrita quatuor munitissimarum navium expeditio: & nullus fuit, laborante incassum Cornelio, qui vellet, vel auderet asserre subsidia. Ideò in consultatione captum consilium de urbe dedenda, & proinde decimo quarto Kalend. Septembris ere-

erectum in mœnibus vexillum album : quo signo pacis à Turcis conspecto , & exultantibus , Iussus indixit subitam ab omni hostilitate cessationem tanta severitate , ut in explodentem igneum globum capite animadverteret : nam potiundæ Cydoniæ cupidus , finem suæ expeditionis , quæ præter opinionem ipsi diuturnior contigerat , vehementissimè optabat . Confestim hinc inde datis , receptisque obsidibus , pax his præcipuis conditionibus sancitur . Ut intra sex dies Urbs dedere-
 tur . Ut incolis securitas , ac bonorum possessio permaneret incolumis . Ut latini , & Græci proprios ritus suis in templis liberi exercerent . Ut Rectores , magistratus , & cum iisdem excedentes quò vellent , Venetas triremes , navesque conscenderent . Ut Episcopus cum Vestalibus , & Clero cum sacra suppellectili parata navigia haberet ad transfretandum . Ut cuique manendi , vel proficiscendi facultas esset . Ut denique copiæ pergerent terrestri itinere ad alia insulæ loca militari more gradientes . Emigrantibus præsens Iussus obstupuit , cum vidisset , quod trecenti tandiù obstitissent suis numero propè infinitis ; & quòd coactus à tam modica manu fuisset ad paciscendum : Laudavit eorum constantiam , & fortitudinem , rarò in Barbaris exemplo ; qui nec leges accipere ,

pere , neque ab ullo se vinci posse gloriantur . Ingressus deditam urbem cum quindecim bellatorum Millibus Mesquitas erigit ; Præsidem suis ritibus constituit ; publicis , privatisque disceptationibus eligit Judices . Inducit in portum , quem durante bello nunquam obtinuit , quinquaginta triremes : imposito Theodoræ Arci præsidio , & munito scopulo æneis tormentis tutam ibidem stationem classibus præstat . His peractis , majora concupivit , arbitratus se , nihil egisse , nisi haberet in sua potestate Sudam decem milliaribus à Cydonia . Ut Arcem sibi dari peteret , ad ejus custodem Michaellem Maripetrum legavit Jacobum Præmarinum virum nobilem : qui recusans munus suis natalibus indignum vi copellitur , ut obeat . Præmarinus accessit ea iniqua petitione ; sed acriter objurgatus hoc reddit Isuffo responsum : Nunquam deferendam Arcis custodiam ab eo , qui in ipsa tuenda se totum suæ patriæ debebat . Ita delusus Cydoniæ se continuit opportunam expectans tempestatem ad repetendam Constantinopolim , quò nuntium de recepta per deditionem urbe præmiserat . Sed priusquam se committeret navigationi , ad armorum regimen destinavit Assanum Belerbejum Bassam hominem , vehementis spiritus ; validiusque munivit
Cydo-

Cydoniam adversus Venetorum oppugnationes, quas timebat.

Tandem decimo sexto kalend. Decembris suam instituit profectiorem securus ab insectatione Venetæ Classis, quia hyemalis rigor præcludebat excursus. Ubi Chium pervenit, ibi reperit justum Hibraimi suum iter urgentis: quare una, de classe post se relicta, conscensa triremi ornatissima, velorum, remorumque nixu omnium spe celerius ad Regiam urbem accessit. Magna lætitia excepto fit obvius Hibraimus, donat amplexus, & oscula, cunctis præ gaudio congratulantibus victoriam. Verum hi plausus aliquorum invidia in diversa mutati Principis gratiam verterunt in odium, excitato in Aula murmure accusantium Isuffum; tùm quòd in bimestri obsidione oppidi parùm muniti triginta Turcarum millia periissent: tùm quòd justam Hibraimi querelam neglexisset: si sic sæpiùs tanta suorum internecone vinceret, brevi illius imperium desolatum iri: tùm quòd à deditis oppidanis longa pace locupletissimis auro, argentoque nulla de congestis prædis dona attulisset Imperatori præter captivos adolescentes, & puellas Gynæceis destinatas, & indonatas Sulthanas reliquisset. Hæc, atque alia objecta crimina crudelis, & avarissimi Hibraimi

mi animum altius occuparunt, ac, præpollente odio, omnem licet justam delecti sui Bassæ excusationem ejecit. Infelici tandem exitu inconstantis lusus fortunæ fuit Ilussus, quem illa repentè e-
vectum inconsultè præcipitavit: jussu Hibraimi laqueo strangulatur. Sed quis hoc Principe dementior? quem immaniter occisum noluit vivum, ejus corpus adhuc calens manu palrans querula voce credidit à morte, teu somno excitari posse: porro ut agnovit extinctum, effusis ubertim lacrymis inhumavit: Nilia-
liaco par monstro; scilicet, quos extinxerat, flente.

Veneta Classis navigatio in Cretam.

QUO tempore Cydonia cogitur ob auxiliorum tarditatem se tradere Turcis in deditionem, Senatus Molino Corcyræ ægroto, & in patriam revocato suffecit Hieronymum Maurocenum quinqueremum Præfectum cum mandato celerrimæ profectio-
nis in Cretam. Hic jussis obtemperans absque mora, Zacyntho solvit, ac in itinere opportunas habuit auxiliares triremes Pontificis Innocentii decimi, & Melitensium equitum; quibus numero XI. sub Ecclesiæ vexillo Princeps Ludovisus præerat. Omnes in communem expeditionem pro-
fe-

fecti prospera aura Sudæ portum tenuere ; absente Capellio , vel ob aquandicauſam , vel ob adventum Cornelii vocati à Mauroceno , ut consultationibus de adminiſtrando bello interesset . Lustrata Classis cum Creticis triremibus , & Capellii navibus talem explebat summam , qualem Ducum potissimi existimarunt validam , quæ Turcicæ objiceretur : nam fore facilius videbatur , quod erat usurpatum , recuperari navali potiùs robore , quàm terrestribus copiis . Camillus Gonzaga summus armorum Præfectus à terra tutiorem impressionem in hostilia castra fore censebat , cùm nihil aliud mari ipso fortuitis sit opportunius , & classem Turcicam à grandioribus tormentis longiùs pilas ejaculantibus ab Theodora arce in statione manere incolumem . Sed qui suadebant maritimos congressus , ad hos incitarunt Maurocenum maximè ob redditum Capellii in portum : qui , approbato Navarchorum consilio , omnium primus prodit adversus hostes , & cum prætoria navis provectus ad tormenti jactum illos provocabat in aciem : quam & Maurocenus explicata classe frustra depoſcebat : quia Aſſanus Baſſa ſuis præceperat , neque Cydonio ſinu ſolverent , neque ſe ab arcis Theodoræ ſtatione moverent . Optimè conſultum à Barbaro , cui exterrito Veneti ducis nomine , & fama militavit

mare procellis tumidum, atque insanè ita fremens, ut nostra classis metu, & periculo naufragii fugienti similis portum repetierit: tantisper ibidem mansura, quoad, fluctibus detumescentibus, rursus prodiret. Paucis itaque diebus recreato, confirmataque æquioris fortunæ fiducia in altum progreditur: verùm quis crederet! conjurati venti ex inopinatò glomeratis nubibus ingruunt, qui navium ordine abrupto, & in diversum distractis lignis, denuò illam compulerunt, ut ocyùs rediret, unde exierat. Aliquibus persuasum fuit ex his repetitis infortuniis inter infideles versari quoddam genus hominum maleficum, & scelestissimum, qui suis præstigiis, & incantamentis ad nutus elementa commoveant. Quoniam verò hucusque sine ullis assultibus tempus trascriptum erat; & hyberni dies frigore crudescerent, auxiliarii de reditu cogitarunt à nostris recedentes, promisso tamen in opportuniorem tempestatem regressu. Cæterùm Maurocenus, ne in portu classis torpesceret, sexto Idus Octobris Melum adnavigavit; ubi improvise appulsu tres onerarias, & magnum gaulum Cydoniæ opem latura adoritur, ac turbat. Unam capit è navibus: classiarii, qui sequebantur, reliquas retinuisent, nisi ventus ex adverso insurrexisset importunus. Leonardus Mocenicus gaulum abripuit cum
sua

sua quinquere mi : quo successu , & præda læti omnes Sudam remigarunt in hyberna.

Per id tempus appulerunt in Insulam Eques Valeta Gallus militaris descensionis Præfectus , & Adriaci pelagi custos Antonius Bernardus . Hi suo adventu non modica ferentes auxilia cum cæteris belli administratoribus consultarunt , rectà ne Cydonia à terra , an à mari Theodora arx esset oppugnanda . Valetæ , discrepantibus aliis , placuit terrestri manu præliari , ut erat proprio , & fervido accensus æstu . Incurrit audacter in hostes ad molas , de Gladiis dictas , excubantes : sed in ipsa dimicatione per insidias interceptus locorum ignarus infelicitè pugnavit , deditque triste incauti consilii exemplum . Tercenti fuere occisi : quinquaginta capti , & in acie occubuit Bernardus Sagredus ; dum nihil suæ virtuti putavit invium .

Hæc agebantur in Creta fortuna plerumque infesta Mauroceno , cùm ejus omnis profectio adversus hostes , veluti invisa satis in irritum cecidisset : & Venetiis incumbere Senatus instruendæ classi , quæ remige , milite , machinis , com meatibus , stipendiis , naviumque numero amplissima esset , ac instructissima . Maximo igitur sumptu intra paucos dies fuere in promptu triremes triginta tres ; quinquere mi sex ; naves quadraginta ; igniariæ quatuor ; aliaque

Aa

plura

plura navigia ad ferenda impedimenta forma, & genere varia, haud numerato Cretico apparatu, neque ab urbe antea dimisso in Insulam. Cæterum qui cum summo imperio tantæ classi præsideret vir militaris scientiæ, & maritimæ rei peritia clarus, cum nullus reperiretur, qui vellet, aut posset ejus administrationem capeßere; licet multa fuerint habita comitia: tandem contigit, quod nemo sibi persuadebat. Franciscus Ericius Princeps octogenario majorè folio assurgens se dixit paratissimum conscendere classem; & subire onus quamvis suæ ætati gravissimum, cum ageretur de Religione, & de Patria tuenda, servandaque, quibus corpus, & spiritum lubentissimè devovebat. Obstupuit Senatus, laudataque cum plausu hac sui Principis intrepida obtestatione, illum concordiis votis summum imperatorem renuntiavit cum amplissima terra, marique potestate: & decrevit, ut hoc pateret omnibus in Veneto dominio degentibus missis literis decimo tertio kal. Decembris: quo generosi ducis ad imitandum proposito exemplo effectum est, ut cujuscunque Ordinis viri, & quarumcunque civitatum indigenæ voluntaria manu, & ope contulerint subsidia in tam periculoso tempore adversus hostes Christiano nomini infestissimos. Canonici Patavini, nullo prævio exemplo, summam ducatorum mille, & ducentum

centum ex proprio censu corrogatam, singulis annis in belli impensam erogarunt. Quam omnium consensu, vel absque suffragiis, probatam animorum conspirationem Senatus Publicis literis adeò commendavit, ut iisdem testatum fecerit, illorum Cœtum fore dignum peculiari tutela, tanquam benè de Republica meritum.

Joannes Capellius Classis Imperator.

Thomæ Mauroceni gesta.

MDCXLVI.

INitium præsentis anni mœstissimum fuit obitu Principis Ericii, quo spes omnis rei benè gerendæ intercudit. Parato ad expeditionem febris publico bono maligna, suborta est, atque subvertit, quod fuerat salubriter institutum. Die decubitus decimo anxie jactatus inter suspiria, & gemitus se diutiùs non posse afflicte patriæ prodesse, tertio Nonas Januarii animam, qua Superos demeruerat, ipsis reddidit. Princeps ob egregia facinora domi, forisque immortalì colendus memoria. Senatus luctu justo mortuum prosequitus in Ducali Sede duabus hebdomadibus vacua collocavit Franciscum Molinum: & Joannem Capellium. Procuratoria veste decoratum delegit ad regendam classem; quæ tanta numero navium erat, ut nunquam ei similem Veneta Republica antea actis

temporibus eduxerit è suo toto terrarum orbe navali celeberrimo.

Capellius igitur cum classe omnium maxima jussus abire festinanter in provinciam, suo discessu spem totius urbis excitavit optatissimi nuntii, qui afferret Turcica ligna quasiata, & Cydoniam receptam. At cum Ducis effœtis viribus Senatus consilia, & populorum vota incassum abiere. Ille inutili cunctatione dum obvias lustrat insulas, & militares audit querelas, nihil deliberando de festinatione, qua opus erat, agendi tempora consumit. Sex mensibus môra supervacua elapsis, tandem tertio Idus Julii ad Sudæ portum appulit: quem accessum præverterat Thomas Maurocenus in navium præfectura Marinii Capellii successor. Virum animi constantia, & fortitudine præditum nulla remorata est formido, quin illicò pertraxerit ad Hellefonti angustias fama de Turcica classe eruptura. Et ne ob ejus exitus tarditatem tempus contereret, vicinam insulam Tenedum improvisa descensione, & excursu vexavit: oppidum non aggressus, à Mussano Bassa clàm traductis viginti triremibus per Asianum littus eodem tempore munitum; inde Mytilenem advenit, sed cito regressu ad pristinas stationes inter Imbrum, Tenedumque vela direxit, ut accuratiùs inimicam classem observaret. Interdum solus cum vastæ molis prætoria usque ad arces

Darda-

Dardanellas (Sextum olim , & Aby-
dum) castra , audacissimè adnavigabat :
quo conspectu Bassa illum credidit plus-
quam hominem . Uterque tamen cau-
tus , ne aliquid præter expectationem
eveniret ; alter se continet ab egressu ,
donec tranquillus aquarum decursus suis
respondeat votis : alter veritus undarum,
ventorumque tempestatem , postulat ab
Capellio leviores triremes , quæ , si su-
borta malacia ipsum præpediret , inse-
querentur fugientem hostem . In hoc re-
rum statu fortuna se Barbaris inclinavit,
ut Nonis Junii per mare momentò placi-
dum , & secundum tota classis numero,
& robore valida in Ægæum descenderit .
Intuebatur Maurocenus ægro animo il-
lam impunè egredi : prævisaque suarum
navium remora , dolebat ejus fugam nul-
lo obice repressam . Itaque cum primùm
loco se movere potuit , multò concitator
ad pugnam in Chium, & Peloponnesum
detorquet proras : at nusquam repertis de
celeritate sollicitis , magis iniquæ forti
irascebatur ; quæ Turcis prospera, sibi
adèd extitisset adversa . Interim cogitanti
remetiri Ægæum , manus conferendi cu-
pido, Capellius indicit regressum in Su-
dæ portum , in quo ferè omnes Classarii
Præfecti morabantur intenti bellicis con-
sultationibus . Audierant delata auxilia
Cydoniam ; & non contemnendo virium

robore Bassam adversus portum, & Sudam arcem hostilia moliturum : jam pluribus in locis erectas munitiones , tormentaque disposita , quibus præcluso sinus ostio classibus , & commeatibus , Sudam ad angustiam redactam compelleret in deditionem. Decretus itaque in talia audentem magna vi impetus fuit , & primùm ad Cisternas tam vehemens , ut illum Turcæ cum sustinere nequirent , fugati , & pulsī Cydoniam repetierunt : neque postea ab urbe , neque ab arce Theodora classico provocati in maritimum congressum descendere sunt ausi. Eminens pugnatum est majoribus pilis : at quæ ad comburendam classē igniaria navigia missa fuere , inutiliter conflagraverunt. Cum frustra hæc agebantur ; Capellius Sudam reversus accepit Rhodium Bejum brevi Cydoniis laturum esse suppetias : has ut auferret , ipse è vestigio Cytheram petere statuit ; & in portu consistere Joannem Baptistam Grimanum ; robusta Classis utrumque tuebatur ; pro certo prætereunti Bejo futura impedimento , sed omnis diligentia ubique irrita ; Bejus prospero vento se committens pertransivit illæsus : & subsidia tutissimè adducta in urbem deposuit.

Dum hæc foris geruntur , Venetiæ infortuniis vexatæ domi hoc ipso anno pridie idus Junii ; ad augenda publica mala , & calamitates ; loca , in quibus
nauticus

nauticus panis pinsitur, & coquitur, correpta flammis conflagrarunt. Casu, an dolo, incertum. Aliquibus tamen suspecta fuit perfida Judæorum colluvies in urbe: eadem Cyprii belli tempore in ipsum quoque Navale ignem dicitur conjecisse: utcumque sit: gens hæc Christiano utpotè nomini infensissima procul equidem foret ableganda.

Etiam Locustæ, insectum animal multitudine innumerabili in Foro-julienses, & confines Venetæ urbi agros effusæ infasta portendere videbantur. Corrodentes pabula antematura, & post resecta, detrimenta maxima sua depopulatione inferbant segetibus, herbis, & arboribus. Ad has, quæ sata cuncta vorabant, enecandas delecti ex Senatus consulto viri, armarunt ab omnibus pagis, ac villis agrestes sarculis, ligonibusque, qui celeri occursu eas coactas in præaltis foveis, ac viva calce obrutas concluderunt: ne diverso modo extinctæ putri sanie, & pestilenti aerem inficerent.

Et quoniam ex impensis quotidie crescentibus exhauriebatur Ærarium; Patres dies, noctesque agitabant, quam ratione sustinere possent gravissimum bellum, quod soli cogebantur subire. Propterea suis in comitiis statuerunt extraordinaria vectigalia imponere in censuum æstimationibus: decretæ idè

decisiones iustæ, taxatæ, ut viæ pecuniarum promptæ, & expeditæ currerent: auctiore fœnore permissio, quo negotiatores spe lucri nummos uberius, & facilius suppeditarent; ut stipendia militibus præstò essent. Sed cùm hæc minimè responderent impendiis, necesse fuit procedere ad subsidia voluntaria iubeatarum Civitatum; tributa moderata imposita, quæ lubentissimè penderentur: atque subinde novæ invenientæ pecuniæ formæ excogitatæ. Indicata. Sancti Marci Procuratoria dignitas viginti nummum millibus, centum Patriciatus nobilitas, extorres pretio, vel militia reducti. Palatina Officia ementibus oblata: Publica patrimonia ad hastam revocata: honorarii proventus divenditi, vel diminuti.

*Rithymna capta à Turcis. Arx
deditione accepta. Andrea
Cornelii interitus.*

TUrcæ in dies viribus auctiores Octavo Idus Septembris ad Rithymnæ oppugnationem se conferunt; & milliario ab oppido tentoria figunt, castra locant, & obsidionem instituunt, minanturque extrema Rithymniis, nisi citò se dederent. Subinde terrorem incutiunt, dum populabundi in locis proximis, quæ deliciis affluebant, prædas agunt, urunt, diruuntque funditus.

Cor-

Cornelius acerbè percussus ea novitate collectis, atque è præsidiis deductis copiis cum Camillo Gonzaga accurrit opitulatum obsessis. Crebræ propterea utrinque fiunt irruptiones, & eruptiones, varia plerumque fortuna. Rithymnii tamen à mari quoque molestissimè navalibus machinis vexabantur, cum Creticæ triremes non dubiis ictibus expositæ vetarentur accedere, & opem ferre. Tandem pro mœnibus à conflictu pertinaciter commisso, exundarunt è castris Turcæ rapidi torrentis in morem, suæque multitudine nostros verterunt in fugam: abripitur cum fugientibus, quorum pauci integri, magna pars confecti vulneribus, ipso Cornelius, atque unà Gonzaga, qui suos hortando, cogendoque cohibere non potuerunt. In ea trepidi tumultus confusione, Cornelius plumbea glande in pectore tactus paulò post occubuit. Vir, cujus animi ardor, & impetus in administranda provincia tantus fuit, ut fortunam valdè adversam, & diversam à suis subierit, Hostes fuga elapsis imminentes Rithymniam ingrediuntur, & occupant cruenta eæde, ac tormenta in capta urbe reperta contra Arcem in edito tumulo structam convertunt. Eam Georgius Quirinus duobus mensibus constantissimè propugnavit ex omni parte circumventam; atque hostium aggressiones, & impetum auda-

cia magis, quàm spe sustinuit, donec vires defecere. Ad extremum cùm nullus superveniret auxiliator; neque diù, noctuque cessarent reboantium machinarum ictus, Arx quassa, & rimosa videbatur brevi casura in obsidentium manus. Igitur fatali quadam necessitate coactus cum præfidiariis, undecimo Kal. Decembris, omnes pacti vitæ incolumitatem, illam dedit invitus. Sub ipsius anni finem Aloysius Victorius Candiam petiturus cum auxiliaria navi non procùl à Cyamò nocte obscura, & caliginosa repentino incursum concutitur ab Rhodiana prætoria. In re subita parumper incertus trepidavit; at dum magna contentione pressus vehementer timeret, periclitanti propitia fors arripit: duæ trirèmes actæ furenti vento in ipsam non agnitam prætoriam per tenebras feruntur, eamque deprimunt: quo casu ille, ad unum interfectis, à quibus vis ingruerat, periculo liberatus cœptum iter confecit, exposuitque subsidia in urbem, gestientem secundi eventus lætitia.

*Thomas Maurocenus pugnat solus cum
Turcica Classe, victor occumbit.*

MDCXLVII.

C Apellius, audita Rithymnæ deditione, omne studium posuit in com meatibus, & auxiliis, quæ libero
tra-

trajectu comportabantur Cydoniam, intercludendis. Quamobrem iussit Grimanum Classis Curatorem cum quinqueremibus, & Maurocenum cum navibus Ægeum pelagus excurrere, ejusque scrutari insulas, & scopulos, in quibus ferebat fama latere vectoria navigia. Grimanus tertio Nonas Januarii vix à portu solverat, cum subito jactatus horridis fluctibus, divulsusque à cæteris quarta die Lagusum appulit: at Maurocenus ab irato mari victor Ceam versus contendit: monitus de accessu navium, quæ illuc transportant ex Africa Mehemetum Regis Algerii filium; & ejusdem nominis alterum illius Regni Præfectum: vocat ab Laguso Grimanum, ut esset pugnae, ac victoriae consors; Hic licet morbo affectus, cum Antonii Bernardi quinqueremi ad eum festinavit. Imperant concordibus animis militum descensionem, & educto murali tormento verberant oppidum integro quatrduo, cujus mœnia fracta cum oppugnantibus aperirent ingressum, obfessi spontè in fidem se tradidere. Recepti ad arbitrium, primariis viri habentur perhumaniter captivi: vulgus transstris destinatur; & spolia in navigiis remulco Sudam traductis inter navarchos, & classiarios dispertiuntur. Mauroceus hoc successu alacer fit ad alia facinora promptior, ut etiam se junctus

ab aliis decurreret maria, & quamcumque sectaretur opportunitatem dimicandi cum hostibus. Itaque Mussanus Bassa credulus ipsum in proximis aquis solum oberrantem facile reprimi posse; dimisit in audentem nimium quadraginta triremes. Curam suscipit expeditionis Carucasius Rhodius Bejus tanta fiducia, ac si momento ad machinarum explosionem esset iacruentam victoriam adepturus. Maurocenus, qui nullum formidabat periculum, irrisit Barbari petulantiam; & adhortans suos ad pugnam undique circumdatus, & oppugnatus, navim coepit agere in gyros, & ab omni latere grandiores pilas in subeuntes jaculari: quæ ferra, & continua tormentorum tempestas crebro concussu quassabat hostilia rostra: ita ictus dirigebantur, ut præ timore nullus esset, qui vellet propius accedere. Indignatus Bassa, quod ab uno vinceretur, alios submisit in subsidium: & mandavit irrumpere ea vi, atque constantia, ac si Hibrainus præsens adesset: singulos incitando nunc pœnarum metu, nunc præmiorum spe: ducenti audacter navim ascenderunt, sed vibrantibus gladiis, plumbeisque globulis excepti ferme omnes vel occisi, vel semianimes in aquas præcipitati miserrime perierunt. In subjectas verò triremes injecti ignes arte elaborati magnum excitarunt incendium.

dium: quo ubique bacchante, terror in hostibus multiplex fuit; veluti si abruptis nubibus coruscarent fulgetra in eos, caderentque fulmina. Hæc inter in navi excurrit nuntius duas quinqueremes in auxilium properare; tunc Maurocenus, ne cum externa ope potiretur victoriæ, vividi sui spiritus auxit robur, ut, ubi majus urgebat discrimen, præstò adestet manu, & consilio. Sed fortuna tanti viri gloriæ invida noluit illum optatissimo triumpho superstitem. Jacuit ex vulnere in capite extinctus: qui acerbo fato proximi erant, ejus necem occultant, ne patefacta socios à pugna deterreret. Quæ in sex horas protracta obstinatissima contentione, tandem ab ea cessatum fuit maxima Turcarum strage. Mussanus interemptus, desiderati non pauci nobilis gradus armorum duces, plurimi è classariis tum ferro necati, tum flammis obruti, & aquis submersi: denique classis partim incensæ, partim laceræ, & consternatæ fuga, hanc unius Maurocenæ navis victoriam mirificè illustrarunt: defuncti corpus Venetias delatum Senatus extulit ea pompa, quæ decebat benemerentem de Republica: & Jadertinos, Dalmatas, Epirotasque, qui cum Mauroceno fortiter dimicarunt, honorificis remuneravit officiis.

*Turcæ capiunt Novigradum.
Leonardus Fusculus Dalmatia Praefectus.*

HOc ipso anno millesimo sexcentesimo quadragesimo septimo Turcicus armorum motus agitavit Dalmatiam. Bosniæ Bassa ad Hibraimi iussa suis excursionibus in Venetos fines cuncta ibat depopulatum. Adorsus ad maris littus Crapanam turrim, ex qua erumpentes incolæ transeuntis agmina carpebant, perdere, ac diruere juravit. Inclusi, & barbaro furori expositi omni humano auxilio carentes, divinum magnis vocibus inelamabant, quod prestò adfuit, illac præternavigante Daule Dotto patricio Patavino. Dum ille intento cursu contendit Ascrivium, ad flebiles deposcentium opem ejulatus constitit: in turmas miseris infestas suæ triremis proram detorquet, explodit majus tormentum, jaculatusque è minoribus plumbeos gobulos illas hac animi sui pietate, ac fortitudine costernatas improvisa aggressione abscedere coegit eximens à nece, atque à captivitate Crapanos. Bassa minatus in aliud tempus vindictam ad expugnandum Novigradum susceptæ expeditionis scopum properavit: & illud provinciæ oppidulum per deditiōem accepit; de ejus custodia

dia diffidentibus præfidiariis, quod viribus
 impares à loco parum munito arcere hostem
 difficile; & incerti de auxiliis; quæ tamen
 jam parata breviterant asserenda. Verùm
 nullum consilium iis, qui aliud nihil cogi-
 tabant, præterquam de vita, & libertate:
 tamen experiuntur, quàm fluxa esset Bar-
 barorum fides, cum plures perfidus hostis
 morti, & captivitati dederit. Bassa, oc-
 cupato Novigrado, majora oppida cona-
 batur invadere hac spe, ut Respublica
 bello in continenti quoque implicita distra-
 ctis, imminutisque viribus infirmior esset
 in Cretæ propugnatione. At pridem ex
 Senatus consulto Aloysius Maripetrus pro-
 vincię oras præfidiis munierat: & castra
 minùs tuta demolitus, cætera solo æquatis
 circum ædificiis, vallo, fossa, firmisque
 munitionibus sepsérat. Præsentium turba-
 rum fax fuit Halyius Bejus Lichæ sangia-
 chus magnæ equitum alæ signifer, Vene-
 tis infensissimus recentia, veteraque odia
 concoquebat in Rempublicam, quam per
 hos dies ausus est educto in aciem agmine
 inquietare. Patres ad hominis temerita-
 tem, Turcarumque impressiones coercen-
 das Dalmatiæ expeditionis summam Leo-
 nardo Fusculo detulerunt, qui tanto mu-
 neri par spondebat sua virtute turbatis re-
 bus tranquillitatem..

infelicitis successus nuntius. Quo facto motus totam Bosniam armavit in Rempublicam, cujus provinciæ viribus auctus succenditur odio majori, iterumque descendit in aciem. Primo congressu, qui fuit acerrimus, audacter, & viriliter confligit: verum ab omni parte circumseptus, postquam aliquandiu repugnantium impetum sustinisset, dilabentibus suis, solus sibi ferro aperuit viam ad fugam: frustra tamen, nam à persequente Epirota sistitur, & dejectus ab equo decollatur. Occisi caput Pisano delatum fuit, prospero maximè obsecundantis fortunæ præsagio. Itaque sublato è vivis hoste Jadertinis infestissimo, arctiori obsidione cingitur Xemonicum. Turcæ exteriora loca per vigili cura defendentes frequenter diurnis, nocturnisque aggressionibus nostra castra vexabant. Sed Pisanus eorum comprefsit ferociam obsidionalibus machinis: quibus excussis prostravit præaltam turrim, & Mesquitam tanta trepidatione oppidanorum, ut hi cœperint cogere Halyium ad pacem ineundam. Homo ferus, ac immanis hanc sollicitantes rapuit ad supplicium, alios in fide retinuit spe proximi à Bosnia subsidii. Crescentibus quotidie magis angustiis, à Pisano averfis aliò aquarum ductibus, & prohibitis com meatibus desperantes salutis, vitæque perfugio iterum sumptis armis in-

ob-

obstinatum convertuntur furiosi, & minitantur. Halyius sævientis vulgi effrænem impetum declinans in arcem trepidè profugit: quo repulso, & incluso, confestim oppidani se dediderunt. Pisanus receptis in fidem liberam potestatem facit proficiscendi Auraniæ: monitus ab iisdem dirigere tormenta in turris, & arcis angulare latus infirmius; illicò ita exequitur: eaque in partes quassata, & ruïnosa suis militibus ad irrumpendum aperuit aditum. Attamen in multum diem dimicatum fuit ingenti sagittariorum vi, crebrisque bombardarum ictibus, donec Halyio cum spe auxilii vigor mansit: sed posteaquam neque roboris, neque animi quicquam ampliùs superesset, imploravit vitæ securitatem his conditionibus: Se arcem victori Veneto bona fide traditurum cum oppido; modò ipse cum suis immunis esset à captivitate, & omnes pro liberis haberentur. Illis acquievit Pisanus; & quarto obsidionis die ingressus est Xemonicum, exeunte Halyio. Nostri pertentato oppido, hostium dolos detexere: alii latitabant in ædibus, è quibus prorumpentes armati illos in magnum discrimen adduxerunt: alii in cavernis rogantes Nicolaum Syllam Croatam, ut eos in suorum numerum reciperet, accedentem perfidiosè obtruncarunt. Quapropter Halyius datæ fidei impius viola-

la-

lator Jaderam captivus, & inde in Brixiā Arcem custodiendus traditur, in qua diū maceratus infamem animam evomuit.

Novigradum receptum.

X Emonicum Pisani virtute captum, & à militibus direptum voracibus nammis consumptum fuit. Quod oppidum nobile, ac munitissimum suo fato deletum, in vicinia tantam incussit formidinem, ut Succovaram, & alia finitima castella nullo negotio fuerint occupata; & pariter raptis prædis exinanita continuè exarserint incendio. His feliciter gestis, Fuscus ad recuperandum Novigradum accingitur, neque alio ductore, quàm Pisano, cujus virtuti, ac fortitudini fortuna comes adesse videbatur. Hanc expeditionem damnabant aliqui existimantes difficillimam: sed ille haud multa moratus voluit celerem experiri aleam: igitur noctu expediri navigia, educi copias, metari castra, & mane subobscuro violentis pilarum ictibus conceiti Novigradum. Quæ omnia ductu, imperioque Pisani peracta, statuta die oppidum inopinata aggressione oppugnatur: qua re deterriti præsidarii vocant in auxilium Sinamum Salonianæ Bejum. Hic non exiguo militum numero ad opem accelerat: festinanti occurrit Pi-

Pisanus, & proximus ut manus confere-
ret, vidit Bejum veluti panico terrore
correptum terga vertere: qua fuga,
cùm satiùs duxisset vicisse hostem solo
conspectu, hac victoria in sua castra, quę
audierat à Turcis perturbari, opportu-
nè reversus est. Illi circumfusi per tur-
res, & mœnium pinnas omni missilium
genere nostras munitiones inquietabant:
& sæpiùs erumpentes eas convellere co-
nabantur: Minotam triremem aggressi va-
cuam classiariis, qui descenderant, eductum
ex ea murale tormentum rapuerunt; sed gra-
ve, & tractu difficile profunda fossa oc-
culuere, superaddito crucis signo, ut ap-
pareret ibi conditum christiani hominis
cadaver. Trierarchus animo minimè sub-
misso aut suorum fuga, aut maris æstuan-
tis timore, effossam machinam extraxit
monitus à transfuga Turcicę astutię.
Cæterum & à mari, & eodem tempore
à terra irrequieta globorum procella lu-
xata mœnia cœperunt hiscere, & per
patentes hiatus irruptioni aperire viam.
Obsessi fracti, ac domiti oppugnationis
artificio, & belli asperitate in extremo
constituti periculo, sine ulla auxilii cer-
titudine, vel effugii consultatione signa
exposuere voluntarię deditiõis. Oran-
tibus pacem, non aliam Fuscus con-
cedere voluit, nisi quę suo placeret ar-
bitrio, memor injuriarum, quibus illi

No-

Novigrado potiti Venetum præsidium affecerant . Hoc pacto quatuor militiæ duces , Aga nominati , in potestatem venere ; Jaderam missi in custodias ; ex Turcis bis sexaginta ad triremes : bellica impedimenta publico usui addicta : & oppidum , abire jussis imbellibus , ne ampliùs Barbaris esset receptui , ferro , ignique devotum funditùs excisum . Hæc quoque Novigradi jacturâ veluti quodam contagio serpsit ad alia loca Tinum , Auraniâ , in qua Lichæ Sangiacatus amœni recessus , & Râtenizzum , & Obrovatium , quæ Sebenicenses direptionibus , & flammis scedarunt .

Nedinum captum cum Scardona .

HOc Dalmatiæ oppidum in vertice collis extractum hostium armamentarium , & horreum Fusculus oppugnare constituit , fretus sua , & Pisani fortuna . Motis itaque castris , & valido militum robore præmisso , haud procul oppido confedit . Hoc Turcæ cùm vidissent , furenti eruptione repellere Venetos conati sunt : sed eorum inordinatus , & confusus egressus illis patefecit ingressum in oppidum : nam undequaque circumventi , & ab reditu interclusi arripiunt fugam per invias rupes , & saltus . Oppidani eo casu perculsi , ignota quoque scrutantes itinera , secum asportando , quæ
rap-

raptim collecta ferri poterant, in tutiora loca se recipiunt. Pauci in arcem confugerant, verum quia parum proficiebat obstinatio, sancita conditione abeundi quò vellent, deditionem faciunt, & demigrant. Pisanus derelictum sola trepidatione Nedinum occupavit, subditisque flammis pari cum cæteris devastatione prorsus sustulit, ac delevit.

Ex his, quæ maximè prospero victoriarum cursu gerebantur in Dalmatia, Hibrainus fera rabie percitus Visiro Techelio Sarmatæ mandavit à propinquis provinciis colligere exercitum, qui par esset refrænandis Venetorum irruptionibus. Igitur ille brevi conscripsit quadraginta hominum millia adversus Sebenicum expedienda, hoc instructus consilio, ut in maritimis oris munitiora castra invaderet; vias obstrueret suppetiis, Scardonam, & reliquas arces regiis firmaret præsidiis, vagisque excursionibus gravia ubique damna Venetis inferret. Fuscus, explorata Visiri mente, decernit hanc citissimè prævertere, & eludere, omni abrupta mora, Sebenicum profectus Scardonæ se armatum, & infestum ostendit. Nonis Majis, exurgente aurora, in oppidi conspectu consistit cum triremibus, & navigiis: quo accessu Turcæ adeò stupuere, ut de hostium, multitudinem velorum numero decepti, quæ Fuscus callido astu mul-

ti-

tiplicarat, diù hæsitarent quid agerent : in hac trepidatione , dum se continent intra muros, Veneti suas copias extendunt : & in timidos bipartitis peditum, equitumque agminibus procedunt. Illi tandem recollecto spiritu nostros invitant ad pugnam eò audaciores, quia loca eminentiora infederant. Croatæ, & Epirotæ procacibus verbis laceßiti primi procurrun; quos inæquali certamine pullos equitatus sustinuit, qui tantum terroris incussit provocantibus, ut coacti à collium cacuminibus in imas convalles descenderent. Fugata, & dispersa subsidia cùm vidissent indigenæ : & continua tormentorum dis-
plosione collapsa mœnia, æquataque solo ædificia, & omne salutis desperatum perfugium, victi fugam occultant, & vacuas sedes relinquunt victoribus : capti æquali metu arcium propugnatores cum fugitivis in latebrosa loca eunt præcipites. Ita cecidit Scardona, novem milliaribus à Sebenico distans, oppidum in Dalmatia potens; cujus, jubente Fusculo, asportata præda, quæ ampla fuit, combustæ sunt ædes, prostratæ cuniculis arces, turritaque mœnia ab imo convulsa. Atque nihil prætermissum, quod hostibus afferret incommodum; & ideò Comiti Alberico Sabino molarum mandatur demolitio; quas ille, & pristina omnia dum rapido igne corrumpit, Turcæ de latebris

bris prodeuntes in pedites direptionibus avidius intentos crudeliter debacchantur. Accurrit in oppressorum subsidium Sabinus : ac postquam horæ spatio ingruenti multitudini restitit, diffusus cum paucis frangere posse inimicum impetum suppetias à Fusculo petit. Jussi properare Germani, & Epirotæ ductoribus Deghenfeldio, & Cruta; simul ac isti in Barbaros infiliunt, classarii exonerantes à mari tormenta, eodem tempore prorumpunt. Aspera pugna confurgit; hostiles phalanges dissipantur; Sabinus vulneratus à cæde eripitur: ex hostibus interfecti eo numero, ut, de cruentissima strage ne constaret quidquam, corpora adhuc spirantia humabant. Fusculus, diruta Scardona, Sebenicensium securitati optimè consuluit: Pisianus contiguos pagos, villasque ferro, & incendiis latè vastavit; ut nullus ferè locus in provincia Turcis superesset aut ad faciendas incursiones, aut ad ponenda castra. Qua de causa paventes contermini Bosniæ accolæ, ne suos vicos Venetæ machinæ quassarent; ne milites diriperent agros; nevé serpens flamma domos in fumum, & cinerem verteret, ad Rempublicam ultrò defecerunt.

Clades Messarea in Creta.

QUæ prosperè Venetis , quæ inauspicatò Turcis in Dalmatia , miscuit fortuna mutatis vicibus in Creta , quo tempore Nicolaus Delphinus , extincto Andrea Cornelio , totius Insulæ Præfecturam obtinebat . Vir quidem gravis , & prudens cùm primùm Candiam urbem advenit , parùm feliciter pugnavit . Tertiodecimo Kal. Julii Hussainus Rhitymnæ , & campestrium armorum Bassa cum suis agminibus in Messaræos vicos descenderat maturas messes populaturus . Ad illum propulsandum Candia egreditur Aloysius Emus plurimo peditatu instructus : & paulò post præcedentem subsequitur Gildasius Germanus cum agrestibus , conterraneis , & civibus , quorum maximè intererat , ne pabulatione , & commeatu prohiberentur . Stabat uterque exercitus in conspectu : promissæ nostris victoria à profugis , si numero auctiores in Turcicas stationes impressionem facerent : super hoc consultus Delphinus è præsidiis detraxit pedites mille , & ducentos ; quos Vincentius Marra Neapolitanus valido equitatu protectos in auxilium duxit , habuitque comitem inter honorarios milites Marcum Antonium Præfecti filium . Aucti

Duces his viribus statuerunt concordī assensu cum impetu irruere in Bassā , qui suas copias extenderat loco , cui Gortini nomen ab antiqua Gortina fortassè . Conversæ acies in pugnam audacissimè congregiuntur ; & qua furenti vi nostræ in hostiles processerint , ex eo credi potest , quòd in ipso primo congressu cœperunt Turcæ trepidare , fluctuare , pavidī tentare fugam , & plurimī cadere vulneribus confossi . Nostri alacres hoc successu Gildasii nomen , fortitudinem , & victoriam ab ipso partam conclamarunt . Sed quia res præclarè gestæ parant invidiam , dicitur iis vocibus ita acriter exarsisse Vincentius in illius odium , ut , reducto equitatu , dum intentior videbatur niti ad pugnam , victoriam corruperit . Pedites præter expectationem equestri militia destituti illicò dilabuntur : & quæ quisque poterat , ruit præceps in fugam , quæ una victis via supererat ad salutem . Surdi omnes ad suorum Ducum incitamenta , ut redirent , ut integrarent aciem , & victoriam retinerent , neglexerunt hortationes , & imperia ; eò quòd tempus non permanendi , sed fugiendi à clade , & à servitute instaret . Turcæ tantam intuiti nostrorum consternationem , & socordiam resumunt animos , & à tergo celeri cursu premunt , quos confusio , & pavor inconsidera-

sideratè occupaverat . Plurimus cæsorū sanguis non explevit Barbarorum immanitatem ; ducti in captivitatem ex trahentium inclementia exorabant remedia [mortis compendio ; jacebant multi lethaliter transfixi : pauci concitis equis ab imminente discrimine se subdixerunt . Delphinus Præfecti filius anhelò cursu sequebatur Gildasium , & Emum ; sed lapsū equi humi prostratum eripere nullus potuit à periculo , ne ab acervatim insequentibus obrueretur . Agnitum armorum nitore , juven-tæque decentia nobilis esse generis , Bassa apud se captivum retinuit . Tandem nox superveniens ferinæ inhumanitati finem dedit : vicerunt , qui victi fuerant ; & magna totius ferme exercitus internecone in Messaræis campestribus cum suspicione perfidæ æmulationis , & invidiæ procurata . Præfectus intempesta nocte residuos à strage recepit ; sui que filii captivitate patientissimè indoluit : qui maxima animi afflictatione sustinuit funestissimum susceptæ expeditionis infortunium .

Sebenicum à Turcis frustra tentatum .

Pervenerant ad aures Hibraimi Venetorum facinora in Dalmatia : tot oppida capta , diruta ; incensa , nudata : duces rapti in captivitatem , fusi exerci-

tus, & omnia in eadem provincia tumultibus, terroribusque repleta. His igitur in odium, & iram implacabiliter concitatus iussa sua maturavit ad Visirum, ut poneret castra apud Sebenicum, toto conatu obsideret, & oppugnaret armis, ac flammis ultricibus. Visirus regiis mandatis summa cum festinatione obtemperans, XII. Kal. Septembris sub conspectum Sebenici suas copias exposuit, militum scilicet viginti quinque millia, & munitionibus crectis, impositisque machinis, urbem arctissima premit obsidione. Sed magna cura, & diligentia Fuscus prævenerat Visiri opera adversus Sebenicum; quod, demolita Scardona, firmissimo munierat præsidio. Omnes hostiles impetus fregit; irruentes Turcas aggressi cives paribus armis; sed iis fortiori animo vibratis, & contortis repulerunt hostem tam truculenta cæde, ut Tetchielius Visirus vigesimo octavo obsidionis die re infecta, & ipso antelucano tempore collectis vasis ad oppidum Dernisium advolarit: ubi recensitus exercitus dicitur minor dimidio inventus cum occisis, vulneratis, & ægris pariter computatis.

Oppida Dernisii , & Tininii obtenta .

FUſculus, deſenſo Sebenico, ſtatuit viſtricibus copiis petere Oppidum ab accolis vocatum Dernis, inter Tininium, Slavis knin, & Cliffam; ut, eo ſubactō, ſuos in Dalmatia augeret ſucceſſus. Itaque Franciſcus Georgius Dux equeſtris militiæ; & alii notæ virtutis Chiliarchæ, ſeptem peditum millibus, ac equitibus octingentis inſtructi, ipſo imperante, proficiſcuntur in deſtinatam expeditionem: quibus na- ves per euripos traductæ omni com meatu onuſtæ laturæ erant ſubſidia. Interim plurimæ emerſerunt anguſtiæ, quia Morlachi ſuis vagationibus, rapinarum ingluvie ita per incerta viarum morabantur ſequentes acies, ut non ſemel de reditu fuerit cogitatum. Porro Fuſculus monitis, & mandatis urgens inceſſum, redegit Morlachos in ordinem, eoſque celeriter juſſit irrumpere in Turcas obſidentes itinera. Aderat cum robuſtiſſima manu Baſſa Techielius, qui ad repellendos ingruentes validiſſimè ſe oppoſuit; ut propterea intra ipſas munitiones cruenta pugna exarſerit, multis ab utraque parte cadentibus. Noſtri tandem allatis ſubſidiis reſecti, denſatis agminibus, audaci conatu rapiuntur in hoſtes; qui magna accepta clade conſternati incli-

narunt in fugam; quam & Bassa, tolerato diù impetu, etiam arripuit. Hoc uno conflictu perterriti Oppidani, neque ulla sperantes auxilia, fugato Bassa, spontaneam pacti deditionem in arbitrium Veneti imperatoris concesserunt.

Recepto Dernisio, Tininii quoque oppugnationem moliri voluit. Ejus oppidi Arx in extremo collis assurgens despectat uberem, latamque planitiem duobus irriguam fluviis, septamque montibus, qui Dalmatiam à Bosnia determinant. Georgius jussus à Fusculo confestim parat omnia expeditioni necessaria, & cum cæteris ductoribus non deterritus vel situ loci, vel interjectæ vallis altitudine delectas copias movet. Tininii è longinquo explorarunt Veneti exercitus accessum, & jam proximi ad vim inferendam: quamobrem metu correpti, ne illos vexaret idem fatum, quod paulò ante Dernisios, collectis repente vasis, Cettinam per saxosa juga præcipites profugerunt. Georgius prosperæ fortunæ gratulatus, quia nullus neque ab externis munitionibus, neque ab Arcis propugnaculis obstaret, in oppidum, & Arcem securus penetravit. Occupati ita facili Marte Tininii spolia fuere multa, & amplissima: hoc enim in loco Turcæ suum habebant armamentarium, machinarum, & com meatuum refertissimum. Rebus omnibus translatis in publica, privataque com-

commoda, exinanitum flammis comburitur, & illius à fundamentis imperatur excidium, ne amplius Barbaris hospitio esset. Sed milites magis ad convectandas prædas, quàm ad perficienda jussa expediti, inde recesserunt, quando incendia, nullo glomerante vento, suas vires deposuere. Ex hac incuria contigit, ut tractu modici temporis idem oppidum à Turcis fuerit reparatum; restituta, munitaque Arx; imposita præsidia; & crebris deinceps molestiis exagitata Provincia.

Cliffa occupata à Venetis.

Turcarum immanitas in Albanenses.

MDCXLVIII.

UT finem transacti anni, ita præsentis initium illustravit Fuscus continuatis victoriis adversus Turcas. Omnium tamen præclarissima illa fuit, quam de subjugata Clissa reportavit: cujus munitissimæ Arcis expugnationem cordi semper infixam habuit post propugnatum Sebenicum: at quoties communicabat suis ducibus arcanum, toties plures eorum inveniebat dissentientes, quòd rem arduam esset aggressurus.

Clissa sita in summo vertice, veteranis custodita militibus, & novo per hos dies aucta præsidio, plurimum negotii facebat dissuadentibus expeditionem:

at nullum Fasculo, vel eo potissimum nomine, quod armis præfset Sororius Hibraimi nepos, & eidem adesset vir ferus, ac ferox Barcovichius Christiani nominis juratus hostis. Hæ difficultates non deterruere Venetum Imperatorem à proposito, qui etsi distulit, non dimisit consilium, cui si contigisset eventus, hic maximæ existimationis futurus erat Reipublicæ; Spalato, & Sebenico certam præstabat securitatem infestissimæ Arcis demolitione, tutioresque in Bosniæ regionem Venetis exercitibus incursiones. Plenus itaque spei xv. kal. Aprilis in triremibus, navibusque festinanter paratis decem armatorum millia, plurimæque impedimenta imposuit, & Jadera discedens, confecto unius diei cursu, Salonam tenuit quinque milliaribus à Clissa. Recensita militum quinque millia jussit adversus Clissanos procurrere in pugnam; de qua Ducis solertia nihil illi præsciverant. Omnium primi Itali, & Epirotæ vi, & armis strenuè decertarunt contra præstructas moles, excitatasque munitiones extra oppidum: quibus potiti cum tentassent in muros evadere omni machinarum genere, faxis, telisque penè obruti Germanis subeundi locum fecerunt: cum quibus etiam acerrimè concertatum fuit. Porro tandiù sustinere furentem impetum,

donec refocillati qui aberant, & animati qui aderant, unanimiter aggressiones repeterent. Tanta utrinque animorum, viriumque contentione præliatum est, ut inter mutuas clades sæpius fluctuaret victoria. Postremò accidit præsentì Numinis ope, quòd nostri primum, & secundum murorum sepimentum obtinuerint, & fortiter repugnantes in arcem retrufferint pavidos, & consternatos hostes. Nuntiatum Techelio Clissæ periculum, totam fermè Bosniam excivit in auxilium: sed Fursculus ejus opis præsciùs in advenientem Visirum obviam mittit Stephanum Sorichium cum Morlachis, quorum is erat antesignanus: sacrisque initiatus, & pro religione, ac libertate Venetis addictus cum sua gente sumpserat arma in Barbaros. Vir locorum peritus, & acer in bellis transeunti hosti struit insidias in abdito convallium recessu: quem repentino incurso, inconditisque vocibus aggressus, nihil fraudis opinantem turbat, & profligat quos ducebat auxiliares: plures in angustiis arripuit, & occidit, capitaque interfectorum hastis infixà ostentavit obsessis, ut desperato subsidio venirent in deditiònem. Visirus à fuga revertitur in campum, dispersos recolligit, æverso itinere novam gravissimè laborantibus opem ferre molitur: sed iterum credula spes eum frustrata est; ab equitatu

circumdatus retrò abire cogitur tumultuariè, & quotquot palantes errabant, expositos deferere interaëcioni. Subinde præfidiarii indefessis eruptionibus trucem pugnam integro die protraxerunt. At cum diutius, quàm pro viribus obstitissent, & nulla affulgeret spes salutis, fugatis auxiliariis, ac interemptis, quorum recisa capita oculis objiciebantur; de deditioe agentes vitam, & libertatem postularunt. Ergo quintodecimo ab oppugnatione die Clissa, credita inexpugnabilis, pridie Kal. Aprilis Fusculi constantiæ, & militiæ, & Ducum fortitudini duccubuit. Rejectis conditionibus, quas turgido fastu Barbari proponebant: has illis Fusculus præscripsit: Ut sine armis, & impedimentis exirent oppido: atque duodecim ex Venetis, quos detinebant, captivos redderent; interim, ne qua fraus intercederet, totidem obsides illustrioris generis in castra mitterent. In his præcipuè decretus erat egressus Sàngiacho, & primoribus Turearum immunis. Dum hæc exequuntur, fatalis casus accensu ignis in oppido tumultum in Polissanis, & Morlachis excitavit, qui, quod acciderat inopinatò, studio factum opinantes, armis furunt crudeliter in exeuntes Clissanos, à quibus jam multa damna in corpora, & fortunas acceperant: neque fuso sanguine saturatum odium in effe-

ratis

ratis quievit: à cædibus ingressi oppidum convolarunt ad rapinas, quibus nostrates immisti milites se involverunt; & computarunt in spoliis imbellem quoque sexum pueros, puellasque: itaque dum quisque pulchriores rapere, & sibi vendicare contendit vi, inter rixantium manus peribat dilaniata præda. Quos raptus, & effrænem libidinem Fuscus execratus multos severis objurgationibus, & districto ferro coercuit. Tandem compressit tumultuantes Morlachos audita vox, quod occisus esset Barcovichius, quem omnes impensè oderant..

Senatus ad nuntium captæ Clissæ effusus in gaudia publicas decrevit supplicationes: & Fusculo, quem in patriam beneficium appellavit civem, insignem victoriam gratulatus est. Cæterum, cum de retinenda, vel demolienda Clissa pluribus in Comitibus disceptatum esset: potior obtinuit sententia illam fore diligentissimè custodiendam, ut constaret, Rempublicam non medicæ existimationis recepisse oppidum. Hoc Senatus consulto Fuscus in eminentiori Clissæ fastigio Marcium vexillum erexit, Curatorem declaravit Franciscum Valerium Trierarcham, & ad armorum administrationem delegit Comitem Sabinum, fortis, ac præstantis animi viros. Eama interim deditæ Clissæ vicinas gentes pervagata pellexit in Reipublicæ ob-

sequium, Albanos maximè; in montanis supra Vegiam opera Marci Sunæ Antistitis Dyrrachini, qui ejus gentis septem millia collegerat, promissa quoque Scodràe, Crojæ, & Lessi deditio, ubi primum illi Veneta insignia, & arma sibi adversa conspexissent. Turcæ per exploratores subodorati quid optaret ea hominum congregata multitudo, magno numero in unum conglobati invadunt parantes defectionem; antequam à Fusculo adessent auxilia, destinata Constantii Pisauri ductu. Hunc per id tempus vis, & incursus pluviarum ingens præpedivit, ne ad ea aspera loca penetraret, & expectantibus opera subveniret; quo eventu omnes ferè in hostium manus, & carnificinam concesserunt. Strage maxima à Barbaris sævitum est, & in viros quidem sacros edita varia, & immania tormentorum genera.

*Sarichii Morlachorum ductoris
crucidatio.*

REnuntiata Hibraino Clissæ deditio-
ne, quo ille irarum æstu fremebat
impotenter, citatis cursoribus impera-
vit numerosissimas copias, quibus Der-
visius Bosniæ Bassa Spalatum impeteret
festinata vindicta; & omnia Venetis in-
festa redderet. Ad hæc jussa Bassa prom-
ptissi-

ptissimus maximum, & fortissimum collegit exercitum: & Fulculus opportunè instructus maturè constituit occurrere eruptionibus, Dalmatarum, & Morlachorum defectu: hos ducere debuit Sorichius, illos Possidaria, qui, Rebenico intercepto, aditum Turcis illac transitoris præcluderent. Euntes in expeditionem Morlachi magis latrocinii, quàm bellis assueti: ac propterea nostris plus incommodo, quàm adjumento fuere, illecti diripiendi aviditate per hosticum vagis excursibus ferebantur nullo insidiarum metu. Quamobrem incaptos prædaram dulcedine Turcæ è latebris repentino incurſu erumpentes, incautos, & dispersos oppreſſerunt luctuosa aggreſſione. Huic aliquot horas reſtitere Poſſidaria, & Sorichius, sed numero, & vi prævalente hoste, coguntur à certamine diſcedere. At Sorichius, ut ſuos conterraneos à nece eriperet, in quos Turcæ, tanquam in inviſam gentem, rabidè deſæviebant, reverſus inſtaurat pugnam; ſed illos à periculis abſtrahere nunquam potuit, licet fortiter dimicaret; tandem eodem facto, cui viſus eſt ſpontè ſe objicere, raptus inter denſiores hoſtium cuneos, vivus capitur, & excruciatuſ diriffimis tormentis ad exſaturandam crudelis odii immanitatem, ſuæ vitæ glorioſum finem impoſuit.

Antibarim Fuscus re infecta aggreditur: Rhizinium occupat.

GRavis hoc anno pestilentia per Dalmatiam grassata est, & non modicam incolarum multitudinem funeribus absumpsit. Provida Senatus cura non minus provinciam purgavit, quam Fuscus suis victoriis recreaverit afflictos tabe mœrentium animos. Qui ne cunctando tempora bellandi produceret, & alias sibi rei benè gerendæ occasiones distulisse videretur, conscendit naves, & contra Antibarim profiscitur, quod oppidum ad oram sinus Adriaci, non tam mari, quam terra oppugnandum duxerat, experturus quemcunque casum fortuna daret. Terrestri exercitui mille adjungit pedites ex Scardo, quem incolæ Montem nigrum vocant, in finibus Albaniae. Gens, quæ à Turcica servitute ad mite Venetæ Reipublicæ dominium lubentissimè transibat. Hoc fultus subsidio Antibarim adoritur magno impetu: porrò Turcæ fortissimè propugnantes reddunt conatus irritos, & funestos. Quamobrem relicta Antibari, Butuam solvit, ubi aliquot dies moratus in expectatione Albanorum, Ascrivium petiit inclinato animo ad Rhizinii expugnationem. Castrum in alto cacumine positum, aditum præstabat arduum,

duum, & difficilem: ab Aga insuper Mehemeto notæ fortitudinis milite custoditum omnes poterat spernere aggressiones. At nihil fortibus viris invium; quare ad expeditionem eligit acres, & impigros duces, Possidariam, & Crutam, consilio, ac robore præstantes. Cruta præmissus cum delecto suorum agmine, & cum Albanis, qui opportunè advenerant, munitionem à montanis Castrum-novum appellatam, intrepidè invadit: quæ viam occludebat ad Rhizinium, in demolientes munimenta superveniens Aga cum feroci Turcarum globo involat, pugnamque committit acerrimam, obstantem aciem obterit, atque adeò confecta cædesurere cœpit in deterritos, ut nostris extremum exeidium immineret, nisi subita dilapsi fuga sibi salutem quæsiissent. Cruta solus in Campo instar omnium dimicabat obfirmato animo mortem potius oppetere, quàm turpiter cedere: itaque multitudine hostium, non virtute victus gloriose occubuit. Eo quoque tempore à mari excussa tormenta, nihil, aut parum profecere: contrà, quæ obsessi expledebant subjectas naves infestabant. Tandem decretum fuit murales machinas deducere, & in collum cacuminibus locare: traductæ summo labore per devia, & aspera itinera: atque à libratoribus adversus oppidum directæ repentina

tina ingentium pilarum dispendio omnia terrore, ac metu complerunt: propugnatores in muris ægrè consistebant: neque in privatis domibus fruebantur securitate conclusi. Accessit ad augendam obsessorum perniciem Marcus Antonius Otthobonus cum sua triremi, & armatis myoparonibus, qui jussu Fusculli Rhizonicum sinum ingressus plures in ejus ora constructas ædes succendit. Quibus calamitatibus pressi Rhizunitæ, mulierum quoque ejulatu, gemituque imbellium perturbati de deditione inierunt consilia. Adiere primores oppidani Fusculum bona fide, & conditionibus pro ejusdem arbitrio captis, vitæ, & viæ, quam velent carpere cum suis sarcinulis impetrarunt indemnitate. Hoc prospero successu Venetus imperator occupavit Rhizinium, suas cumulavit victorias, & misso nuntio inopina gaudia attulit Senatui. Albanis receptum oppidum tradidit, & optimè munitum; ut loci vicini opportunitate suum odium in Turcas explerent directionibus, incendiis, cædibus, prædantes, & vastantes omnia in circuitu, quæ barbaræ nationi subessent: erga Rempublicam servata fide, & obedientia. Interim se circumagebat annus ab inchoato bello tertius; & Senatus maximè optabat celerem Melitensium triremium cum Pontificiis velificationem in Orientem,

tem, ac subinde Joannis Justiniani Equitis Oratoris sui in Aula Romana urgebat operam . Ab eadem Legatione in patriam reduci Aloysio Contareno , qui nunc ad Reipublicæ clavum feliciter sedet , in ejus Successoris obsequia , & munera ab epistolis , & à libellis transivit ille , qui modò cum veteribus Reipublicæ Venetæ rebus recentes conjungens in breviarium colligit . Justinianus , donec Pontificiæ triremes instruerentur , ut impleret mandata Senatus , quærebat inter suos , quem Melitam expediret ad evocanda ejus Insulæ auxilia ; sed cæteris promptiorem habuit illum , qui licet bellici muneris particeps esse non poterat , sacris addictus , cupiebat tamen suæ patriæ amans in aliquam curarum publicarum partem venire . Itaque nulla longæ navigationis cogitatione deterritus , neque intuto pavidus itinere ; quia Punici myoparones infestabant maria , & Gallica navigia (nondum sedatis Neapolitanis tumultibus) Tyrrhenum tenebant obsessum , subitæ profectioni se accingit . Pridie kal. Maji Roma discedens Neapolim citatis equis advolavit , & conducticia celoce per ventorum , & æstus arbitria sextodecimo Kalend. Junii Melitam appulit . Coram Magno Equitum Magistro causam sui accessus exposuit , & munus sibi demandatum felici eventu perfecit . Quibus
in-

intra quatuor dies ex voto peractis, cum classe illicò adornata in ejus Prætoria exceptus Taurominam venit; quò cum Pontificiæ triremes ex condicito non accessissent, Melitenses suum iter in Cretam maturarunt: ille Messana digressus, sulcato mari Tyberim fluvium subit, ac se Romæ restituit ad Oratorem, à quo cognovit præstitæ suæ solertiæ apud Senatum in secretis Tabulariis extare monumenta.

Per idem tempus adhuc in Romana Curia degebat, cùm alteram creditæ sibi procurationis exhibuit sedulitatem testibus, scriptisque probatam; in subsidium pugnantis Reipublicæ. Non est quòd multa loquatur: nemo ignorat, quàm ingentem auri vim duo Purpurati Principes in sumptus bellicos erogarint: quàm abundè effuso proprio censu eorum Apes Publicis necessitatibus mellificarint. Tàm largam munificentiam perpendens Senatus, & ad aliæ ferenda auxilia promptiora studia, iisdem sua sponte censuit eam referre gratiam, quæ summa, quin etiam in existimatione apud Principes esse solet; ut in aureum Reipublicæ librum referrentur cum omnibus ex eadem Gente; ne unquam Venetorum grati animi memoria apud posteros interiret.

Sed nec silentio prætereundum est, ex hac animorum vicissitudine maximum

ac-

accessisse incrementum gloriæ ejusdem familiæ, splendidissimis conjugiiis, & summa sacri Purpurati Ordinis dignitate peculiari modo collata uni ex nepotibus majori, apud quem hujus Operis auctor munus obivit à secretis; eoque sex integros annos, & quod excedit, absoluto, hoc gratæ benevolentiae testimonium reportavit: inter Basilicæ Patavinæ Canonicos ascriptum fuisse.

Varii rerum maritimarum eventus.

Joannis Baptiste Grimani ad Insulam Psyræ naufragi mors.

JOannes Capellius ejus classis imperator, quæ navium numero, militumque delectu omnium maxima, ex iis, quas ab urbe dimisit Respublica, finem præsentì bello pollicebatur; effœta senectute confectus, implicitusque in agendo discordibus consiliis obtinuit ab Senatu veniam sui reditus in patriam. Reduci sufficitur Joannes Baptista Grimanus amplissimo Marcii Procuratoris gradu ornatus, qui jam rei navali præpositus statim ob collatum munus assidua cura incubuit, ut classis in portu non amplius marcesceret, & otio milites diffuerent. Itaque Ægæum emensus excubantibus quatuordecim armatis navigiis ad arces Dardanellas Jacobi Ripæ vigilantia, hoc unum habuit semper in votis, ne ab illis.

pidum præstabat : Candiam regressus iterum statuit moliri, cunctaque tentare, ut majori vi Helleſpontiaci ponti ostium Barbaris occluderetur . Reparata itaque, ac munita classe, quæ aucta navibus vigintiſeptem in Cea insula luſtranda erat, & inde Pſyram deducenda, tertio kal. Martii è portu solvit; præpropere nimis consilio, quod in pugnandi cupidissimo imminentis fati præſagium fuit . Incœptam navigationem circumfufis repente nubibus, ventorumque concursu exorta procella, & densantibus se tenebris, mare, cœlumque horrendo, ac miserando spectaculo vexarunt; integra nocte quasi turbine circumactus Pſyram tandem pervenit : minima quoque classis pars eò appulit : ſeptemdecim triremes, totidem naves, & duæ quinqueremes, adeò quassatæ, ac laceræ, veluti à prælio victæ recessissent . Porro fessis, neque in portu ſecura quies: excitatur denudò irati Africi rabies, qua vehementiùs sæviente, reducta navigia eadem pariter involvit ruina : concussa, & littoribus illisa furenti impetu luctuosum in omne tempus fecere naufragium xvi. kalend. Aprilis, extincto Grimano, qui divulsus à cæteris cum sua quinqueremi in arenam impegit : cujus repertum cadaver ex lurido, deformique aspectu vix agnitum classiarii Duces uberibus lacrymis extulerunt, complorantes miserandum, funus

funus præstantissimi viri, qui nihil habuit æquè in votis, quàm generosis ausis, avitæ gloriæ æmulus, de Republica, & Patria benemereri.

Nuntius de naufragio, deque acerbo Grimani interitu Venetias allatus dolore maximo universam Civitatem afflixit: & Senatum in anxias curas deduxit, valdè ancipitem, quem præficeret Classis imperio. Quoniam verò abjicienda erat omnis procrastinatio, virtuti, ac famæ suffragatus Aloysii Mocenici Secundi cognomine, tunc Candiaæ adversus insultantes Turcas strenui propugnatoris, ipsum in Grimani locum, & Procuratoriam dignitatem constituit. Hoc interim spatio incolumes à Psýrensi jactura reparata classe, suppletaque Creticis, Corcyreisque triremibus, quas octo numero Laurentius Marcellus adduxerat, iterùm Helleponticam expeditionem cogitarunt Georgii Maurocenì auspiciis; dum verò se parant navigationi, nuntiatur Turcica classis egressa intento cursu Cydoniam petere; nihilominus in paratis pristino vividi spiritus impetu revirescente unus omnium consensus fuit fugientem persequi, & eam in Cydonio portu concludere. Sed huic consilio faventior fortuna affuit: ex fuga tres Punicæ triremes captæ sunt: & ne ulteriùs progredetur Mocenicus classarios ad se revocat; quoniam per
eos

eos dies Hussainus Bassa totum se obstinato animo ad Candia oppugnationem converterat.

*Aloysius Mocenicus Grimano naufrago
suffectus.*

Candia oppugnatio.

Hibraimi Turcarum Regis interfectio,

HUSSAINUS post Messaræam cladem agro Cretico potitus libero excursu quaqua versum exploratum dimittebat, qui sibi opportuna loca notarent ad Candia oppugnationem instituendam. Igitur ab ea parte, quæ oriente sole Sudæ sinum, & ejus ostium respicit, kal. Maiis cum sua castra disposuisset, & super egestos tumulos tormenta locasset, cœpit multa globorum grandine concutere portum, eo consilio, ut navigiis in statione molestus, adeuntibus incussio timore præcluderet ingressum. Maurocenus nullo in discrimine sui dissimilis in hostiles operas irrumpens, turbavit Bassæ machinamenta Joannis Uvertii ingenio, qui tum omnium mœrore occisus periit; cujus viri in militari architectonica singularis maxima fuit jactura. Subinde Nonis Juniis nuntium accepit de collato honore, & cura totius Classis administrandæ sibi ab Senatu demandata, cum Antonii Lippomani electione ad Insulæ Præfecturam: nullam interea omi-

pugnatio , & defensio . Noverant tartarei inventores actis cuniculis vel hostem appetere, velex adverso molientibus occurrere; & in imis cryptis furialibus odiis digladiari; per occultas, & obliquas vias plures mortes quærere ; propugnacula , terreaque munimenta , in suffocissis cavernis incluso igne, qui horrendo strepitu exhalaret , à fundamentis convulsa prostrernere , cunctaque obvia flammis , & fummo involve-
re cum occisorum corporibus laceris , ac semiustis . In propugnatione Martinengii propugnaculi , quod eo disceptandi genere sæpè à Turcis depressum fuit , & à nostris restauratum, Joannis Aloysii Emi intrepida vis enituit, donec funestus præstantissimi viri casus contigit . Obierat antea Vincentius à Marra plumbea glande interemptus , dum rimatur murorum loricas, & circitorum vias. Hujus nex indeplorata ob acerbam Messaræi conflictus recordationem ; onus , quod ille in eo parùm probatus gerebat , in Gildasium transtulit militari prudentia , & multarum rerum usu conspicuum . Sub hoc duce nostris crevit fiducia , hostibus formido ; quorum impetus non diu , non noctu intermissi , fuere viriliter , fortiterque compressi . Interim in labentis anni curriculo quædam affulsit proximæ tranquillitatis spes , dissidentibus invicem Constantinopoli Prætorianis militibus

tibus mutuis altercationibus . Oderant alii Regis incitiam , & crudelitatem : alii habebant exosam Achmetis primi Visiri severitatem , & avaritiam , cum de mutanda militia , deque pendendis stipendiis insolita cogitasset ; ideò furenti rabie frementes Visirum de medio tollunt : Hibraimo , extrema minitanti supplicia interfecto-ribus , nervo injecto gulam frangunt , præfocantque Sulthanam matrem : his patratis necibus sistunt in throno Mahumetum septennem , ejus nominis quartum , strangulati filium , & in Primum Visirum Turcarum satrapæ , & Bassæ in Aula , quam Divanum appellant , convenientes , assumunt Ascrepium , hominem octogenarium , inveteratæ feritatis notissimum .

Gesta Constantinopoli adversus Venetum

Legatum .

MDCXLIX.

Superantius Legatus ex occasione publici tumultus nondum sedati , ratus prosequi posse cum electo Visiro pacificationis negotia (quæ cum vivente Achmete instituerat) innixus prudentiæ , ac dexteritati Joannis Baptistæ Ballarini , qui per eos dies missus ab Senatu , cujus erat à secretis , Constantinopolim venerat : accessit ad Ascrepium , cum Grillo linguarum interprete , exponendo ,
quàm

quàm prona esset Respublica ad instaurandam honestis conditionibus, quæ sua jura facta, tectaque custodirent, illam concordiam, & amicitiam, quam cum Hibraimi antecessoribus intemerata fide coluit. Ad hæc Barbarus, non alia sancienda pacta, dixit, nisi ea quæ ab ipso præscripta ad Senatum afferret Olacus nuntius, quem ille suis literis dimissum statim comitaretur, & revertentem repræsentaret incolumem. Olacus ad natum perfidi hominis Venetias profectus honorificè excipitur: adducendum in Curiam tota confluit civitas, ut videret, & curiola exquireret, quid novi apportaret. Coram Patribus quas attulerat literas explicuit, & quæ continebant, scilicet, solidam Divanimentem esse, ut Respublica spontè ab Insula Creta demigraret; de pace, & de amicitia cum Rege frustrà, & in sui perniciem tempus terebat; ergo effugeret cum potentissimo hoste bellum, qui, ea non tradita, nunquam erat quieturus. Huic iniquæ petitioni responsum fuit, Rempublicam omnem operam, omnesque vires terra, marique in suis rebus tuendis, & maximè in retinenda Insula esse collaturam: non vereri minas eorum, qui pro arbitrio violant fœdera, & dissolvunt amicitias: Deum habere injuriarum vindicem, & justæ causæ patronum. Abiret itaque, & hæc renuntiaret Divano. Custoditus excessit, ne aliquid adversi ei

contingeret, fremente populo; & navem conscendit, & ubique locorum tutus, sexto kal. Maji Constantinopolim pervenit. Ubi infame mancipium ad aures Visiri, & Bassarum multa contraria his, quæ audierat, temerè, petulanterque effutivit. Quam ob causam tanta fuit indignatio Ascrepii, animo, vultuque erumpens; ut in conspectu suo consistentes Superrantium, Ballarinum, & Grillum, gravibus contumeliis oneravit, ac jussit morti addictos in turribus Euxinis asservari. Suam interim immanitatem commento hoc prætexebat, Ballarinum multo auro tentasse corrumpere non paucos Aulæ proceres, ut in pacem consentirent quibuscumque conditionibus. Sed tandem Deo placuit Ascrepii fraudes detegere, & ejus atrocissima scelera non ampliùs ire impunita. Dejectus è gradu, & privatus vita suæ effertatè inhumanitatis in Grillum crudeliter necatum pœnas dedit. Successit in Visiratam Amurathes Bassa mitioris ingenii, qui ad preces Gallici Oratoris in carceribus detentos libertati restituit: atque de ineunda pace utrique genti necessaria, effari veritus est, quæ optabat, dum Prætorianæ cohortes, licet multis in rebus adhuc inter se discreparent, tamen in hanc unam conveniebant; prosequendum esse bellum, & subjugandam

dam Cretam, ne hac expeditione intermissa fieret impuberi Regi detrimentum : in Divano idem susceptum consilium ; quia cum foris sunt arma, domi regnat concordia, & propterea adornatur amplissima classis, proximis Kalendis Majis educenda in Cretam.

Navalis victoria de Turcis Phocææ portu.

CUM nulla ob interfectum Hibraimum, aut ob militares tumultus, pacis spes refulgeret ; imò potiùs metuendi essent majores armorum turbines ; stabat ad arces Sestum, & Abydum Jacobus Rhodus duodecim rostratarum navium Præfectus, ut hostilem classem vel intercluderet, vel oppugnaret. Porro dum vigilat in expectatione aggrediendi hostes proximos ad legressum, fama retulit ab Hellesponto illos noctu erupisse, radentes Græciæ littora. Quo monitu illicò persequitur fugientes, quorum à tergo instantes Bertucius Ciuranus, & Hieronymus Battalea, nonnullas eorum puppes atroci glandium tempestate verberarunt : expositos majori periculo subduxit subitus maris æstus, qui nostris moderandi naves arbitrium ademittit. Illos, qui anxia trepidatione quærebant, quam stationem tenerent, Phocææ urbis, hodie

Focchie, portus recepit. In hoc se tutos credidere: sed Ripa aliquot dierum indagine scrutatus Ægæum, tandem ut reperit quò loci manerent, eòdem celeri cursu advectus, habita consultatione statuit in ipso portu eos oppugnare, promittens navigiis pretio conductis, quæ conflictum detrectabant, se damna compensaturum. Cùm igitur omnibus eadem esset pugnandi cupido in hostiùm conspectum venerunt promptis animis ad concertationem. Irridebant Turcæ Ripæ fiduciam, qui cum paucis auderet adori centum navigia decem millibus instructa propugnatoribus: habebant duas, & septuaginta triremes, undecim rostratas naves cum quinquere- mibus decem. Numero non deterritus, quem sola animorum fortitudo præponde- rabat, in portum, cujus ostium hostes præ- cluserant, audacter penetravit. Una ex Turcicis quinquere mibus repentè adversa in Scotam navim impetum fecit adeò ve- hementem, ut certo esset in discrimine, nisi navarchi virtus, & Ripæ accurrentis ad opem celeritas, opprimentem depres- sisset, undique à majoribus tormentis perforatam; quo factò Bassa, cui Voimeghemet nomen, iracundus se totum convertit in ipsum Ripam, excitando suos, ne du- biterent illius navim conscendere. Utrin- que fortissimè conseritur manus; hostis tandiù apparuit superior, donec superve-
nien-

niente Ciurano , æquata dimicatione , & facto in prætoriam impetu , plurimis partim jugulatis , partim in mare præcipitatis Bassæ in scapham se conjecit aufugiens vulneratus . In ipsis quoque portus angustiis magnum commissum est prælium , cùm suis quisque vellet opem ferre ; sed quantò propinquioribus navibus cominùs pugnandi dabatur potestas , tantò Veneti superiores in hosticas furebant ferro , & flammis . Hæc inter in universa classe discurrens fama occisi Bassæ , tantam confusionem excitavit , & consternationem , ut fuga in littora , vicinasque rupes , & specus amandaret , quos casus ab internecione vindicaret . Nox tandem pugnam diremit igni illuminata , qui per classem vagatus totam non absumpsit recedente Ripa , quem dubium incescit , ne , combustis retinaculis , impellens ventus incendium suas naves corriperet . E portu unum extrahit navigium , eidem traditur triremis ducta à captivis , quorum sexcenti libertati donantur , quinquagemis una in Francisci Mauroceni potestatem venit ; septem Turcarum millia desiderata dicuntur : plurima fuit præda inter navarchos , & milites continuo triduo divisa . Cessit Ripæ hæc victoria tam modica nostrorum jactura , ut divinitus contigisse fatendum sit . Turcæ , qui fugiendo

vitæ discrimina evaserant , observato Venetorum recessu , redeunt in portum , in quo cū vidissent è classe , quam in fumum , & cinerem versam putabant , triremes non paucas à flammis intactas , alacres accingunt se ad illas refarciendas : & cum refectis , instructisque remigibus , commeatuque passis velis Cydoniam pervehuntur . In hac statione digressi à Phocæo congressu manserunt quandiū opus fuit diligentiae , & laboris adornandæ classi : quæ tandem ab eodem Bassa , qui dicebatur periisse , iterū educta in altum , cum navi inusitatæ magnitudinis decimo quarto kal. Aprilis ante Candiam consistens pugnae signum dedit , ac si dimicando , vellet damna rependere , quæ pridem à Ripa acceperat : propterea in urbem ferè sexcenta ex omnibus machinis missilia jaculatus est . Nostri prope littus decem navibus tantum , ac triginta triremibus instructi , in eo statu non detrectarunt provocationem , è majoribus tormentis excutiunt magni ponderis pilas , quibus graviter ipsemet Bassa perculsus , subito recessu classem longiùs subduxit . Attamen ne victus videretur abiisse , præternavigata Dia ; Creticam oram legens Palæocastrum occupat , vacuum præsidiariis , qui Candiam in supplementum commigrarant . Denique per eos dies opportunissimè contigit Jacobi Ripæ reditus ,

ditus, qui Venetias profectus, nuntius suæ victoriæ ingenti omnium ordinum hilaritate aureo torque, & equestri titulo decoratus ab Senatu fuit, & in Hellespontiacam expeditionem rursus dimissus cum suis navibus, & quinquere-
 mibus sex. In suscepta navigatione obviam habuit Turcicam classem adhuc Creticum mare percurrentem, quam idem Bassa ductabat. Ripa ea conspecta jussit quinquere-
 mes remulco navium soltas retrocedere, & cum iisdem vincere assuetus processit in hostem, pugnam deposcentem, qui spem victoriæ conceperat, observato quinquere-
 minum recessu. At de repente horrenda tormentorum ejaculatione excep-
 tus cogitur proras obvertere, & quære-
 re effugium totius classis consternatione. Ita denuò de eodem Bassa Ripa trium-
 phat, & uno capto navigio festinanter trajecit in Hellespontum; dum ille con-
 fusus, fugatusque Cydoniam repetiit. Cæterum pertinaci odio, & rabie inflam-
 matus, sublato Ripæ obice, intra paucos dies reductam, reparatamque classem tra-
 duxit in Amphimalum sinum, & in Su-
 dam omnes suas vires maritimas, ac ter-
 restres effudit. Qui arci præsidebat Pe-
 trus Diedus ad primas impressiones vi-
 gilans brevi dissipatos, & oppressos insa-
 ni hominis conatus vidit, dum inter cre-
 bros fulminantium bombardarum ictus

ille ab uno è puppi in mare præcipitatus submergitur. Turcæ Bassæ sui fato magis irritati, mortuo veluti parentaturi Candia excidio, ad Hussainum, tunc obsidionales præteriti anni accessus renovantem, promptis agminibus accurrunt.

Candia iterum oppugnata.

MDCL.

HÆc altera Candia urbis obsidio ab Hussaino Bassa instaurata valdè sollicitum habuit Mocenicum: nullo tamen metu correptus confirmavit pavidos, & obsidentis conatus elusit, retuditque. Una ferè semper diu, noctuque fuit dimicandi ratio, plus igni, quàm ferro: & plurima subterraneis operibus tentamenta. Inter munitiora loca, in quibus à nostris vehementiùs dimicari poterat: & ab urbe procul submoveri hostis, extabat propugnaculum Martinengum dictum, cujus oppugnatio hoc anno gravior Mocenici constantiam, militumque fortitudinem exercuit. Quotidie certabatur crebris è machinis jaculationibus, omnisque generis missilibus, sagittis, faxis, ignibusque arte elaboratis, perque dies, ac noctes creberrimis irruptionibus. Turcæ aliquando audaciùs progressi per transversos aggeres in propugnaculi fundamentis hoc egerunt, ut sulphureo pulveri, quem in excavatis

pu-

puteis abundè congefferant, ignis fenfim admotus, dum fpiraculum quæreret, fuperimpositam molem violento impetu in partes difjiceret, faceretque aditum aggrefforibus ad irrumpendum. Tandiu moti funt opus, ut per ruinas evadentes in fumum fua ibi extulerint vexilla ululantes, & alacres, quòd propugnaculum fuperaffent. Verùm hæc eorum lætitia momento diffluxit: quando noftri corporibus, animisque innixi illos ingenti jactura repulerunt in ima; convulferunt vexilla: & quæ ab ignis impetu fuerunt difrupta fuma celeritate repararunt. Variis inde congressibus, mutuiſque velitationibus gens utraque fatagebat hoſtiles impedire conatus, diſturbare opera, adoriri caſtra, actiſque cuniculis ſe invicem in ſublime rapere, diſcerpere, & procelloſa ſaxorum ruina obruere. Idcirco non modica utrinque clades; quare cùm Huſſainus pluribus de ſuis interfectis nihil in opugnatione proficeret, ubique præſente, ac obluſtante Mocenico: & cogitaret meliorem anni partem ad militaria agenda præterire, atque autumnales impendere pluviâs obſidentibus importunas, decrevit movere caſtra, retrahere impedimenta, & duobus circiter paſſuum millibus ab urbe ſua ſtativa facere in colle, vulgò Ambruſcio, quem munimentis, tentoriis, vallo, aggeribusque inſtar oppidi circumdatum.

Enandiam appellavit: nostri Candiam novam dixere.

Hic Bassæ inopinatus recessus Turcicæ militiæ suspectus fuit occultæ cum Veneto Imperatore amicitiae; eaque opinio tum magis invaluit, cum literæ inter utrumque commearent; ut propterea de affectato Regno Constantinopolim delatæ sint criminationes. Sed perperam: quia scriptæ ab Hussaino ostentabant præpotentis sui Regis vim; minabantur pericula, & strages, nisi Candiam ultrò traderet: continebant, si morem gereret, magnifica promissa: præter unam Candiam, reliqua totius Insulæ oppida cessura in Reipublicæ liberam potestatem cum nobilium captivorum donatione. Et Mocenicus, qui optimè noverat perfidi hominis fraudes, suis responsis exaggerabat violati fœderis turpitudinem, ac præsentis belli injuriam: obtestabatur, Deo propitio, nunquam Reipublicæ Venetæ vires defuturas ad obtundendam Barbaræ gentis superbiam: nunquam civibus fidem sibi, & in castris merentibus constantiam pro Religione, & Patria confligendi cum teterrimo hoste ad extremum usque halitum. Hæc rescriptit Mocenicus; & hæc non minùs ipse, quam cæteri Duces rebus fortissimè gestis comprobaverunt.

Maritima expeditio .
Intercepta Cydoniæ subsidia .

Nuntiarat fama, in sinu Epidauri Limeræ plurima reperiri belli subsidia, quæ brevi erant transportanda Cydoniam; Mccenicus à terrestribus ad maritima conversus facinora, mandat Aloysio Leonardo nepoti suo Classis Curatori, ut omni sublata mora illuc adnavigaret, & improvise accessu ea impediret, & caperet. Huic mandato indulgere venti, & ille octo selectis triremibus, duabus quinquereuibus, tribusque navigiis, hostibus inopinato apparuit ad insulæ portum; sed cum arceretur ingressu ab Arce, ex qua tela innumera in subeuntes quinquereuibus jaculabantur præsidarii; intrepidus tamen, & ingenio promptus, pontem abrumpit, qui continenti jungebat insulam: quo interciso, & externi auxilii interdicto accessu, tutiorem sibi aperuit aditum, contraque obsistentes in arce omnes bellicas machinas admovit. Illi cominùs experti venientium pilarum ictus, & opis, fugæque spe destituti nihil ampliùs ab arce tentarunt, veriti, ne ea expugnata à victoribus miserè trucidarentur. Hac trepidatione cesserunt Venetis incruentum triumphum de navigiis, quæ Cydoniam erant allatura suppetias.

*Castra Theodori, & Turluru recepta,
& diruta.*

AB Epidauro Limeræ deflexit pro-
ras ad Cifamum oppidum in ora
Cydoniæ littorali, in quo Turcæ multa
congefserant ad alendum bellum necessa-
ria: at nullo eventu tentatum fuit, quia
fortuna ad præclariora gesta evocabat Aloy-
fium. Igitur ab irrita Cifami oppugnatio-
ne consilium capit adoriendi Theodori ca-
stri, licet aliquibus ejus aggressio difficilli-
ma videbatur. Quarto idus Julii primo di-
luculo ad castrum littus inobservato appulsus
venit, exposuitque perexiguam bellato-
rum catervam, quæ admotis scalis osten-
taret moliri ascensum, & irruptionem.
Hoc ille astu occupatos habuit præfidia-
rios; atque interim majori vi in alterum
castrum Turluru munitissimum inopina-
tam dedit impressionem: & sic utrumque
expugnavit. Hoc tamen non exiguo labo-
re ob semel, & iterum repulsos Epirotas:
quos intrepidè sustinuit, & reduxit in-
sciem cum honoraria, & conducta mili-
tum manu superans interruptos ascensus,
& castrum ostium, affixo pyloclastro, re-
fregit, & aditum reclusit suis, qui cater-
vatim ingressi, Turcis nil hujusmodi
opinantibus, quos obvios, & reluctan-
tes habuere, occiderunt, præter Castrum
præ-

præfectum, & alios ad remigium destinatos. Capto Turluru, in cujus expugnatione Petrus Trambachinus triremis Patavinæ trierarchus magno audentis animi robore depugnavit: tormenta in eo reperta, ex adverso disposita in Theodoram munitionem, & displosa damno, ac metu maximo ejusdem propugnatores affecerunt: qui cum diutius nequirent sustinere validos ictus, ac timerent sibi necem, & captivitatem, exorata corporum incolumitate, se dedidere; & Cydoniam abire permitti sunt, ut referrent reducta castra in Venetorum potestatem. Mocenicus Imperator eo nuntio lætus consensu prætorum venit gratulatum nepoti, ducibus, militibusque de rei fortiter gestæ magnitudine; & decrevit retinenda, ac munienda Castra, collata cura Comiti Pompejo Strazoldo. Subinde mutato in melius consilio, jussit omnia bellica impedimenta detrahi, ac utrumque castrum subdito igne, suffocisque cuniculis funditus everti; ut quicumque receptus hostibus capta reposcere volentibus fieret inutilis, & Venetæ classis nulla defensionis necessitate astrictæ promptior progressus ad Turcicam propulsandam, quæ ferebatur potentissima in Ægæum descensura.

Veneta Classis conflictus cum Turcica .
MDCLI.

MOcenicus rerum maritimarum Dux , delegata provincia tuendæ Candiaë Georgio Mauroceno Insulæ Præfecto , quarto nonas Julii classem conscendit instructam navibus octo , & viginti , triginta tribus triremibus , quinquere-
mibus sex , ceterique cursu Cytheram adnavigat . Audierat , Turcicam in Ægæum traductam , navium numero , militumque copia præpotentem : recensabat triremes quinquaginta tres , totidem navigia cum senis quinquere-
mibus : ac tam valido bel-
lantium , & bellicorum instrumentorum apparatu , ut quisque crederet , extremam universæ Insulæ instare perniciem . Tot viribus metuenda Therasiam pervenit ,
cujus appulfus monitus Mocenicus Cythera digreditur obviam è longinquo conspectæ : & pugnandi ardore concitatus , dum raptim in illam fertur , reflavit Aquilo ,
& noctis interventus currenti obfuit . At tamen inter obortas tenebras hostiles na-
ves acriter vexavit Hieronymus Battalea , fugientes insectatus cum suis patricii sangui-
nis commilitonibus : & ictu fulmineæ glandis percussit Mehemetum Natoliæ Bassam , qui Cydoniam ibat Hussaini successor . Redeunte die Turcica sinuata
fren-

fronte procedens Venetæ adversa constitit, quasi parata certamini: Mocenicus, totus compositus ad excipiendam provocationem furenter invehitur in Bassam, & utrumque cornu gravi pilarum grandine percellit, subvertit triremium ordines, & hostem cogit sese repente ex acie proripere. Luce postera iterum in acie visus est, quasi vellet præteritæ fugæ abolere notam, & explicata classe Venetos inclamans offerebat se prælio. Thomas, & Lazarus Mocenici barbaræ petulantiae cum suis triremibus ad pugnam dispositis fuissent ultores, nisi Imperator dubius eventui, si tota classis eos circumveniret, missa liburnica utrumque revocasset. Quos cum Bassa vidisset proras avertere credidit conversos in fugam, quare ejus intercludendæ cupidus citò persequitur remigio spe victoriæ, quia ab auxiliariis longè distabant. Illi pares virtute, & constantia in persequentem obversi strenuam exhibuere propugnationem, donec accedente in auxilium Francisco Mauroceno cum quinquere misibus, quas regebat, unâ cum summi Ducis Nepote, & Laurentio Baduario atrociori dimicatione conflictus incretceret in aliquot horas obstinatus. Quievit tandem, ac pro Venetis stetit victoria, licet funesta ob interitum Thomæ Mocenici: sed hostium cædes tanta fuit, ut ritè expiarit fortissimi

simi viri necem. Turcicæ triremes, con-
specta prætoria quassata, & Bassæ inter-
itu consternatæ tumultuaria navigatione
tutam quærebant stationem. Sed à tri-
rarchis cum Mocenico in tergum instan-
tibus assidua tormentorum explosione fœ-
dè lacerabantur: quæ remulco trahebant
navigia, hæc eo soluto accelerandæ fu-
gæ causâ in victorum manibus relique-
runt. De hostili classe plus dimidia aquis,
flammiq; deleta, & consumpta Vene-
tus Imperator unam occupavit quinque-
remem occiso Præfecto. Maurocenus na-
vim grandem intercepit, cui præsidebat
Nicolaus Natalis Foro-juliensis filius à
nostra fide transfuga, ac ejusdem hostis
immanissimus. Singuli trierarchæ vel tri-
remem, vel navim deduxere in trium-
phum, captivorum numero, & spoli-
orum copia amplissimum. Tria Turcarum mil-
lia dicuntur perempta: quingenti à servi-
tute redempti: & qui gloriola morte pro
Religione, & Patria pugnando efflarunt
animas interfecti propè ducenti. Moceni-
cus Candiam reversus plurima dissipatæ
classis insignia retulit; ac inter plausus,
militumque acclamationes eidem circum-
fusa urbs honorificè excepto ingentes ex-
hibuit gratulationes. Insignis hujus vi-
ctoriæ testes fuere insulæ Naxos, & Pa-
ros: & nuntius ad Senatum Jacobus Lau-
retanus. Patres pro lætitia perquàm ma-
xi-

xima indixere supplicationes : & universa Civitas hilaribus signis testata est, quanta in omnium animis præ læto nuntio gaudia effervescerent.

Duare oppidum in Dalmatia captum.

MDCLII.

MOcenico Venetias redire permisso, ut quiesceret, Senatus suffecit Leonardum Fusculum, qui hætenus in Dalmatia fortuna usus constanti, spem dabat eadem comite, etiam in mari omnia sibi prospera fore. Destinato ad classis imperium subrogavit Hieronymum Fuscarenum pari gradu, & auctoritate, ut Dalmatiam à recentibus Turcarum irruptionibus tutaretur. Hic in provinciam profectus, ubi Jaderam venit sui consilii, & propositi tenax, Morlachos effusè latrocinantes frænavit : eorum prolapsam disciplinam, & obedientiam restituit : contumacibus indulgit ; solutisque stipendiis ex septem millibus tria delegit magis ad concertationes idonea, & penes se retinuit. Hostes interim Jadertinum, & Sebenicensem agros suis excursibus vastare cœperant, & fuga cultorum deserta fata igni corrumpere. Contra omnia barbarè populantes. Fuscarenì jussu ivere Morlachi ; qui, licèt modici ad obsistendum, valentioribus, tamen vigore animorum sub-

subnixi; & præeunte suo duce, viro fortissimo Harambassa Smigliavicho; quinque Turcarum millia prostrarunt: atque eodem ferè momento dederunt in fugam alia agmina in subsidium missa à Bosniæ Bassa. Hac victoria, quæ hostium cæde, captivitate, ac tumultu fuit celebris, Fuscarenus animo erectus Duaris montani oppidi aggressionem cogitavit. Illud superioribus annis à Paulo Caotorta obsessum, & occupatum, Turcæ paulò post numero, & viribus validiores sibi denuò vindicarunt. Dum parat omnia ad expeditionem opportuna, hostes ejus explorato consilio statim deserunt agros, domosque, & ex metu in oppidum confugiunt. Quod videntes Morlachi, & ipsi nulla mora convolant ad rapinas; atque in iis dividendis, post depopulatas, direptasque Prilam, & Polinizzam, non levem excitatum tumultum Fuscarenus sua dexteritate compressit. Hoc sedato, & fluvio Cetinæ trajecto adversus oppidum progressus est, & quartodecimo Kalend. Martii obsidio instituta, excitatis munitionibus, quæ omnes aditus subveniendi oppido intercludebant. Turcæ vocati ad operas obsidionales evertendas forti conatu in easdem irrupere: sed rursus Dalmatæ militiæ victricia arma experiuntur: quingenti in acie ceciderunt ex tribus millibus: par numerus in captivis, &

& faucibus recensitus : reliquos cum ductore Bassa Daniele nomine, viro potente, præceps fuga distraxit : Prosper hic dimicationis exitus, qui obsessis intercepti auxilia, extremum illis minabatur excidium : sed non desperatæ opis fiducia, obstinatis animis protrahebant deditionem : quam ut extorqueret Fuscarenus voluit per inaccessas etiam rupes trahi muralia tormenta, in editioribus tumulis collocari, & contra oppidum displodi . Ita globorum vi concussa mœnia, & per loca convulsa reclusus ingressus, sollicitarunt obsessos, ut se dederent . Decimo igitur obsidionis die Fuscarenus Venetæ ditio-
ni reddidit Duare, Almissæ urbi in Illyrio conterminum, maximi momenti Dalmatiæ securitati.

*Navalis Classis successus, Imperatore
Leonardo Fusculo.*

MDCLIII

Leonardus Fusculus in Cretam delatus omnes Ægæi latebras, & sinus accurata indagine lustrando hostem quærebat ad pugnam . Sui voti compos illum prope Leriam insulam offendit : qui tamen inquirentis, ac insectantis conspectu, & robore perterritus fugæ se commisit . Sequutus fugientem non apprehendit, vi venti contraria repul-
sus.

fus. Tunc primum illi visa est fortuna
 dilabi; tametsi parum circa Leriam re-
 federit: quam insulam frequenti tormen-
 torum percussione concussam obtinuit.
 Coos restitit oppugnant, quoad pericu-
 lum ab ea depulit rumor in Rhodio por-
 tu inimicam classem expectare tempus
 transfretandi Cydoniam. Monitus hac fa-
 ma, relicta Coe, Rhodum versus conten-
 dit, & in ea statione Turcicas triremes
 obsedit. Pugnatum est utrinque solis ma-
 chinarum tonitrubus pertinacissime: in-
 terea casu accidit, ut ob aquandi neces-
 sitatem Veneta classe imminuta, Turci-
 ca de fuga cogitaret: hæc igitur, arre-
 pta, quæ se obtulerat, occasione, no-
 ctem nocturna suboscurem, furtim æstu se-
 cundo è portu egreditur, & Cydoniam
 advehit auxilia: & incassum Fuscus tor-
 menta explodit in longè proVectam. Can-
 diam reversus periculosa valetudine cœ-
 pit fluctuare: quo tempore Franciscus
 Maurocenus Classis curator munitionem
 in portu Epidauri Limeræ à Turcis ere-
 ctam disjecit: absolvisset quoque ipsius
 oppidi expugnationem, disturbatis ab a-
 gro incolis; si qui excenderant irrupturi
 in mœnia à muralibus machinis penè di-
 ruta, prædarum aviditate effusi per do-
 mos, perque cellas, & apothecas indul-
 gentes vino, cujus insula ferax est; non
 provocassent obsecrosos in eorum perni-
 ciem.

ciem. Erumpentes cum vi, & rabie invagos, & ebrios, plurimos morti, fugæque dederunt: unde maxima orta confusio Maurocenum repulit ab egregio facinore classe reducta. Quod factum Fusculus ægrè tulit non minùs, quàm famam de Turcis liberè permeantibus cum suppetiis ad Cydonios: & licèt aliquando eorum naves à Navarchis essent oppugnatae: tamen resumptis illicò viribus legissent Australem oram, Seleno castro, olim Pelicasio, in suam potestatem redacto. Idcirco plurimis confectus angoribus impetravit veniam remeandi in Patriam. Cæterùm adhuc manenti in expectatione adventus successoris, Aloysii Mocenici secundi; quem Senatus iterùm maritimarum rerum generali administrationi præfecit; nuntiatur decreta Turcicæ classis in annum sequentem expeditio.

Pugna cum Turcica Classe infelix.
MDCLIV.

Hanc igitur expeditionem, ac militarem apparatus hoc anno, uti fama vulgaverat, adduxit in Hellespontum Amurathes Bassa suo tempore in Ægæum erupturus. In classe quinquaginta quinque triremes, quinquereemes sex, navigia viginti duo, & myoparones, celoces, liburnicæ ferè centum

nu-

numerabantur . Monitus Fusculus de impendenti egressu , eò navigare jussit , quò vocabat necessitas , Josephum Delphinum , navium Præfectum , & Franciscum Maurocenum Sinus Adriaci custodem : ut quindecim navibus , duabus quinquereimis , octoque instructi triremibus exire tentantem repellerent . Cum his viribus sibi modicè ministratis maturatè properarunt : utrumque metuebat Barbarus ob notam animi magnitudinem , & periculorum contemptum . Sed à perfido transfuga Georgio Blanco unius navigii rectore instructus de statu , & robore Venetæ classis , expugnatu facilis , si Turcica audacter exiliens illam invaderet ; exhilaratus Bassa Bejis , Punicisque stationariis in Tenedi , Trojæque sinibus suum indixit exitum valdè diluculo , secundante aquarum cursu . Rebus ita dispositis ab Hellesponti faucibus intento remorum pulsu erumpens subita aggressione adoritur Prætorias Delphinam , & Maurocenam ; cum quibus majoribus explosis tormentis cruentissimum orditur certamen . Nostri in hostium conspectu plumbeis glandibus , ignitisque missilibus , stragem maximam dabant . Verùm à validiori numero tanta pilarum , sagittarumque vis uno tempore à fronte , atque ex adverso emissâ est , ut oppressæ naves , & classarii veluti pestifera grandi-

ra grandine confusi succubuerint. Delphinam extremo periculo liberaffet Comes Antonius Capilistius Patavinę triremis Gubernator : sed illa ab incurſu Turcicę quinqueremis magno impetu percuſſa admiſſis in ſinum fluctibus demergitur : & Capiliſtius dum fortiter in ſui deſenſionem pugnat, ſaucius capitur à Baſſa, addiciturque mancipio. Manſit duobus annis captivus, tandem libertati donatus : quia in utraque fortuna in Rempublicam exitit officioſus, ab eadem ob antiqua, & recentia merita, militaribus titulis decoratur. Maurocena nudata deſenſoribus, lacera, & fatiſcens, ne Barbari ea potirentur, excitato incendio abiit in favillas : duę alię naves pari exemplo conflagrarunt : neque ullus tam abjecti animi fuit, qui non mori potiùs non optaret, quàm vivere infidę gentis mancipium. Sex horas ſæviit conſlictus utrinque acerrimus : in quo cęſa dicuntur ad Turcarum quinque millia, & Baſſa lethaliter vulneratus : noſtrorum ex omni genere tria mortem oppetierunt : inter patricios inſigni fortitudine, & virtute præſtantes deſiderati ſunt Maurocenus cum altero ejusdem familię Daniele, & Sebaſtianus Molinus. Adierunt Turcę Mitylenen, & Chium nulla triumphipompa : & Veneti Paron inſulam tenere : qui duas biremes, totque naves vel flammis, vel aquis depreſſas, amiſerunt :

Dd

ferunt :

ferant : hostes quinquagemam unam ,
 biremes tres , & duo Punica navigia
 gurgitibus absorpta . Constans fama est :
 si Venetæ Classis vires Fuscus non
 enervasset intentus ad exigenda tributa
 ab Insularibus , sed integras contulisset
 ad Hellepontiacas angustias , seque ob-
 tulisset certamini , celeberrimam de
 profligatis hostibus victoriam reporta-
 tum iri .

*Irrita Tininii oppidi aggressio ,
 Laurentio Delphino Dalmatie Præside.*

HOc Oppidum knin appellatum in
 Dalmatia , ante septennium à
 Fusculo in eadem provincia arma mo-
 derante receptum feliciter incolarum
 fuga ; quia iussu dirui , comburi , &
 solo æquari ; totum non corruerit , &
 arserit , eorum incuria , qui tantum ra-
 pinas cogitarunt ; Turcæ aliquot post
 menses suas ibidem sedes fixere iterum ,
 & reparatam arcem eo munivere præ-
 sidio , ut sæpius confines de illius insul-
 tibus quererentur . Laurentius Delphi-
 nus Fuscareni successor , in Dalmatia
 Præses , quæ de oppido recuperando ,
 animo agitabat consilia , suis ducibus
 exposuit : sed examinata cum multipli-
 ci sententiarum varietate pugnarunt :
 major pars detestabatur expeditionem

hyber-

hyberno tempore inopportunam, paratu
difficilem, & exitus incertam ob loci situm,
auctam præsidium, & incolarum vim, pa-
vore deposito, ad repugnandum acriorem.
Hæc objiciebat Joannes Baptista Benzoni
asserentibus parum munitum oppidum;
desperatum auxiliis, & comineatu; omnia
circum juga aspera, nivibus oppleta, gelu-
que rigentia, ad necessaria comportanda
moram, ac impedimentum afferentia. In ea
sententia aggrediendi præcipuus erat Al-
bertus architectus, cui adhæsit Delphi-
nus inflammatus ad gloriam, spe faventis
fortunæ. Itaque kalendis Martiis Sebeni-
cum versus indietur profectio: & Scardonæ
octavo die lustratur exercitus, qui con-
stabat quatuor peditem millibus cum Mor-
lachis, & equitibus octingentis. Omnia
curabat Benzoniæ equitum Præfectus, &
quatrIduo post haud procul Tininio loca-
vit castra. Jussit Morlachos obstruere adi-
tus ad oppidum, ne illos Turcæ transili-
rent: & victa itinerum difficultate, tor-
menta, militum, fenumque labore per-
tracta, in fummo vertice deposuit: ac tan-
dem traductis copiis arduos, abruptosque
colles emensus Tininiis suas vires osten-
tans ad terrorem illos in deditionem per-
trahere conatus est. Turcæ jam pridem
cognito Venetorum incessu, & eo observa-
to, è montium cacaminibus instar decur-
rentium aquarum in civos præcipitan-

ter descendunt , quinque millium numero , & magno equitatu . In unum conglobati ad recludendos obstructos aditus in Morlachos immani rabie irrupere : quo valido impetu graviter percussi , & manifestæ neci expositi tumultuario recessu stationes deseruerunt ; non sine strage , plurimi adversis vulneribus fuere interfecti . Inde totus perturbatus , & confusus exercitus ; gregariæ turmæ præ timore palantes missilium jactus non evitant ; qui auxilio erant ab oppido ipsa loci iniquitate submoventur : tormenta in irritum jaculabantur contra munitiones congesta humo firmatas . Bis mille militum ex stipendiariis obversa fronte ingruentibus Barbaris resistere quousque confluenti multitudini cedere coacti sunt . Postremò ab hostibus omni per terrestria itinera , & fluviorum transmissiones effugio intercluso , cùm alium exitum virtus non haberet , Duces , ne captivi remanerent , capiunt consilium solvendæ obsidionis : atque eò citiùs , quòd nullas Delphinus per absentiam vires suppeditabat . Igitur præcipiti festinatione ab hostium manibus se proripiunt , relictis impedimentis . In concepta trepidatione , & fuga fortunati , quòd Turcæ non sint persequuti consternati exercitus reliquias : & propterea suam extenuarint

nuarint victoriam . Hæc infelix expeditio tria millia militum abstulit, partim dispersa, partim occisa : & inter præclaros duces Joannem Baptistam Dottum è vivis eripuit, cujus singularis invicti animi constantia præcipuè enituit, cùm à confertissima hostium manu circumventus, conanteque tormentum rapere suæ custodiæ traditum, non priùs quàm abscissis cervicibus ab illius tenaci amplexu divelli potuit . Tum redacta in potestate hostium impedimenta omnia tùm publica, tùm privata : mille tantùm Turcis desideratis.

Morlachorum eruptio in Turcas.

Pirata domiti.

TUrcæ non multò post quàm repulsis Venetis, servarunt Tininium, in Jaderæ finitimos liberis excursibus bacchabantur : urebant agros, ac tuguria ; abigebant pecora, & jumenta : homines trahebant in servitutem . Nostri per eos dies eandem urbem ingressi incumbabant reficiendis viribus, ut cladem recens acceptam rependerent . Interea Morlachos ad signa reductos præteritæ inertiae pudor admonebat inustam suæ genti notam abolere . Ut igitur inaudiant in vicinos Turcicas irruptiones libero cursu exerceri, acuentes ad vindictam stimulos, observata nocte

illuni, tacito incessu, subitoque illato impetu incauti hostis stationes adoriuntur; & invadunt vigiles, somniculosos, atque obvios quosque multa cæde prosterunt. Inopinatò comprehensos terror tantus occupavit, ut undique per tenebras discurrentes, in aggressorum arma evaderent. Huic nocturno facinori felix illuxit eventus: à paucis plurimi victi sunt, recepta furta, & exempti qui erant in vinculis. Notiorum ex occisis capita contis affixa lætissimi triumphi simulachra exhibuere omnibus eadem, quæ pari in discipline cum Morlachis passi erant, ulcisci parantibus. Eodem Tininii factò Turcæ redditu insolentiores Dalmatiæ oram, & sinus armatis myoparonibus infestantes piratarum more latrocinabantur. In temerarios prædones insurrexit Antonius Barbarus Adriaci pelagi Custos: eos inventos prope Perastum compressit, & piraticis navibus exuit, restituta comitantibus securitate. Hanc etiam per id tempus præstitit trium Insularum Præfectus, qui prædatorias aliquot naves Naupacto egressas oppugnavit, & succendit: & quos de latronibus fuga non subduxit, ultore ferro punivit.

*Aloysii Mocenici altera in Turcas
expeditio.*

Eiusdem mors.

R Evertenti Venetias Fusculo Patres substituere Aloysium Mocenicum: ut rursus in regendæ classis administratione suæ pristinæ virtutis, ac invictæ fortitudinis documenta renovaret. Maximo apparatu ab urbe discedens adduxit secum Horatium Odoardi Parmæ Ducis fratrem, peditatu in ejus provincia collecto trium millium: & Alexandrum Borrum bellicis in rebus notissimæ experientiæ ad Reipublicæ stipendia accitum, ut militum exscensionibus præfideret. Prospera navigatione Cytheram appulit: & quem expectabant festivis auspiciis, salutarunt auxiliâres Pontificiæ, & Melitenses triremes; quibus & sibi de communi studio gratulatus continuò trajecit in Cretam. Tunc temporis Turcica Classis adornata pari triremium, & navigiorum numero, quæ simul erant sexaginta; præter quinqueremes sex, & innumeras minoris formæ naviculas, in Chio morabatur sub Amurâthis Bassæ imperio. Qui non ignarus de Mocenici adventu, cujus prudentiam, ac fortitudinem extimescebat, ut congressum aliquo astu effu-

¶ d 4 geret,

geret , & Cydoniam se tutò transferret ,
evulgavit expeditionem suam Regio jussu
in Cephaleniam . Verùm certior fama de-
tulerat Mocenico mendacium Bassæ ; nul-
lum habere mandatum , neque virium sa-
tis ad eam insulam tentandam : sed de ju-
vanda Cydonia properæ festinationis præ-
ceptum ; cui non erant retardanda subsidia,
ne Regis in se provocaret indignationem.
Ergo statuit moras abrumpere , & parere
Regi præcipienti , educta classe iv. kal. Ju-
lii : verùm ubi contra se Venetam stare
conspexit , paratam ad pugnam , metu cor-
reptus illicò refugit in portum . Incertus
consilii , & plenus timoris diem integrum
mansit in expectatione secundæ tempe-
statis : hanc postera luce nactus , sum-
mo mane placidè excitato Aquilone pro-
cessit in altum . Classem , cui ventus ,
& mare favebant , Venetæ quinquere-
mes persequiebantur , & classico ciebant
in certamen : sed Bassa , ne cessante au-
ra congregi compelleretur , conversis pro-
ris in Euboicos euripos , & in sinum mu-
nitissimæ arcis confugit . Exinde æquiori
fortuna destinatum iter confecit , Cydo-
niam intulit suppetias : & his expositis , feli-
citer remensus mare Constantinopolim re-
gressus est . Nostri maligna , & invida fa-
ta querebantur , quæ , cælo , pelagoque
infestis , victoriam è Mocenici manibus
eripuissent ; tandem ab Insulis antea ve-
xatis

xatis aliquot asportantes navigia , Cretica littora tenuerunt . At Mocenicus ubi Candiam accessit , ultimum vitæ discrimen subiit ingenti totius militiæ luctu . Mortem tanti viri , quem Turcæ timebant , ac venerabantur , fama est lugubribus signis , mœstoque ululatu fuisse ab iisdem complo- ratam ; hoc enim proprium habet virtus , ut etiam in hoste sit admirabilis . Nuntius , qui cum cadavere Venetias venit , civita- tem summè afflixit , turbavitque Senatum , quòd Classis Imperatoris interitus alienis- simo Reipublicæ tempore contigisset .

Ægina , & Vollus expugnata .

Hieronymi Fuscarenis obitus .

MDCLV.

HOc ineunte anno Franciscus Moli- nus Princeps migrat è vita : suc- cedit Carolus Contareus : & Hierony- mus Fuscarenus , qui fuerat Dalmatiæ Præses , evehitur ad maris imperium , ut vices defuncti Mocenici impletet . Maxima navium , militum , pecuniarum , & com meatuum copia accessit in provin- ciam , quo tempore Franciscus Mauro- cenus Classis Curator , cum Alexandro Borro , Æginam in Saronico sinu , & Vollum , urbem littoralem Thessaliæ ex- pugnavit : Maurocenus , & Borrus de- cimo quarto kal. Aprilis celeri appulsit ; alter cum triremibus littus obtinuit ; al-

Dd 5 ter

rer. exposito milite campum insedit, ut oppidum simul à terra, & à mari peteretur. Insulares omnem vim in externas munitiones jugi bombardarum percussione illatam, ac terrestres impetus quatriduo fortiter cum Turcis præsidariis tolerantes; tandem multa cæde, & jactura suorum exanimati, ac nostrorum oppugnatione fracti cesserunt oppido, & arce: qui autem evaserant, extremas Insulæ oras petiere. Ægina multata vastationibus, & incendiis, quòd esset Venetis tributa exigentibus refractaria, docuit suo casu cæteras adjacentes insulas Scopelum, & Schiatum respicere, seque profiteri vectigales. Ab hoc felici eventu Maurocenus auspiciatò se contulit in Thessaliæ sinum spe potiundæ urbis, cui nomen Vollus, illius tractus primaria, absente Borro ducendis navibus præedito: ne mora interposita occasio rei gerendæ efflueret, declinante in vespertinum die vigesima secunda Maji urbi classem ostendit. Illam tuebantur Bassa, & Aga robustissimi viri præsidii, muris, arce, turribusque munitissimam. Omnes conspirantes ad inferenda damna in conspecta navigia sua tormenta exonerarunt. Maurocenus illicò jussit classarios in continentem exscendere, tresque in classes dispertiri; quia triplici incursione statuerat, muros, arcem, turresque scalis, pylocлаstris, & cuniculis oppugnare.

Dum

Dum Britonius, & Galeſius Chiliar-
 chæ milites ordinant, parantque machi-
 nas; fervens à claſſe tormentorum ictus
 pullabat hoſtiles munitiones: non ſecus
 Turcæ impetu pari Veneta ligna infe-
 ſtabant. Sed in continenti cum celerita-
 te, & ſilentio adeò cuncta peraguntur, in-
 tempeſta nocte ſcælas ad muros erectas
 conſcendunt milites; pyroclaſtra portam
 effringunt, & cuniculi proſternunt tur-
 res tanta vi, ſtrepituque, ut conſeſtim
 auditus ſit flebilis ejulatus vociferantium,
 Venetos occupaviſſe urbem; ubique excur-
 rere, ſomno adhuc obrutos, & obvios
 paſſim occidere. Repentina aggreſſione
 conſuſi Baſſa, & Aga adverſus potitos mu-
 nimentis, aditibusque ignorant quid facto
 opus ſit, jam vicini manifeſtæ cædi, ſi
 aperto Marte vellent contendere; itaque
 territi, atque conſternati, in arcem ſe con-
 cluſerunt. Noſtri ſubeuntes, tormenta in-
 mœnibus reperta in eam obvertunt, quæ
 proximè ruitura non movet incluſos jaſtan-
 tes ſe nunquam deditionem facturos. Tan-
 dem deſperato conſilio ab ea arcis parte,
 quæ vix aſcendi poterat, præcipites ſeſe
 in ſubjectam planitiem demiferunt. Hæc
 fuga capta fuit urbs, occupata arx, nu-
 data impedimentis, & actæ prædæ opulen-
 tiſſimæ: omnia poſtremò devota flammis,
 & in cineres redacta quæ publica, quæ
 privata erant ædificia. Urbem hunc in-

modum deformatam prospexit è longinquo Græciæ Bejerbegus, qui ad summovendos ab ea hostes cum sex Turcarum millibus properabat. Utraque victoria modico sanguine Mauroceno stetit.

Post hæc in Saronico, Theffaloque sinibus gesta, Hieronymus Fuscarenus ampla classe advectus, Andrum insulam petivit: & sollicitus circa ea, quæ in itinere digesserat, decrevit, expedito Mauroceno, & vires, quas secum adduxerat, & quas repererat in procinctu, Bosphoranis faucibus promovere. His jussis, atque ad præclara facinora erecto animo, in morbum incidit, quo brevi consumptus, occubuit, ingenti luctu ab universa militia defletus.

Lazari Mocenici de Turcis victoria.

PER hos dies Lazarus Mocenicus, & duo Antonii, Zenus Navarchus, & Barbarus Custos Adriatici ad ostium Bosphori, observabant Turcicæ classis accessum, quæ ducta à Barazano Mustapha Bassa ferebatur explere numerum sexaginta triremium, octo quinqueremium, cum navibus onerariis triginta; minoribus naviculis ferè innumeris, ac tribus enormis magnitudinis Sulthanis. Omnem egressus moram impatienter ferebat Mocenicus: cujus & Maurocenus pertæsus, cum valida classis parte recessit,

fit, ut ab Ægæo exturbaret Bejebejorum triremes, quas cum auxiliariis Melitenſibus perſequutus, hūc illūc per mare diſpuliſ; & navis Punica Chium ab Cydonia contendens in Equitum manus incidit. Tandem Mocenicus viginti navium Præfectus cum Zeno, & Barbaro, qui octo triremibus, duabusque quinqueremibus præſidebat, haud perterritus permagno hoſtium robore, ubi ab exploratoribus accepit, in diem vigefimum primum Junii conſtitutam exeuntibus, Turcis eruptionem, illicò ſuis hortationibus omnium animos inflammavit ad illos intercludendos. In tres partes dividit claſſem; Zenum collocat à ſiniſtris cum navibus: Barbarum cum triremibus à dextris: ita Græca, & Aſiatica littora magno obice obſtruebantur; dum ipſe à fronte in ſua Prætoria cupiebat obvium ſe dare hoſti; qui quoties prodiret, veluti expansis retibus inauſpicatò concluſus, non poterat inde ſe explicare niſi peſſimè exceptus. Statuta die, Baſſa ventis, undiſque faventibus, Ægæum ingreditur numeroſa claſſe conſiſus poſſe modicam Venctorum eludere. Mocenicus extemplò in egreſſam tanto impetu fertur, ut momento atrox ex propinquo prælium coortum ſit poſt primos tormentorum iētus cohærentibus inter ſe triremibus. Ille nulli impar pugnans Baſſam ferocientem ſæpiùs repreſſit, ac plu-

plurimos Turcarum occidit: in molientes fugam triremes, navesque secus Græcæ litora navigia immisit; quæ illas displois tormentis, jactuque ignitorum missilium adegerunt ad scopulos fractas, & incensas: grandiores quinquerenium pilæ Sulthanas expugnarunt: totamque Classem intercluso effugio adorti Zenus, & Barbarus in perturbationem, ac tumultum maximum rede gere. Tandem post asperrimam sex horarum pugnam Veneti victoriæ compotes facti sunt, Mocenico duce, de Bassa profligato, deque Turcica classe majori ex parte comminuta, corrupta flammis, & submersa: reperti quinque mille homines ad transtra damnantur: decem millia occisorum capita referuntur: multi à vinculis soluti: & maxima comæduntia, & armamentorum copiam relata: tresque Sulthanae in triumphum adductæ: quas de classe laceras reliquias Bassa servavit, Tenedus insula recepit: de Veneta cæsi centum, ac quinquaginta; totidem numero sauciati: & navis una tantum à Præfecto voluntario incendio absumpta, ne proximè à Turcis subigenda ipse cum filiis in servitutem traheretur.

Post hæc victrix classis cum Meliteniis triremibus, vela pandit in Eubœam: inde flexit contra Epidaurum Limeram, cujus oppidum Maurocenus Turcis eripere statuerat, nam ex eo facilis erat tra-

je-

jectus ad subsidia Cydoniam transportanda. Antonius Barbarus suscepta oppugnationis cura juxta littus stationem habuit; facto ponte continenti adhæsit, & constructa munitione cœpit oppidum assidua pilarum pulsatione terrere, & quætere, at nulla exitus spe: quia non alia vi expugnari posse videbatur, nisi adhibito injectæ famis tormento: ac propterea omnis cura Ducis in com meatibus intercipientibus versabatur. Hæc inter quædam naves expeditæ ad exturbandos obsidentes se intulerant in ea maria obsessis opem latu-
ræ; sed cum vidissent Venetos procurrare in pugnam, & propè vires conferre, recentis jacturæ memoria edocti, in altum illicò se proripiunt. Attamen quod hostis efficere non est ausus, obtinuit post bimestrem obsidionem imminens, & suspecta Autumnalis temporis tempestas: hæc Venetos compulit ad recessum, ne portibus carentes dispergerentur. Igitur Epidaurus non invisa fato mansit incolumis. Secus Megara, quam Maurocenus vastavit, ac diripuit, licèt cum Turcis repugnantibus Græcis, quorum plurimos cæcidit, egitque in fugam. Ibidem magnam frumenti copiam Turcæ, & insulares pretiosiora, quæque congefserant; quæ omnia inde ablata, & aliunde collecta spolia Candiam invenit Maurocenus, quo tempore eidem nuntiatum fuit, summam totius insulæ admi-
ni-

nistrationem sibi ab Senatu decretam ,
 Andrea Cornelio ad alia obeunda munera
 destinato .

*Multiplex in mari cum Turcis
 dimicatio .*

*Laurentius Marcellus pugnando
 interiit .*

MDCLVI.

HOc anno pridie kal. Maji Carolus
 Contarenus Princeps discessit è vi-
 vis : & illius successor Franciscus Corne-
 lius intra vigesimum diem morte sublatus
 reliquit sedem , quam Bertuccius Valerius
 sexto decimo kal. Junii obtinuit . Dum
 hæc funesta succedunt in urbe , in sinu
 Adriatico Laurentius Marcellus , quem
 Senatus clarum longa navalis disciplinæ pe-
 ritia mortuo Fuscareno suffecerat , foeda
 tempestate jactatur cum classico apparatu ,
 quo ventis , procellisque disperso , una tan-
 tum navi Zacynthum attigit : reliquæ pau-
 lò post eò quoque venire valdè quassæ ;
 compensarunt tamen acceptam molestiam
 visa suis ducis incolumitate . Qui refectis
 viribus festinanter solvit in Cretam , &
 dum solerti studio explet in munienda
 Urbe Senatus mandata , monitus de pro-
 ximo Turcarum ingressu in Ægæum ex-
 templo omnes ejus insulas explorare sta-
 tuit , ut opportuniùs obsisteret trajectu-
 ris .

ris . Navigantis contrarius ventus classem
Diam rejecit , expulsamque inde Jos , ac
Thera recepit ; in hac Lazarus Moceni-
cus morabatur .

Marcellus placato mari , & transcurfis
Paro , & Naxo , aliisque insulis , multos
in his reduxit ad obsequium extorres , &
qui fugerant de Venetis classibus eos hu-
maniter exceptos verbis , & promissis in
pristina munia restituit ; Andrum vela di-
rexit , habuitque in itinere obvium Mau-
rocentum quinqueremium Præfectum . Su-
pervenit etiam Marcus Bembus , qui cum
duodecim navibus ab urbe solverat , ut
Mocenici munus ex Senatus consulto su-
sciperet . Tota classis , in qua Mocenicus ,
dimissa navium Præfectura , honorarius
miles haberi voluit , instructa viginti qua-
tuor triremibus , navibus octo , & vigin-
ti , cum septem quinqueremibus , præter
Melitenses , xi. kalend. Junii ab Scyro ad
Helleſponti ostia defertur : & in vicinis
aquis confedit explicata tripartito agmine ,
ut exeunti Turcicæ undique adimeret
transitum . Quoniam verò ill'us mora ex-
pectatione longior summè angebat Mar-
cellum , ad alias interim incitatum ex-
peditiones urgebat pugnandi desiderium ,
ne unius mensis cunctatione , & otio
ardor configendi in classiariis langue-
sceret . Hæc secum reputanti iteratæ
speculatorum voces annuntiant , adese

se hostes : quæ totam classem pervagatæ , omnes ingenti lætitia replerunt : nam quò cupidiùs hostium optabant accessum , eò molestiùs tolerabant congressus dilationem . Marcellus præ cæteris paratior ad conferendas manus , hortando , precandoque unumquemque jussit expedire arma , animosque , & recordatione rerum gestarum circa eadem loca sperare victoriam . Decimo igitur kal. Julii visa est Turcica classis ad Arces Hellepontiaci freti accedere remige , milite , & commeatu perquam maximo munita , & vires suas ostentare robustissimas , cum Bassa , qui objecturus omnem vim sui itineris turbatoribus , duo promontoria haud longè ab Arcibus , Europæum , & Asianum , pluribus tormentis bellicis compleverat ; quæ ab utroque littore displosa cogerent Venetam in altum se recipere , ut sua liberius exeundi spatium haberet , tres dies continuatis jaculationibus pugnatum est : quo tempore nostri omni posthabito periculo supra modum invigilabant , ne ante hostis elaberetur , quam iter ipsi intercluderent . Hæc inter Bassa leni aspirante aura ab Austro , & undis pacatè fluentibus classem movet ab Hellesponto in Ægæum . Stabat Veneta in procinctu : sed progredi ad subitum aggressum impedita à ventorum , aquarumque infestissimo incursu , morabatur ; erat tamen

in:

in conspectu, habitu pugnaturæ, tam è propinquo, ut Marcelli Prætoria cognita ex Marcio vexillo, quod explicuerat, certissimis majorum tormentorum ictibus peteretur: verum ille licet è suis aliqui tacti perierint, nihilominus intrepide propositæ sibi gloriæ insitebat. Æquali cura Mocenicus invigilabat: non secus Bembus cum cæteris Navarchis, & classiariis ducibus, militibusque, quibus omnibus erat idem mentis, animique stimulus per summum hostium contemptum irrumpendi. At nondum fortunæ favor à Turcis aberat; nisi postquam ea uti nesciis, favente Numine justæ causæ, ad Venetos se convertit. Turcæ detrectantes in aperto mari pugnam, trahentis ad perniciem fati vim sequuntur, dum suam classem reducunt in litoreos Natoliæ sinus, rati eam tutam fore ab omni impressione, quam longè arcebant machinarum tonitru, & grandium pilarum procella: Hic Turcicæ classis deflexus Venotæ secundi eventus amen fuit: idcirco Marcellus cœpit illicò excitare milites tam bono auspicio ad propria munera fortiter obeunda. Deinde jussit leviora navigia incitari remis, remulco moveri naves, & ab expeditis triremibus hostium stationem oppugnari. Hostilem classem omnium primus Mocenicus publicæ Sultanæ gubernator plumbeis glandibus,

sul-

fulphuratisque missilibus laceffivit . Melitensium acies in eandem dedit impetum , quæ altum petere intendebat , & fugere . Bembus quoque illam repressit suis navibus adortus , in quibus Horatius Princeps Farnesius egregium militaris virtutis specimen edidit , cum Alexandro Borro exercitata fortitudine claro , omnes audacter in aperta pugna discrimina se immiserunt . Ad hos primos impetus ingens metus Turcas corripuit : quare ab omni parte , quam evaderent circumspectabant . Bassa in summa consternatione nactus effugiendi locum repentè proripuit sese ex acie , ac turpissimè intra Bosphorum latitavit : reliquam classem conantem pariter moliri fugam Mocenicus sistit , & circumventam à tergo , & à latere Barbarus , alique triremium , quinquereciumque Præfecti , multa cæde , strageque lacerarunt . Medius in agmine Marcellus constanter , atque intrepidè consilio , & exemplo hortatur ; incitat , & impellit è celsa Prætoria (in quam hostes identidem collimabant ictus) ad omnes Turcarum assultus , impressionesque eludendas , ac vera virtute urgere . Hac ille plurimos præcipites in undas dejecit , non paucos resistere audentes ferro cæcidit . Itaque incredibili celeritate unam de Sulthanis occupavit , ac ulterius rapiente ardore pugnandi progressus ,

sus, dum alteram rapere ferreis uncis, & secum trahere allaborat, majori glande percussus extinguitur, quo momento singulari victoria erat illustrandus. Tanti viri necem occuluit Joannes Marcellus vices gerens, & ne turbata classis extincto Duce à persequendo bello cessaret, Curator Barbarus Baduarius illius curam suscepit: & milites, qui conscenderant Sulthanam, ex qua fatale tormentum explosum fuit, Turcas certamini superstites ad unum trucidarunt. Increcente pugna sensim residere hostium vires: neque unquam illi donec sol occideret, se subducere potuerunt; nostris impigrè illos cum auxiliari manu ejectos in Natoliæ littora prementibus. Multi Navarchi, quibus effugium in terram patuit, deseruere naves, quæ vacuæ defensoribus jugi pilarum grandine confractæ, & immixtis ignibus combustæ verterunt noctem in diem, & lætissimam triumphī faciem præbuerunt victoribus. Postera luce, quæ incendio superfuere, ausæ iterum luctari ab Joanne Marcello partim captæ, partim incensæ ab Antonio Barbaro infanæ temeritatis dederunt pœnas. Tres Venetæ naves correptæ alieno igne conflagrarunt: Mocenici quoque Sulthana idem fatum subiit; & deplorandum magis, quò eidem se ad omnes ictus aperiēti plumbeus globulus oculum eripuit.

puit. Stetit hæc victoria in ipsis Hellesponti faucibus reportata modico nostrorum sanguine, sed ingenti jactura in Marcelli morte, qui animo conceperat, si ei contigisset tam validam profligare classem se inferre in Hellespontum, & majorum suorum exemplo in ipsam Regiam urbem facere impressionem. Venerunt in potestatem octodecim Beleberiarum triremes: undecim in Melitensium manus cum tormentis, & captivis, illorum egregiæ fortitudinis præda: pauca transtra à Venetis in triumphum signum asportata, cum reliqua rebus bellicis exinanita subditæ flammæ in fumum, & cinerem redegerunt. Quantum fuerit occisorum Turcarum numerus nemo potuit exploratum habere: infinita propè dicuntur cadavera, quæ per undas sanguine rubentes fluctuabant, & jactabantur: septem captivorum millia fuere exempta à barbarâ servitute: qui libertate donati in publicis navigiis meruerunt. Cum hujus victoriae nuntio Lazarus Mocenicus quinque remi Rhodia advectus, & intercepta in itinere navi Punica multa merce onusta, Kal. Augusti Venetias pervenit. Æstuarium ingressus, explosis bombardis, classiaris lætitiæ voces ingeminantibus, atque cum Turcicis vexillis undas verrentibus Marciani fori ripas attigit. In terram exhibens circumfusæ civitati nuntiat

tiam victoriam : & coram Principe , & Patribus exponit , ad arces Dardanellas hostium classem non victam modò , sed fusam , deletamque fuisse . Extemplò effunditur in omnium animos ingens gaudium : & pro gratiarum actione publicæ indicuntur preces . Mocenicus , qui læta , & multa ab se gesta detulerat , cum equestris honoris titulo aurea torque donatur : eique Cretam revertenti Senatus , quod Marcellus exercuerat , summum maritimi imperii munus decrevit .

Tenedus , & Lemnus insulae captae .

Alexandri Borri , Horatii Parmensis Principis obitus ,

VEneti Duces ex occasione commissi feliciter prælii fortunatiora sibi polliciti consultarunt ; vel Cydoniam , victricem promovere classem : hæc Guilielmi Azoni Equitis Avogadri Tarvisinæ triremis Navarchi erat opinio , & in eam mitti expeditionem ardens desiderium , (præmissis Turcicis triremibus , in pugna captis , quæ mentitæ patrios habitus , & acceptam de Venetis victoriam , ostentantes oblata signa cum ululatu , & sonitu classico , si portum teneant ; tum delecti milites exilirent , districtisque gladiis deceptam hoc astu , imparatamque , subsequente reliqua classe ,

se, occuparent) vel Insulas Tenedum, Lemnumque, non multò ab Hellespontico ostio sejunctas totis viribus invadere; quarum potiti faciliùs, securiùsque deinceps hostibus transitum occluderent. Easdem Marcellus vita comite, & fortuna erat aggressurus; nam illis subactis præstiebat Venetis armis feliciores eventus; idcirco Baduarius, arcanorum conscius, accedente Senatus consulto mortui Imperatoris excogitatum facinus moliri statuit. Hoc major Ducum pars sequuta est consilium, rejecto priori, cui Barbarus, uti præsentissimo remedio ad eximendam Cretam ab Turcica vexatione, adhærebat: qua de causâ à reliquis digrediens Candiam trajecit, à Præsìde, qui ejusdem erat sententiæ, comiter exceptus.

Decreta in Tenedum expeditione Venetæ classis regressa Meliteni in Occidentem (nisi sub summo classis Imperatore militare prohibita:) pars una mittitur ad auferenda armamenta ab incensis triremium, naviumque reliquiis: & altera viribus major tertio Non. Julii se dat in, destinatæ insulæ conspectum. Borrus ad obeundum munus littori applicitus illicò facta peditum, equitumque exscensione, occupatos aggeres munit, & in hosticum jubet excursiones fieri. Turcæ repentino accessu haud territi numerosiores egressi adoriuntur obvios, & conjiciunt
in

in fugam. Tamen ab equitatu , cui Villalta Foro-julienſis præerat , reducti ad ſigna, obvertunt faciem in perſequentes, quos cogunt multis conſoſſis pedem referre . Tunc Borrus cum recenti ſupplemento omnibus antefignanus uſque ad Oppidi proximum vicum provehitur tanta hoſtium trepidatione, & fuga, ut confertim eo deſerto in arce ſe clauderent . In occupato vico plura dolia vino oppleta re-
 perta fuere de induſtria à Turcis reliſta, ut milites , in ſe dulce merum ingurgitantes fierent ebrii , & magis obnoxii eorum impreſſionibus . Cognita fraude , quæ alibi pari ingenio ſtructa Turcis profuit , Borrus omnia vaſa confregit : & in oppugnationem oppidi intentus triplicem muralibus machinis ſedem poſuit , quæ diu, noctuque inceſſanti jaculatione mœnia , & arcem concuterent . Hac Borri ſolertia fuit obſeſſa Tenedus : & à propugnatoribus fortiter deſenſa : denique vi ſubaſta venit in deditionem ; cùm præſidarios Turcas , atque Tenedios graviores pilæ moleſtiſſimè infeſtarent ; quarum una lapſa in ſulphureo pulvere confertum penu , horrendo fragore , terræque motu , magnum excitavit incendium , & ruinam ; cùmque aliæ è navibus eductæ turmæ interneſionis metu acriùs urgerent ; tum de tradendo oppido , vel reluctante Baſſa ,

extulerunt signa . Borrus in conditionibus munificus , & vitæ incolumitatem , & innoxium ad Trojana littora reditum concessit ; atque cunctis , qui exierunt oppido , in suis tentoriis lauta cibaria paravit : sed Bassa jejunus deditiois fatum suorum ignaviæ imputabat . Ita recepta est Tenedus , de qua olim Veneti cum Genuensibus plurimis bellis disceptarunt . Deinde munitæ à Borro vallo , fossis , loricisque , tormentis æneis , aliisque ad quamcumque vim propulsandam machinis , atque instructæ tanto classis numero , & veteranæ militiæ robore , quanto publicæ intererat securitatis , dati sunt Præfecti duo Joannes Contarenius titulo Ordinarii ; & extra Ordinem Jacobus Lauretanus , ut Insula perquam accuratissimè custodirent : quia in ejus possessione fideliter , ac strenuè retenta ipsum Byzantium à mari videbatur obsessum .

Redacta in Venetam potestatem Tenedo , Baduarius classem ducit Lemnum , Alteram Ægæi nobilissimam Insulam ; quæ se tutam credebat quatuor millium peditum , & trecentorum equitum præsidio . Conspectis quinque Venetas quinqueremes suo littori appullas Kal. Augusti (nondum Borrus cum navibus advenerat) & nulla mora in oppidum Stalimini dictum , à quo illa Stalimene

limene appellatur; expositos milites, excursus fieri, & necququam obistente equitatu vicinum collem infessum à copiarum ductore Bertone. Sequenti die adfuit Borrus, & è navigiis deductis turmis, extractisque tormentis cum Baduario decrevit Insulæ primariam arcem fore petendam. Quare dispositis aggeribus, collineatisque tormentis, illius munitiones, & propugnacula cœpta sunt verberari: satis animi, & constantiæ inerat propugnantibus à principio: sed perpetua volitantium globorum grandine contusi, & flammarum, missiliumque jactibus obruti, tertia ab oppugnatione die coguntur se dedere, & has accipere condiciones; Ut armis spoliati in proximās continentis oras migrarent suis actuariolis, sarcinas tantum ferentes. Hac festinata deditio periiit tempus auxilii, quod Natoliæ Bassa destinarat; jam accesserat quinquere mis: at frustra; subita nostrorum impressio emerſos auxiliares coercuit, captosque inter remigantes distribuit; cujus sinistri successus fama alios à Bassa mittendos deterruit. Lemnus intra paucos dies expugnata, Arce Veneto imperio adjuncta, duos habuit Præfectos Petrum Contarenum, & Fanſtinum Ripam; ac quingentos milites in præsidium.

cubuit. Hæc tanti Ducis jactura ab omnibus uberrimis lacrymis defleta fuit, ob illius in rebus bellicis ubique magna cum laude gestis, prudentiam, ac virtutem singularem.

Lazari Mocenici gesta cum Turcis, & interitus.

MDCLVII.

VIx effluxerat superior annus, cum Lazarus Mocenicus ad maris electus imperium navigavit in Cretam magno nautici apparatus præsidio. Solverat ab urbe animo deliberato in suscipiendis expeditionibus, vel prodesse Reipublicæ, vel sibi parare gloriosam mortem. Naviganti renuntiatum fuit de Marchionis Borri obitu, quem graviter, molestèque tulit. In ejus locum adscivit Odescallum Comitem Polcinici, ut eandem, quam in Tribus Insulis, militaris descensus Præfecturam, obiret, donec alium ad idem munus Senatus destinaret. Interea Turcæ triremes triginta duas, plura navigia cum multis myoparonibus Ægæum traduxerant quarto Non. Aprilis, quæ transitio opinione, ac tempore celerior facta fuit ex metu, ne Veneti promptiores ad vim, Regiam classem intra Bosphori claustra concluderent. Liberè egressi cogitarunt ex improvise adoriri, & recipere Tenedum: sed repens, in appropin-

quantas Insulæ maris , cœlique procella ,
confurgens quinque eorum triremes pel-
simè vexavit ; reliquas per incertum ma-
re agrè collectas tenuit Chius , & Mity-
lene . Mocenicus , qui pridem Candiam
pervenerat , cognito ex rumore hostilis
classis egressu , extemplò inde se proxi-
puit , celeremque cursum ad illius per-
quirendas stationes instituit . Littora , &
insulas perscrutanti valida rostratarum
navium acies occurrit ; quæ Punicæ , &
novem numero velis , remisq; iter suum
Chium versus maturabant . His ille
conspectis sine cunctatione occurrere ob-
viam constituit ; ne , permissso accessu ,
vires hostium caperent incrementum .
Itaque accinctus ad pugnam distributæ
classis medium sibi locum delegit , præ-
cedente Antonio Barbaro , dexterum
Curatori Baduario , sinistram Conquisi-
tori Leonardo Michaelio demandavit :
ut omni ex parte circumvento hosti ne-
cessariò pugnandum esset . In certamen
procursum fuit cruentum , & obstinatum .
Tribus horis stridore ingenti tonuerunt
majora tormenta in Venetos ; etiam Chia
Arx grandinabat omnium missilium ja-
ctu ; spemque ostentabat Barbaris pro-
ximioris auxilii aliarum adventu na-
vium . Porro Mocenicus ubique animo ,
& consilio præsens omnes excitabat , ut
pugnandi artem , audaciam , & in peri-
cu-

culis fortitudinem ostenderent : qui impavidi Ducis æmulatione accensi , strenuè , atque enixè dimicarunt . Circumdatos arcto amplexu hostes invadunt : & generoso conatu insiliunt in naves : ex his quatuor vi , atque armis expugnatae in potestatem venire ; & illa præcipuè , quam ductabat Archithalassus Mehemetus Belga cultui Turcico mancipatus : hic à Mocenico cæsus suæ perfidiæ pœnas tulit . Totidem naves arenæ impactæ , & desertæ à fugientibus igne fuere consumptæ detractis armamentis . Unam longè vagantem obsecundantis venti flatus eripuit à conflictu : sex aliæ per discrimen subire veritæ altum tenere . Mocenicus sub Chiensum oculis hac 'potitus victoria nullam Venetarum navium jacturam passus est : Christianis plurimis inter captivos solvit vincula : & captos Turcas ad transtra applicuit : quantus autem fuerit debellatorum numerus computari non potuit ; cùm illos promiscuè ferrum , mare , fuga abripuisset : centum , ac viginti miserunt nostri præclara morte extinctos . Hujus felicissimi successus nuntius Venetias properè adstitit : & dum tota Civitas summa efferebatur lætitia , morte absumitur Joannes Barbadicus Marcius Procurator : Opportunum Senatui incitamentum ad illustrandam Mocenici virtutem : quare majoribus in Comitibus habitis kal. Aprilis illum procuratoria dignitate , quæ amplif-

fama est , & Principi proxima cohonestavit. Parta hac victoria , & relicta Chio, novis rebus animum adjecit. Vocatis itaque in consultationem navium , armorumque Præfectis , statuit , classe refecta ex damnis , quæ superiori pugna contraxerat , à Scala nova transire in portum Svazichium , id loco nomen est , ubi fama afferebat , sex reperiri naves Algerias piratica infames ; & gaulos nonnullos Alexandrinis mercibus onustos ; quos in ipso portus ostio navis magna tutabatur validissimè munita . In decretam expeditionem decimo septimo Kal. Junii proficiscitur : littori appulsus innumeris tormentorum ictibus excipitur tum à mari , tum à terra : ab omni tamen jaculatione immunis suas naves contra hostiles explicat , & in continentem jubet exscendere milites . Laboriosum utrinque certamen exoritur per aliquot horas maximo ardore , varioque eventu . Fuere tandem repugnantium insularum cætervæ fugatæ ; obluētantium Turcarum cunei repressi ; & in navium concursu disjectæ , profligatæque Turcicæ : ubique intrepide præeunte Mocenico. Aggressus deinde oppidum , in quo pretiosiora quæque congesta erant , non solum illud expugnavit , sed evertit : opulentissimam , abduxit prædam ; machinas extraxit à Turcis in locum præsidii deportatas post ereptam Cyprum : & militibus concessit
 gaulo-

gaulorum, naviumque direptiones. His prosperè peractis in spem venit Chiæ Insulæ obtinendæ: verùm illuc tendentem, constans rumor admonuit, Turcas in Tenedum irrupturos magna classe, numerofoque peditum, equitumque exercitu. Hac fama eò intendit vela, & intentus ad retinendam insulam, selectiores quinque-remes, ac naves delegit, quæ cum auxiliaribus Pontificiis, & Melitenfibus, hostium conatus comprimerent. Post hæc aquæ penuria coactus, Imbrum dum navigat aquatum, Turcæ illius explorata absentia, occasionem exeundi ab Hellesponto solerter arripiunt, & audacissimè prorumpunt: primo incurfu Marci Bembi prætoriam invadunt: qui à septem petitus, & circumventus navigiis, celeritate consilii præciciens anchoras periculo se explicavit. Subinde alias adorti comparatas ad excipiendos eorum impetus non modica damna passi sunt: nam classes juxtà mutuis odiis, & iëtibus committebant certamen, tandem superante Veneta, cogitur Turcica fugata, ac diminuta cum cæde, & strage recedere; fortiter se gesserunt Antonius Priolus, Ludovicus Bassus, cæterique Trierarchæ, quorum unus Aloysius Fuscarus vitam perenni gloria cum morte commutavit. Ex hac pugna in multum diem, qui fuit Julii decimus septimus, obnixè protracta, Veneta victrix quinque-

hostium naves oppressit ; & unam , Alexandri Zanii robore acquisitam , deduxit in triumphum : addita quinqueremi , avulsa à reliquis , quæ combustæ , & impellentibus fluctibus ad scopulos confractæ fecere naufragium . Percusserat Mocenici aures tormentorum fragor , strepitusque , quare sibi non esse cunctandum , ratus accedere quò bellica signa vocabant , ne , si quid adversi contigisset , suis differret auxilium , extemplo Imbro discessit . Navigantem cum festinatione conspiciunt ex longinquo duode triginta triremes Turcicæ , quæ opinantes eum esse Rhodium Bassam properatò currentem ad Tenedi recuperationem , illi alacres occurrunt : at vix progressæ dum è speculis prospectant Veneta insignia , raptim ex metu convertunt proras , fugiuntque ad Natoliæ , Trojæque littora . Hæc Turcæ firmissimis propugnaculis munierant : & collocatis ex ordine tormentorum sedibus ita protexerant , ut videretur nulla de Venetis navis illac transire , nedum appellere posse inoffensa , quòd abundabat machinis , sagittis , facibus , quas expedita militum manus jaciebat in præternavigantes : id moliebantur , ut in pristinam dominationem vindicarent Tenedum . Mocenicus ad suos reiectus , certiorque factus de Turcicis tentamentis , ne minimo quidem spatio Temporis interjecto , censuit , hostem

stem ubique persequendum esse, ac infestandum. Ideò juxta occasionem, quam casus obtulit, quinque triremes Asianum littus radentes è vestigio insequitur perpetua majorum machinarum verberatione: unam adnitentem vim facere intercipit; reliquas graviter percussas compellit ex fuga in arenosas syrtes. Ceterùm anxius de tutanda Tenedo constituit ipsas hostium stationes invadere, licet fama inexpugnabiles. Turcica classis numero majori egressa, & per Trojana littora extensa, suis viribus à mari, & à munitio- nibus in continenti suscitatis validissimè defensabatur: octoginta militum millia per multiplices tormentorum suggestus colli- neatis ictibus propiùs succedere audentes, & claudere transitum in Tenedum repulsa- bant. Sed Mœcenicus animo forti, & ob- firmato opposita impedimenta aspernatus decrevit navigare ad Tenias, Barbieri voca- tas, ubi septem Turcicæ triremes manebant in statione. Plena periculis navigatio nul- lum deterruit æmulantem Classici Impera- toris virtutem: & primus omnium procur- rit. Barbarus Adriaci Custos inter immanes tormentorum globos sua quinquerei, priores munitiones pertransiit: sequentes superarunt Michaelius, & Baduarius, omnes ab effuso pilarum imbre in pro- ra, clavo, & scalmò lacesciti: per tela, perque ignes audacissimè penetravit in.

aciem Mocenicus, qui æstuans impatienti desiderio pugnandi ex propinquo cœpit præliari cum hostili classe: quam adeò ferociter aggreditur, dissipat, ac perdit; ut de ea in ipso primo certaminis ardore futuræ victoriæ spem conciperet. At quæ vis fati! aut lapsu pilæ ferreæ ab Natoliæ castellis explosæ in inferiorem Prætorix partem, in qua tormentarius pulvis asservatur; aut ab igniariis ministris ob ineuriam suis in officinis accensus (res incerto est) totam incendit, ruptisque compagibus corruens repente malus, suo, & decussæ antennæ improvise pondere oppressum exanimavit Lazarum Mocenicum, quem adeò horrebant Barbari, ut audito illius interitu sonora lætitiæ signa dederint: dum nostri gemitibus, lacrymisque fatum præstantissimi Ducis complorabant.

Tenedus, & Lemnus à Turcis recepta.

EXtincto Mocenico summa belli in Barbaro Baduario resedit; qui statim probato consilio ad incendenda navigia in conflictu arenæ impacta classem promovet: & quamvis à terrestribus munimentis magno tormentorum conatu repulsus: tamen adjuvante intrepidus fortuna, sub ictus ubique grandinantes ultrà tutissimè progreditur; adhæ-

ren.

rentibus Bembo, cæterisque Navarchis cum auxiliaribus. Applicantes proras arenosis littoribus, in his implicitas hosticas naves, vel conjectis flammis incendio absumunt, armamentis detractis; vel injectis harpagonibus retrahunt, frementibus Barbaris, quibus in mari neque fugæ, neque auxilii spes reliqua. Ideò nulla in Veneta classe navi nec igne, nec alio fato corrupta, præter Mocenici Prætoriam: de combustis, reduëtisque lignis, deque profligatis, captisque hostibus insignem victoriam nostri adepti sunt, vocatis in partem opulentissimæ prædæ Pontificiis, & Melitensibus: perspecto deinde certaminis eventu, retulit fama, Turcas amisisse quindecim majora navigia: centum circiter ænea tormenta; relicta in servitutum ad mille, & ampliùs hominum capita: plurima in ipsa acie ferro, igne, & aquis absumpta. Nongenti pro re christiana, certantes desiderati: quibus classarii ad Insulam Tenedum appulsi piè litarunt; gratesque Deo pro accepta victoria, egerunt. Sed lætitiā vix prægustatam conturbavit Baduarii ex morbo interitus xvii. Kal. Septembris. Hujus clarissimi Ducis jactura, æquiparanda nondum, satis deplorato Mocenici excidio, notabilis, atque etiam, ut exitus docuit, ominosa fuit. Auxiliares triremes à Venetis, summo orbatis Imperatore, discedunt.

dunt: Laurentius Rainerius quinquere-
mum Præfectus regendæ classis habenas
capit infelici auspicio. Tenedus in Tur-
carum potestatem regreditur. Præsides,
qui in ea erant, Contarenus, & Lauren-
tanus obcæcati avaritia, quæ solet publi-
cis rebus privata commoda anteferre, clas-
sem ibidem morantem autumnali tempore
infestam habuere: quia remiges, & clas-
sarii percurrentes agros, villasque vinde-
miales fructus obliguribant: hausto in uvis
vino, quo illi venundato, grandia lucra
captabant. Hac de causa rumores spar-
gunt de hostibus vicinis ad ostia Hellespon-
ti: & impellunt Rainerium, ut omni re-
jecta cunctatione obicem opponat proximè
egressuris. Dux credulus contracta classe
deserit Insulam; & occupatis euripis mul-
tos dies consumpsit in expectatione hostilis
adventus. Turcæ ad Mitylenem excu-
bantes cognito Venetæ classis discessu ab
Tenedo, nocte intempesta septimo Kal.
Septembris copias traducunt in Insulam,
numero, & robore perquam validas, quæ
tanto cum tumultu invasere externas mu-
nitiones, ut oppido quoque hæc noctur-
na, & non opinata incurio magnum ter-
rorem attulerit. Præsides improvisò ex-
territi, ac propè in ipsa arce obsessi,
tormentorum tonitruis ingeminant signa
solicite opis. Rainerius, ut cognovit,
se commentitio rumore deceptum, fe-
sti-

stinato remigio Tenedum redit, sed collocata classe versus Trojana littora non occlusit aditum ingruentibus Turcis ab aperto mari. In consultationibus, quid esset agendum, in diversum inclinabant sententiæ: alii repugnandum esse omni vi agebant: censebant alii dedendam Insulam, eum ad propugnationem vires non sufficerent: fuit hoc præsidium consilium, non esse pertinaciter immorandum: nam invalescentes quotidie magis hostes minabantur infesto agmine irrupturos, & oppidum aggressuros. Itaque intra quintum diem, quam Turcæ exscenderant, deditur Tenedus cum impedimentis, & comitatibus, gravi nostrorum indignatione: quod quindecim mensibus possesam Insulam, tanti momenti ad angustandum à mari ipsum Byzantium per socordiam amisissent, eamque Barbaris reddidisset vana trepidatio; vel potius suspecta fides, cujus cognitio Senatus iudicio fuit reservata. Vocati Præsides, ut de objectis criminibus dimoverent suspicionem, torquentes conscientia, cum absentes damnati essent, exilium sibimetipsis aqua, & igni interdictis, consciverunt. Classis amissa Tenedo Lemnum perducitur: tristi provecta infortunio, quarto die, quo portum attingit, conspexit è navibus in littora profligare duo Turcarum millia, & oppidi præsidium haud multum abesse à pavore. Ten-

Tentatum subitis aggressionibus, crescente in hostibus audacia ex alieno metu, nec audente Rainerio ferre opem, qui è classe certi periculi spectator erat, frustra quæ dissuadentibus Præfectis Paulo Bernardo, & Faustino Ripa, ne se dederet proximi auxilii fiducia; tandem coactum à datis bona fide conditionibus post quintum, ac sexagesimum propugnationis diem se tradidit. Ita Turcæ suas in Ægæo præclarissimas Insulas Tenedum, & Lemnum nostrorum vel ignavia, vel avaritia receperunt.

Turcica excursiones in Dalmatia compresse. Ascrivium defensum. Camilli

Gonzaga Mors.

MDCLVIII.

PRæsenti anno in Dalmatia Cedinus Acmetes Bosniæ Bassa repentino incurfu Spalatinos agros populatus, ad ipsam urbem castra posuit Idibus Juliis: multoque potens equitatu suis incursionibus totam provinciam exterrebat. Adversus hostem egressi cives, adjutrice robusta Bosilianæ conterminæ gentis manu, ejus impetum, & ferociam sæpius repetitis congressibus superiores compresserunt. Conversus in fugam, relicto in manibus rixantium de præda filio ad necem, in Bosilianos ultra montes incolas, quos in se acerbiores erat expertus,

tus, omnem iram immani crudelitate effudit ; imbellibus non pepercit , colonos villicos omnes trucidavit : expillatas domos , tecta^{que} omnia urentibus flammis devovit . A devastatæ Bosiliatæ digressu Albaniam properat , ut cum Scodrensi Bassa Mehemeto Regia mandata exqueretur de oppugnando Ascrivio paratis in expeditionem octodecim bellatorum millibus . Quod ubi Venetias nuntiatur , & esse hostilium copiarum ductor Voinus Ivarina , qui à Religione , & à Republica defecerat , Senatus cogitatione metus , & periculi dilectissimi oppidi , confestim duos creavit belli Curatores Franciscum Barbarum in Dalmatia , & Hieronymum Battaleam in Albania . Hic celeri navigio in provinciam advectus , ad urbis securitatem suburbana loca diruit ; & complanavit , ne ullus esset hosti furtivus accessus ; tuta in muris appoluit propugnacula ; militibus stationes paravit ; distribuit munia ducibus , & chiliarchis ; omniaque ita opportunè peregit , ut quemcumque tæderet moræ , quæ protrahebat certamen . Exemit cunctationem Mehemetus , cum die trigesima Julii se dedisset conspiciendum in cacumine collis haud procul oppido assurgentis : aderat Voinus jactabundus illud brevi casurum iis viribus , quas secum Bassa afferebat , & quarum ipse erat instructor . Ergo sub pro-

ximi mensis Augusti exordium productis in excitatis aggeribus tormentis , cœpta sunt quati mœnia : sed promptis operibus , quæ convulsa ruebant , reficiebantur , Cedinus quoque suo adventu Rizonici sinum obsepire , & occludere valido conatu moliebatur ; ne subsidiariæ manus , quas armatis biremibus Bernardus Provinciæ Præses , & Gonzaga copiarum ductor afferebant è Dalmatia , penetrarent per Euripum ad obsessos . Quotidie utrinque pugnabatur : frequentes erant eruptiones in aggressores , quarum una ad Scalgiari , id nomen loco , ab oppidanis commissa , Turcis fuit cruentissima ; fuga , strageque adedò insignis , ut aliquot dies cum quiete transacti indicarent hostes nihil ultra tentaturos : quin hujus cessationis fidem augebat fama de Bassarum profectio-
ne in Pannoniam : verùm adhuc nostros tenebat suspicio , ne fraus subesset , ac per tenebras silenti agminè importunissimus hostis in mœnia irrumperet : idedò vigilatis noctibus assidui erant in muris , & propugnaculis excubitores . Tandem kal. Octobribus pro comperto allatum fuit , Turcas omninò recessisse : ex quo læto eventu ingens in oppido , summa constantia , fide , & robore à propugnatoribus defenso , animorum exultatio , indictusque ad templa concursus , actæque Deo grates , qui civitatem à bime-

stri

stri obsidione servasset incolumem . Lau-
data Bataleæ solertia , Jadera redeunt
Bernardus , & Gonzaga armorum Præfe-
ctus , cujus mox sequuta mors valdè af-
flixit omnes , qui toties experti erant in-
signem ducis in consulendo prudentiam ,
& in agendo fortitudinem . Tunc Gilda-
sius Venetis stipendiis revocatus defuncti
onus excipit probatæ virtutis testimonio .
Sufficitur extincto Mocenico Franciscus
Maurocenus : & emerito Navium Præ-
fecto Bembo Hieronymus Contarenus
succedit .

Respublica externis auxiliis adjuta .

V Erùm quia procedente tempore cum
hostium viribus quotidie magis au-
gescentibus crescebant Reipublicæ dispen-
dia , cœpta sunt desiderari externa auxi-
lia ; quæ & opportunè admodum adfue-
runt . Alexander Septimus , & Clemens
Nonus Summi Pontifices , quibus persua-
sum erat , conservationem Veneti imperii
cum Romana Ecclesia ita esse conjunctam ,
ut commune esset utrique effugium , &
detrimentum , sæpè permissis suis in ditio-
nibus militum delectu , missis classium ,
& copiarum subsidiis Rempublicam ju-
verunt . Et Innocentii Decimi sequenti
documenta , decreverunt insuper , ut
Religiosi quidam Ordines , quorum mi-
nor

nor erat utilitas, aut necessitas, tollerentur, assignatis eorum redditibus in bellum pium, & justum; quique exturbati, agente lege, suis sedibus fuerant, multo persoluto ære; reciperentur. Iidem Pontifices præter Decumas Sacerdotiis impositas novies concessere centena aureorum millia ab eorundem proventibus colligenda, subsidiario nomine. Etiam inter Purpuratos Patres, qui nummariam præstarent opem, delectamque terra, marique militiam eminuerunt. Richelius, Mazzarinus, & Barberini, quos omnes, ut eorum pia, summaque liberalitas, ac justa pariter, & debita in Rempublicam grati animi significatio nota esset posteritati, Senatus in Patriciorum numero reposit. Ludovicus XIII. Galliarum Rex, & non pauci Christiani Orbis Principes, ac Dynastæ pecuniarios, militaresque apparatus, & aliqui se ipsos ultrò ad præliandum obtulerunt. Multi denique Venetarum Urbium Præfules, pro sua quisque facultate Reipublicæ auxiliati sunt: studio piæ æmulationis, & contentione religiosa omnes ad liberandam Rempublicam, ad protegendam, & propagandam fidem, ejus juratis hostibus depressis, conspirabant.

*Francisci Mauroceni in Cretam expeditio .
Maritima ejusdem facinora in Turcas .*

JAm trajecerat in Cretam Dux totius militiæ Franciscus Maurocenus in locum defuncti Mocenici : jam classem inopem , & infirmam ex rebus malè gestis , apud Tenedum pecunia , commeatu , & Epibatis instruxerat , jussu Rainerio obtemperare Senatui illum vocanti ad causam dicendam : damna quoque , quæ Contareus navium Præfectus subivit inter navigandum subortis tempestatibus resarciat . His diligenter provisis ad maritimas expeditiones accingitur : ab Cretico littore Idibus Februariis solvens , Chium dum cogitat , adverso vento coactus Astypalæam tenuit ; inde tandem abscedens in Insulam , nomine Calchi , Venetis infestam irrupit , & desæviti : ut reliquis direpta , ac incensa exemplum esset punitæ superbæ , & contumaciæ . Rhodium mare emensus quarto Nonas Martii , Carpathum vix aspexit , cùm repentinis circumactus vorticibus miserrimum facit naufragium , trium triremium , & unius quinqueremis Benedicti Michaelii : quas suas in voragines procellosus pontus absorbit . Hoc submersarum navium detrimentum , paucis è naufragio collectis impediementis , tristis nuntius Venetias attu-

attulit, quo tempore mœstissimæ Urbi Principem Valerium eripuit mors, quem diù victurum & sperabat, & optabat. Respublica. Sed intra sex dies festiva acclamatio in Joannem Pisaurum, omnium ordinum consensu ad sublime solium erectum cives non modica affecit hilaritate, quam etiam magnoperè adauxit rebellis Comitis Voini interemptio; sublato de medio homine perditissimo, qui Turcas perpetuò instigabat adversus Rempubicam. Illius necem sagaci astu machinatus est Bernardus Dalmatiæ Præses: nam causa dirimendæ inter duos dissidentes controversiæ vocatus sequester, adducitur in locum opportunè destinatum: ibi, quos componere debebat, habuit interfectores.

Maurocenus postquam disjectam naufragio classem collegisset, Astypalæam movens Delum petere constituit, ad quam insulam tunc pervenerat Prior (dignitatis vocabulo) Bichius cum auxiliariis triremibus numero duodecim, decemque navibus, unà cum Etruscis, & Melitensibus. Auctus his viribus excurrit Ægæum: & qua opus erat solertia, Hussainum Bassam electum maris Imperatorem persequitur: sed ille semper in fuga totius pelagi quærebat latebras, ut evitaret incursus. In hac intercipienti hostis incerta spe cogit Maurocenus militare concilium, & Cydoniæ aggressio-

sionem proponit exitu facilem, absente Hussaino: & plurimis ex oppidanis, secretis nuntiis suum erga Rempublicam testantibus non interruptum obsequium. Variæ tamen, & discrepantes fuere consulentium sententiæ: alii, quos timor occupabat, opinati sunt factu difficillimum memoratum facinus: alii, quos livor tangebatur instinctu infestæ æmulationis, & Mauroceni gloriæ olores, neglecto publico bono, rem agitari plenam periculi, ac discriminis, dixerunt. Hanc expeditionem, quam laudabant auxiliarii Duces, parati cum Mauroceno ad eam captandam, omnium primus conficere cupiebat Eques Avogradus, cujus invicti animi præstantia ob alia præclare, fortiterque gesta, cunctis erat notissima: sed prævalente in viros fortes invidia, per piscatores Tænarios furtim submissos rescivit Hussainus, & illam dissolvit suo celerrimo regressu Cydoniam. His dissipatis machinamentis rursus mare ingreditur cum bis viginti triremibus aggressurus tres insulas, quæ in Mediterraneo parent Reipublicæ; quo etiam tempore fama deportabat terrestres copias adversus easdem paratas à primo Visiro Chiopurlo. Diffusus rumor Venetiis tantam injecit trepidationem, veluti si Turcica classis in Urbis conspectu esset: omnem tandem pavorem expulit relatus in Ægæum Bassæ

sæ transitus, & illius vestigiis continuò inhærens nostrorum infectatio.

Verùm hostis, cui fuga omni congressu tutior, de more hùc illùc dilabens, nullo consistebat loco suarum triremium agilitate, quas sic remis, perinde ac habenis, agebat, cùm Venetæ pondere, & armis graves lentè regebantur. Nunquam excepti hostes, præterita Chio, in Mitylinæo portu sese abdiderunt. Intereà hybernandi tempus instabat, & auxilarii Duces oppugnandæ Cydoniæ spe frustrati, ad occiduum iter se comparabant. Transvecti Zacynthum gravi animorum acerbitate apud trium Insularum Præsidem conqueruntur, quòd inutili mora tempus absumpserint; verùm adhuc, antequam ad patrias sedes pergerent, paratissimos esse ad præclarum aliquid agendum pro Republica. Præses experiendi cupidus suas vires, Buthroti, contra Corcyram oppidi, proponit oppugnationem: sed ejus explorata difficultate, in Leucadem, sceleratum piraticæ gentis domicilium, irruptionem persuasit. Eò profecti, quatuor etiam à Præside acceptis triremibus, fortunato descensu evadunt in Littus, scalasque muris applicant, at pro usu breviores: à valida Insulanorum phalange repulsi, coguntur ad suas naves reverti. Meliori auspicio Maurocenus priusquàm iret hybernatum classem

cenus priusquam iret hybernatum classem adduxit ad Insulam Claron, quam metu territam obtinuit; postea Samum: atque ex utraque abducta abundantem præda milites, remigesque resectos Melum advexit in stationes.

*Hieronymi Contareni pugna cum
Turcis.*

EAdem tempestate Contarenius ductor procellosis tempestatibus diu vexatus, Thalame tandem Laconiae oppido discedens, ad Hellespontiacum fretum pervenit. Acceperat per actuaras, Bassam inde brevi erupturum spe tuti exitus à præpotenti classe, & substructis manitionibus in Littorali Græciæ ora positis: nec diutius contineri potuit, quin IV. Non. Augusti occurreret exeunti cum suis navibus infesso euripo.

Quo improvise accessu Bassa deterritus, crebra tormentorum explosione suis nuntiavit adesse hostem, ut agentes in terrestribus stationibus eundem grandioribus machinis lacefferent: sed Contarenius magis venti sævitie, quam globorum grandine impeditus, propius accedere nequivit: & Bassa ob id liber à manifesto classis discrimine, interiora littora petiit, latuitque sub Sestæ arcis propugnaculo usque ad VII. kal. Sep-

tembris . Sed Regio mandato compul-
sus ultra progredi , nocte subobscura
navigans , in Contarenum ineidit , qui
nunquam locum , à principio captum
deseruit ; & improvisus iterum ante so-
lis ortum supervenit transenti . Sub
hostis conspectum illicò tormenta dispo-
nit in Turcicam classem , quæ pari con-
cussione à mari , terraque pullabat Ve-
netos , adjuvante milite è propugnacu-
lis : Sæpius renovati fuere congressus ,
& subinde magna in eorum triremibus
orta consternatio : atque in terrestribus
copiis confusio ingens : nempè in tento-
ria , & castra majora tormenta latè stra-
gem dabant . Quamobrem Bassa fuga
salutem quærens , reliquit in acie trire-
mes quatuordecim laceras , dissipatas , &
inutiles : sexcentos occisos : duplo ma-
jus damnum accepit in stationibus , &
munimentis : dirutum Græciæ castrum ,
prostratasque Mesquitas : & victorem
vidit Contarenum ; qui parto triumpho
illustri Imbrum se contulit : ubi Vene-
tias reversurus , Antonio Priolo IV. Idus
Septembris ex Senatus consulto navium
Præfecturam tradidit .

*Castri Ruzi, Toronis, & Chia**Arcis expugnatio.*

MDCLIX.

HOc anno Franciscus Maurocenus totum ferme Ægeum permensus, complures biremes, dromones, parvaque navigia, quæ furtim Cydoniam importabant commeatus, fugavit, evertit, & subegit. Eo transmissio, classem applicuit ad unam Chelidoniaram insulam, Castrum Ruzum; Græcum emporium, in quo Alexandrinæ naves onerariæ suas merces, necessariaque Turcis alendo bello deponebant. Spe ductus prosperi successus facinus aggreditur, longè ab omni expectatione.

E triremibus mandat militibus, ut citò descendant, & quingenti numero Arcem obsidione cingant. Insulani, qui nihil minus, quàm hostem expectabant; ea subita aggressionem contremiscunt: propugnatores Arcis exterriti, quibus explota tormenta defensiones adimebant; & effracta furenti pyroclastri vi porta, minabatur cruentum ingressum; suis diffidunt viribus, seque arbitrio Veneti imperatoris committunt. Facta est deditio, & accepta his conditionibus, ut tres è populo primores suam redimere possint captivitatem; omnes exeant op-

classe : factus etiam certior de futura cunctatione in agendo ob complurium imperium , delulerat eos conficta literarum fallacia : qua opportunum nactus tempus, portum munivit, auxit copias, & subsidia advocavit . Ab Enandia profectus Bassa, & asperamontium transgressus, juxta Malaxam sese abdidit in insidiis : quo tempore Cydonius numeratis duobus peditum millibus, & octingentis equitibus ex oppido erat erupturus. Condicta igitur die VIII. Idus Septembris repentinus in Venetis castris horror ingruit, ac terror ingens, oppugnantur ab omni latere incauti, & imparati, lataque strage profligantur: fuga ubique, & consternatio maxima. Turcæ barbaro more defævientes omnes ad unum occidissent, nisi ad opem accurrisset fortis Melitensium manus, quæ frænavit, ac repressit insequentes, qui fugerant: & ab eo conflictu (quo Turcæ penè parem reposuere cladem suis illatam ad Cisternas Kal. Majis inter hostiles plausus, & saltus) ægrè evaserunt Maurocenus, & Barbarus . Compressa in hunc modum Cydoniæ obsidio, priusquam adolesceret, docuit non esse tempus in rebus magni momenti cunctationibus terendum : nam si à mari, teraque subita aggressione Cydonia fuisset petita, vel deditio, vel vi, casura erat in obsidentium manus . Irrita ex-

peditione auxiliares triremes III. Idus Septembris discessere : & multati exercitus reliquæ à Calami castro Candiam traductæ, auctæque supplemento, majori spe domandæ Enandix per eos dies imminutis defensoribus audacter progressæ spondebant præteritam cladem ultumire. In ejus conspectum explicata acies, & ad invadendas exteriores munitiones excitata, facili impressione in ipsas penetravit, subsidentibus Turcis in oppido pavidis, ac perterrefactis, ac si non haberent neque consilium, neque robur ad obsistendum. Quare nostri cum nullam contra se in hostibus repugnantiam animadverterent, securius incœperunt castra diripere, & prædas agere : ex iis, qui redibant spoliis onusti, animati qui sequebantur pari exemplo ad rapinas convolabant : omnes direptionibus erant intenti. Turcæ furiali jactati rabie in furaces magno impetu irruunt, ut sua sanguine, & cæde reposcerent, non opinato aggressu incubantes prædis occidunt ; terga fugientium sagittis configunt ; palantes, nullisque ordinibus coactos in captivitatem trahunt : capita ferme tercenta capta, totidem interfecta, redempta furta, & intercepta victoria, quæ propè in manibus erat, cum Bassa ad primas aggressiones Enandiam deferere cogitasset. Maurocenus, experimento cognita militum

rapacitate , & ignavia , noluit alteram Turcicarum munitiuntentare oppugnationem : hanc suadebant Galli ductores , ut suorum præsertim turpitudinem diluerent ; qui promptiores ad fugam , quàm ad pugnam nullam victoriæ curam habuerint . Quapropter Candiam repetens , & ab Suda recedens cum classe , & Almerico Principe Venetias ituro , Paron vela facit : quæ insula salubri cœlo , & comœatu divite , cæteris visâ est aptior ad reficiendos remiges , & classarios : verùm fatalis extitit Principi , corpore , & animo nondum confirmato : nam adhuc hærebat cordi quædam cum Mauroceno amarities , ob non iteratam adversus Enandiam impressionem . Itaque contracta infirmitate extinguitur , omnium lacrymis defletus : Princeps Juvenis in rebus bellicis eximiæ expectationis , ex Senatus consulto perpetuum meruit erecta Statua in æde Minorum , Conventualium monumentum virtutis , & fortitudinis suæ supra ætatem admirandæ .

*Rex à Maurocenis Francisco , & ejus
successore Georgio gesta .*

MDCLXI.

SEquens annus inchoatus est , audito inhumanæ feritatis nuntio : Turcæ pergraviter offensi , quòd Galli pro Venetis

netis pugnaſſent, licet victi, fugatique, captivos, quos Cretæ, ac Byzantii in vinculis detinebant, vario, & inaudito ſuppliciorum genere ad unum trucidarunt. Franciſco Mauroceno hoc ipſo tempore reditum in patriam poſtulanti Senatus annuit, ſuſſecto ex eadem Maurocenorum familia Georgio probatæ famæ viro, ſuncto imperatoris munere in Dalmatia, & Creta; geſtoque laudabiliter præſenti bello. Porro antequam hic ad provinciam accederet, ille octodecim naves ab Ægypto proſectas audierat, & Cydoniam miſſas cum ſubſidiis; quare ſolvens è veſtigio ab Inſula, eas irrequieta curſu perſequitur, adoniturque nunquam ceſſante tormentorum verberatione: hærentem retinuit furens Notus; noxque tenebriſa uſque in diem, quo luceſcente diſcuſſis nubibus, rursus infectatus errantes, unam cepit; reliquæ ex fuga diſperſæ; aliæ Rhodum; aliæ Punica littora tenuere. Hoc tamen Mauroceni ſolertia effecit, ut interrupto itinere nullos hoſtis commeatus Cydoniis attulerit. Subinde reboante mari ex magno bombardarum fragore, quæ Corcyræ explodebantur, cognovit ad eam Inſulam ſui ſucceſſoris acceſſum: propterea illicò eò contendit, ut penes novum classiſ Imperatorem bellica inſignia, & muneris admiſtrationem deponeret. Quo facto,

Geor.

arce , quam militibus diripiendam tradidit , & comburendam , sibi reservata peractæ demolitionis memoria . Reducta classis ab Icario mari in Ægæum , ex insulis , quas circuibat , Patmon exilio , & æde Joannis Apostoli ipsis Barbaris venerandam attrectare est ausa sacrilega licentia ; quæ nulli rei pepercit , in quâ prædandi cupiditas , ferrum , ignisque sævire potuit .

*In Dalmatia repressi Turcici excursus .
Dominicus Contarenius Dux .*

EXeunte Augusto Turcæ in Dalmatia non contemnenda multitudo sese effundentes, in castrum Sancti Joannis incurrun-
runt . At viriliter defensum , suos oppugnatores repulit : qui paulò post in provinciam reversi , octingentis equitibus Sébenicum adoriuntur ; verùm iterùm circumventi à minori equitatu magna strage multantur ; discerpto in pugna à contendentibus de præda Licha Sangiacchi filio . Spalatium quoque per id tempus inquietarunt , terrore quidem multiplici , sed vanis conatibus . Indignatus Turcicus Imperator vinci à modica manu , Bosniæ Bassæ imperavit amplissimas parari copias , quæ resistentis provinciæ comprimerent audaciam . Hoc duce cum quindecim armatorum millibus nihil actum præter prædas La-

trocinantium more : nulli aperto Marte tentati congressus , licet in Spalatum tot agmina essent instructa ; quæ tandem properato discessu deflexere in Pannoniam tunc temporis à Turcis validissimè oppugnatam . Interim Pisaurus Princeps rebus domi , forisque gestis conspicuus , extremum diem obiit : & Dominicus Contarenus ruri agens vocatur ad gubernacula Reipublicæ : tanta erat apud Senatum illius prudentiæ , ac pietatis existimatio.

Schiatton castrum captum à Venetis.

Clades acceptæ ad Cydoniam.

Almerici Atestini Principis mors.

MDCLX.

EXclusus Maurocenus à ventorum reflatu , & à fama exploratæ suæ expeditionis in Eubœam , convertit se ad Schiatton , eminentem è mari scopulum , cum arce in ejus cacumine , ascensu ardua , & delecto subsidio tutissima . At quia plerumque difficilia conantibus arridet fortuna , è triremibus educit epibatas , & saxosum jugum conscendit . Vocata , ut se dederet , respondit , velle aut vincere , aut mori : quare in ipsam obstinata vi defensam ferro , & igne per-rumpit , & octavo die perdomitam accepit in deditionem hac lege : Turcæ in
proxi-

proximum solum immunes traducantur . Græci quotannis mille nummos tributi nomine pendant Reipublicæ .

Post debellatam insulam , Cytheram cum classe decurrit ibidem opperiturus auxiliares triremes : & manus Gallicas ; quas purpuratus Mazzarinus mittebat in subsidium , regendas ab Almerico Mutinæ Principe sub Præfectura Dynastæ Baas cognomine , militari disciplina præstantis . Hoc virium accessu censa sunt undecim peditum millia , & equites mille ducenti : robur non modicum , quod sine cunctatione in Cretam deferendum esse consultum fuit . Duces , dum se XI. kal. Septembris committunt navigationi , admoniti , ubi adesset hostis , eam dirigunt Lesbum , in cujus portu morabatur . Cæterum quia prævenerat fama classis adventum , ille ex metu malè tutam stationem præpropera fuga reliquerat . Nostri , hoste non reperto , legentes Creticum Littus , vi capiunt divæ Venerandæ castrum , Turcis fugatis , & Asiano eorum : Bassa notæ fortitudinis interfecto . Addunt his prosperè cœptis expugnationem arcis , quæ proxima Sudæ erat molestissima . Hac diruta , & spoliata tormentis , Almericus feliciora sibi auspicatus incampum prodiit , ut cum hostibus cominus pugnaret . Rursus itaque illos conantes obsistere fudit : & persecutus fu-

ignium in Sulthanas jaculatione tanta, tamque atrox edita strages est, ut ex illis tres fuerint debellatæ, & una ab incendio redacta in cineres. Hæc victoria III. kal. Octobris conclamata, classem in hybernis collocavit; navibus à Mauroceno Melum inter, & Dolum distributis. In eo certamine Aga captus est Eunuchus, qui regiam pellicem ducebat ad Mecham: ex donariis, & ex mercibus, quas secum vehebant negotiatores, parta præda; auro quoque, & argento, perquam ampla: cæterum aliquantum cruenta, interfectis è nostris sexaginta, & in his fuere aliqui militia illustres; & duo viri nobiles Jacobi nomine Semitecolus Trierarchus, & Cornelius classis curator; totidem vulneratis. De Turcis præter paucos ad transtra damnatos; reliqui fermè omnes in navibus militantes ferro, ignibus, & aquis obruti perierunt. Dum hæc foris aguntur, domi ab Senatu sex grandiores naves omni apparatu adornantur, quæ à navali eductæ in Dalmatiam veherent Hieronymum Contarenum delectum Provinciæ Præsidem: Corcyram ad trium Insularum custodiam Franciscum Moenicum, subrogatum fratri, qui priusquam illas attigisset inter navigandum obierat extremum diem: & Nicolaum Cornelium traducerent in Cretam totius Insulæ Præfectum. In Dalmatiam

Tur-

Turcæ satis hoc anno terroris, tumultusque intulerunt: egressi magno equitatu adversus Morlachos crebris, infestisque rapinis turbantes conterminos agros; illos non procul Jadera comprehensos coegerunt rapta spolia, & armenta deferere tristi strage, & captivitate. Hic successus rebellis Philippovicchi ita auxit dementissimam temeritatem, ut datis publicæ lætitiæ signis, jactaret se subditorum suis artibus Turcico imperio Spalaturn, & Sebinicum. At paulo post contrà accidit; & inani gaudio subiit veramœstitia. Morlachi mutuis sese stimulis urgentes ad vindictam; iterum incursiones in extrema finium faciunt; omnia passim agrorum tecta, vicosque exurunt; & prædas hominum, pecudumque abducunt uberrimas. His quoque diebus Tragurienfès in Turcas à Bosnia dimissos, ut Spalaturn vexarent, repentino ex insidiis impetu ferociter irrumpunt, aguntque in fugam strage, & confusione maxima. Hanc hostes, instigante Philippoviccho, fulturi, bis septem armatorum milia descendunt in Provinciam cum ipso Bosniæ Bassa minarum pleno. Verùm dies aliquot inutili cunctatione moratus, veluti si quis terror eum cohiberet, visus est ex inopinato copias suas retrahere; & ab omni trepidatione liberare Dalmatiam. Sed hujus repentini discessus

cau-

causa manavit ab imperante Achmeto Primo Visiro, qui Patri Chiopurlo in dignitate successor, & susceptæ ab eodem adversus Pannoniam expeditionis hæres, ad illam perficiendam collectas vires ex diversis provinciis evocaverat.

Successus varii in Dalmatia, & Creta.
MDCLXIII.

IN bello, quod gliscebatur quotannis difficillimum, atque periculosum, omnis cura Senatus versabatur ad illud sustinendum; ideo frequentes erant militum delectus, solliciti armorum apparatus, & diligens virorum conquisitio, quos exploratæ virtutis suis præficeret expeditionibus. Et quidem hac tempestate magis, magisque angebatur minis Achmeti. Visiri multa minantis Dalmatiæ, & Foro-julio: quamobrem cognita illius cupidine, Senatus creavit castrorum Præfectum virum Germanum Spzar cognomine bellicarum rerum usu celebrem: aliosque delegit præstantissimos duces, inter quos numerabat Echenfeltum, comitem Hectorem Albanum, Carolum Martinengum, & Equitem Bartholomæum Varisanum Grimaldum, quibus larga decrevit stipendia, atque utriusque provinciæ custodiam demandavit.

Cæterum conversis copiis ab Achmeto
in

in Hungariam, cujus per id tempus munitiones arces cupidius impugnabat, levioribus certaminibus in Dalmatia dimicabatur. Repressi fuere à Præsìde Provinciæ Contareno incursum armorum in Spalatenses, & Jadertinos agros aliquandò facti. Spaar Jadera solvens in maritimam Castrinovi oppugnationem (quoniam Turcæ ejus navigationis causam explorarunt) mutato cursu flexit in Olcinium; quo loci immanes belluæ piraticam exercentes nidificabant; illud furenter adortus plura sceleratæ gentis cubilia succendit, & infames myoparones in portu depressit. Alibi Turcæ Buthrotum occuparunt; ægrè defudantibus Venetis amissum reposcere non æturnis, cruentisque aggressionibus. In Creta bis tentata fuit ab hostibus Spinalonga; sed irritò conatu; quia Præfectus fraudibus tempestivè occurrit: atque castrum, de Garabufis dictum, detecta conspiratione cum Cydonio Bassa, præsidii transportatione, & quatuor bellicarum navium subsidio tutatus est. Maurocenus totum Ægæum pererrabat in perquisitione Turcicæ Classis; at nullo loco illam offendit: cui tantum terrorem incusserat, ut omnem declinaret congressum, quem semper fuerat experta magna sui jactura pertimescendum: quare cùm cerneret transire dies à laboribus vacuos, reditum in patriam impetravit ab Senatu. Successo-

Georgius Maurocenus renuntiatus universi belli summus Dux, constituit quamprimum adire Cretam, viribus potens, & animo constans, ac dictitans, se omnes congregiendi cum hoste occasiones arripiturum. Sed interim ei navigationi accincto nuntiatur, sex navigia Venetiis sub Anglorum præfecturaeducta, munitaque ad nostri belli usum, cum in totidem Punicas incidissent, proditoria deditione Barbaris se tradidisse: alia duo pariter Angla referta militibus, & com meatibus, ductore Comite Sfortia Bissara Vicentino ab iisdem prædonibus oppugnata, ab iniquo fato coacta cedere; alterum incendio combustum: alterum cum Sfortia captum, & avectum in eaptivitatem: verum non hic finis prædæ fuit, dum alia oneraria pretiosis repleta mercibus Smyrnam adnavigans capitur, & barbaras rapinas valdè adauget. Hac damna ulturus Maurocenus in insulæ Chii curipum se intrudit, & hostes parata obsidione territare cœpit: mox pervenit rumor, Bassam, cui Mazzamama nomen, quadraginta iussulum triremibus Rhodum applicuisse: indeque procursum Cydoniam cum Alexandrinis navibus oppletis com meatu plurimo victui, & bello necessario. Qua fama excitus, viginti triremes, & quinquereemes duas apprimè instructas, cum Melitensi acie, secum edu-

educit; jussu cum reliquis Hieronymo Battalea manere apud Chium in excubiis. In altum provectus, totumque speculatus *Ægæum*, hostilem classem ante Milum nihil ejusmodi opinantem exacto sex dierum excursu offendit. Illi cò expeditis omnibus, quæ ad ejus aggressionem opus erant, Bassam provocat in pugnam: sed promptior ad fugam dum pro-
ras contorquet, terribili bombardarum strepitu, furentique pilarum impetu pulsatus deserit in portu decem triremes: quarum sex ab impetu jactatæ littoribus adhæserunt quassæ, & oppressæ: alias quatuor procedente certamine Veneti, & Melitenses occuparunt: Turcis in interiora Insulæ loca tumultuariè evadentibus Maurocenis cum victrice classe portum ingressus; fugatos invitat ad deditionem, in quam mille circiter devenerunt: quatuor millia dicuntur desiderata in conflictu acerrimè utrinque commissio: in quo Melitensibus non parva jactura obvenit, quam tamen locupletior præda compensavit; duabus potiti triremibus cum impedimentis, actis per insulam direptionibus, & recensitis in captivis sexcentis Prætorianis militibus. Singulis Trierarchis dono addidit Senatus torques aureas; & Maurocenum equestri honore decoravit ob ea, quæ nuntii fortiter gesta retulerunt; quorum singularis eventus ferendas Cydo-

doniæ suppetias avertit; & hostium hoc anno cogitatas in-Mediterraneas insulas irruptiones disjecit. Tandem inconstans fortuna rebus lætis immiscuit tristitia; hujus anni finis luctuosus fuit: plurimos in classe exitialis morbus corripuit; citaque confectos ægitudine extinxit: militantes quoque in Creta virulenta tabes infecit, valdeque imminuit propugnantium vires adversus nuper excitatas Enandiæ munitiones. Pestis neque Turcis pepercit: nam Byzantium etiam annonæ caritate vexatum, summè afflixit: at nobis nunquam profutura est lues, fames, aut ullus adversus bellorum casus in Barbaris, qui cladibus supersunt, & nihili æstimant succorum jacturam: cum à vastissimis provinciis colligant ad omnem nutum innumeros milites, uberes commeatus, validissimas classes; quod christianus orbis experientia deprehendit; ut magis dilatent imperium, & opprimant quos habent invilos.

Mari, terraque cum Turcis certatum.

MDCLXII.

Auxiliariis suas in regiones reversis, Venetus imperator decursio Ægæo nullum vel diligentiae, vel labori locum reliquit, ubique hostem insectando, ne Reipublicæ esset injurius, & in Cretam transfret inoffensus. Quare
mo-

lorem habuit Andream Cornelium : & Catharino ejusdem cognominis , in Dalmatia suffectus est Hieronymus Contarenius . Per hos dies tristis nuntius retulit Patribus : ictu fulminis Sebenici turrim tactam, in qua magna copia tormentarii pulveris servabatur , atque ab impetu erumpentis ignis terribili fragore, & ruina prostratam . Candia quoque in ipso portu , excitato fortuito incendio septem navigia deflagasse; Melitensium quatuor, Reipublicæ unum Turcis pridem ereptum, & duo ad vehendas merces à privatis negotiatoribus conducta . Quos infaustos successus fuere qui verterent in prælagium alicujus insignis calamitatis.

*Intercepta subsidia, & plura Turcarum
navigia.*

MDCLXIV.

Turcis Hungarico bello implicitis, & in mari eorum classe Venetam ex trepidatione subterfugiente, Dalmatia, & Creta hoc anno veluti accepta pacis fiducia in muris, & ad portus liberè excubabant . Tænaria gens, quæ hodie Mainæ in Peloponneso, Turcicæ tyrannidis jugum detrectans Reipublicæ partes, dedito obsequio, sequi voluit . Maurocenus , quem adhuc tenebat in castris Successoris desiderium , ubi intellexit, duas, & viginti ho-

hostium naves per Mediterraneum discurrere; suam classem per viciniore sinu ad erumpendum distribuit, ut advenienti Cornelio muniret iter, sin minus, cum illis confliget. In hac expectatione contigit repentinus ex conspectu recessus Punicarum navium: quare ille Cydonias aquas permenius Milum properatò contendit vocatus à fama, quædam Alexandrina navigia cum armis, & annona in Cretam transitura. Hæc intercipiendi cupidus mandavit Architalasso Justiniano præcedere usque ad Patini oras, mox ipse cum triremibus pro tempore affuturus, ut ea simul oppugnaret, ac everteret. Justinianus, qua ex causa adhuc fluctuat opinio, diversum iter intendens, Rhodum versus expandit vela: dum Petrus Diedus navium Præfectus subterlabentibus navigiis occurrens, duo ex illis capit; Maurocenus alia distraxit; sex tantum Cydoniæ portum ingressis. Post hæc supervenit Andreas Cornelius, cui ille tradito regendæ classis imperio, Venetias repetiit.

Cornelius omnem moram abjiciens insequēbatur hostes Ægæum permeantes; at illi, recusata quacumque disceptandi aperto Marte provocatione, per subterfugia, & diverticula in hoc unum erant intenti, ut comportatis tutò commeatibus, suis in Creta militantibus suppedita-

tarent. Ad Chium imperato accessu cum Turcis exsensionem vetantibus, ne classarii aquari possent, strenuè pugnavit: expositi milites, quos Bassa illis opposuit, cum cæde repulerunt, eo graviter saucio, vixque fuga elapso. Inde Rhodum, Samumque prætervectus, nunquam in hoste persequendo defatigabatur. In Chitreo portu quatuordecim minoris formæ gaulos metu, atque consternatione percussos oppressit; potitus mercibus, quas Constantinopoli exportabant Alexandriam: sed vectores effugientes ad terram & salutis suæ, & mercimoniortum majoris pretii consulere securitati.

*Primi Visiri Achmeti profectio in
Cretam.*

*Obitus Joannis Capelli; ejus, & Bal-
larini omnis de pace tractatus
inanis.*

MDCLXV.

PACTIS cum Leopoldo Cæsare in viginti annos induciis Turcicæ copiæ ab Hungaria ad oras Albanix, & Peloponnesi traductæ, in Cretam transportandæ esse dicebantur. Ex illius Insulæ adjectione Achmetus Primus Visirus Chiopurli patris instructus monitis, sciebat plurimum virium, & commoditatis accessurum ad Ottomannici imperii pro-

pagationem referato trajectu in Italiam. Igitur solutus ab externis expeditionibus, huic unæ conficiendæ majori quàm antea sedulitate vacavit: quocircà increpabat Reipublicæ obstinata consilia disceptandi cum Othomannorum Regum virtute, ac potentia: minabatur incendia, direptiones, & incursus in ipsam urbem: omnesque respuebat de concordia conditiones, quæ liberè totam Insulam Turcicæ ditioni non submitterent. Eatenus viguerat reconciliandæ pacis negotium, quod superioribus annis susceptum in sequentibus ex armorum eventis, modò infaustris, modò prosperis, vel dissidebat, vel variabat apud Turcas. Liceat hoc loco deducere ab exordio, qui fuerit Veneti Senatus in retinenda pacificatione consensus: & quæ in ea dissolvenda Turcarum perfidia; quæve contra jurâ gentium plusquàm immanis barbaries.

Anno MDCLI. Orator Gallus immorans Byzantii Patres admonuit, quanta esset ejus temporis Primi Visiri propensio ad pristinam animorum reconciliationem. Ideò deligerent Virum, qui missus secum asserret condiciones ad eam stabiliendam opportunas. Nullus erat in comitiis, quin sciret à Barbaro iniqua peti, atque intoleranda; nihilque omninò ex dignitate Reipublicæ: attamen ne viderentur optatæ tranquillitati refragari, & par-

fragari , & parvi facere amica Regii
Oratoris officia , Joannis Capellii sequuti
sententiam , statuere Legatum Byzan-
tium dimittere , ipsumque Capellium ;
qui , non multò ante functus eodem mu-
nere , Turcicæ Aulæ mores probè nove-
rat . Vir ætate provectus , vivido ta-
men , magnoque animo pollens non ab-
nuit injunctam sibi profectionem , quam
studio juvandæ Patriæ lubentissimè su-
scepit . Impetravit ab urbe discessurus
habere penes se Joannem Baptistam Bal-
larinum , expertissimum ex his , quæ
gesserat cum Superantio in pertractandis
hujusmodi negotiis , summa prudentia ,
ac dexteritate . Post anni decursum ,
mense Januario appulsus Ascrivium ,
longam ibidem traxit moram in expecta-
tione mandati de proseguendo itinere :
quo tandem à Visiro transmissa cum fe-
stinatione illud confecit . Porro vix ocu-
lis intuitus est Byzantium , cùm protinùs
inaudit de edicto citissimi recessus ; ut
unde venerat , eò continuò remigraret .
Impiæ jussioni paruit ; sed ubi in reditu
Hadrianopolim tenuit Nonis Februariis ,
triennio post quàm Venetiis excesserat ,
vidit se , & suos , clauso transitu , con-
stringi custodiis . Has illæ infidæ gentis
perpeffus molestias incredibili patientia
Senatus commovit animum , qui gravi-
ter affectus misera sui legati conditione ,

dum eam solari desiderat, occasione vacantis Procuratoriæ dignitatis usus, cunctis suffragiis illum eo amplissimo honore, & nomine affecit. Interim suis in ædibus obsessi habebant ad limina inexorabiles custodes: attamen per fidos conciliatores non intermittebant officia, & mentionem pacis, quæ cum Reipublicæ existimatione confici posset. Sed quæ pacta honesta, & laudabilia proponebantur, ea Bassarum fastus, ac superbia, tanquam cassa, vanaque absque Crete deditione, vertebat in ludibria. Hic deplorandus rei gerendæ status adeò torquebat Capellii animum, ut natura, & valetudine imbecillis in Ballarinum obeundæ legationis curam deponeret. Quod ex mœrore levamen in Capellio approbavit Senatus: & in Ballarino publicè laudato confirmavit delegati muneris facultatem. Onus subiit qui patriæ totum se devoverat plenum difficultatis, ac timoris, quo tempore ingentes tumultus gliscebant inter primores Aulæ Purpuratos; verùm trucidatis discordiarum auctoribus Primum Visiratum consequutus est Mehemetes Chio-purlus, homo callidus, militari fastu ferox, & qui variis consiliis de imperio dilatando gratiam à Mahometo inierat. Tunc summè infensus Venetis visus est, cum Ballarinum arctiori custodia teneri voluit:

voluit : cujus tamen virtus Barbarum
 mitiorem sibi reddidit . Itaque evocatus
 ad colloquia consensit , Venetias lingua-
 rum interpretem Paradam nomine pro-
 ficisci , ut renuntiaret Senatui Visiri men-
 tem ; & quo pacto redimenda esset con-
 cordia . Hoc ingenio tempori inservie-
 bat ; quia procrastinando poterat con-
 tingere Reipublicæ aliquis fortunatus
 armorum eventus , qui pacis condiciones
 nimium rigidas mitigaret . In his disce-
 ptationibus , & angustiis sex effluxerant
 anni . Interim labente MDCLVII. , qui
 missus fuerat , retulit Senatum , ejus pa-
 cis se profiteri studiosissimum , quæ sus-
 picione careret , nec officeret Reipubli-
 cæ nomini . Reddito hoc responso ex-
 canduit Visirus , iratusque Ballarino ,
 furere cœpit verbis , & minis : sed hic
 imperterritus tam dexterè illius ferita-
 tem lenivit , ut inter Prætorianas acies
 honorificè exceptus , ejus jussu Regem
 comitatus sit Byzantium redeuntem . Per
 internuntios sæpè , ac frequenter illos
 adibat , quos pronos ad tranquillitatem
 agnoscebat : multas subinde acerbitates
 tolerabat à Visiro , qui omnes honestæ
 pacis condiciones averfabatur , & hanc
 unam sæpiùs repetebat : dedendam esse
 Cretam : & occupatas in Dalmatia ar-
 ces restituendas : hisce iniquis postula-
 tionibus integro triennio exagitatus quo-

tidie sibi metuebat carceres , & necem ;
cujus extremam horam plerumque ex-
pectabat , quæ tot miseriis circumdatum
exolveret . Hadrianopolim denuò re-
greditur Barbarus Imperator, quem juf-
fu Viſiri ſequutus Ballarinus ſemper in
ancipecti ſuæ vitæ caſu . Excurrebat an-
nus MDCLX. qui Mehemeto ultimum
dierum clauſit : & Ballarino aditum ,
aperuit ad conſequendam inter ſuos ci-
ves ſupremam dignitatem . Vacabat
tunc temporis Magni Cancellarii Offi-
cium, & Reſpublica, quæ cupiebat labo-
res , & patientiam benemerentis mune-
rari , eo præcellentiſſimo titulo majori-
bus in comitiis illum condecoravit ; qui
gradu ſenatorio par , licet abſentibus
non conferatur, tamen pro præſente fuit
habitus , qui ſuis meritis ante omnium
oculos obverſabatur . Pro collato mune-
re ſuis in epiſtolis ad Rempublicam ſe
quàm maximas ei agere , habereque
gratias profeſſus eſt ; & eveſto ad primi
Viſiratus apicem Achmeto Mehemetis
filio , delatum ſibi honorem à Republi-
ca expoſuit : ille benevolè auditum re-
miſit cum ſpe majoris lætitiæ : de pace
intelligi voluit : ſed callidiſſimi hominis
vaſtrities Ballarinum haud latebat . Re-
vertentem Tyrannum Hadrianopolim
ſequutus , ut quacunq; duceretur præ-
ſtò eſſet ad procerum , Viſirique nutus
dies

dies noctibus conferendo , omne tempus in
tuenda Reipublicæ indemnitate impende-
bat , ægrotante Capellio : & probabat
pacis conventionem à victis , & à victori-
bus necessariò exquirendam esse . Sic agen-
do curabat vel inire rationem , vel inveni-
re modum honestæ pacificationis : & hæc
tunc erat in spe , cùm ubique adversa
Turcis evenirent : verùm, quia temporis
processu , quæ sperari poterant , omninò
videbantur sublata ; contraria fata Creticis
rebus extremum prænuntiabant excidium .
Cui , ne superstes esset Capellius . qui sa-
tis multas æumnas exantlaverat , mors
eum ab hujusmodi curis , & molestiis li-
beravit , pridie Nonas Novembris MDC-
LXII.

Sublato è vivis Capellio , qui pietate in
Deum , charitate in Patriam ita excellue-
rat ; ut pro illa obire graves perpeffus
æumnas sub extero cœlo dulce , & deco-
rum duxerit ; Ballarinus ad omnia inten-
tus , atque agendo indefessus nihil de iis o-
mittebat , quæ æquis rationibus in honestas
pacis conditiones pertrahere possent Visi-
rum . Verùm cuncta sua officia jactabat in-
cassum apud hominem ferocientem quoti-
die magis , ac semper iniqua postulantiem .
Affectabat laudem perdomitæ Cretæ , &
se auctore propagationem Turcici Im-
perii :

*Senatus Marchioni Villa summam peditum Praefecturam decernit: hic
 lustrat Dalmatiam, Praefide
 Catharino Cornelio.*

Intercipiuntur Turcici commeatus.

NObis redeuntibus ad summam rerum gestarum hoc anno se offert anxia Senatus cura, & sollicita festinatio comparandi necessaria ad tuendam Insulam, in quam Achmetus transfuturus ferebatur, evocatis ab omni Oriente copiis. Hæc erat universæ Christianæ Reipublicæ propugnaculum; de ejus securitate, eo defenso, proculdubio agebatur: decrevit igitur externam opem iterum conquirere; Italos Principes excitare, ut in communes hostes confurgerent, jungerent arma, & eorum conatus reprimerent, qui provehendæ suæ tyrannidis cupiditate exagitati, Italiam cum primis subigere cogitabant. Per Legatos exposita periculi, & indigentiae causa, Pontifex in suis ditionibus, quatuor peditum milium delectum haberi permisit; Imperator alios conscribi suis in provinciis: Confines Principes, & plures in Germania Dynastæ, milites, arma, & seipso in ductores obtulerunt. Quærebatur interea, qui summi, consilii, & maximi animi paratis exercitibus imperaret.

ret . Contigerat tribus ante annis illius disceptationis abolitio , quæ de Cyprio Regno , diù calamo , & atramento agitata fuit inter Venetam Rempubicam , & Allobrogum Duces : & quòd hac tempestate Taurini Orator Venetus esset Catharinus Bellenius . Hujus itaque solertiæ , & initæ concordiaë quæstus extitit Marchio Ghironus Franciscus Villa , vir , id tempus , tùm in re militari exercitus , tùm gerendorum bellorum usu apprimè peritus ; & quo nemo expectatior , exoptatiorve hac urgenti Reipublicæ sollicitudine . Nonis Aprilis Venetiis comparuit , & coram Patribus visus perhumaniter de summa belli disseruit ; suumque studium , operamque in eo fideliter administrando pollicitus , meruit stipendia , quæ ampla Bellenius cum illo pepigerat ; ac totius peditatus cûram sibi uni creditam , nullius , præterquam Veneti Imperatoris , addictus arbitrio . Interim Andreas Cornelius cum classe maris pererrans XI. Kal. Julii à Præpesinthe , hodie Argentiera (ubi Bonfilius Patavinus à sua familia accepto nomine equestris alæ ductor immatura morte abripitur in summa strenui bellatoris expectatione) factus certior , in Lesbio portu manere hosticam , discussit omnem moram , seque eidem conspiciendum dedit . Sed

illa intuita supervenientem maxima cum trepidatione Tenedum festinavit : & à persequente se minùs tutam ibidem credens , ad priorem rediit stationem munitissima arce defensam . Cornelius ex hoc ab hoste captandi effugii circuitu , occasione capta , pluribus onerariis , quæ annonam , & armamenta vehabant , potitus est . Duas quoque triremes spontè deditas recepit ; alteram à Samo , alteram à Lemno deductas ; hanc Nauplii ; illam Chalcidici Bejorum . His ad rapinas cum epibatis egressis christiana mancipia concordì libertatis voto , nunquam intermisso remigandi labore , à captivitate se subtraxerunt . Villa per hoc tempus in Dalmatiam devectus , cum Catharino Cornelio , oppida , & arces tum terrestres , tum maritimas accuratissima indagine exploravit : quod tum Præsidi Provinciæ suggererat , Venetias reversus Senatui postea renuntiavit , scilicet quid aliquibus vel minuendum , vel addendum esset , ut adversus hostium impressiones redderentur tutiores . Demum Zacynthum delatus , receptusque à Marco Lauretano , transit secunda navigatione in Orientem . Paron insulam octavo Idus Decembris tenuit ; in qua Cornelius , & alii armorum duces de bello agitabant consilia : & ille opportuno
suo

fuο adventu omnes hilaravit: ibi jam pridem commodum accesserunt Alexander Molinus navium Præfectus, atque Archithalassus Justinianus; postquam omnis eorum cura apud Sphagiam insulam Peloponnesi, & in Cydonio freto, ne suppetiæ ad hostes transveherentur, propter pertinaciam ventorum, & effusam diu, noctuque tenebricosam caliginem in irritum cecidit. Simul in unum coactis indixit Villa, iustrandam esse universam militiam; quo facto, eaque in acies disposita, numerata sunt octo millia peditum, & equites mille octingenti: in portu verò parata classis navium quadraginta, triremium sexdecim, cum quinquere mis quinque: quam læti conficendunt, & Paro solventes leni vento Præpesinthum applicuerunt.

His gestis præsens expletur annus: cuius porro initium infida aperuit, funestavitque Bernardini Calixti proditio, qui pedibus appensus execrandi sceleris poenas dedit: surripuerat à secretis occultas notas, ut paterent Turcis Veneta rerum gerendarum arcana. In Dalmatia incursiones, & prædæ: quas tamen cum multo scœnore reposuerunt Morlachi Bosniensibus; quorum ductore Philippovicchio Dalmatæ gentis hoste acerrimo turpiter fugato; Castrum Caormanum direptionibus, & flammis graviter vastarunt.

*Varia eventuum vicissitudines terrestres,
ac maritime.*

MDCLXVI.

IDibus Februariis, universa classe Præ-
pesintha collecta, & omnibus rebus
ad navigandum comparatis, Duces con-
siliū ineunt, quam in expeditionem ea
dirigenda esset. Censuit Villa in aliquam
ex majoribus Ægæi insulam promovenda;
& inde relictis militibus, Turci-
cam insectandam; hostes ubique infestan-
dos ad intercipienda subsidia, quæ prope-
diem dicebantur afferenda Cydoniis. Cor-
nelius, productis Reipublicæ mandatis,
retulit in Cretam eundum, ut omni abje-
cta cunctatione, Candiæ opitularetur à
Turcis validissimè oppugnandæ. Iter ten-
dentibus in Cretam nuntiat fama, Hoc quin-
centum piratam unica sua navi immensæ
molis intra Chii euripum triginta quinque
hostium triremes, occiso Bassæ filio, &
ipso saucio, magna ex parte dissipasse. Ve-
neta porrò Classis VII. Kal. Martii, è pro-
pinquo vix Cretam lustravit oculis, quan-
do improvise suborta tempestas eidem &
obductum nubibus cælum noctem repente
offudit. Tum reboante tonitribus aere,
turbatum mare elatis in cælum fluctibus
Classi exitium minabatur, quæ jactata,
& dispersa in arenam, scopulosque im-
pe-

pegisset, nisi Suda Arx accensis ignibus
navigantium ad salutem iter in Amphima-
lum sinum indicasset. Eo signo velox ab
insidiis exiit: Turcarum cuneus, ut à
portu illam arceret; at vani fuerunt cona-
tus fuga, cædeque debilitati. Interim
cum hostibus æther conjurasse videbatur,
nam largos, & assiduos imbres effundens
nubibus, pelago exemptos vellet undequa-
que aquis inundantibus, terrestri quodam
naufragio perituros. Tandem cessante di-
ludio, Cydoniam versus Villa se transfert,
locum, quem occuparet magis aptum
ad reciprocum utriusque classis commea-
tum exploraturus. Observatus à Turcis,
magno armatorum globo Cydonia erum-
pente, petitur. Ille verò, cui neque vis,
neque ars deerat, eam eruptionem forti-
ter sustinuit, ac repressit; imminensque
fugientium tergis plurimos vulneravit,
cæciditque. Uvertmillerius tormentorum
Præfectus non hac victoria contentus, ul-
teriùs persequutus in fugam versos, ma-
ximum in discrimen incidisset, exeuntibus
ab oppido turmatim, & incondito clamo-
re præsidariis, nisi maturè idem penè ob-
ruto hostium multitudine subvenisset:
qui vehementiùs instantes pedem refer-
re compulit, perterritosque retrusit,
non ausos ampliùs obsistere. Multis suo-
rum in concertatione amissis, & cognito
hostium robore, celeris regressionis in-

Candiam capit consilium : Diam cum applicuisset, ubi Cornelius erat cum reliqua classe; uterque consulto ad ipsam urbem transeunt XVI. Kal. Maji. Facto descensu, extra Candia: moenia locantur castra opposita hostium munitionibus : ex quibus illi quoties erupere, ut Venetas expugnarent; toties rejecti, nec unquam ausi aperto Marte concurrere, quia eorum impetus igne, ac missilibus eminens, gladiis eominus invicta virtute compescebantur. Hæc dum prospero eventu peraguntur, fama pervadit castra, octodecim Punicas naves insulas Cephaleuiam, Zacynthum, & Corcyram infesto animo circuire. Tunc Cornelius moveri castra, & milites in urbem reduci imperat : quippe arma aliò converti oportebat. Hujusmodi recessus, Villæ mœrorem, Turcis attulit hilaritatem: sed erant, qui ex eo Marchioni existimationem elevarent: cui tamen prospexit Senatus, laudata illius virtute, modicis viribus Turcicas propè infinitas sperni, ac obtundi posse. Junio mense Melitensium triremes Diara pervenerunt : at non assignato sibi loco, quem affectabant in Veneta classe, remigrarunt, obtentu affectandi Hispaniarum Regiam profecturam per Italiam Leopoldo Augusto nuptam. his diebus ad eandem insulam accessit Antonius Barbarus honorarii Ducis titulo : & Cornelius, cui cre-

creberrimè nuntiabatur, Turcas nullo impedimento frequentes adire Cydonios cum com meatibus; ad hos intercludendos indixit omnium ducum conventum. Præpessunthi agendum. Tamen, ut constituerat, discedere Dia non potuit, repugnantibus ventis: neque illuc Villa appellere, quem Melos iisdem insultantibus retinebat: quare eo absente consultum fuit, avocare ab urbe Candia pedites, equitesque in decretas noviter expeditiones: factum, prout jussum fuerat à Cornelio; sed quidquid in cogitationem venerat, caruit effectu, infesta ubique nostris fortuna, & Turcis prospera. Navigabat Classis hosticæ occurrens, ut ferentem suppetias interverteret: sed illico horrida tempestas eam à Therasiæ portu summovit, compulitque diù agitatam Astypalææ littoribus adhærere. Hinc retentata navigatione, sensit antea exasperatam ventorum rabiem: intensior Notus illam adeò afflixit, ut in diversum agens triremes, has magno cum periculo Pathmon rejecerit. Postremò in unum collecta, postquam Ægæas insulas quindecim dierum spatio perlustrasset: nullo prosperitatis eventu in Andrio portu VII. Kal. Septembris resedit; incusans querelis fata, quæ quotiescunque aliquam in Barbaros expeditionem susciperet; toties adversus ipsam vocarent ad classica ventos, ac tempestates. In-

Ma-

Maliaco sinu duodecim Turcarum navigia operiebantur tempus cautæ velificationis in Cretam: Cornelius erectus in spem placatæ fortis, confestim ad detrahenda auxilia destinavit Grimanum navium Præfectum: qui audacter progressus, & fortiter præliatus post multam pugnam omnia subegit, suisque religata puppibus ovans Delum perduxit. Hæc inter anni mensis undecimus vertebatur, quo hybernorum necessitas vacationem à bello postulabat; & Villa iter suum Venetias instituebat; at proximè discedenti Priolus remoram fecit enuntiato Primi Visiri apulsu in Cretam. Hoc monitu haud cunctantior factus conscendit naves, & Candiae portum ingressus, sub adventu, magis voto, quàm spe concepto, universam militiam erexit, ac recreavit festis vocibus testantem: quale gaudium ab illius reditu perceperat. Assiduam operam, sollicitamque illicò dedit molendis intra, & extra urbem novis munitionibus: quas contra exteriorem hostem ita instruxit omni ex re bellica disciplina, & apparatu excitatas, ut, rectè dispositis, quæ ad ejus tutelam sufficere videbantur, quoscunque hostiles impetus posset eludere. Verùm cuncta, quæ magno studio, & cura Villa perfecerat, Barotius quidam Cydonius mutato cum Religione in Principem obsequio, sedulo speculatus quæ loca ad occul-

occultandas insidias, quæque ad eruptiones faciendas, ordinatim. Visiro manifestavit: & reverà plurimum laboris virium, & opum in oppugnatione à Turcis esset exhaustum, nisi infamis ille proditor omnia nostrum machinamenta, & astus detexisset.

*Turca Dalmatiam excurrunt.
Ballarini obitus.*

*Candiam terrent infortunia.
Captivitas Ægyptii Sangiachi
Ramadami.*

HOC item anno in Dalmatia Turcæ ad tria millia Jadertinos agros incurserunt: & Morlachi quatuor centum numero ut cohiberent exeursus, obviam profecti; dum cedentibus tumultuariò insistent, dolosè perductos in insidias, qui latebant emergentes partim obtruncant, partim capiunt; paucos à cæde, & à captivitate redemit fuga. Ductor Morlachæ gentis Possidarius accepti damni sarcindi curam, eomplexus, robustam manum Novigradum deduxit in Turcas: cum quibus eò loci pari astu, & improvise assultu dimicavit, magnamque eorum partem oppressit, recepta præda, quæ non modica fuit. Subinde Bosniæ Bassa cum septem pedum millibus postquam aliquot dies Tinianum consedisset, trepido terrore replens

vi ci-

vicina oppida, Spalatum, & Clissam, vagis excursionibus agitabat. Nostri ad omnes hostilium armorum motus intenti, aliquando ex occasione præliantes; folisque velitationibus sic contundunt il-
 lius conatus, ut contractis agminibus Ma-
 caricham peteret. Quoniam verò oppor-
 tunè affuit Cornelius cum classe insultan-
 tis fregit audaciam, & à Turri, cui Gra-
 dz nomen, quam tormentis quatiebat,
 expulit. Hoste longè submoto, biennio
 quievit Dalmatia; nam exercitus collecti
 in adjacentibus provinciis Bosnia, & Al-
 bania, urgente Visiri jussu, transportan-
 di erant in Peloponnesum, & inde in Cre-
 tam; cujus Candix urbis oppugnationem
 sic avidè arripere peroptabat, quasi diu-
 turnam sitim explere cuperet. Alsuetus
 tamen nectendis fraudibus profitebatur
 non abhorre à concordia cum Republi-
 ca; licèt, ut jactabat, illum exasperassent
 transmissæ in Dalmatiam, & in Cretam
 copix, dum pacis intercederet negotia-
 tio. Vocavit igitur ad se (Thebis paran-
 tem sollicita conquisitione milites obtentu
 externi belli) Ballarinum: qui nulla in-
 mora fuit, quin ad iter promptus, hoc
 festinanter arripuerit, quamvis sciret, se
 à Barbaro illudi. Byzantio perhonorifi-
 co Prætorianæ cohortis comitatu, impe-
 rante Visiro, egreditur: Thessalonicam,
 usque progressus, ulterius nequit con-
 ten-

tendere, variis corporis, animique curis confectus. Inde nihilominus voluit abscedere, recusata ad colligendas vires etiam modica quiete; at viæ laborem ita gravem sensit, ut coactus ex morbo Isdini conquietescere, qui vicus Macedoniae est, cognovit se brevi moriturum. Cum igitur de extremo vitæ fato prorsus ageretur, Joanni Baptistæ Padavino affini suo, & assiduo in utraque fortuna socio, res publicas enixissime commendavit: ipsumque non rogavit tantum, verum etiam obsecravit, ut Senatui referret, nullam in eum irrepsisse torpedinem, qui multas passus contumelias, duros carceres, difficilesque peregrinationes non modica statuisset documenta suæ fidei in Rempublicam; & quo perseveranti studio illius asserendæ existimationi, ac tranquillitati se totum addixisset. In hæc ultimum suæ vitæ diem clausit, oblitus res proprias componere, quia nihil magis volvebat animo, quam Religionis, & Patriæ fortunas. Quanti eum fecerit Senatus, & sibi quàm charus fuerit, mœrore funeris indicavit: quod publico sumptu curavit; iusta solvit coram Duce, Senatu, Principumque Legatis, & laudatum nomen mandavit æternitati, atque in Dominicum filium, æquata ejus ætate paternis meritis Magni Cancellarii transtulit dignitatem. Ballarini obitus non tam domesticis, quàm

quàm ipsis barbaris lacrymas expressit; ac præcipuè Visiro, qui ejus in agendo constantiam, tuendaque Reipublicæ majestate, nullis unquam concussam adversis, valdè admiratus est. Contigit quidem difficillimo Reipublicæ tempore: quo & alia supervenere miseranda: vehementes ventorum flatus invicem præliantes Candiam plurimùm exagitarunt: terruerunt tonitrua, & fulgura, inter quæ duo magno fragore displosa fulmina; alterum turrim Divo Francisco sacram penetravit, perque templum serpens dicatam eidem supellectilem combussit; & mortuorum sedes contrivit: alterum castelli Laternam discussit. A sævientibus noctu procellis navis commeatibus plena in ipso portus ostio demergitur: aliam pari discrimine, quæ ignara successus priorem veluti scopulum offendit, mare suis voraginibus absorbet. Hæc omnia, an fuerint impendentis calamitatis signa, adeò suo eventu ventura tempora declararunt, ut non temerè prodigia evenire putandum sit.

Venetiis explevit hunc annum Andreæ Cornelii Classis summi Ducis, & Francisci Barbari ejusdem Curatoris adventus. Hi secum adduxere captivum Ramadamum Ægypti sangiahum; quem superiori anno conantem intrmittere ad Cydonios Ægyptiaca subsidia

viginti tribus navigiis allata, Grimanus, & Molinus navium Præfecti interceperunt. In conflictu cum sæpè obnitens repugnasset, tandem victo proximus, & frustra à Cydoniis triremibus defensus, incendit navigium, quo vehebatur, & clam conscenso actuariolo per intervalla discurrentium navium tentantem elabi, Molini vigilantia remorata est. Eo capto, nullus fuit qui ultra obsisteret: quamobrem ex navigiis, partim à Venetis occupata, partim demersa; & eorum quatuor à Melitenensibus opportuno certamini accessu acquisita, integram fermè victoriam cohonestarunt; ducto præsertim in triumpho Ramadamo. Præter hæc Turcica triremis Christianorum remigantium ingenio Veneto imperatori Francisco Mauroceno Cornelii in locum suffecto, subditur: hanc juxta Polycandri scopulos ad anchoras stantem multis in locis perterebrarunt, quæ cum recepta aqua propè mergi videretur, & minari naufragium, Turcis ex metu raptim exilientibus, captivi obturant foramina, celerique remorum conatu Venetæ classi se jungunt. Maurocenus comiter exceptos donat libertate, & monitus, errare Tureas in scopulis, nullo patente effugio, ad eos in potestatem redigendos mittit Laurentium Cornelium Adriaci maris Custodem, qui, præter paucos, lassis viribus natando.

in

in undis demersos, cæteros captivos abduxit.

Obsessa Candia annus primus.

Hieronymus Javarina Ballarino subrogatus pestilentia in Turcarum castris absumitur.

MDCLXVII.

HUjus anni mense Majo Achmetus cum terrestribus, navalibusque copiis transivit in Cretam. Cydoniam primò appulsus, contemplatus est accuratissimè ejus præsidia, & munitiones, quas firmavit validiùs, & militum auxit incremento; deinde profectus Enandiam, hanc illicò demolitus est: ne, obsessa Candia, suis aliquo sinistro casu perculsis, locus ille superesset ad refugium: atque ob eam causam sublata inde impedimenta contra Candiam explicuit: & ejus instituit obsidionem in valle castrametatus, cui Jophiri nomen; versus mare, ex qua parte putabat impediri posse subsidia ad urbem, non modò circumfessam, sed etiam circumvallatam. Dum hæc ille molitur, & quandoque cum prohibentibus opera pugnat haud prosperis initiis; Villa revocatus in Sabaudiam propter nata dissidia intra finitimos, Zacynthum pervenerat. Illum ne ulterius viam carperet, Maurocenus remoratur: quia deprecante Se-

natu, Princeps ejus dominus ad aliud tempus incœptum iter remittebat, cujus rei certior factus Cretam revisit traductus navibus Octavii Labiæ, quem Patres ad convehendos commeatus destinarent, præ cæteris intrepidè suscipientem onus, & curam difficilis navigationis.

Villa Candiæ restitutus omnium spem crexit comprimendos fore sua virtute conatus, Achmeti. Hujus insidiæ, & militares astus Ducis sagacitatem, ac prudentiam non fallebant. Quamobrem continuò studuit intra, & extra mœnia propugnacula, munitionesque firmare præsidiis, augere operas, & omnia statuere opportuna ad arcendas hostium impressiones.

Candia, qua à Septentrione mare abluitur, continenti situ inæquali adhæret; septem habet propugnacula cæteris majora; & hæc propriis nominibus appellata Sabulonaria, Victurium, Martinengium, Bethlemiticum, Panigrà, Jesus, & Sancti Andreæ: mœnia circumdat à terra longa, lataque fossa, cujus pars adversa valdè munita est; tumulos tenet præaltos suis locis impositos: cæcæ cryptæ excurrunt propugnaculorum latera; sunt in urbe interni receptus, perfugiaque secundaria: ante portas præstructæ moles; semilunaria munimenta; loricae post circuitotum vias; tormentarii suggestus sustinent enormes machinas: &
tan-

tandem in se colligit quidquid est armorum, tormentorumque gerendo, sustinendoque bello opportunum. Ita Urbs rebus omnibus referta; suis confisa ducibus gloria militaris scientiæ præstantissimis, Mauroceno secundum electo Imperatore, Villa martia virtute, & multarum rerum usu summè laudato, militibus paratis ad omnia obeunda pro Religione, & Republica adversus infestissimos hostes pericula, satis videbatur idonea ad repellendas quascumque aggressiones. Jam Visirus XI. kal. Maji cœperat irrequietis aggressionibus Candiam impetere, grandioribus machinis concutere: & cum ea potiri aperta vi diffideret, occultis dolis per subterranea machinamenta evertere, & expugnare. Habebat in castris quadraginta peditum millia: diu, noctuque fossores, & cunicularios octo mille exercebat in attollendis aggeribus, producendisque ad miram altitudinem foveis, ac subtus efodiendis cuniculis; è quibus nitrato pulvere oppletis excitatus ignis, nescius occludi, cum fragore, & impetu erumpens, solum convelleret ab imo; cogeret propugnatores discerptos volare per aerem; ac, ut subitaneis ruinis convulsa mœnia furentes catervæ occuparent, viam ingrediendi in urbem aperirent. Contrà nostri hæud inertes Mauroceni Imperatoris præsentia, atque strenua

Vil-

Villæ ducis solertia confirmati in subeuntes hostes, & molientes ascensum inopinitis eruptionibus ferebantur nullo intrepidi mortis metu, sed vividæ virtutis impulsu alacres, alios cædebant, multos obtruncabant, adigebantque in fugam, quos suorum strages denuntiatione ejusdem periculi terrebat. Hostibus etiam paria referentes excavabant profundiores cuniculos; quibus non tam ex adverso occurrebant effossis ab hoste, quàm subter ipsos penetrando, vi abditi ignis cum strepitu eructantis, superimpositas structiones dissolvebant funestissima operarum laceratione; in quorum capita convertebantur machinamenta. Hoc invento ab inferis mutuato, belligerandi igne potius, quàm ferro, usi sunt Turcæ; & ab his instructi Veneti, durante obsessæ urbis triennio. Hæc dum aguntur apud Candiam, Alexander Molinus Diam victor advenit: expugnat in Maliaco sinu onerarias, quas ibidem repererat, instituentes celerem navigationem in Cretam cum annona, militibus, & impedimentis. Aggressus replet improviso metu trepidas, omnesque tumultu miscet, & maxima consternatione. Aliquas tormentis concussas, & laceras profundo merfit; aliquas vi captas suis reli-gatas puppibus in triumpho duxit.

Tunc temporis iterum ab occasu in auxilium venire Pontificiæ, ac Meliten-

tenſes triremes, quarum ſummi erant du-
ctores Prior Bichius, & Balivus à Bene:
Siculæ quoque, & Neapolitanæ, Præfe-
cto Jannettino Doria, acceſſere. Omnes
hilari, ac militari ſalutatione Venetus im-
perator excepit: verùm ab his nihil ge-
ſtum memorabile hac tempeſtate; eorum
excuſus per maria piraticis magis, quàm
juſtis præliis ſimiles fuerunt: nullus ab
eſſe egreſſus eſt, qui obſidionalia Turca-
rum caſtra, aut extructas noſtrorum muni-
tiones inſpiceret. Sed cogitantibus abire,
eò quòd nulla in promptu eſſet pugnan-
di opportunitas, ac ſcirent, Candiam in
extremum penè periculum adductam;
Villa renidens, Bichio, & Doriæ retu-
lit, non eſſe defuturas occaſiones, ſi vel-
lent iis accedentibus occurrere: ſiquē
deſcendiſſent in caſtra, aliud de Candia
ſtatu iudicium laturos; irent igitur, quia
Veneti talibus non egebant auxiliis. Unus
Arcurtius Gallus Eques Melitenſis, &
decem ejusdem Ordinis præſtantiffimi
juvenes, cum ſuo comitatu exilientes è
navibus non pauca martialis militiæ de-
dere ſpecimina. Hæc inter propugna-
culum Panigrà dictum, cujus Viſirus ſua
præſentia moliebatur expugnationem, pri-
mos ſuſtinuit impetus, qui à noſtris au-
daci, fortique animo repreſſi fuere: &
per eos dies Julii menſis extremos Hie-
nymus Javarina à Senatus Secretis Balla-
ri-

rino subrogatus Candiam pervenit : qui accepta ab hostibus fide Jophiri fluminis ostium ingreditur ; exceptus à Visiro cum honore , tanquam missus ad paciscendum ; & jussus commigrare in domum tutò sibi præparatam , comitem habuit Padavinum , ut instructus de his , quæ à Ballarino ille exceperat , Reipublicæ magis profutura , ex Senatus mandato , eadem pacificationis negotia acturus in medium proferret . Interim Visiri adversus illud propugnaculum furor , ad alia aggredienda , in cæteros quoque Bassas effundebatur . Diurni , nocturnique erant aggressus , & repulsus ; hi sæpius cum magna hostium cæde ; nam quò eniti tentabant , eò festinus properabat Villa cum reliquis copiarum ducibus : Barbarus , Uvertmelierius , Grimaldus irruentibus undique Turcis fortissimè resistebant ; & per omnes numeros singularia militaris disciplinæ edebant specimina . Quæ pars murorum flammifera impulsæ vi corruerat : quod munimentum tormentarius pulsus labefactabat , confestim omnia validiora in pristinum restituta exurgebant ; tantam operum celeritatem obstupefcebat Visirus , & obstinatiùs moles , machinas , & instrumenta aggerebat . Adductis Cydonia quinque enormis magnitudinis bombardis , alterum

invadere jussit propugnaculum , quod fuit Bethelemiticum , cura , & opere Agæ Teſterdari : vehemens , feroxque natura homo ad aſcenſum ſuos minacibus verbis incitabat ; qui parati primi conſcenderant , poſt longam , & cruentam pugnam dejecti fuerunt , & cum deriſu ad repetendas impreſſiones provocati . Tum lapidis fragmetum , evulſum ab impetu exploſi tormenti , Villam in vultu levi taſtu percuſſit : igneus quoque globulus cum ejus pectus ſacra icuncula munitum vix tetigifſet , illam reveritus ad pedes cecidit . Extinguitur pila vitrea Sulphurata Aeneas de Comitibus Patavinus , qui in Sabulonaſiæ propugnatione vigilantem nava-
bat operam . Dum hæc circa urbem ; Maurocenus Benzoniæ triremem emiſit , ut ab oſtio Jophyri amnis infeſtis iſtibus moleſtiam Turcicis caſtris exhiberet : illam ſex aliæ ſubſequentæ , plura Baſſarum tentoria proſtrarunt . Alibi auditur ingens armorum fragor , in Sancti Andreæ propugnaculum Turcas per cuniculos irrupiſſe : quare cito gradu progreſſi noſtri , atque in unum conglobati ſupremæ fortitudinis experimento ad ima devolutis aggreſſoribus , occiſis , fugatiſque , muros excuſſos repararunt , ſolicitantibus operas Villa , & Grimaldo . Verùm quia continuati labores ,
impa-

impacta vulnera , & illatę cędes pręfi-
 diariorum vires , & propugnantium nu-
 merum exhauriebant , Barbarus suade-
 bat evocari ę navibus epibatas ; sed mil-
 le tantum suffecturos ostendebat Villa :
 alii opinabantur fore ętilius expediri
 classem , militibus non diminutam ad
 explorandos maritimos recessus , ut sub-
 sidia , quę magna , & valida adnaviga-
 bant ad hostes , ubique perquisita , in-
 terceptaque surriperet . Has inter disce-
 ptationes , quę frequentiüs propagantur,
 ubi plures imperant , Turcę in ipsum
 propugnaculum denuđ insurgunt ; fossas
 agunt , & muris appropinquare conten-
 dunt : idęd per mille necis discrimina
 deturbare conantur propugnatores ;
 nam ad alias nocendi artes excogitarunt
 atros ignes concipere , quorum fumei
 globi gravi nidore , & pestifero veneno
 infecti , obcęcandi , & occidendi vim
 haberent . Nullo tamen eventu hęc
 agentes ę nostris iterum cum cęde pro-
 pullantur jacentibus sulphureas ollas ,
 saxa , & missilia omnis generis , cum ip-
 sius Visiri periculo , in cuius castra vo-
 lantes pilę fecerunt impetum . Sub hoc
 tempus valentissima auxilia , Venetiis
 comparata , advenit Josephus Mauroce-
 nus suis quinquaginta quatuor milibus , quarum gere-
 bat pręfecturam sexcentos pedites Cę-
 sar ę Germania transmisit . Clemens

Nonus , consecratis publicæ causæ sui Pontificatus exordiis , quinquaginta-
 nummum aureorum millia numeravit :
 professus se nihil prætermisurum in una
 defendenda Creta adversus communem
 hostem , qui ea in potestatem redacta ,
 universæ Italiæ parabat excidium .
 Propterea vigilanter excubans pro Chri-
 stiana Republica , nullis abstinuit im-
 pensis , quin ob terrestres , maritimos-
 que apparatus plurima pecuniarum , mi-
 litumque subsidia ministraret , & Catho-
 licos Principes promoveret ad opem fe-
 rendam Venetis ; qui periculoso bello
 perculsi , si vincerentur , in omnes effusa
 Barbarorum postis inhumaniter desævi-
 ret . Cæterum per similitatem , quam
 de re bellica administranda , exercebant
 Antonius Barbarus Cretæ Præses , &
 Uvertemellerius tormentorum Præfe-
 ctus cum Marchione Villa : uterque , de-
 cernente Senatu , ne latens odium in
 apertum discrimen efflueret , Candia di-
 scessit . Munus , quod Barbarus obtine-
 bat , Battalæ Insulæ Curatori deferitur :
 & Maurocenus suo descensu è Classe in
 omnes obsessæ urbis necessitates incum-
 bendi curam amplectitur .

Jam quatuor menses effluxerant ab
 inchoata obsidione : reliqui tres non
 absimili contentione , ac rabie pugnati
 sunt . Idcirco Maurocenus cognito sua-
 rum

rum virium defectu , majorem ped-
tum , equitumque partem , quos Suda,
Tine , Cytheraque retinebant , ad se
accerfivit : his acceptis, in Turcas pro-
pugnaculo Panigrà inhærentes paravit
eruptionem ; quæ tanto cum impetu
facta est, ut ab ipso incumbentium im-
pulsu lacerati , contusi , cæsi que fue-
rint , modico nostrorum damno . Ex
qua tamen clade ne abirent inulti , ter-
tiò eidem insultant ; & cùm nullum es-
set telorum genus , quod non torque-
rent in propugnantes , in ejus cacumen
evadunt , & quinque affigunt vexilla ,
ululantes , ac si illius potiti essent. Ve-
rùm resumptis animis coram Mauroce-
no, & Villa , audaciùs , atque arden-
tiùs irruunt in obsessores ; revellunt si-
gna ; & ex multis , qui in summum
evaserant , pauciores numero in suas
stationes retrudunt. Hinc denuò erum-
punt fortissimè , & ferro simul, & exi-
liente à cavernosis recessibus igne , ab-
sumunt , ac dissipant conantes vim vi
repulsare . Insanè fremebat Visirus ,
cùm omnia sibi iniquiora succederent :
& quòd usque adhuc propitia fortuna
Venetis arrisisset . Itaque anxiis curis
agitatus , conquirat auxilia datis literis
ad Bassas , ut accelerent collecta in toto
firmè imperio : & componendæ pacis
cupidum se ostendit , illum sequuturus

eventum , quem fors daret . Tunc gra-
vis pestilentia vis , quæ Turcica castra
maximè lacerabat , Padavinum IV. Id.
Novembris oppressit ; quem paucos post
dies Javarina eodem morbo confectus
subsequutus est : horum interitus non
parum afflixit Visirum , qui motus amo-
ris affectu , raro exemplo apud Barba-
ros , iussit ad eorum assecclas omnia red-
di , quæ pro usu , & suppellectili attule-
rant . Hoc anno obstinatissimæ obsidio-
nis primo ex Venetis , cum duobus pa-
triciis Laurentio Pilano , & Nicolao
Justiniano , exhausta cæde varia dicun-
tur octo circiter millia : Viginti septem
millia cum quingentis Turcæ amisisse ,
inter quas , quatuor Bassæ à Visiro pro-
pter militarem disciplinam , ac strenui-
tatem mœstissimè defleti . Tot occiso-
rum numerum habent , qui per singu-
los obsidionis menses , & dies sua confi-
ciunt commentaria .

*Senatus Aloysium Melinum mittit ad
Turcas pacis Legatum.*

MDCLXVIII.

Annus obfesso Candia secundus.

PRæsens annus idem habet à Turcis
certaminum irritamentum , quod
proximè transactus , in propugnacula :
&

& idem exhibet Venetorum constans robur in propugnationibus, tuendo præsertim Panigrà, irritò conatu ab hostibus huc usque tentato.

Nonis Januariis Bernardus Nanius cum navigiis in portu consistentibus vela in Cretam explicuit; & secum traduxit Mutium Matthæum Romanum, quem Clemens destinaverat quingentorum perditum Ducem. Qui quidem Pontifex aliq̃ subinde auxilia contulit, & magnam vim auri erogavit ex collectis, & collatis quorundam Religiosorum Ordinum bonis, Prædecesores suos imitatus, ut redditus pro communi causa adversus Christiani nominis hostes fructuosius impenderentur. Candia cum nova recepisset subsidia, numerabat in censu octo bel-latorum millia: quam tamen summam diminuēbant quotidiani conflictus. Non secus Turcæ ad expugnandas munitiones assidui, & ad repellendas à mari ex-censionēs seduli, quamvis numerosiores, nihilominus invalidi nostris eruptionibus videbantur. Quapropter Visirus, ut occultaret aliquod vafri sui ingenii inventum vel de continuanda obsidione; vel indigus virium de mora injicienda Venetis ad progressus, explicato albo vexillo, ad Maurocenum literas dedit, scriptas Senatui, cui pacis conditiones proponebat. Ille, per Joannem Petrum Cabal-

lum à Secretis , qui cum Javarina in Cretam venerat , eidem respondet : Se ab Senatu talem recepisse facultatem , qualem ipse sciret sibi à suo Rege fuisse impertitam . Patres ad hujus rei notitiam , decreverunt legare virum patricium , qui in spem pacis Turcicam Aulam adiret . Eligunt Andreum Valerium , tunc trium Insularum Præsidem : sed ille legitimè probata excusatione se à munere eximit . Data suffragia Aloysio Molino Equiti ; hunc invenere paratissimum , licet affectæ ætatis , ad quodcumque discrimen pro Republica subeundum . Susceptum legationis onus expleturus , iter , ne minimo quidem spatio temporis interjecto , ita maturavit , ut brevi Larissam Macedoniæ urbem , quæ Regem Turcicum in delitiis detinebat , profectus sit . Visus , & habitus honorificè in ingressu , post exiguum moram mox cogitar inde discedere , & Cydoniam properatè transire , suæque ibidem cum Visiro negotia agere . Senatus , Molino digresso , ejus filio Alexandro Turcis infesto substituit in navium præfecturam Thaddæum Maurocenum : ne illi etiam nunc navalibus pugnis attriti , in Patrem falsis criminibus insimulatum , Barbaro ritu favirent : ideò evocato Venetias Censoriam dignitatem attribuit . Interea Visiro

om-

omnis tarditas, & procrastinatio subjugandæ Candiaë erat odiosa; indignanti, quod, qua volebat celeritate, bellum non conficeret; decrevit igitur totis viribus arcere à mari triremes; ne accederent; ob id in Sabulonariæ tumulis majora tormenta collocavit, quæ nullo tempore intermisso immanibus globis eas percuterent: neque à terra conquievit, quin renovatis conatibus per aggressores, & cunicularios propugnacula toties petita prosterneret. Nostri odorati Visiri mentem, Classem in tutum reductam protegunt à fulminibus: & barbaros astus pari arte deludunt. Per transversa sepimenta ipsis in terræ visceribus actis cuniculis obvii, alios contrà suffodiunt; in cados nitrato pulvere repletos projiciunt ignem, qui succensi tantam flammarum jaculantur vim, ut hostium plurimi, aut semusti, aut faucibus fumo interclusis perierint. Multiplices quoque fuere eruptiones, quas Maurocenus, & Villæ moliebantur excitantes militum virtutem, & constantiam ad exturbandos hostes ab aggeribus, in quos ipsi catervatim sese inferebant, intrudebantque duabus erectis munitionibus: altera contra Sancti Andreæ obstructam portam; altera prope maritimam oram, omni machinarum, tormentorumque copia communitis; quæ grande periculum faciebant propugnaculis. Attamen ex ad-

verſo qui eruperant cum ingenti impetu, & animorum ardore penetrarunt incurſantes acies, & quò gradum promovebant à fronte, à lateribus viriliter ſe geſſerunt multis necatis, & ſauciis. Sed quia pertinaciſſimis animis pugnabatur, plurimi quoque de Venetis lacerati, & occiſi ſunt.

Nocturna in mari pugna cum Turcis.

Durachus Rejus victus.

occiditur.

Viſirus acriter indignatus, quòd parùm feliciter ferrum, ignes, tela, furoremque ſuum in Venetos exerceret, ad alia implacabilis odii facinora ſe convertit. Laurentius Cornelius excubabat in mari cum triremibus ſeptem, Turcis navigiis prohibendo tranſitum, ne ab Cydonia verherent in caſtra ſuppeties. Viſirus ad eum obicem ſibi infeſtiſſimum auferendum totus incubuit: duo peditum millia nocturno itinere, ut celaret arcanum, Galippo Natoliæ Baſſæ tranſmittit, & imperat Rithymnam ire; conſcendere triremes, navesque in portu ſtantes, & militibus ab eo miſſis, rebusque neceſſariis adornatas educere in Cornelias transitionem impediētes; eas per tenebras repentinò impetu aggredi, inflammare, & peſſumdare, minatus vincula, & neceſſe contuma-

macibus ad mandata. Hæc expeditio per secretos nuntios sibi revelata docuit Maurocenum, non esse opus consultationibus, ubi urget festinandi necessitas: ideo ut Visiri cogitata præverteret, ex templo imponit suis triremibus sexcentos præcipui roboris viros, quos Grimaldi experta solertia ex omni militia selegerat; & adulta nocte octavo Id. Martii Diam petit, in qua Nanius ad curam Classis delegatus in locum Battalææ cum sexdecim triremibus manebat. Facto accessu inaudit, sequenti nocte duodecim triremes optimè instructas, ad locum Fodelle nuncupatum, expectari: quare Diam deserit sub tenebroso tempore, & viginti stipatus triremibus Cretica littora excurrit. Eodem ferè momento à Rithymina supervenere hosticæ naves, & cum sua Classe Durachus Bejus insignis pirata: una omnes tanto inconditarum vocum ululatu, fremitu, strepituque bombardarum adoriuntur Cornelias triremes, ut de his repentino incurſu concussis spem victoriæ foverent. Sed intrepide Cornelius discussit impetum explosis tormentis, & nudatis armis, in eo nocturno conflictu (quo nullus alius, nisi præſens commissus in tenebris, legitur atrocior) fœdiſſimè laceravit, & confudit hostium classem. Super his veluti in subsidium advenit Maurocenus, &

magis recrudit certamen cum Duracho. Fortuna varia, modò Turcis, modò Venetis adversa, multiplicem obstinati, cruentique prælii faciem præbebat: cœperant nostros deficere bellica instrumenta, missilia, & fabrefacti ignes; at ex Mauroceni ingenio prosper in obscuro illuxit eventus: tædas, facesque cera, piceque circumlitas succendi jubet; easque secundo vento in classem inimicam vibrari: hoc ille commento vehementer hostes exterruit; qui flammis, fumoque obruti, & impotentes ad extinguendum incendium, sensere nostros instare acrius, irrumpere, invadere navium latera, & obvias puppes conversis proris allidere. Nocte cum hostili classe, cladeque emensa, septem horas pugnatum est, Durachus congressus cum Mauroceno in prælio cecidit: cum ejus Prætoria quinque triremes captæ sunt; una in profundum demersa; semisfractæ, & ferè inutiles quæ se ab acie subduxere; de Turcis valentiores obtruncati, quadringenti, & ampliùs detenti; ultra mille captivi in libertatem vindicati: ducentos Veneti numerarunt interfectos, quingentos vulneratos. Tandem albescentè die Maurocenus cum decrevisset Fodelle castrum adire, & diripere quæ in eo Turcæ magna comæentum, & impedimentorum copia de-

posuerant, ad augendam amplioribus spoliis victoriam, vidit suis votis obistere adversis fluctibus mare tumidum, & procellosum; & Visirus ex specula contra expectationem spectatorem se præbuit infelici eventus: atque in testimonium acceptæ victoriæ à Mauroceno audiit à Dia insula in conspectum oblectæ urbis ejus reditum lætis acclamationibus prosequi, & in sua castra explosa præ gaudio tormenta, non modica damna intulisse. Chiliarca Vecchia cognomine non vulgaris famæ in præsentibello, & clarus ingenio, quo se per subterraneam cavam ab Turcarum ergastulis exsolvit, cum victoriæ nuntio Venetias mittitur: appulit advectus navigio hostium manubiis, insignibusque onusto, & coram Patribus rei benè gestæ felicem exitum exponit. Statim ingens in urbe lætitia, è navibus in portu festus tormentorum fragor immugit: & effusa grati Principis munificentia erga omnes, qui fortiter præliati sunt; ornavit supremæ Classis ducem Equestri dignitate: atque multorum clara facta liberalissimè compensavit.

Catharino Cornelio Classis administrationem Senatus tradit

Villa Candia discendentis vicem S.

Andree Marchioni Mombruna

Galla committit.

Candiam reversus Maurocenus ,
quia terrestribus , maritimisque
curis distentus ægrè poterat ubique & ope-
ra , & animo adesse , Senatus Classis admi-
strationi præposuit Catharinum Corne-
lium ; qui tunc Dalmatæ Provinciæ præsi-
debat . Ille hinc destinatus muneri solici-
tavit suam expeditionem in Cretam mili-
te , commeatu , bellicoque apparatu instru-
ctam ; & patriciis ornatam commilitonibus ,
quibus Religionis defensio , Patriæ amor
cordi esset . Hæc dum Venetiis parantur ,
Marchio Franciscus Villa à Creta suum in
Sabaudiam adornat iter jussus à Principe ,
cui erat mancipatus , illuc quàm celeriter
se transferri : ambiguum est , an ob suspi-
cionem surgentis belli in ea provincia ,
cui maxime necessarius videbatur : an ,
quod magis credibile , ob invidiam turbæ
aulicorum ægrè ferentis præclara illius
gesta in Creta cum egregia fama , &
plausu celebri : verum remotus ab armis
in otio consenuit . Atque ideo nullus ne-
que Pontificis , neque Reipublicæ enixis
precibus locus fuit , ut Candia perma-
ne-

neret eo tempore, quo sua præsentia, & vigilantia certam spem excitabat amolien-
dæ obsidionis. Patres abeuntis adventum
in urbem cum honore excipiunt, illum-
que verbis compositis laudatum cum ré-
galibus donis dimittunt, & Marchionem
alterum Sancti Andreae Mombrunum,
appellatum, sufficiunt, virum armis spe-
ctatissimum, & multæ, probatæque exi-
stimationis in bellis, quibus cum imperio
præfuit.

Per hos dies Nanius dum Candiaæ suo
muneri accuratè incumbit ictu glandis in
capite occumbit: mors hæc Venetias allata
Patres induxit, ut defuncti vices iterùm
Hieronymo Battaleæ committerent.

- *Ducis Bassæ in mari pugna cum Piratis:*
Gallis: cum Vitali, & Lescasio.
- *Leonius navium Præfectus contra decem*
Punicas à tribus Venetis defenditur.

QUatuor Navarchi Galli, duo
Equites, alter de Verva, alter de
Bremonte, & duo fratres Temericorcii
totidem Melitæas naves piratarum mor-
agebant in Turcas. Singuli, ut quisque
suam reficeret, Ion admovent: omni
soluti metu cum sexcentis militibus alii
excubabant in portu, alii ab ejus extre-
ma parte in littus extrahebant navalia
impedimenta. Dux Bassa dum à Paro
foli-

solicitabat in Cretam præparata auxilia, explorata piratarum mora in proxima insula, ad hanc nocturno cursu vela dirigit. Piratæ cùm circa ortum diei conspicerent appropinquantem ex inopinato classem, extemplo promptis animis, & armis accinguntur ad repellendum hostem: utrumque portus latus intortis firmant rudentibus, & binis navibus protegunt: binis aliis custodiunt tentoria. Ubi Classis sub ictu provecta fuit, uno tempore utrinque emissæ est ingens pilarum vis: sed à Bassa, desperato intra portus fauces ingressu, jussa sunt descendere in continentem tria peditum millia: ut illi à terra, ipsi à mari homines Turcis infensos oppugnarent. Terrestrès manus in tentoria irruerunt igni, & inflammaverunt. Maritimæ verò acies quadraginta triremium per ternas vices toto integro die succedentes ad aggressiones conabantur progredi, & naves à portu deturbare assiduò tormentorum fragore, & innumera sagittarum copia. Verùm non minùs respondabant qui erant veluti obsessi pari jaculatione: ingentes contorquent pilas, præcipitique minorum glandium procella prohibent classarios ab accessu. Et in pedestres turmas librata ex majoribus iex ænea tormenta plumbeis globulis inferta, strages accumulanti. Ita confusus, & oppressus Bassa recessit: & Galli duces

ces victores, solis viginti quatuor amissis, nec multis graviter sauciis, cum sexcenti Turcarum cecidissent, illustre facinus ingenti gloria perpetrarunt.

Postremò fortuna visa est respuere constantiam cum Piratis Georgio Maria Vitali, & Lescasio: Bassa lacera resecta classe, & Cydoniis aliquo submisso auxilio, Asianas oras cœpit percurrere, ut colligeret suppetias deportandas in obsidionalia castra. Transiens Mitylenem in duas illorum naves invehitur: qui contrà audacissimè exceperunt accedentem: & continuata die, noctuque per biduum acerrima pugna conflixerunt. Undique infinita propemodùm è tormentis globorum procella excussa est: sed ab universa classe circumventi non potuere imminens fatum evitare. Vitalis bombardæ fulmine tactus vita exiit, & cum eo quingenti perierunt in ipsa navi, quæ unica fuit inimicæ classis ditissimum spoliū. Lescasius cum vidisset hostes in suum navigium propè oppressum insilire; illi ignem admovit nitrato pulvere: & spe fugæ cum se intulisset in scapham, à persequente celoce interceptus est, affectusque vulneribus, raptus in servitutem. Hac parta victoria Bassæ ex navarchis, qui maria, & insulas peragrandò Turcica ligna infestabant, & captiva multa incolarum capita Candiam traducebant æquius visum

sum est in Mitylenæis aquis compensasse cladem, quam antea apud Ion à piratis Gallis acceperat.

Nova alia in mari efferbuit pugna : Venetus Præfectus Leonius cum quinque navibus in portu Hierapetræ obstabat, ne ulla illæ subsidia pertransirent obsidentibus. Ea propter Visirus decem Punicas eò destinat, quæ Venetas inde exturbarent, & everterent, ut non amplius adventibus sibi necessaria ad bellum, essent impedimento. Illarum una Contarenam biremem adorta certamen accendit; utraque inter se commissa pugna, tormentis primùm, deinde cominūs levioribus missilibus, nudatisque gladiis conserens manus, à marinis tandem fluctibus introgressis per rimas absorbetur. Hostilis altera Venetam triremem proximè erat oppressura; verùm hæc generoso ausu tormentario pulveri applicat ignem; qui diffusus etiam in opprimentem, ambas adussit. Leonius tribus aggressionibus à cæteris impetitus, semper strenuè se defendit; tamen ab iteratis ictibus continenter pulsatus summo in discrimine versabatur. Tres interim Venetæ naves opportunè supervenientes illum eximunt periculo; & Punicas cum clade repressas avertunt in fugam.

Non minùs Barbarorum sanguine rubebat æquor, quàm etiam in Candiaë obsidio-

Adione per multas strages, cædesque in-
 secta tellus cruentabatur: nulla dabatur
 reficiendis corporibus quies: die, nocteque
 vel oppugnando, vel repugnando, milites
 in armis ad lassitudinem, interitumque de-
 ducebantur. Turcæ si quâ irrumpere pos-
 sent omnia tentabant, modò aperta, modò
 occulta vi. Veneti in conantes subire, &
 adoriri munitiones adeò æquali studio se
 exercebant, ut nullis non machinarum in-
 ventis supra, infraque terram excogitatis
 parcitum unquam fuerit. Hæc dimicandi
 ratione singuli dies, præter vulneratos re-
 censebant alios ferro interemptos: alios
 tormentorum ictibus prostratos: alios in
 cuniculis igni, fumoque consumptos, ter-
 ræque obrutos, excussos, & strangulatos.
 Verùm multò plures de hostibus, tum in
 subterraneis illis cavernis, tum in aper-
 tis, inopinatisque incursum peribant.
 Hic erat Candia status; de quo dum con-
 sulitur defendendo, modò vires suppete-
 rent, adfuit tempestivè Hieronymus Bat-
 talea rursus ad generalem totius Insulæ
 procurationem designatus: accessit quoque
 Thaddæus Maurocenus, cui commissæ
 erat navium præfectura. Hi duxerunt
 secum peditum tria millia ab urbibus in
 continenti, & ab arcibus evocata mille
 à Dalmatia milites, quos Etrusci, & Pon-
 tificii Duces ductabant. Sub idem tem-
 pus Voluntarii plerique ex variis provin-
 ciis.

ciis viri conspicui, & armis præstantes advenere excitæ fama inauditæ obsidionis, hanc non minùs ut oculis conspicerent, quàm ut in eadem manibus se probarent. Multi mense Novembri ex Gallia Dynastæ, quorum antesignanus Sancti Pauli Comes, cum flore primariæ nobilitatis comparuere mille, ac quingenti numero. Hi partiti inter se eruptiones plerumque usque ad castrorum munimenta audacissimè penetrarunt, plurimis hostium interfectis. XIV. verò Kal. Januarii, tercenti primo diluculo exiere tanta furentis impetus celeritate, ut in ipsa Turcarum receptacula (in quibus Cattrezolius Bassa homo pugnacis inter barbaros ingenii, magnique roboris cum tribus millibus Sabulonariam sollicitabat oppugnationem) sese ferociter intruissent; eorum mille, Bassa gravi vulnere faucio, cæciderint; & reliquos metu perculsos in fugam verterint. Non hac victoria contenti terga dantes insequuntur: & cum, morte contempta, confertissimas acies, ferreos globos, ignes fabrefactos, & sagittarum nimbos parvifacerent, ac impari numero præliarentur; eorum pars major interempta fuit. Non minùs per singulos dies urbis propugnatio absumebat defensores: & cum vulgo cadebant extincti multi Venetorum agminum instructores; machinarum, armorumque præfecti. Quo autem

tem mortis genere, cujusque casus contigerit, quo mense, & die, non desunt auctores, qui hanc summam reponant. Cum duodecim Venetis patriciis, multi præstantes viri, duces, chiliarchæ, centuriones, hoc anno desiderati sunt: Patavina nobilitate conspicui cecidere Petrus Sala, Constantinus Dottorius, Jacobus Venturinus, Marcus Zacchus, omnes à prima ætate per militares gradus ad bellica evecti munia, & contra Barbaros fortissimè pugnantes eum vitæ finem invenerunt, quem gloriosum testantur perennia gestorum monumenta; & amplissima Veneti Senatus diplomata claris laudibus, collatisque honorum titulis commendant. De militibus, decem millia tercenta quinquaginta octo bellica tempestas oppressit. In barathrum præcipitarunt Turcarum triginta septem millia, æterno igni destinata mancipia.

Obsessæ Candia annus tertius.

Pacem à Molino cum Visiro pangen-
dam disturbant auxiliares accessus.

Catharini Cornelii interitus.

MDCLXIX.

Hic annus Candia urbi postremus fuit, & Cretæ insulæ fatalis. Exordium habuit luctuosum, cum ab Turcarum cuniculis, quos nostri fategabant scrutari, ut in eos converte-

rent

rent occultas flammarum vires, erumpentis ignis operum, violentia, concussa que motu terra combusti, & oppressi interiere, quorum unus ex armorum præfectis fuit Joannes Baptista Zacchus Marci superiori anno extincti frater, ingenio bellicosus, vigore animi, atque generositate illustris. Pauci de his, quos e Gallia generis nobilitas, ætatis fervor, & gloriæ stimulus attraxit voluntarios in Creticam expeditionem, rediere superstites ad patrios lares, post data integro bimestri illustria generosi animi experimenta. His decedentibus, alios Nonis Januariis quatercentos Diam attulit appulsa navis ex delectu Equitis Arcurtii: quo tempore tota belli moles erat converta in Sancti Andree propugnaculum; cujus pars vi nitrati pulveris jacebat prostrata, gravi que lapsu ruebant muri, & multi inter ruinas laniatis corporibus peribant. Nostri verò nullo perculsi metu assiduus tormentorum fragoribus urgere hostium munitiones non intermittebant; tubos fictiles igniarios projicere, & vario armorum genere, saxorum, atque stipitum libramentis depellere aggressores. His gestis Visirus ira supra modum æstuans, quòd nihil proficeret, præcipit ab egesta humo in altum attolli tumulos, qui mœnia supereminerent, & sedes essent enormibus machinis; quæ

in

in illis dispositæ irrequietis ictibus fulminarent urbem. Oblessi alios in mœnibus elevant altiores aggeres, & grandioribus tormentis onerati, quæ repererent adversa, & stationibus ipsis damna inferrent. Interim non ignorabat Visirus, undique ab Republica comparari auxilia, & conquiri opem apud Principes, quorum intererat Creticæ Insulæ tuitio; illaque intra paucos dies, tum ab Italia; tum ab Gallia in Cretam transitura militum robore, & navium numero uberrimè instructa. Quade causa Regi suo nuntiat, nulla opus esse cunctatione; sed celeri præcepto: Bassas Hungariæ, Bosniæ, & Albanæ, aliosque per Asiam armorum præfectos cogendos, ut quàm primùm triremes expediant, copias conscendere faciant in eorum provinciis collectas, & festinato cursu transmittant; quia munitissima urbs strenuè propugnata non poterat nisi magnis viribus expugnari. Subinde monitus, Aloysium Molinum Reipublicæ Legatum Cydoniam pervenisse, illicò dimisit viarum custodes, qui illum ad se tutò deducerent; cupidissimus cum eodem transigere: ut si belli fortuna (cujus vicissitudines plerumque incertæ esse solent) in diversum cessisset, haberet unde de se omne dubium tolleret suspectæ administrationis,

nis . Igitur cum Molino egit de componenda pace, & de conditionibus, quæ illam confirmarent . Venetus Legatus prompto animo in ea pacta properabat , assequutus Ballarini propositum : ut Respublica Turcico Imperatori quæcumque oppida, præsentī bello occupata, restitueret, ac nonnulla daret ex permutatione . Et Visirus obsidionem Candiaë solveret , & Venetis cum urbe, & arcibus, quas possidebant, dimidiatum jus esset in Insula . Sed alia ille quæritabat , fortassè ab Senatu non rejicienda ; quia servata Candia, & ex dimidia parte Cretæ retenta possessio, non minimè æquabant gloriæ, quam ex diutino bello conquisierat . Dum talia discutiuntur, & cum spe ineundæ concordiaë, quia Molinus eadem proponebat, quæ Visirus à Ballarino non semel audivisse affirmabat, eo ipso tempore rumor castra pervasit auxiliorum, quæ numerosa mittebant Romanus Pontifex, & Rex Gallus . Ea vox speratam difflavī pacem (quæ postea nobis ex necessitate iniquiori sorte revixit) & excitavit Visirum, ut Cydoniam magis obfirmaret addito duorum millium pugnatorum præsidio : utque Venetæ vires plures in partes divisæ minùs in Creta coalescerent, Dalmatiæ agros incurfari curavit; terreri Ascrivium irruptionibus; & in Epiri oppidum Torone,

ne , nunc Pargam , fieri impetus. Sed Antonius Priolus vigilantī studio excursionē per provinciam actas frænavit : & Epirotici littoris oram ab hostium machinamentis immunem reddidit trium Insularum Curator Andreas Valerius.

Post hæc Visirus adversus Sancti Andree , & Sabulonariæ propugnacula iterum summa vi omne robur admovit : quæ si expugnasset , se tum fore urbis , ac totius Insulæ compotem censebat . Hæc (quæ versus mare protenta tutò submissa auxilia intromittebant) productis usque ad interiora mœnia cuniculis evertere conabatur : attamen in iis tuendis sollicito labori Maurocenus , Cornelius , Mombrunus , & cæteri armorum duces incumbēbant , ut per contrarios meatus deciperent hostes , eorum vires in ipsis caveis eliderent : quod ferè semper fortunatè gestum , incendia , & ruinas in operarum capita rejecit . Cæterum Turcæ fidentes sua multitudine eò obstinatiùs anhelabant agere de copiosis viribus experimenta . Summa igitur vi , eadem sæpiùs petita propugnacula tentarunt diruere , tum globis tormentorum creberrimis , tum muris intra fundamenta perfossis , ut vias sibi pararent , & emergerent ad illa occupanda improvisi . Obiecti neque hostium

numero deterriti , neque trepidi occultarum fraudum formidine , & supra , & infra terram fortissimè luctabantur . Qui de nostris proposuerant pro patria , pro religione gloriosè occumbere , ibi aderant , ubi majus erat periculum . Catharinus Cornelius nunquam recessit à propugnatione munitionis Sancti Andree , quam videbat acriùs à Turcis oppugnari . At dum in reficiendis , quà aperti ruina muri erant , perfractis , ac dirutis sollicitam curam impendit ; casus attulit , pridie Kal. Junii , ut inter alia igniaria missilia ab hostibus emissa , una ex ollis , quæ bombæ dicuntur , prope ipsum concepto igne frangeretur in frusta ; à quibus cum impetu percussus in latere , & vulneratus ita ut intestina effluerent , pius in Deum , & optimè de patria meritis diem suum obiit : commendata commilitonibus , & præcipuè Equiti Grimaldo (cujus in militari disciplina ingenium , ac experientiam magni faciebat) ejusdem propugnaculi custodia , & defensione : nam eo subactò Candia manebat extremum fatum . Ex præstantissimi Ducis interitu doloris plurimum hausit terrestris , & navalis exercitus : Turcæ hilaritate maxima affecti sunt , ac si ipsum cepissent . propugnaculum : Senatus tristi nuntio accepto suum mœrorem ostendit lugubri cultu , quo

funus

funus eidem faciendum cum mœstitia publica decrevit . Eodem infortunio succubuerunt neci honorarii milites Comes Vignola Gallus , & Marchio Borrus . Per id tempus Joannes Maurocenus Candiam ingressus exposuit è navibus Germanas acies , quas in subsidium Bransuichius , & Luneburghius Principes ductu Comitis Valdecensis destinarent ; armaque , annonam , & pecuniam ; quibus rebus obsessis opportunè subventum fuit . Hæc inter de Cornelii morte Venetus imperator duxit, è re publica dari literas ad Aloysium Molinum : igitur per albi vexilli signum petiit à Visiro tutum iter tabellario Cydoniam profecturo . Hanc ille concitato animo transitionem denegavit : dum extincto Cornelio , cujus solertiam , & fortitudinem verebatur , actum esse de Candia sibi persuadebat , & ejus deditio- nis tempus advenisse . Idcirco acriori fervidus ira , denuò tentat perrumpere in propugnacula : in illud Sancti Andreæ omnis furit impetus cuniculorum , machinarum , & ingruentium militum , qui tandem ejus munitionis angulum occuparunt . Complures horas continenter dimicatum est : demùm Turcæ repulsi , & in vallum à Bransuichiis agminibus detrasi , de suis multò plures recensuere o cisos , quàm de nostris .

Experti Maurocenus , & Mombrunus ,
 quòd in illius propugnaculi custodia con-
 sisteret urbis tutela , statuere suas ibidem
 agere excubias , ne improvise excipe-
 rentur hostium fraudibus . Horum co-
 pia quotidie augebatur : unde cum fessis ,
 & vulneratis assidue submitterentur re-
 centes , nullum nostris quiescendi tempus
 erat : & Visirus furenti excitatus rabie ,
 quòd non continuo vinceret , missilium ,
 pilarumque procella nitebatur à muni-
 tionibus deturbare praesidia ; subruere
 mœnia , alios substruere fornices ad tor-
 mentarium pulverem excipiendum , fos-
 sas perducere , ut ad aggressiones sui sub-
 irent milites tecti , tutique ab injuriis .
 Nostri contra , praeteritarum rerum suc-
 cessibus animati , Barbaris paria objicie-
 bant molimina : cum ipsis pugnabant oc-
 cultis ignibus : furiali machinarum ira di-
 lacerabant castra , & inquietabant ten-
 toria . Quotiescumque cominus con-
 gressuri erant , tam se acriter infere-
 bant , ut irruentes in munimenta (Tur-
 cis in ea sibi parare ascensum ruptis obi-
 cibus contendentibus) multi ex conferta
 pugna caderent cruentissima strage .
 Porro Visirus , quibus affluebat viribus ,
 nunquam cessabat ab oppugnando , ratus
 occupare posse urbem prius quam expe-
 ctata Gallorum auxilia accederent : ne-
 que intermittebat fossorum , & cunicu-
 lario-

lariorum operas, non uno in loco, at passim, ac ubique: quare cum eadem in terræ visceribus machinamenta Veneti quoque molirentur, Candia tota foris, & intus erat cuniculata. Octavo Id. Junii adversus idem propugnaculum toties infestatum acriores renovantur impetus, duplicantur tormentorum ictus, & multiplici eructantium de inferis meatibus flammarum strepitu, una erat Visiri jussio, ut illud ab imis radicibus erueretur. Exequitur imperantis mandata obsequentium voluntas: primis incursum propugnantes exturbant: ignis cuniculis appositus violenta vi profiliens cuncta opposita frangit, rimas agit in muris, potiore partem excutit in sublime, & ad irruptiones aditum aperit. Sub ruinis plurimi ultimum invenerunt excidium; Mombrunus vix periculo evasit; Jacobo Contareno Insulæ Rectori brachium fuit mutilatum, & non pauci illustres bellatores vitam cum gloriosa morte commutarunt. Propterea consultum fuit de propugnaculo deferendo; sed non sine ultione, ut Turcis, ne læta ulularent victoria, vires adhuc vividas ostentarent. Quamobrem illos evadentes in summum occupati propugnaculi Veneta tormenta ex adversis tumultis horrida fulmina jaculantia repulerunt, devolutique ad una tres bom-

bardas , quas evexerant , reliquerunt .
Ignes quoque ex abditis caveis non ex-
halarunt innoxii, cùm terribili crepitu
convulsa rudera obrutis mortem simul
attulerint , & sepulchrum . Qua suo-
rum strage Visirus maximè indignatus ,
sed minimè absterritus non cohibuit im-
petum , neque ab occasione violentiùs
invadendæ urbis se continuit . Crevit
gravior , atque asperior oppugnatio ,
postquàm fama pervaserat, Gallica auxi-
lia haud procul esse : nam stimulante
Visiro die , & noctu jugis erat tormen-
torum excussio in urbem ; ignes perpe-
tuò eructabant ab operis multiplici fos-
sorum numero aggestis : atque sæpissimè
exercitus robustior manus frequentes in
munitiones dabat impressiones . Sic il-
le , ut præveniret subsidiariæ opis acces-
sum , impigrè connitebatur , aut Can-
diam vi capere , aut cogere ad deditio-
nem : Obsessi tamen remorantes pro vi-
ribus Visiri conamina , conceperant de
auxiliaribus copiis fiduciam , Turcas
spe sua frustratos obsidionem esse deser-
tuos .

Candiam accedunt Gallica auxilia.

Erumpunt in Turcas tristi eventu.

Ducis Belfortii mors.

NOnis Juniis è Tolonenſi portu Regiæ naves celerrimo duodecimdierum curſu , quem triremes aſſequi non valuerè , Candiam appulſæ , Urbem , & præſidia plurimùm eo adventu exhilararunt . Has duc̃tabat Novaliæ Dux , cui injuncta erat cura militaris excenſionis ; & Franciſco Vindocinenſi Duci Belfortio univerſæ rei maritimæ Præfectura , atque Pontificiæ classi Imperium . Advehebant unà cum triremibus in terreſtrem , maritimamque concertationem ſeptem peditum millia , & equites quingentos : de his exponendis , deque ferenda ope ubi tempus , & neceſſitas poſtulabat , Novalea acturus cum Veneto Imperatore è Prætoria egreſſus ab eo excipitur honorifico dignationis teſtimonio . Sed , ut faciliùs deturbarentur occupantes unius propugnaculi tumultum , cùm opus eſſet majori virium acceſſione , expectandæ erant auxiliares triremes Pontificiæ , Melitenſes , & illæ , quas ducebat Comes Vivona . Ita diſſerebat Maurocenus : contrà moræ impatiens Novalea fretus ſuo peſttri militum delectu , & Belfortii epi-

batis (tanquam non egerent alieno adju-
mento Regiæ cohortes) in Barbaros deli-
beravit perrumpere . Itaque die vigesima-
quarta Junii instructæ acies sub Ducibus
primæ nobilitatis , notæque fortitudinis jus-
sæ sunt noctis silentio sequi viarum gnaros ;
his præeuntibus proximo mane descendunt
in planitiem versus Sabulonariam , cujus
propugnationem Novalea sibi delegerat .
Tum explicatis agminibus , Damperius
inopinato incursu duo invasit receptacula
interemptis stationariis , ac terreas munitio-
nes subvertit : eodem impetu in castrenses
aggeres alter dux Castellanus investus ob-
truncavit incautos , obvios , & repugnan-
tes concitato furore stravit ad internecio-
nem , Belfortius ab aliis stationibus fugavit .
Turcarum vigiles , plurimos neci dedit ,
& acriter dimicando sibi adversos insigni
virtute submovit . Turcæ repentina vi ac-
cerrimè perculsi , catervatim , uti quosque
fors conglobaverat , in suos aggressores
concurrunt , & numero plures confun-
dunt . Novalea inclinantes in fugam ali-
quandiù sustinuit ; & cæteri duces ingruen-
tium hostium impetum comprimere con-
nixa sunt : Belfortius modò laborantibus suc-
currere ; modò hostiles turmas , ubi con-
fertissimæ obstiterant , contendit dispelle-
re , ac tueri suos à circumfusus agminibus
propè oppressos ad fortuiti casus eventum
victoriæ cursu excutitur . Succensus de im-
provi-

provisò in oppugnatis castris tormentarii pulveris cadus exterruit supra fidem milites Gallos, qui opinantes suffossum cuniculis totum solum, quod calcabant, seque erumpentibus flammis iri consumptos, retrò pedes retulerunt omnes, & extra ordinem metu trepidi in diversum avolarunt. Non ulla Ducum vis, non preces potuere sistere, quos pavor, confusio, fuga nimium consternaverant; non Belfortius sua præsèntia, & exemplo invadere manu, consulere meticulosis, conturbatis omnibus imperare; quin in se fugientium, & instantium hostium multitudo conflueret. Propterea sanguine, pulvere, fumoque obvolutus, alieno pavore, & ignavia desertus inter innumeros Turcarum cuneos per ignes, & gladios discurrens, suis hostibus ignotus ita lacer occubuit, ut nullum illius cadaveris vestigium inveniri potuerit. Hic fuit Gallicæ expeditionis infelix exitus, quem Maurocenus præviderat, ac præmonuerat, sed frustra; quia Novalea ex insito gentis more præcipiti, nimisque animoso consilio, suisque tantum viribus exequi destinata concupivit. Dissipatæ acies, fuga magis, quam pugna, reliquerunt in Campo ad stragem, & cædem mille, & amplius viros, & occisos non paucos spectatæ nobilitatis, ac virtutis Præfectos: at instar omnium

Belfortium . Hujus extincti Principis occasus mœrore maximo replevit Senatum ; qui ab imminuta præpotentis auxilii spe , suoolvebat animo labentis Candia hoc esse præhodium , ac portentum . Verùm si cineri Belfortii Ducis tumulum excitare non potuit , ejus tamen memoriæ apud Rempublicam æternùm mansuræ regium erexit cenotaphium . Publico quoque luctu parentavit Catharino Cornelio : & his gestis rerum maritimarum imperium Antonio Bernardo Marcio Procuratori contulit .

Nulla navalium suppetiarum utilitas .

Novalæ ab Creta discessus .

Mirandulani subsidii extenuatæ vires .

HÆc inter fulcabant maria auxiliares triremes viginti novem : septem Pontificiæ , totidem Melitenses , & quindecim Gallicæ , præter Venetas quatuor , quæ illis in navigatione duces præibant . Vincen-tius Rospiliosus Balivus omnium erat Imperator ; Comes Vivona Gallicas administrabat , Melitæus Eques Clemens Accarissus in suas gerebat præfecturam . Clafsis hæc universa quinto Nonas Julii in Diæ insulæ portu defixit anchoras ; & inde Rospiliosus , & Vivona , ægrotante Accarissio , celocibus advecti Candiam advenere . Hos Maurocenus , Mombrunus,

rus, & clari bello proceres multis humanitatis, lætitiæque signis editis complectuntur: qui post exploratum urbis statum in propugnaculis præsertim Sancti Andreæ, & Sabulonariæ à Turcis maximè oppugnatis, Diam iterùm regressi sunt. Virescentibus his recentibus auxiliis ad iram magis incitatus continuò suis imperavit, ut novos deducerent aggeres, cryptas effoderent, in tumulis obsidionalia tormenta singulis horis exploderent, ac per transversa sepimenta in muros, in munitiones irreperent. Tantam suadebat diligentiam; ne cunctando, victoriam, quam de quassata urbe brevi se adepturum sperabat, auxiliares manus eriperent. Plures dies, & usque ad Julii exitum, vario, & obstinato bellandi genere insumpti sunt: quia nostri ad propugnationem expediti, & Ducum aspectu, atque cohortatione excitati, stationes suas quisque occupabat, & necesse despondere animos, cum omnes pro Republica, pro Religione mortem oppetere statuissent, Turcarum irruptiones compescunt igne, missilibus, gladiis; at non sine utrinque jactura, & sanguine: dum dimicantium alii ascendere, alii detrudere adnitentes feralia arma miscebant, & frequentes oriebantur cædes. Præter hucusque gesta, in Concilio Candiaë habito fuit decretum, ut

universa classis auxiliaris , ac Veneta ,
 conjunctis navibus , è Dia in Candia con-
 spectum se daret : & in dimidiatae lunæ si-
 militudinem explicata , signum expectaret
 à Rospiliosi summi Ducis Prætoria ; quo
 accepto omnes uno impetu , & in Turcica
 munimenta majores bombardas displode-
 rent , & acies terrestres in eadem irrum-
 perent . Porro Turcæ ubi viderunt in sua
 damna tot navium , triremiumque puppes
 tendere , illicò cuncta bellica instrumenta
 in appropinquantes contorquent : ac ne
 propè accederent ductos in littoreis ag-
 geribus cuniculos incendunt . Tunc sin-
 gulæ nostrorum triremes , & naves tor-
 menti maximi explosione monitæ , ex-
 templo ingentem pilarum vim per tres
 horas excusserunt , quarum horribilis
 boatus , & fremitus , mugiente ponto ,
 & solo resonante , hostes valdè exter-
 ruit , & immanes globi in castra gra-
 fiantes , flammis , & ruinis multos ob-
 ruerunt . Sed eruptionem eodem tem-
 pore decretam cum decem militum
 millibus retinuerunt . Discrepantes No-
 valea , & Maurocen . postulat
 ex Venetis quatuor . suis præ-
 cederent irrupturis : . am. ad-
 duci potuit , ut urbi p . heret .
 Hæc inter centum , acq . Ger-
 mani , & Galli , aliis su . in-
 unum conglobati exiere , . is

ad exploranda hostium facta, quàm ad manum conferendam, à Turcarum turmis intercepti, ferè omnes obtriti sunt. Ex his, quæ Galli terra gesserant, & quæ mari tentarant classes, ubique audaci animo, sed parvi momenti exitu, & non modico detrimento, cœperunt oblessæ vires languere, Turcicæ verò ferociiores reddi: & auctæ subsidiariis incrementis, quia ab Græcia, & Asia nullo loco infesto mari, Cydoniam commeabant navigia; acriùs in dies frequentabant impressiones: continuabant verberationes, quassatisque aggeribus defensiones curabant amoliri; & sibi aperire accessus non minùs ad Sancti Andree, & Sabulonariæ propugnacula, quàm ad navalia: ut interrupto commercio, nullum ultrò, citròque excurreret auxilium, tum substructis fornicibus, tum tormentario quo erant impediti, ignis, & alia in munitiones convertunt, & paucis diebus genus quàm visum, & in mare versus lam. Comitiis; quæ verò bebant à terra commendavit. Vilius præsens erat, & stationes

universa classis auxiliaris , ac Venetæ , conjunctis navibus , è Dia in Candiæ conspectum se daret : & in dimidiatæ lunæ similitudinem explicata , signum expectaret à Rospiliosi summi Ducis Prætoria ; quo accepto omnes uno impetu , & in Turcica munimenta majores bombardas disploderent , & acies terrestres in eadem irrumperent . Porro Turcæ ubi viderunt in sua damna tot navium , triremiumque puppes tendere , illicò cuncta bellica instrumenta in appropinquantes contorquent : ac ne propè accederent ductos in littoreis aggeribus cuniculos incendunt . Tunc singulæ nostrorum triremes , & naves tormenti maximi explosione monitæ , extemplo ingentem pilarum vim per tres horas excusserunt , quarum horribilis boatus , & fremitus , mugiente ponto , & solo resonante , hostes valdè exterruit , & immanes globi in castra grassantes , flammis , & ruinis multos obruerunt . Sed eruptionem eodem tempore decretam cum decem militum millibus retinuerunt discrepantes Novalea , & Maurocenus .. Ille postulabat ex Venetis quatuor millia , qui suis præcederent irrupturis : hic nunquam adduci potuit , ut urbi præsidia detraheret . Hæc inter centum , ac quinquaginta Germani , & Galli , aliis subsidientibus , in unum conglobati exiere ; at quia magis
ad

ad exploranda hostium facta, quàm ad manum conferendam, à Turcarum turmis intercepti, ferè omnes obtriti sunt. Ex his, quæ Galli terra gesserant, & quæ mari tentarant classes, ubique audaci animo, sed parvi momenti exitu, & non modico detrimento, cœperunt oblesæ vires languere, Turcicæ verò ferociiores reddi: & auctæ subsidiariis incrementis, quia ab Græcia, & Asia nullo loco infesto mari, Cydoniam commeabant navigia; acrius in dies frequentabant impressiones: continuabant verberationes, quassatisque aggeribus defensiones curabant amoliri; & sibi aperire accessus non minùs ad Sancti Andreæ, & Sabulonariæ propugnacula, quàm ad navalia: ut interrupto commercio, nullum ultrò, citròque excurreret auxilium, tum substructis fornicibus, & pulveri tormentario quo erant impleti injectus ignis per decidentium ruderum tumulos ascendentes inmunitiones tormentum unum abripuerunt, & præsidia disturbarunt. Maurocenus quæ viribus, quæ ingenio ad ea, versùs mare tuenda sollicitus curam illam Comiti Valdechenfi, & ejus turmis; quæ verò contra prospectum habebant à terra Equiti Grimaldo commendavit. Visirus interim omnibus in locis præsens erat: igitur adversus maritimas stationes observantem, validum

im-

immisit agmen. Aggressus præsidium primo impetu cognovit, illud expugnatum iri, cui major metus, & confusio, quàm pugna fuit objecta. Dum Comes contendit intrepidè, ne sui timerent oppositos, ex accepto in dimicando vulnere haud multos post dies interiit. Amis-
 sis in pugna dari supplementum oportebat; hoc Maurocenus ab Novalea obtinuit; & ea propugnaculi pars, quam Turcæ nitebantur invadere, strenuè defensa est, quamdiù Galli ibidem habuere stationes. Hoc loco Candiaë res erant, & quia Turcæ novis operibus illam ita seplerant, ut brevè esset ruitura; Maurocenus vocatis ad concilium Præfectoris auxiliariis, & Venetis Chiliarchis, omnium exquirat opiniones: an ad exturbandos hostes ab urbe, qui incubabant, altera opus esset eruptione: quam si probarent, tria peditum millia Gallicis agminibus jungenda offerebat. Dissensit Novalea cum veteranis immiscere tyrones, & gregarios, ostentabat ab eventis usque adhuc satis probatam in urbis propugnatione bellicam Gallorum militum audaciam, & Ducum strenuitatem: omnes fortiter præliando invenisse mortem ferme trium millium strage propagatam: non esse cur ampliùs attriti exercitus reliquias internecioni exponeret: instare, tempus sui regressus in Galliam, quod
 sibi

sibi in Creta assignatum prorogari non poterat. Hæc dicenti, & discessum meditantī summi militiæ Præfecti ponebant ob oculos proximum afflictæ Candiæ excidium, si Gallica deficerent præsidia, in quibus & urbis salus, & universæ Christianæ Reipublicæ tutamentum consistere videbatur. Cū verò nullius acquiesceret voto, & nocte integraltercando disceptatum esset, ex aliorum sententia statuitur: si vires faciundis eruptionibus non suppeterent, effodere intra mœnia recentes aggeres, loricas obducere, tutiora moliri refugia, & donec ab Senatu parata subsidia, ea ducente Antonio Bernardo; & Mirandulæ Principis venirent suppetiæ, hostiles aggressiones remorari tormentis, jaciendorum ignium machinis, districtis gladiis, hastarumque pulsibus retundere impetus. Quoniam verò ad interna opera excitanda impar erat Venetæ militiæ nervus assiduo labore fractus, rogatur Novalea, ut saltem aliquam operariis adderet opem, & augeret robur, quod opus festinaret: sed ille hoc etiam se facturum abnuī, causandocommissi reditus imperium ad Regem, cujus mandatis jam paruerat; & quod ipse per se in suscepta expeditione abundè suo muneri satisfecerat.

Destinato profectiōi die XIV. Kal. Septembris mandavit Novalea recolligamini-

milites; navibusque imponi, præter sexcentos, quibus erat assignata statio, donec alias Venetus Imperator excubias subsisteret. Sic deseritur, cum magis opis egeret: tamen non inops animi, neque consilii disponit præsidia, & ad signum canentis classici quotquot erant in urbe, eo audito promptissimi, sumptis armis, ad loca hostibus opposita concurrerunt. Ita recensuit, ac recognovit, quas haberet vires: porro tam debiles, atque enectas vigiliis, laboribusque, ut ostentatæ pro mœnibus ægrè repulissent inimicos. Cruciabatur prætereà expectatione publici subsidii, quod Marcius Procurator Bernardus Venetiis digressus erat allaturus; quod proximum opinatus, conspectis haud procul navigiis, speculatoria, quam dimisit, retulit, ea esse Mirandulæ Ducis, & Diam prope adventasse: ex quo nuntio suam auxit fiduciam tuendi parumper obsessam urbem. Visirus, cui præsentis auxilii fama pervenerat, & Gallorum audierat recessum, celer in consilio promovit omnia machinamenta in Candiam tum facillimè expugnandam; cujus præsidia erant immiuta, & nondum intromissæ subsidiariæ manus. Idcirco cum potiori exercitus robore in toties impugnatas munitiones redintegrare conatus deliberat. Ex veteranis, qui nuper auxilio venerant, decem millia selegit; sex in Sancti Andree;

dreæ; quatuor in Sabulonariæ propugnacula, qui validissimas darent impressiones. Maurocenus ab nocturno exploratore præmonitus, quæ esset Visiri mens, ex templo hortatur duces, & milites, ut accurata diligentia ea munimenta custodiant, & pugnando edant suprema bellicæ virtutis gesta. Nox tota vigilata est, & nihil prætermisum repulsiandis hostibus opportunum. Ex propugnaculis, quibus Turcæ avidius inhiabant, illud Sancti Andree obtigerat Equiti Grimaldo: qui in ejus defensione attentus, cuncta ex militari disciplina paravit, & ob missilium defectum altum suffodere jussit cuniculum, qui centum sulphurei pulveris cadoc occuleret. Laudatus à Mombruno (ubique excurrente, & indagante, ne quid sinistri ex incuria contingeret) hostem infracto animo expectabat. Alterum Sabulonariæ tuebatur vigilans Imperatoris studium: Insulæ quoque Rector, & peritissimi rerum bellicarum viri in ejus cœnæ custodiam sedulo incumbabant. Adversum hoc propugnaculum vigesima quinta Augusti die post meridiem Turcæ majora tormenta exonerant, quorum vehemens impetus summum præsidariis horrorem incussit: eodem momento, dum perterritos Maurocenus confirmat, ingens etiam strepitus, fremitusque illum admonent Sancti Andree muni-

ni-

nitiones irrequietis bombardarum ictibus verberari. Ubi igitur omnia circum fragoribus, & ululatibus remugiant, à nostris pugna suscipitur, quam Turcæ arte elaboratis ignibus, glandibus, pilis, jaculis, sagittisque deposcebant aggressi Sanctæ Pelagiæ munimentum, quod occuparunt: præfidiarii, pauci numero, non observato Grimaldi jussu, ut post explotos manuales tubos in refugia se reciperent, ab condensa acie, cui repugnare temerè ausi sunt, dissipati, & concisi fuere. Proxima Bransuichia statio, viso discrimine cœpit trepidare. Turcæ verò audaces efferre animos cùm interiores munitionum receptus conniterentur invadere. Sed propius admotos, & conantes ultrà perumpere, prohibuere tormenta in fronte, & à lateribus collineata: horum crebra percussione multi cadebant cæsi, & vulnerati: ac sæviente munitarum glandium nimbo ruebant dejecti à propugnantibus adhuc obstinatissimo certamine. Tandem visi sunt hostes dubiis hærere animis, & abnuere in pugnam rursus descendere: hos ita fluctuantes conspicatus Grimaldus, è vestigio accersitis voluntariis, quibus se subsidiarium præbuit, jussis equitibus desilire in pedestrem concertationem; & vocata in auxilium Meliteni acie, cui plurimùm fidebat, acriter aggreditur, quos etiam Gabriellus Chiliarcha cum

cum suis, & Bransuichiis turmis ferociter invadit. Hinc altera pugna, & quidem tumultuaria; at hostibus valde cruenta, quia undique circumsepti, & innumera globorum tempestate penè contusi, major eorum pars interfecta est, exigua nostrum jactura: & qui fugerant in tentoria omne speraverunt suorum Ducum incitamentum, ut redirent, & prælium instaurarent. Per hæc quædam munimenta à nostris recepta sunt: quædam à Turcis retenta; ea præsertim, quorum prospectus in maritima: ubi eorum multi convenerant, & ingenti suscitato igne aliquod insolitum facinus videbantur molituri. Maurocenus illuc festinato cursu progressus, jubet parato pridem cuniculo injici flammam, qui optato eventu proscissus latam dedit ruinam, & stragem. Visirus ubi intuitus est suos, quos increpabat timoris, & ignaviæ, omni vi, & ingenio ab aggressionibus summoverti, & occidi, totis viribus enititur, ostentata audentibus spe certa victoriæ, in altera Sabulonariæ propugnaculi oppugnatione. Tum experturus quod virium, quod roboris habeat, rursus aggeres subire imperat, molientibus ascensum præmia destinat; recedentibus minatur necesse: omnes hortatur ad pugnam; nulli in castra daturus reditum edicit, nisi expugnato propugnaculo, in quo rerum summa vertebat. Ab initio

com-

commissi conflictus, Barbaris depulso à protectoriis aggeribus præsidio quoddam fortunæ jubar affulsit; hoc tamen meliori fato citò disparuit. Succedunt subsidiarii Galli adhuc manentes in stationibus, & Allobroges: ingruentium impetum fortiter excipiunt: & quos compellebat Visirus, ut audaciùs sese inferrent egregiè pugnata pugna propellunt, mactantque. Cælorum non exiguus fuit numerus: at omnis in bellis jactura Turcis mediocris est: quippe aliis alii integri, & alacres succedebant. Nostreis nihil horum suppetebat; unde magna erat difficultas subrogare defessis, & sauciis sanos, ac valentes. Quæ supervenere Mirandulana subsidia parùm opis attulerant: de mille quingentis militibus sexcenti exscenderant, reliqui variis morbis inter navigandum consumpti perierant, hos paucos Maurocenus statim substituit stationarios in locum abscedentium Gallorum. Hi ab Candiaë castris nocturnè demigrarunt: cum ipsis recesserunt Voluntarii: quingenti etiam à Republica mercede conducti; centumque ex remigibus, qui furtim Gallicis turmis immisti latebant; & omnes ingressi naves Diam profecti sunt. Questis de injuria, & reposcentibus fugitivos, ab Novalea factum ignorante, quadraginta tantummodò restituntur Itali, & Germani, qui ut se omninò occultarent, vel ingenio, vel favore caruerunt.

Can-

*Candia deditio.**Pax.*

MAurocenus multis circumventus angustis, quoniam discedentibus Gallis, Pontificii, ac Melitenses cogitantes recessum Diam proras converterant, sæpius anxius animi volvebat quo remedio deploratis rebus succurreret: quo molimine assultanti hostium potentiæ deinceps repugnaret, exutus externis auxiliis, & omni spe publici subsidii. Habito suorum delectu reperiit quatuor tantum millia numerari ad arma idoneos, & hi quotidie indefessis vigiliis, atque concertationibus imminui. Igitur indicto Concilio vocat omnes, qui maritimæ, qui terrestri militiæ præsidebant, ut proferrent aut voce, aut scripto quæ de præsenti rerum statu sentirent: unusquisque ad sua consilia tendebat. Aliqui enuntiarunt, brevi lapsuram urbem ob propugnantium paucitatem: nullam esse repulsam repetitis hostium aggressionibus: majora labefactata propugnacula, quassa, & penè diruta: à Sabulonaria ad Navalia obductas munitiones; impedita portus commercia: unde maturatò opus esse aliquid deliberare in rerum apice ultima decernendo. Qui fortunam ponderabant eventis, dixere, opportunè cum Visiro agendum esse

de

de Candiaë deditio; ne cum civitate victor hostis alias arces, & insulas interciperet. Nonnulli malebant usque ad extremum spiritum tolerari obsidium, ac sub cadentis urbis ruinis tumulari: non alius finis futurus erat defensoribus illustrior; quamvis fatum appareret è re Principis damnosum: ita Grimaldus cum Minio Conquisitore abhorrens à deditioe, cum proprium sit Turcarum institutum fidem non servare, suadebat traduci in naves nocte obscura, & quieta inutile vulgus, & impedimenta; & in classes omnem militiam: quo facto, tum ignis per pulveris nitrati semitas decurrens cuniculos ubique dispositos uno tempore succenderet: Prosilientes flammæ inopinato, ac terribili strepitu universam urbem concuterent; fumo, incendiis, ruinis involverent: terrerent hostes formidine, & aspectu sibi pro victoria relictum fuisse devastatæ civitatis informe bustum. Mombrunus laudavit fortes animos ad generosum facinus, verum hoc exitu difficillimum arbitratus est: non poterat Turcis urbi incubantibus celari ea transmigratio: ac propterea quod de tacito, nocturnoque trajectu, deque civitate inflammanda, dictum fuerat, vix tutò exequi posse. Huic opinioni favens Maurocenus sua auctoritate; quia pendebat à fortuna semper
ad-

adversa, non minùs discedendi, quàm navigandi securitas; censuit paciscendum de deditioe cum Visiro, quem credebatur pertæsum diutinæ obsidionis, & moræ procul Constantinopoli, ubi illum æmuli insimulabant cupiditatis, & pigritiæ. Tandem sedatis quorundam altercationibus, qui primò ambigebant, Imperatori adhæserunt affirmanti, ex deditioe minus damni, detrimentique publicis rebus importari. Decretum cogente necessitate, visum fuit indicari Auxiliariis hucusque Diæ in portu expectantibus ventorum tempestatem: & cum eis precibus agere, ut, dum tempus est, opem afferant, missis tribus militum millibus, qui ferè totidem adjunctis operariis, in excitandis subducta humo novis receptaculis se exercerent: quo perfugio haud erat difficile Candiam diutiùs servari. Nullum auxilium, nec quidquam aliud fuit impetratum ab iis, qui obtentu sollicitæ velificationis pandere vela in occidentem constituerant. Itaque Maurocenus cùm acriùs per singula momenta urgeretur auxiliorum incertus, aut ab alienis, aut à propriis viribus, cò celerius suum edixit deditiois propositum formula notis exarata, cui cum cæteris Præfectis, & Chiliarchis subscripsere Grimaldus, & Minius, ne ab Imperantis voluntate dissentirent. Hoc capto, probatque consilio dedendæ urbis ad explorandum

dum Visiri animum duo delecti sunt viri prompto ad omnia, sagacique ingenio Thomas Anandus Anglus, & Stephanus Scordilius. His datur in mandatis, ut Quarto kal. Septembris primo mane Jophyritus radentes in hostium conspectum album vexillum extollerent: Interrogantibus quid vellent, se missos dicerent ad paciscendam concordiam. Obvius occurrit Achmetus Aga, Visiro carus; sed illos de pace agentes, non tradita urbe, superbo fastu rejicit; minaturque dira, si rursus sine ejusdem libera deditioe auderent accedere. Illi nihil profectò extimescentes denuò regressi sunt; cum ipsomet Aga colloquuntur; postulant illa pacis pacta, de quibus actum fuerat ab Aloysio Molino Legato: rogant hæc referri Visiro, qui sciret Candiam vi vim adhuc strenuè posse repellere. Attamen si dederetur, quid Visirus ex æquo rependeret, hoc primùm oportebat pacisci. Ad hæc Aga ex mente Visiri retulit, dimissa Candia, Rempublicam optimas securæ pacis conditiones, & æquabilem compensationem esse consequuturam. Super his acturi de concordia ultrò, citròque Palæocastrum usque com-
meabant: verùm quia maritimum illud castrum congressibus valdè erat incommodum, ac plenum periculi, decretum fuit, ut deinceps ii haberentur in tentoriis ponendis ad Sancti Demetrii propugnaculum,

lum, nemine de loco discrepante, neque de Internuntiis Anando, & Scordilio; qui ob ejus viciniam commodius ad Concilium referre poterant, quæ gererentur. Interim Auxiliarii pridie Kal. Septembris contorquentes proras in occiduas plagas Candiaæ vale dixerunt: qui verò ad stabiliendas pacis conditiones à Mauroceno delegati fuerant; & delecti à Visiro Hibraimus Aleppi Bassa, Achmetus Aga cum aliis è Turcarum primoribus, suis in opinionibus discordes plurimum altercati sunt. Turcæ reposcebant bellicos sumptus, exacta ab Ægæis insulis tributa; atque ut vectigales essent Tenus, & Cythera: Clisiam insuper, cæteraque castra in Dalmatia occupata. Nullam dicebant pro Candia posse fieri permutationem, quam Leges Mahumeticæ vetabant, ubi extractæ essent Mesquitæ. Veneti referebant non congruere cum promissis ea postulata; quibus si obstinatè inhærerent, evanescebat omnis transactio: non esse injustum, quod paulò antè Aloysio Molino desponderant dimidiatam Insulam, Enandiam, Cythæum, & Hierapetram, Mesquitas tunc habentes, ubi Candia dederetur: neque alienum ab honesta ratione dari in commutationem quæcumque præsentī bello Respublica in Dalmatia, & Bosnia con-

quisierat loca, & eorum confines agros: hanc petitionem Grimaldus suggesserat. His auditis cum indignatione, & ira nostrum audaciam procacibus verbis deridebant; quod talia temerè præsumerent, quæ non ausi essent requirere, si totus Occidens armatus ad eorum auxilia cucurrisset: nunc agi de oppido viribus, & ope destituto, & penè debellato. Abirent itaque, & nihil sperarent amplius de pace, subigendi victoris arbitrio. Sed Anandus dicta refellens magna animi libertate, & constantia, affirmabat adhuc vires suppetere, innumera parari subsidia, adornari classes, & Candiam de se non pertimescere: Visiro omnia hæc nuntiarent; ne in obstinatis disceptationibus tempus terneretur. Tandem Quarto Non. Septembris convenere, ut Visirus intelligeret, absque aliqua permutatione non esse Candiam dedendam: & Maurocenus agnosceret in postulationibus Turcarum pertinaciam. Nox integra tenuit Concilium variis agitatum sententiis; hæc tamen vicit; ut nihil omnino remittendum esset de præsentis statu, sed cum ipsa urbis tutela, communis salus, & existimatio maneret inconcussa. Postera die quinta ejusdem mensis, diluculo, ad tentoria redditum est; ubi Turcæ aliud opinantes responsum ab eo, quod

quod audierant, superbi, & iracundi
 nostros suis minis territare putabant.
 Exinde ad urbis custodiam sedulò vigi-
 labatur; quia hostes vi conantes extor-
 quere deditionem in munitiones recentèr
 compactas decem majora tormenta at-
 traxere; quòrum ingentibus globis, &
 magni ponderis saxis è mortariis in edi-
 ficia collibratis per aliquot horarum spa-
 tium urbem lacerarunt. Maurocenus,
 ubi insolita machinarum tonitrua fre-
 mebant, ocyùs procurrens duobus è cu-
 niculis, abundantissima nitrati pulveris
 copia infertis ignem admovet, quo illi
 subito eructantes ab internis visceribus
 flammæ; incendio, fumoque involutos
 ab occupatis aggeribus excutiunt alios;
 alios inter rudera præcipitados exani-
 mant. Turcæ hoc moniti experimento
 in Venetis non refrixisse animos, & vi-
 res, ad paciſcendum proniores coivere
 iterùm in tentoria; & cum destinatis à
 Mauroceno, decreverunt Non. Septem-
 bris de dandis obsidibus tribus numero
 ab utraque parte, genere, & existima-
 tione claris; deque conditionibus scripto
 exprimendis. Maurocenus habito super
 re tanta Concilio, statuit illas à Grimal-
 do componi; qui sine mora susceptum
 munus accuratissimè explevit. Inter pa-
 cta, hæc præcipuè exarata sunt. Can-
 diæ urbis deditio in Primi Visirimanus,

cum omnibus, quæ in ea extabant, impedimentis ante belli exordium. Reipublicæ certa, stabilisque possessio littoralium arcium in Insula Spinalongæ, Garabufarum, & Sudæ. Clissæ pariter, & oppidorum cum adjacentibus agris, quæ in Dalmatia, & Albania sibi armis conquissierat. Duodecimo à constituta pace die, adversa tempestate non impedita, demigrarent ab urbe universa militia, incolæ qui vellent; ac quicumque alii in ea degentes, & in naves, triremesque ad littora cum libero appulsu traducendas imponderentur armamenta, omnis generis belli causa deducta in Insulam, commeatus, quælibet impedimenta, resque tum sacræ, tum profanæ ad publicos, vel privatos usus spectantes. Venetæ classes tutissima fruerentur statione in Diæ, aut aliis portibus, donec tempus captarent navigationi opportunum. De captivis libertati restituendis tum esset agendum, cum Venetus Legatus Constantinopolim adiret. Dimittendos fore in pristinum statum illos, qui Reipublicæ auxiliati essent; qui honorario militiæ titulo sumpsissent arma; & qui adversis partibus in bello deservissent, his dandam esse veniam. Hæc præsertim de pace scripta, postquam super singulis habita longa consultatione Visirus approbasset, de obsidibus agi cœ-

ptum

ptum est . Pro Venetis ob fidem dati sunt
 Faustinus Ripa Legatus, Joannes Bapti-
 sta Calbus Conquisitor, & Zacharias Mo-
 cenicus, qui Ducis nomine rexerat Insu-
 lam : & Mauroceno transmissi Beblirus
 Assanus Bassa, Prætorianorum militum
 Præfectus Achmetus Aga, & Gajus Be-
 jus Romeliæ Thesaurarius, omnes magni
 nominis viri . His intra decimum diem
 peractis, & receptis utrinque obsidi-
 bus, Anandus, & Scordilius primo vespere
 ad Visirum profecti humaniter fuere
 suscepti . Salutatus Mauroceni nomine,
 eidem jussit reddi mutuam salutationem,
 & gratulari, qui sua virtute, & con-
 stantia mercatus esset, dedito oppido ad
 extremum proximo excidium, suæ Rei-
 publicæ pacem, & Othomani Regis a-
 micitiā; deinde bina conceptæ paci-
 ficationis exempla, alterum Italica,
 Turcica alterum lingua digesta fuere
 subscriptaque, & regalibus sigillis obsi-
 gnata; postea Visirus dimissos Anandum,
 & Scordilium, vestibus vario textis co-
 lore donavit . VII. Idus Septembris
 divulgatus confirmatæ concordie ru-
 mor, proclamata securitas, & ab armis
 cessatio, extemplo in lætitiæ signum re-
 boare tormentorum fragor exauditur;
 & inter tubarum, tympanorumque
 clangorem, & strepitum personare in
 utrisque exercitibus voces, & plausus

confecti belli, & restituti commercii. Cæterum ad implenda quæ fuerunt statuta de profectioe, singuli Duces, quorum unus Comes Franciscus Sylvaticus, qui Cataphractorum ductor multa dedit prudentiæ, ac fortitudinis documenta, tum ad Cytheram, Cydoniamque, tum in propugnandis ex mandato Panigræ, & Sabulonariæ propugnaculis; atque ita inclaruit, ut Candix civitatis, cum magis fervebat obsidio, Gubernatoris titulo meruerit insigniri; & deinceps ab Senatu ad alias armorum in urbibus Præfecturas promoveri: sedulitatem maximam adhibuerunt: cupidi exire quam primùm à Barbarorum conspectu. Nullus enim expertus se credebat hosti tot antea vicibus in præteritis bellis fœdifrago. Mombrunus, & Grimaldus præcipuè destinati ad accelerandos com meatus summa cura, & ordine intra præfixos dies universam militiam, impedimenta omnia diu, noctuque satagentes in naves imposuere, quas etiam conscenderunt cives, & incolæ utriusque sexus: vestales, sacrisque addicti viri cupientes degere sub miti Reipublicæ regimine, execrando Turcicum, cui proprium est, dedititios pro vilissimis mancipiis habere. V. kal. Octobris tanto silentio fuit deliberatus discessus, remanentibus in urbe duobus Græcis, qui

Pap

Pappi vocantur, Judæis tribus, & una muliercula, ut celeritate haud credibili stupentes Turcæ dubitarent subesse fraudes, adhuc cuniculos, militesque ad inopinatas eruptiones, & ruinas latere. Verum certiores facti de migratione, & quod suspecti doli, machinæ, & fallaciæ omnino abessent, adducunt ad Visirum Pozzoburgium acierum instructorem, qui humili cum obsequio eidem deditæ Urbis claves detulit, atque ea, quæ ex pactis præstanda erant, optima fide complevit laudatus à Visiro, & cum ferica veste sexcentis nummis aureis donatus. Octiduum post, IV. Nonas Octobris, die Veneris in Candie possessionem Visirus triumphantis more ingreditur, qui concrepantibus tympanis, clangentibus tubis, necnon tormentis reboantibus, lætis circumquaque vocibus Turcæ gratulari victoriam, augurari vitam, felicitatem portendere, & in recepta Candia ominari totius Cretæ Othomano Imperio subjectionem. Hæc ultima triennalis obsidii tempestas triginta septem Turcarum millia protrivit. Et Maurocenus, qui arces, & castra, quæ Reipublicæ reliqua erant in Insula Battalæ Legati curæ, & vigilantia commiserat, paratus ad navigandum nuntium à Visiro accepit referentem nullo unquam tempore sancitam pacem fore.

violandam eo incolumi, & stabili in gratia sui Regis, & auctoritate, qua supra ceteros in Aula pollebat. His promissis Venetum Imperatorem in patriam redeuntem prosequi voluit: at quamdiu erit duratura sponsio in unius vita facta, & quæ futuri securitas, nempe apud eos, qui pro nihilo ducunt fidem prodere, in simulatione officii celare insidias, & quolibet obtentu omnes amplificandæ dominationis occasiones arripere? Interea adventum Mauroceni, qui per hos dies xij. Kal. Octob. ab Senatu inter Marcios Procuratores extra ordinem, & supra numerum, fuerat cooptatus, fama præpeti volatu prævenit, & in vulgus dilapsa rumorem excitavit Candiaë deditæ, & pacis initæ cum Turcis. Vox hæc popularis vario affectu accipiebatur: illam alii vanam, mendacem, nullique veritatis fundamento innixam deridebant: alii existimabant non hominum esse, sed potius superum oraculi, neque temerè contemnendam: quod paulò post probavit eventus. Dum enim pro se quisque omnes suam confirmare opinionem contendunt, nuntiæ litteræ afferuntur, quæ rei gestæ seriem exponebant. Maurocenum fatali veluti coactum necessitate, facta Candiaë deditioe iis conditionibus, quæ de Consultorum consilio pro Republica visæ sunt honestiores, pacem cum

Tur-

Turcis transegisse. Atque eo quidem tempore, quo extrema non erant expectanda; quia nullæ ampliùs vigeant vires præpotenti hostium robori pares: hæc quotidie in propugnantibus laceræ, & imminutæ languoribus, cædibusque reddebantur ad repulsandas aggressiones invalidæ: hujus tertii anni asperissima obfidionis acerbitas militum duodecim millia, & sexcenta consumpserat cum duobus Patriciis Cornelio, & Quirino, ac sexdecim clarissimis armorum Præfectis, (quorum nomina ad memoriam posteritatis insignia, summis præconiis ab aliis concelebrata nunquam interibunt,) præter bina Gallorum millia cum Belfortio Duce interempta. Auxiliares classes conspecta urbis proximè labentis deplorata conditione suum maturarunt discessum: festinantis Novalæ exemplo non solum Pontificiæ, sed etiam Melitenses, quorum causa Respublica præsentis bello vexata fuerat. Externæ quoque copiæ ne ruituræ Candiæ obruerentur ruinis verterunt solum. Cum igitur obsessis spes omnis auxiliorum terra, marique occidisset; Turcica classis, cui nemo erat qui resisteret, ultrò, citròque absque metu pervagabatur Ægæum; ac uberes in obsidionalia castra commeatus, & impedimenta convectabat: Veneta subsidebat in portu vacua epibatis, re-

migibusque, qui à maritimis excursibus
 vocati ad terrestres concertationes, &
 opera, deficientes supplebant. At post-
 quam hostis magno virium incremento
 auctus majora cœpit audere facinora,
 munitiora, propugnacula invadere, ea
 insedere, jamque mediam in urbem ir-
 rumpere, tum Maurocenus omnem
 cunctatione marbitratus exitiosam, dedi-
 tionis consilia maturavit. Si hostilibus
 armis Candia subigebatur nullum non
 genus crudelitatis victor Turca exer-
 cuisset in captos: aditus ad effugia, ad
 navigationem libertatem eripuisset; clas-
 sibus interceptis, & maris potitus arbi-
 trio cæteras Mediterranei insulas Za-
 cynthum, Cephaleniam, Corcyram ex-
 terruisset; ipsis Venetis æstuariis in-
 casso pavore. Quare optimo è re nato
 consilio censuit exequi quæ magis vide-
 bantur è dignitate, atque utilitate Rei-
 publicæ: hæc in mandatis habuisse dici-
 tur: ac tempori cedendum cum esset,
 omnem excludere procrastinationem;
 quia vel dies unus intermissus, vel nox
 una interposita, cuncta sæpè perturbat.
 Non à Patribus alia mandata expectare
 potuit, ex distantibus locorum spatiis
 importunè afferenda: non Alóysio Mo-
 lino referre eam, qua opprimebatur,
 necessitatem, Vifro nuntiorum transi-
 tum prohibente. Igitur ad extrema red-
 actum;

actum opportunitas, quæ se objecit publicæ, privatæque securitati, compulerat in deditiōem, & pacem. Hanc Senatus præsentia considerans, ac prospiciens futura, plenis suffragiis approbavit; & Dominicus Contarenius Princeps piè persolutis votis divinitus redditam testatus est. His itaque gestis Franciscus Maurocenus declinata obtrectantium emulatione, & invidia in attributo sibi jure, ac merito Procuratoriæ dignitatis splendore, illustriorem suæ fortitudinis, & prudentiæ famam in omnium voces extendit. Et verò si quis æquus rerum æstimator accuratiùs expendere voluerit conditiones constitutæ pacis, post atrox, & diuturnum bellum, judicabit is, Senatum Venetum non ab hoste hanc accepisse, sed illi potiùs dedisse ..

* Hic extremam jam manum Historia nostra receperat: sed dum quartò illam mandari typis intelleximus; si nobis longo jam senio confectis, vires, & anni suppeterent; narrationem nostram, quam Pax quindecim ab hinc annis cum Turcis inita clauferat, recens adhuc in eodem instauratum bellum produceret. Argumentum, quod maximarum rerum refertissimum futurum credimus, hoc est

Veneto nomini responsurum, post nos venturis dimittentes, belli tantummodo causam, & occasionem summis, ut ajuht, labiis, delibamus. Causa: non aliena invadere, sed fœdifragum toties ulciscendo hostem, sua sibi repetere, & vindicare. Occasio: Germanorum, & Polonorum junctis viribus, soluta ab arctissima obsidione Vienna Austriæ, quo nã Superi indulgissent, protinus Italorum, & primis Venetorum cervicibus institisset immanis furor. Divina itaque, plus quàm humana ope libertatis, ad Sacrum cum Leopoldo Cæsare, tanquam Regnorum Hungariæ, atque Bohemiæ, & Arciducatus Austriæ Domino: necnon cum Joanne Polonorum Rege III. Regnoque invitatos, tertios accedere placuit. Fœdus autem iis conditionibus, eaque lege sancitum est; & in manus Innocentii XI. cujus ope, Divinitatis vicaria, steterat elapso anno Christianares, partium jurejurando firmatum: Ut scilicet Cæsar in Hungaria: Joannes ad Podoliam, & Ucraniam terrestribus exercitibus rem gerant; Nostri verò Dalmatiam copiis adeant, & Mari validissima instructa classe incumbant. Cæterum quidquid arcium, & regionum, cuique fœderatorum in his bellis cessarit, sua sui habeant, & cuncta in priores possessores concedant. Maxima igitur

tur parandæ validissimæ classis Senatus cura; quod tanta animi, & operis magnitudine, & tam brevi temporis intervallo aggressum, & expeditum est, ut suis populis amorem, exteris admirationem, hostibus terrorem, nec quidem panicum excitaverit. Nec minor pro gerendis in Dalmatia rebus sollicitudo; unde iusto exercitu jam comparato, & in hostes finitimos proximè educendo, præclarum aliquod facinus præstolamur, quod exordia Principatus Serenissimi Marci Antonii Justiniani totius Reipublicæ consensu, & bono, ad summam Dignitatem evecti, felicissimè signet. Classi autem universæ, summæque rerum idem, qui aliàs, Franciscus Maurocenus D. Marci extra ordinem Procurator, tantoque non impar oneri summa de more auctoritate impositus; qui dum nos hanc supremam manum operi nostro imponimus, suam magno demandato muneri prosperè admovens, septemdecim dierum acri cum defensoribus Turcis contentione perducta, Leucade insula, & arce hujus nominis munitissima, vulgò Sancta Maura, potitus est, quam ab ora Epyri occidua, ubi olim Acarnania, nunc Ducatus, seu Despotatus, angustum adeò fretum dirimit, ut ponte continenti jungatur. Et hinc reclusus ad majora aditus, quamvis hujus

loci adeptionem inter non minora ponamus , quem post , vel illam ad Echindas altero ab hinc sæculo insignem partam victoriam , vincere , sed improspere , & inutiliter nostri tentaverant.

F I N I S.



JOANNES BAPTISTA VERUS.

ANAGRAMMA PURUM.

NOBIS UNA PATES, VERITAS,

Huic tanto sacrum Numini
Sit; quod debemus Patriæ,
Stylo veraci proditum.



RERUM VENETARUM INDEX

LIBRI PRIMII.

A.C.

536. **R**es gestæ sub Tribunis. pag. 2
 697. Ducum origo. 4
 725. Prima Venetorum Ducum expeditio ad Ravennam. 6
 737. Bellum inter Heraclianos, & Æquilios. 8
 756. Conjuratio Gallæ in Theodatum Principem. 8
 773. In Longobardos expeditio. 9
 802. Civiles Venetorum tumultus. 11
 809. Bellum Gallicum cum Pipino. 14
 827. Bellum Saracenicum primum. 17
 830. Curicta insula expugnata. 18
 835. Carossiana conjuratio in Principē. 19
 839. Prima in Narentinos expeditio. 20
 840. Bellum Saracenicum secundum. 20
 864. Secunda in Narentinos expeditio. 21
 867. Bellum Saracenicum tertium. 22
 881. Comaclensis pugna prima. 23
 887. Tertia in Narentinos expeditio. 24
 903. Hunni à Venetis victi. 25
 932. Comaclensis pugna secunda. 26
 944. Impiæ finitimorum insidiæ repressæ. 27
 975. Cædes Petri Candiani Ducis. 28

997. *Histria, & Dalmatia in ditionem receptæ: eversæ Narentini.* 30
1005. *Bellum Saracenicum quartum.* 33
1015. *Pugna cum Adriensibus prima.* 34
1023. *Bellum in Murcimirum Liburnicæ Regulum.* 34
1050. *Prima Jaderæ defectio.* 35
1080. *Bellum Normannicum primū.* 36
1099. *Bellum Syriacum primum.* 37
1100. *Bellum Normannicum secundum.* 40
1104. *Bellum Syriacum secundum.* 40
1110. *Bellum Patavinum primum.* 42
1117. *Jaderæ secunda defectio.* 42
1118. *Bellum Pannonicum primum.* 44
1122. *Bellum Syriacum tertium.* 46
1125. *Bellum cum Græcis. Imperatoribus primum. Jaderæ tertia defectio.* 49
1140. *Fanenses Libertati restituti.* 50
1143. *Bellum Patavinum secundum.* 51
1149. *Bellum in Rogerium Siciliae Regem pro Græcis.* 51
1150. *Cum finitimis navalis decertatio.* 53
1162. *Victoria de Ulrico Patriarcha Aquilejensi.* 53
1163. *Pugna cum Adriensibus. secunda.* 54
1170. *Bellum cum Græcis Imperatoribus secundum.* 55

1172. In Anconitanos expeditio prima.
59
1177. Bellum pro Alexandro III. Pon-
tifice in Federicum Anobarium
Imperatorem. 60
1187. Jaderæ quarta defectio. 63
1192. Bellum Syriacum quartum. 64
1193. Expeditio in Pisanos. 65
1202. Bellum Constantinopolitanum pri-
mum. Tergestum receptum. Ja-
deræ quinta defectio. Creta Ve-
neti juris facta. 66
1205. Expeditio in piratas prima. 70
1207. Rebellantium in Creta tumultus
sedati. Bellum cum Genuensibus
primum. 71
1215. Bellum Patavinum tertium. 77
1236. Bellum in Federicum II. Impera-
torem. 79
1238. Bellum Constantinopolitanum se-
cundum. 80
1240. Ferraria Romano Pontifici serua-
ta. 81
1242. Jaderæ sexta defectio. 82
1247. Compressus Alexii Calergii tu-
multus in Creta. 83
1256. Bellum in Actiolinum Tyran-
num. 84
1257. Bellum cum Genuensibus secun-
dum. 87
1259. Constantinopolis à Palæologis oc-
cupata. 89

1260. Bellum cum Genuensibus tertium. 91
1265. Civilis tumultus ob tributum. 94
1266. Bellum cum Genuensibus quartum. 95
1271. Pugna cum Bononiensibus. 96
1276. Justinopolis recepta. 98
1278. In Anconitanos expeditio secunda. 98
1289. Bellum Histricum cum Aquilejensibus primum. 100
1291. Res in Syria malè gesta. 101
1294. Bellum cum Genuensibus quintum. 103
1301. Expeditio in Græcum Imperatorem. 106
1302. Bochoniana in urbe conspiratio. 107
1304. Bellum Patavinum quartum. 108
1307. Bellum Ferrariense primum. 108
1310. Bajamontis Theupoli conjuratio. 110
1311. Jaderæ defectio septima. 112
1313. Expeditio in piratas secunda. 113
1328. Bellum Histricum II. cum Aquilejensibus. 114
1330. Compressæ in Creta seditiones. 115
1331. Expeditio in piratas tertia. 117
1332. Bellum Turcicum primum. 117

1337. *Bellum in Scaligeros Veronæ Principes. Tarvisium receptum.* 120
1342. *Cretensium defectio.* 125
1345. *Jadera defectio octava.* 126
1348. *Bellum Histricum tertium.* 127
1350. *Bellum cū Genuensibus sextum.* 128
1355. *Marini Falerii Principis conjuratio.* 134
1356. *Bellum Pannonicum secundum.* 136
1364. *Bellum Creticum in Colonos.* 138
1368. *Tergestinatorum defectio prima.* 142
1372. *Bellum Carrariense primum.* 144
1474. *Bellum Austriacum primum.* 147
1377. *Bellum cum Genuensibus septimum Clodianum.* 148
1381. *Tergestinatorum defectio secunda. Justinopolis iterum recepta.* 162
1382. *Bellum Carrariense secundum.* 165
1388. *Fœdus cum Mediolanensium Duce in Carrarienses.* 167
1397. *Bellum sociale in Galeatium Vitecomitem Mediolani Ducem.* 168
1401. *Bellum cum Genuensibus octavum.* 170
1403. *Bellum Carrariense tertium.* 171
1409. *Bellum cum Sigismundo Imperatore.* 175

1420. *Utinum cum Foro-julio receptum.*
177
1423. *Dalmatia recepta.* 178
1426. *Bellum Insubricum primum cum
Philippo Vicecomite Mediolaneu-
sium Duce.* 179
1430. *Expeditio in piratas quarta.*
184
1431. *Bellum Insubricum secundum.*
185
1432. *Bellum cum Genuensibus nonum.*
187
1433. *Bellum Valli Fellinæ illatum.* 189
1434. *Bellum Insubricum tertium.* 190
1443. *Expeditio in piratas quinta.* 196
1447. *Bellum Insubricum quartum.* 197
1448. *Bellum Neapolitanum primum.*
199
1450. *Bellum Insubricum quintum.* 201
1453. *Bellum Constantinopolitanum ter-
tium.* 205
1454. *Bellum Insubricum sextum.* 208

LIBRI TERTII.

1463. *Bellum Turcicum secundum.* 210
1464. *Tergestini debellati.* 213
1466. *Bellum Turcicum tertium.* 214
1469. *Ænum à Venetis captum. Chal-
cis à Turcis expugnata.* 217
1470. *Socialis expeditio in Turcas.* 220
1471. *Bellum in Cilicia.* 223

1472.

1472. *Bellum in Lycia.* 224
 1473. *Scodra, & Naupactus à Turcica obsidione liberata.* 225
 1475. *Croja à Turcis capta.* 227
 1476. *Turcicae irruptiones in Forum-julium.* 228
 1478. *Scodra Turcis tradita. Pax.* 230
 1483. *Bellum Ferrariense secundum, sociale cum Insubre, & Aragoniis in Venetos.* 233
 1486. *Bellum Rheticum Austriacum secundum.* 239
 1487. *Cyprus Veneto imperio adjecta.* 243
 1495. *Bellum Gallicum ad Tarum.* 246
 2496. *Bellum Pisanum cum Florentinis.* 250
 1500. *Bellum Turcicum quartum.* 253
 1503. *Bellum Faventinum.* 262
 1507. *Bellum Austriacum tertium.* 263
 1508. *Fædus Cameracense in Venetos.* 266
 1507. *Bellum cum fæderatis hostibus ad Caravagium.* 268
 Patavium receptum à Venetis, frustra à Confæderatis oppugnatur. 272
 Vincentia recepta. 278
 Bellum tertium Ferrariense. 279
 Promiscui bellorum successus. 281
 1510. *Fædus cum Julio II. Pontifice.* 286
 Irrita Verona oppugnatio. 287
 Bel-

Bellum quartum Ferrariense. 289

Bellum in Foro julio, & Histria. 292

Variae hinc inde hostium expeditiones. 294

1511. *Brixia recepta, mox amissa.* 297

1512. *Gallorum fuga ex Italia.* 300

Brixia Hispanis prodita. 303

Fœdus Venetorum cum Gallis. 304

1513. *Venetorum clades ad Creatium.* 307

1514. *Crema obsidione liberata.* 311

Marianum proditione amissum. 312

Bellum alterum in Foro-julio. 313

Rhodigium Hispanis ereptum. 316

Crema rursus servata. Bergomum recuperatum, repente deperditum. 318

1515. *Helvetii victi ad Marignanum.* 320

1516. *Brixia, Bergomum, Verona à Veneto receptæ.* 323

LIBRI QUARTI.

1527. *Bellum Insubricum septimum.* 329

1528. *Bellum Neapolitanum secundum.* 338

1530. *Bellum Insubricum octavum.* 340

1539. *Bellum Turcicum quintum.* 343

1542. *Receptum Marianum.* 356

798	
1546.	Uscoci primùm compressi . 357
1548.	Expeditio sexta in piratas . 358
1570.	Bellum Turcicum sextum Cyprium, Nicosia subacta . 361
1571.	Tamassus expugnata . 376
	Navalis de Turcis victoria ad Echinadas . 385
1572.	Varii cum Turca conflictus . Pax. 391
1576.	Uscoci denuò repressi . 396
1601.	Expeditio septima in piratas . 401
1605.	Interdictum Pontificium in Vene- tos . 403

LIBRI QUINTI.

1615.	Bellum Austriacum quartum . U- scoci deleti . 405
1617.	Hispanæ expeditiones terra , ma- rique coercitæ . 420
1618.	Gradiscia obsidione liberata . Pax. 429
	Conjuraciones in Rempublicam de- tectæ , & punitæ . 431
1622.	Vallis Tellinæ tumultus exorti, & compressi . 438
1628.	Mantuani belli origo . 450
1629.	Veneta auxilia Mantuæ à Germa- nis oppugnata . 455
1630.	Mantua Germanis prodita . 466
1638.	Octava in piratas expeditio . 473
	1641.

1641. *Belli Parmensis causæ.* 479
1642. *Barberina expeditio in Odoardum
 Parmæ Ducem.* 483
*Principum consociatio in Parmen-
 sis Ducis causa tuenda.* 486
*Bellum Sociale, Venetum, Etru-
 scum, Mutinense adversus Bar-
 berinos.* 489
*Ducis Odoardi ingressus in Roma-
 nas ditiones.* 491
*Varii armorum successus. Odoar-
 dus Bondenum, & Stellatam oc-
 cupat.* 495
*Multiplies Oppidorum aggressio-
 nes, & propugnationes.* 500
*Barberinæ militiæ irruptio in Po-
 licinium.* 508
*Marci Justiniani Veneti Imperato-
 ris expeditio. Inauspicatum Co-
 mitis Federici Mirolî facinus.* 515
Varia concertationes. 518
1644. *Pax inter fœderatos Principes,
 & Barberinos. Castrum Odoardo
 Duci restitutum.* 523

LIBRI SEXTI.

1645. *Bellum Turcicum septimum.* 529
Origo Cretici belli. 531
*Turcicæ classis expeditio in Cre-
 tam.*

- tam .. Oppugnata Cydoniæ dedi-
 tio .. 531
 Venetæ Classis. navigatio in Cre-
 tam .. 550
 1646. Joannes Capellius. classis Impera-
 tor. Thomæ Mauroceni gesta ..
 555
 Rithymna capta à Turcis. Arx
 deditione accepta .. Andrea Cor-
 nelii interitus .. 560
 1647. Thomas Maurocenus pugnat solus
 cum Turcica Classe .. Victor oc-
 cumbit .. 562
 Turcæ capiunt Novigradum ..
 Leonard. Fusculus Dalmatiæ Præ-
 fectus .. 566
 Xemonicum à Marco Antonio Pi-
 sano expugnatum .. Durachi nece,
 & Halyii captivitate .. 568
 Novigradum receptum .. 571
 Nedinum. captum cum Scardo-
 na .. 573
 Glades Messariæ in Cretam .. 577
 Sebenicum à Turcis frustra ten-
 tatum .. 579
 Oppida Dernisii, & Tininii ob-
 tenta .. 581
 1648. Clissa occupata à Venetis .. Turca-
 rum immanitas in Albanenses ..
 583
 Sorichii Morlachorum ductoris
 trucidatio .. 588

Antibarim Fusculus re infecta .
aggreditur . Rhizinium occupat .
 590

Varii rerum maritimarum even-
tus .

Joannis Baptistæ Grimani ad in-
sulam Tsyram naufragi mors .
 595

Aloysius Mocenicus Grimano nau-
frago suffectus . Candia oppugna-
tio . Hibraini Turcarum Regis
interfectio . 599

1649. *Gesta Constantinopoli adversus Ve-*
netum Legatum . 608

Navalis victoria de Turcis in
Phoceæ portu . 611

1650. *Candia iterum oppugnata .* 616
Maritima expeditio . Intercepta
Cydoniæ subsidia . 619

Castra Theodori, & Turluru re-
cepta, & diruta . 620

1651. *Venetæ Classis conflictus cum Tur-*
cica . 622

1652. *Duare oppidum in Dalmatia ca-*
ptum . 625

1653. *Navalis Classis successus Impera-*
tore Leonardo Fusculo . 627

1654. *Pugna cum Turcica classe infe-*
lix . 629

Irrita Tininii oppidi aggressio ,
Laurëtio Delphino Dalmatia Præ-
side . 632

Mor.

- Morlachorum irruptio in Turcas.*
Piratæ domiti. 635
Aloysii Mocenici altera in Turcas
expeditio. Ejusdem mors. 637
 1655. *Agina, & Vollus expugnata.*
Hieronimi Fuscarini obitus.
 639
Lazari Mocenici de Turcis victo-
ria. 642
 1656. *Multiplex in mari cum Turcis di-*
micatio. Laurentius Marcellus
pugnando interiit. 646
Tenedus, & Lemnus insulæ ca-
ptæ. Alexandri Borri, & Hora-
tii Parmensis Principis obitus.
 653
 1657. *Lazari Mocenici gesta cum Tur-*
cis, & interitus. 659
Tenedus, & Lemnus à Turcis
receptæ. 666
 1658. *Turciæ excursiones in Dalmatia*
compressæ. Ascrivium defensum.
Camilli Gonzagæ mors. 670
Respublica externis auxiliis adju-
ta. 673
Francisci Mauroceni in Cretam
expeditio. Maritima ejusdem fa-
cinora in Turcas. 675
Hieronimi Contareni pugna cum
Turcis. 679
 1659. *Castri, Ruzi, Toronis, & Chia-*
arcis expugnatio. 681

In Dalmatia repressi Turcici excursus . Dominicus Contarenius Dux . 683

1660. *Schiathon Castrum captum à Venetis . Clades accepta ad Cydoniam . Almerici Atestini Principis mors .* 684

1661. *Res à Maurocenis Francisco , & ejus successore Georgio gesta .* 689

1662. *Mari , terraque cum Turcis certatum .* 693

1663. *Successus varii in Dalmatia , & Creta .* 697

1664. *Intercepta subsidia , & plura Turcarum navigia .* 699

1665. *Primi Visiri Achmeti profectio in Cretam . Obitus Joannis Capellii , cujus , & Ballarini omnis de pace tractatus inanis .* 701

*Senatus Marchioni Villæ peditum Præfecturam decernit : hic lustrat Dalmatiâ Præsidi Catharino Cornelio . Intercipiuntur Turcici com-
meatus .* 708

Varie eventuum vicissitudines terrestres , ac maritimæ . 712

Turcæ Dalmatiam excurrunt . Ballarini obitus . Candiam terrent infortunia . Captivitas Ægyptii

gyptii Sangiachi Ramadami ..

717

1667.. Obsessæ Candiaë annus primus ..
Hieronymus Javarina Ballarino
subrogatus pestilentia in Turca-
rum castris absūmitur .. 722

1668.. Senatus Aloysium Molinum mit-
tit ad Turcas pacis Legatum ..
Annus obsessæ Candiaë secundus ..
732

Nocturna in mari pugna cum
Turcis .. Durachus Bejus victus
occiditur .. 736

Catharino Cornelio Classis admi-
nistrationem Senatus tradit .. Vil-
læ Candia discedentis vicem S.
Andreae Marchioni Mombruno
Gallo committit .. 740

Ducis Bassæ in mari pugna cum
Piratis Gallis; cum Vitali &
Lescasio .. Leonus navium Præse-
ctus contra decem Punicas à tri-
bus Venetis defenditur .. 741

1669.. Obsessæ Candiaë annus tertius ..
Pacem à Visiro cum Molino pan-
gendam disturbant auxiliares ac-
cessus .. Catharini Cornelii interi-
tus .. 747

Candiam accedunt Gallica auxi-
lia .. Erumpunt in Turcas tri-
pli eventu .. Ducis Belfortii
mors .. 757

Nul-

*Nulla navalium suppetiarum
utilitas. Novaleæ ab Creta di-
scessus. Mirandulani subsidii ex-
tenuatæ vires.*

760

Candiæ deditio. Pax.

772

F I N I S.





